

აკოლონ ნულაძე

ეთნოგრაფიული გურია

საბჭოთა საქართველო
1971

საქართველოს წყლის რეალიზაციის განხორციელებისათვის

ჩვენს სასოებას, გ-ნო ივანე!

საინჟინრო საქმის სიყვარულის გამო მეც კნინს შემინდვ ეგზომ კად-
ბ... მე შევეუდექი გურიის ცხოვრების ეთნოგრაფიულ მასალების
დარღვევას. გიგზავნით სანიმუშო პირველ წერილს — საშობო სამზადი-
ბა და შობა. გაახლებთ სამუშაო გეგმასაც და თავაზით გთხოვთ (სააქისო
ეს თუ იშოვით) გამაგებინოთ თქვენი აზრი — ჩემთვის საყვარელად.
შედეგის მეტად სასურველია ამ კილოზე განვაგრძო, თუ უფრო შშრალად.
ბოლოს დართული იქნება გურული სიტყვების განმარტება.

წლები თქვენდამი გულსავესე პატივისცემით აღსავესე

აბ. წ უ ლ ა ძ ი

მაისის 10. დედაქალაქი.

... არის აღნ ბნული. ი. ჯავახიშვილის პასუხის მიხედვით
რედ.

1927. 19.5

ტფილისი

ი. ჯავახიშვილის პასუხი

დიდად პატივცემულო, ბ-ნო აკოლონ!

დიდ ბოდიშს ვიხდი, რომ მოუცლელობის გამო აქამდის წერილი ვერ გამოგიგზავნეთ. თქვენი „ეთნოგრაფიული მასალები“, რომლის გამოგზავნისათვისაც მადლობას მოგახსენებთ, გადავიკითხე იმგვარადვე, როგორც თქვენი სამუშაო ვეგმაც ამ დარგისათვის.

წერილი კარგად არის დაწერილი, ადვილი წასაკითხია და შინაარსითაც საინტერესო. ძალიან კარგი ვინებებიან, რომ ასეთი მუშაობისათვის მივიყვიათ ხელი. სასურველია მხოლოდ ზოგი ადგილობრივი სიტყვების განმარტება, რადგან უამისოდ ეს ადგილი შეიძლება მკითხველისათვის გაუგებარი დარჩეს. მართალია, სულ ბოლოში თქვენ ასეთი სიტყვების ლექსიკონის დართვას აპირებთ, მაგრამ მანამდის რა ქნას მკითხველმა? შემდეგში ამ ადგილების ხელმოკრედ გადაკითხვა მოუხდება, რაც მკითხველსაც და მკვლევარსაც საქმეს გაუძნელებს. ამას გარდა, ზოგან სასურველია უფრო დაწერილებითი ცნობები იყოს. თქვენს საეთნოგრაფიო მუშაობის პროგრამაში კარგი იქნება ჩაურთოთ აგრეთვე ნათესაობისა და სქესობრივი დამოკიდებულების აღმნიშვნელი ტერმინები ადამიანთა და პირუტყვთა სამეფოში. ამ საკითხს პირველყოფილი კულტურის სურათის აღსადგენად დიდი მნიშვნელობა აქვს და, სანამ ძველებური მთლად გამჭრალი არ არის, უნდა შეგროვდეს და ჩაიწეროს. გთხოვთ აგრეთვე სამეურნეო მუშაობასა და იარაღებთან დაკავშირებული ყოველივე ტერმინები, სიტყვები და ვაჟ.

მოიქმები შეიტანოთ თქვენს წერილებში. სასურველია, მაგალითად, სხვადასხვა გუთნის, ურმის და სხვა სახელები სათითაოდ ჩაწერილი და განპარტებული იყოს და თითოეული იარაღის ყველა ნაწილის აღმნიშვნელი სიტყვებიც შეიტანოთ თქვენ აღწერილობაში. აუცილებლად საჭიროა საშუალო თესლების, მცენარეულობისა და ხეხილის ყოველგვარი ჯიშების სახელებიც ჩაწერილი იყოს. სახლის ნაწილებისა და აგებასთან დაკავშირებულს იმგვარადვე, როგორც სხვადასხვა ხელოსნობის ტერმინებს, მუშაობისა და საამქრო წესების აღნუსხვასაც რომ მიაქციოთ ყურადღება, ძალიან კარგი იქნება. მართალია, ეს თქვენ მუშაობას გაართულებს, მაგრამ ასეთი ფართო პროგრამით გაკეთებულ საქმეს უფრო მეტი ღირებულებაც ექნება მეცნიერებისა და მკითხველისათვისაც. მეცნიერული დაკვირვების ზედმიწევნულობისათვის საჭიროა ნიშანდობლივ აღნიშნული იყოს, თქვენი ცნობები გურიის რომელსაჲმე კუთხეს ახასიათებს ზოლმე აუ მთელს გურიაშიაც გავრცელებულია.

გისურვებთ ყოველგვარ გამარჯვებას ამ საკულისხმო დარგში მუშაობის დროს.

თქვენი პატივისმცემელი
ივ. ჯაგანოშვილი

ჩემს მკითხველს

რვა წლის ასაკიდან გატაცებით მიყვარდა ფუტკარი. თუ რამდენად შევძელ საქმით დამემტკიცებინა ეს სიყვარული, მე ამის შესახებ არას ვიტყვი... ფუტკარი დღესაც მიყვარს, მაგრამ მას სხვა მეტოქე გაუჩნდა — ჩვენი ხალხის შემოქმედება, მისი ადათ-ჩვეულება. ერთი სიტყვით, ის, რასაც ბერძნები ეთნოგრაფიას ეძახიან.

ხალხური უშრეტ-ულევი განძის სიყვარული ხალხის საყვარელმა მგოსანმა აკაკიმ ჩამაგონა — მისი შეკრების, ჩაწერისა და გამოქვეყნების სურვილიც მანვე აღმიძრა, მაგრამ საბჭოთა ხელისუფლების დამყარებამდე ჩემი ოცნება განუხორციელებელი დარჩა. დღეს ყოველგვარი დაბრკოლება გადალახულია — შრომა დაფასებული და განადღებულია, რადგან საბჭოთა მთავრობა ხალხურ შემოქმედებას, წარსულის შესწავლას დიდი მზრუნველობით ეპყრობა.

და მეც, ახალი დროით წაქეზებული მოხუცი, ახალგაზრდული გულმოდგინებით შევეუდექი სოფლის დაუშრეტელი წყაროს „დაშრეტას“ — მისი სილამაზისა და გენიალობის შეკრებას.

აკაკის კიკოლა თუ „ასი წლის მეტის“ იყო, მე ისეთ ხანა-

ში მომიწია ცხოვრება და იმდენ რამეს მოვესწარ, რომ მგონია, სამჯერ ასი წლისაც ვარ. „ვარ ბევრის მნახველი და მეტის კიდევ გამგონი“. ჩემი გულითადი სურვილია რაც შეთვით ვიცი ან, რაც ხალხშია დარჩენილი, ჩვენი ერთი კუთხის — გურიის — ძველი ყოფა-ცხოვრების დამახასიათებელი ზნე-ჩვეულება — ადათი, ცრუმორწმუნეობა, ხალხური ფოლკლორი — ყოველივე შევკრიბო და მომავალ თაობას დავუტოვო. ჭერ კიდევ ბევრი რამ მახსოვს ისეთი, რაც მომავლისათვის საჭირო და სასარგებლოა, თვით ხალხში კი ვინ მოთვლის რამდენი საუნჯე არის შემონახული, მაგრამ თუ დროზე არ შეიკრიბა, იკარგება, ძველ თაობას თან მიაქვს. მაგალითისათვის მოგახსენებთ: უბრალო უსწავლელი ხუცის „ივანე მღვდლის“ (შარაბიძე—ასკანელი) შეუდარებელი იუმორისტულ-სატირული შაირული ლექსები ბევრი ვეცადე, მაგრამ ველარ აღვადგინე, შვილიშვილებმაც აღარ იციან. რამდენიმე წლის შემდეგ იგივე ბედი ეწვევა ჩვენებურ ადათებს—ვერავენ გვეტყვის, თუ როგორ ეგებებოდნენ სხვადასხვა დღესასწაულს. ჩემი სურვილია ყოველივე ეს რაც კი ხალხურ შემოქმედებას ეხება, თუგინდ ის „უმართებულოც“ (უცენზურო) იყოს, შევაგროვო მშრალად, ვარიანტებით და მერვე აქედან დავამუშავო მოთხრობის სახით „საშობაო სამზადისი“ და „შობის“ მსგავსად.

ეთნოგრაფიულად საქართველოს არც ერთი კუთხე არ არის საფუძვლიანად შესწავლილი, მოგვეპოვება მხოლოდ ეთნოგრაფიული ეტიუდები (თუ შეიძლება ასე ითქვას), ისიც ზოგიერთი კუთხეების შესახებ, კერძოდ სვანეთსა და ხევსურეთზე. გურია, რომელიც, ჩემის აზრით, ძლიერ მდიდარია თავისი სხვადასხვა ჩვეულებით, ადათით, ცრუმორწმუნეობით

და სხვ., სრულიად დავიწყებულია. გურულების ეთნოგრაფიულად დახასიათებას ვერ ვხვდებით ვერც სიტყვაკაზმულ მწერლობაშიც. გურულების ცხოვრების ამსახველი ნიჰიერი მწერლები ნინოშვილი, ლალიონი და ჭოლა ლომთათიძე ამ მხრივ თავიანთ ნაწერებში თითქმის სულ არაფერს იძლევიან. ამ თვალსაზრისით საყურადღებოა გამოჩენილი და ნაყოფიერი მწერლის მიხეილ ჯავახიშვილის „თეთრი საყელო“, სადაც გადმოცემულია ხევსურეთის ეთნოგრაფიული ყოფა. აბა ერთი რომელიმე მოთხრობა დამისახელეთ მსგავსი გურულების ცხოვრებიდან. აწინდელმა მწერლებმა ძალიანაც რომ ეცადონ გურულების ცხოვრებიდან „თეთრი საყელოს“ მაგვარი დაწერონ, ვერ შეძლებენ, რადგან საამისო მასალას ვერ იპოვიან.

რაც ვიყავით, ის აღარ ვართ, რაცა ვართ, არც ის ვიქნებით. ჯერ კიდევ ჩემს მახსოვრობაში, ჩემს ბავშვობის ხანაში რამდენი ჩვეულება და ცრუმორწმუნეობა (თუგინდ ადათიც) იყო გურიაში, რომელსაც დღევანდელი ახალგაზრდა ვერც კი წარმოიდგენს... დავიხოცებით ჭადარა გურულები და ყოველივე ეს სრულს დავიწყებას მიეცემა.

მე განვიზრახე შევეუდგე იმის აღდგენას, რაც მახსოვს.

I. შრომის სიმღერები

გართობა, თამაშობა, სიმღერა, ლხინი, გალობა, დროს ტარება, შექცევა, სიამოვნება, სულისა და გულის დატკობა, სხეულისა და გონების ვარჯიში. მწუხარებისა და დუხჭირაკბოვრების შემამსუბუქებლად მანუგეშებელი რისიმე გამოსახვა — გურულისათვის ყველაფერი იყო. ყველგან, ყოველ დროს და ყოველგვარ პირობებში გურული ცდილობდა სიამოვნება ენახა და მით თავისი შრომა გაეადვილებინა, მწუხარება შეემსუბუქებინა. გურულმა იცოდა ყოველგვარი შრომის შესაფერი სიმღერა. სიმღერითვე ერთობოდა იგი ცხოვრებაში ყოველი ნაბიჯის გადადგმის დროს.

სტუმართმოყვარე გურული სტუმრის შესაქცევად, უცხო იქნებოდა ის თუ ნათესავ-მოყვარე, აუცილებლად მოიწვევდა მეზობლებს, მომლხენს, ჩონგურის დამკვრელს და დამლილინებელს, ენაწყლიან მოსაუბრეებს, კარგ თამადას, ვინც ასე არ მოიქცეოდა, „პურშავიაო“, იტყოდნენ მასზე. მასპინძელი თუ მხიარულობდა, სტუმარიც კმაყოფილი იყო და ისიც მხიარულობდა. ლხინიც მასპინძლის წასაქეზებელ, გასამხიარულებელი მოლხენით იწყებოდა:

ქასპინძელსა მხიარულსა
ჰყავს სტუმრები საყვარლები,
ღმერთო, ნურას ნუ მოუშლი,
რაც რომ ჰყავდეს საყვარლები.

ზამთარში კი მასპინძლის მაგიერ ბუხარს — ცეცხლს —
მიმართავდნენ.

გამხიარულდი, ბუხარო,
გულჩახვეული ნუ ხარო!

ეს იყო შესავალი. როცა თამადა აირჩეოდა და სმა დაი-
წყებოდა, მაშინ მომლხენნი ჩაარაკრაკებდნენ გაეროვნებულ
საეკლესიო სძლისპირს — „მონასიპს“:

ღღეს საღმრთო მადლმან
შეგვკრიბნა ჩვენ...

ან მეორე ამგვარსავე: „მოვედით და ვსვათ სასმელი ახალი“.

გურული მღეროდა ყველგან — შრომის დროს, გზაში,
ომში, მინდორში და, საერთოდ, ბუნების ვრცელ წიაღში. სიმ-
ღერა, მოლხენა, გალობა მას ისე შეესისხლხორცა, იმდენად
გადაექცა მოთხოვნილებად, რომ გლოვის დროსაც კი ერ-
იობოდა და ნუგეშობდა გლოვა-ტირილის შესაფერი გალო-
ბით — ზარით.

გ ა ლ ო ბ ა

გალობა სულის საოხი, სულის „საცხონებელი“ იყო და
არა ხორციელი სიამოვნება-დატკბობა. დროთა ვითარებაში
გალობამ სულიერ-საიქიო მნიშვნელობა ნაწილობრივ დაკარ-

გა და ხორციელი სიამოვნების სახე მიიღო. იმ ეკლესიაში, სა-
ცა კარგი მგალობლები იყვნენ, ბევრი გალობის მოსასმენად
უფრო მიდიოდა, ვიდრე სალოცავად... 1890 წლიდან, როცა
გათვითცნობიერებულმა ხალხმა ხუცესსა და ეკლესიას ზურ-
გი აქცია, ხუცეები მლოცავთა მოზიდვას გალობით ლამობდნენ,
მგალობლები დაიჭირავეს და ამით ლოცვა-მორწმუნენი თუ
ვერ მიიმატეს, თვალის ასახვევ ეფექტს მაინც მიაღწიეს —
ეკლესია გალობის მოყვარული ხალხით ივსებოდა.

ზოგიერთი გალობა, მართლაც, ისე საამო მოსასმენი იყო,
რომ ხელოვანი მუსიკოსის ნაწარმოებს თუ არ აჯობებდა, არც
კი ჩამოუვარდებოდა. ამიტომაც, ალბათ, რომ ასეთნაირმა გა-
ლობამ ხალხური სახე მიიღო. ლხინისა და დროს ტარების
დროს გალობდნენ და პირჯვრის წერის მაგიერ სავსე ჭიქას ან
ყანწს ცლიდნენ. კარგი გალობა იყო მადის აღმძვრელი, სახა-
ლისო და გასართობი, დროსა და გარემოებას შეგუებული და
მათი დამამშვენებელი. მაგალითად, ჯვრისწერის დროს, რო-
ცა ნეფე-დედოფალს გვირგვინით თავზე, ხუცესი ანალო-
გიის გარშემო ჩამოატარებდა, მგალობლები გალობდნენ:
„ისაია მხიარულ იყავ, ქალწულმან მიუდგა და შვა ძე ემა-
ნუილ“... სიტყვები და, მეტადრე გალობის კილო, იყო ვნების
აღმძვრელი — სიცოცხლის, სიამოვნებისა და გამრავლების
ხალისიანი ჰიმნი. სულ სხვა იყო წესის (ანდერძის) აგების —
ცხედრის უკანასკნელი გამოთხოვების — „სულთითანა განუ-
სვენე“... მსმენელს სევდა ეუფლებოდა, საგალობელი „წუთი-
სოფლის სტუმრობის“ ხანმოკლეობას აგრძნობინებდა და
თვალს ცრემლით უვსებდა.

მიცვალებულის დამარხვის დღეს ტრაპეზი (პურის ჭამა)
ქორწილს არ ჩამოუვარდებოდა, მეტადრე თუ მიცვალებულს

პატივისმცემელი ჭირისუფალი რჩებოდა. ყველა ჭიქას შესაფერისი გალობა მოჰყვებოდა. მრავალჯამიერის მაგიერ „საუკუნოთ იყოს ხსენება მისი!“... სამჯერ გალობით იტყოდნენ: არ დაითვრებოდნენ, მაგრამ კარგა ლამაზად შეჭიკჭიკდებოდნენ.

გალობა ხალხს ძალიან უყვარდა. ზოგჯერ ყველა ეკლესიას თავისი მგალობელი (სამი კაცი სჭირდებოდა) არ ჰყავდა და ეკლესიის დღეობაზე მას მეორე სოფლიდან საგანგებოდ იწვევდნენ. ისეთი ეკლესიაც იყო, საცა გალობა ორპირად ითქმოდა. გალობის მცოდნეთა უმეტესობას თავადაზნაურები და მღვდლის ოჯახის წევრები შეადგენდნენ. გალობის შესწავლას, გარდა ბუნებრივი ნიჭისა, წერა-კითხვის ცოდნა, დიდი დრო და მოცალეობა სჭირდებოდა. ყველა ამისათვის კი მაშინდელ გლეხს არ ეცალა, ამიტომ მგალობელი გლეხი იშვიათი იყო, და თუ იყო, მას გააზატებულს, ნახევრად აზნაურს ეძახდნენ, სხვებთან შედარებით იგი უკეთეს პირობებში იმყოფებოდა.

გალობის (ზარის) მასწავლებელს გასამრჯელო ეძლეოდა. ზოგიერთ თავადს ეზოში საკუთარი კარის ეკლესია ჰქონდა და კარის მღვდელი ჰყავდა, მგალობლები კი თვით თავადები (ზოგჯერ ქალებიც) იყვნენ. ეს თავადები შერჩეულ ახალგაზრდებს გალობას ასწავლიდნენ — სამაგიეროდ, სწავლის გათავებამდე 6—12 თვეს ხელზე იმსახურებდნენ.

საქართველოს სხვადასხვა კუთხესთან შედარებით გალობა ყველაზე მეტად გურიაში გავრცელდა ბევრი პროფესიონალი მგალობელი იყო, მის საარსებო წყაროს გალობის სწავლება შეადგენდა. უმეტესობა იმერეთსა და სამეგრელოში მიდიოდა და იქ ასწავლიდა. ზოგიერთისათვის გალობა ყველა-

ფერი იყო. გურიაში ანეკდოტიც კი შეთხზეს ერთ-ერთ ცნობილ მაგალობელ მაქსიმე წეროძეზე, ერთხელ თურმე მაქსიმე სასამართლოში დაუბარებიათ მოწმედ. მოსამართლე ეკითხება:

— მაქსიმე, შენ რას იტყვი?

— შენ თუ დაიწყებ, მე ბანს გეტყვი! — უპასუხნია მაქსიმეს.

მაგალობელი, მოზარე და მომლხენი უნდა ყოფილიყო, ზრდილი, დარბაისელი, კარგი სიტყვა-პასუხის, კარგად ჩაცმულ-დახურული, ნაზად მკამელი, ღვინო „სამწყურვალთ“ უნდა დაეღია, არ უნდა დამთვრალიყო. სუფრაზე ეძლეოდა უპირატესობა — რჩეულ ადგილას ჯდებოდა, ალავერდს არ ეტყოდნენ და ღვინოს თავის ნება-სურვილზე მიართმევდნენ.

კარგ მაგალობელს, თუ იგი ამავე დროს მასწავლებელიც იყო, დიდად აფასებდნენ. ყველას უყვარდა, პატივს სცემდა და, საერთოდ, საზოგადო მოღვაწედ თვლიდნენ.

1932 წელს გარდაიცვალნენ ცნობილი მაგალობელ-მომლხენ-მომღერალნი (ჩონგურზე დამკვრელებიც): ნესტორ კონტრიძე, სამოელ ჩავლეშვილი (მთავრობამ იუბილე გადაუხადა რუსთაველის სახელობის თეატრში) და გიორგი ბაბილოძე. გარდაცვალების გამო საერთო მწუხარება-დანაკლისი მათმა მოწაფემ, ახალგაზრდა მომღერალ-მასწავლებელმა არტემ ერქომაიშვილმა საკუთარი ლექსით გამოხატა და ეს ლექსი სიმღერად აქცია.

ამ გალობისებურ სიმღერას დღეს ხალხით მღერიან გურიაში.

დაეკარგეთ სამი მომღზენი,
 მსმენელთა დამატკობელი,
 გურიის ღვიძლი შვილება,
 ჩაგრულთა გამართობელი,
 პირველ ხმაში ჩავლესვილი,
 კაკანებდა ვით ბულბული,
 წვრილს ეტყოდა ბაბილოძე,
 სხვაფრივ ენა მოქარგული,
 ბანს კონტრიძე შესძახებდა,
 დასტკებბოდა სული, გული,
 სიხარულით აგავსებდა
 სამივეს ხმა ერთად თქმული.
 სამოელ, გიორგი, ნესტორ
 არ არს ჩვენთვის დაკარგული,
 ხშირათ ვტკებებით სიმღერებით,
 მათი ენით წარმოთქმული.
 ისტორიაც არ ივიწყებს
 მიზნათა აქვს დასახული,
 რომ გადასცეს მომავალ ერს
 მათი ქება, ხალხის თქმული.

ლილინი

ლილინი ერთპიროვნული იყო. ლილინებდნენ საკრავზე —
 ჩონგურზე ან ჭიანჭურზე, ან მარტოდ — მუშაობის ან მგზავ-
 რობის დროს. „ვეფხისტყაოსანს“ და „დავითიანს“ ლილინით
 კითხულობდნენ. ჩონგურის დამკვრელს არასოდეს არ სთხო-
 ვდნენ დაამღერეო, ეტყოდნენ, დაალილინეო. დამლილინებელს
 ღიდად აფასებდნენ: „ერთ ქალათ მარტუაი იგი ღირს, ის რომ
 ჩონგურზე დაალილინებსო“, „მისი დალილინება მკვდარს გ-
 აცოცხლებსო“.

კრიმანჭული ან კირკანტული სიმღერის ერთი წამყვანი ხმაა, მაგრამ როგორც დილინი, ისე კრიმანჭულიც ზოგჯერ ერთპიროვნულია. მარტოდ დარჩენილი ახალგაზრდა კრიმანჭულობდა ტყეში, ყანაში და გზაში. კრიმანჭულს იწვევდა მარტოობა ან შიში. კრიმანჭულობდა — შიში უქრებოდა, არ მოიწყენდა, არ ჩამოეძინებოდა. კრიმანჭული უფრო ხშირად ჭაბუკების საქმე იყო. ღამით მოზარდს საღმე წასვლას რომ დაავალებდნენ, ეტყოდნენ: „წეიკრიმანჭულე და ისე წადიო“. კრიმანჭულობდა ძროხისა და თხის მწყემსი ახალგაზრდა, თუ მას მოპირდაპირე მხრიდან მეორე ტოლი გამოეკრიმანჭულებოდა, ეს მოგაგონებდა ორი მწყემსის სონარით ან სალამურით შეჯიბრებას. კრიმანჭული დიდად სასიამოვნო მოსასმენი იყო, მეტადრე მყუდრო მთვარიან ღამეში. ზოგჯერ კრიმანჭული შეყვარებულთა საპაემანო ნიშანიც კი იყო.

ხ ი მ ლ ე რ ა

გურული სიმღერა, რომელიც შეგუებული, შეხამებული, მისადაგებული, შეხმატკბილებული იყო შრომა-გარჯილობასთან, აადვილებდა, არაქაფებდა და მეტ ნაყოფიერ-ბარაქიანს ხდიდა შრომას, აძლევდა მას შინაარსსა და ხალისს. ზარმაცს აბეჯითებდა, ლაჩარს ამხნევებდა, დაღლილს ძალ-ღონეს მატებდა, ხორციელად ამხნევებდა, სულიერად აკეთილშობილებდა.

სიმღერას სწავლობდნენ ყურის დაგდებით ბუნებაში მოქმედების დროს. საყურადღებოა ის გარემოება, რომ სიმღერა

გლებობის კუთვნილება იყო და არა „ბრწყინვალე“ წოდებისა. გალობა და მოღბენა კი თავად-აზნაურობის საქმე გახლდათ და ძალიან ბევრი იშვიათი მგალობელ-მომღბენის ჩამოთვლა შეიძლებოდა მათი წრიდან. სამაგიეროდ, ვერავინ დაასახელებს ამ ცნობილ, და, მართლაც, ხელოვან მგალობელ-მომღბენებიდან ვინმე ყოფილიყო კარგი მომღერალი.

თავადი დათა გუგუნავა, გურიის გარეთაც ცნობილი, სხელგანთქმული მგალობელი-მომღბენი და ცნობილი მასწავლებელი, ერთ თავის ლექსში თავის თავს „ლხინის დედას“ უწოდებს. მისი — ყოფილი მოწაფეები ადასტურებენ, რომ სიმღერა ამ თავადს, სხვებთან შედარებით, არ სცოდნია და, ეს არც გასაკვირია, რადგან სიმღერა უმთავრესად თან სდევს შრომა-გარჯილობას, რასაც ეს წოდება თავიდანვე არ მისდევდა.

უანური, ანუ ნადური

ყველა სიმღერაზე მეტად რთული, ძველი და ამავე დროს საყვარელი იყო ყანური, ანუ ნადური. სიმღერა ორპირი იყო და რვა კაცი სჭირდებოდა: ორი დამწყები (მთქმელი), ორი გამყივანი (გადამძახებელი) და ორ-ორი ბანი (შემხმობი). მღეროდნენ ყანის თოხნისა (დათესვის) და მარგვლის (გაბარვის) დროს, ამიტომ დაერქვა მას ყანური, და რადგან იგი უნადოდ არ ითქმის, ამიტომ ნადურსაც ეძახიან. დამტკიცებულია, რომ ნადური სიმღერით ნადი ორჯერ მეტად ხალისით და დაუღალავად მუშაობს, ვიდრე უსიმღეროდ. სიმღერა იწყება მეტათ ნელი ტემპით, თანდათან მუხლიდან მუხლზე გადადის, მუხლი მოკლდება და ტემპიც მის შესაფერად ვითარდება.

ცხოველდება, და (სიმღერის დაწყებიდან 20—30 წუთის შემდეგ) როცა ის ი-ო, ი-ო, ი-ო, ი-ო-ზე გადადის, თოხის დარტყმაც სიმღერას ყვება. ამასთან იმდენად სწრაფად, რომ თოხს თვალს ძლივს მოჰკრავ. თოხებს სიმღერის ტემპს აყოლებენ, როგორც მომღერლები, ისე არამომღერლებიც. აქ სრული ჰარმონიაა, თუ ვინმემ სიმღერას თოხი არ ააყოლა, ან გაუსწრო, ან ჩამორჩა, ის სიმღერას ისევე არღვევს, როგორც ცეკვის დროს უადგილოდ და ურიგოდ ტაშის დამცვრელი. ყველამ უნდა დაიცვას ტაქტი, დამრღვევს ცალკე ნაპირს (სვრელს) მიუჩინენ — თავის რიგში არ გაირევენ. თოხების დარტყმა და სიმღერა რიტმული უხდა იყოს.

ყანური სიმღერა არსებითად თითქმის ყველა ერთნაირია, მაგრამ სხვადასხვა კუთხის ყანურს შორის განსხვავება მაინც საგრძნობია. განსაკუთრებით საქებია: საჯაოხურაი, ქობულეთურაი, გურიანთულაი და შემოქმედურაი. თითოეული მათგანი თავის კუთხური ხასიათ-ტემპერამენტით გამოირჩევა. საჯაოხურაი უფრო დინჯია, დარბაისლური, მოზომილი; გურიანთულაი — სწრაფი, აფეთქებული, ცოფი, შლეგი, იერიშის მიმტანი; ქობულეთურაი გურიანთულას ენათესავება, მაგრამ უფრო მხედრულია: შემოქმედურას ახასიათებს მეტი სიტკბო და მოქნილობა.

ხელოვანმა მომღერალმა, 89 წლის მოხუცმა ივლიანე კეკეყმაძემ (კვირიკეთის მცხოვრებმა) გადმომცა: „შემოქმედურაის მთქმელი იყო შემოქმედელი გლეხი გიორგი ლომჯარია. ასი კაცი რომ ვყოფილიყავით უგიორგისოთ შემოქმედურაის ვერ ვიტყოდით. გიორგი ამ სიმღერის უზომოთ მოყვარული იყო — ორი ჯოხით რომ დადიოდა, მაშინაც კი ჩაგვიდგებოდა ნაპირში და მღეროდა. ერთხელ, როცა გიორგი უკვე ღრმა

მოხუცი იყო და კვირიკეთიდან მის მეზობელს ნადი მიჰგვარეს. ნაშუადღევს ერთმა მომღერალმა თქვა — მოდი გიორგის პატივსაცემათ მისი საყვარელი შემოქმედურაი ვთქვათო. გიორგის ნადურის ხმა რომ შემოესმა, სახეგაბრწყინებული ჩვენთან მოვიდა, ჯოხები გადააგდო, თოხს ხელი მოკიდა და შემოსძახა: ჰო, ჰო, ჰოო. ბიჭებო, გენაცვალეთ ყიაში, აწი, თუ მოკვდები რა მიჭირსო“.

თვით ყანურ სიმღერაშიაცაა განსხვავებაც. ყანური არის დილის, ანუ ხელმოსაკრავი (მუშაობის დაწყების); სადილობის ან შუადღის (ზოგან „წეროდის“ ეძახდნენ); ზარმლობის (სამხრის, ზარმლობის ყანურს აღმოსავლეთ გურიაში „შექცეულას“ ეძახიან) და ყანის სამუშაოს გათავების. ყანურის ეს სიმღერები მოკლედ ითქმოდნენ მთლიან ყანურში ჩართვით.

— თუ რომელი დროის ყანურს მღეროდნენ, ამას მოთაღრეები (მოსაზღვრეები) და შორიდან მსმენელებიც კი არჩევდნენ და იტყოდნენ: ნადი ზარმლობისას მღერის — ზარმელს ითხოვსო. ამრიგად, ყანური სიმღერა დროს საზომიც იყო. ნადის „წეროდია“ იქნებოდა სწორედ იმ დროსო — იტყოდნენ. თუ ყანის მთელ სამუშაოს მორჩებოდნენ, მაშინ ყანურ სიმღერას დამამთავრებელ მეორე სიმღერას — „ელესას“ გადააბამდნენ. ელესას ბოლო გვაგონებს სამხედრო იერიშს. გმირული, მამაცური შეტევის მარშია და გამარჯვების ყიყინით მთავრდება.

ყანური სიმღერა რთულია და მისი კარგი შემსრულებელიც იშვიათად მოიპოვებოდა, ამიტომ კარგ მომღერალს მოწონება-დაფასება ჰქონდა, მომღერლის ერთ დღეს მოხმარება ორ დღედ ღირდა. ხშირად შეხვედებოდით ისეთ გლეხს, რომელიც სხვათაგან სიმღერაში მოეხმარებოდა და ვერც ლხინში, მა-

გრამ მარტო ყანურის მთქმელი ან გამყივანი, ან ბანი იყო.

მაგალითად, ასკანელი გლეხი ლომინ ნაცვალაძე, საეროდ, არ მღეროდა, მაგრამ ნადურის იშვიათ შემსრულებლად ითვლებოდა. იგი საბჭოთა ხელისუფლებას მოესწრო, ასკანაში კლუბის საზეიმო გახსნის დროს იმღერა თავისი საყვარელი ნადური; და როცა რამდენიმე ხნის შემდეგ გარდაიცვალა, ზარის ნაცვლად ნადური უმღერეს, და მით დიდი პატივი სცეს.

ისეთებიც იყვნენ, რომლებმაც სიმღერა, მოლხენა, გალობა კარგად იცოდნენ. როგორცაა, მაგალითად, ასკანის მცხოვრები ანტონ ჩხაიძე. კანკათელ გლეხებს პავლე და ისიდორე ჩიჩუებს და საბა გოგუაძეს — ამ, მართლაც, იშვიათ ტრიოს — მთელ გურიაში იცნობდნენ.

ნადური სიმღერა ძველია, ისტორიულია, ის წარმოშობილია ბატონყმობის დროს ყმა გლეხებში, მასში ცხადად ჩანს ბატონების წინააღმდეგ შეთქმულება — ჯანყი, შეტევა, იერიში და გამარჯვება — ბატონების განადგურება და მათი „მოთხრა“.

სიმღერას იწყებდა ერთი მთქმელი დაბალი ხმით, გაუბედავად, წუწუნით, არ მოსწონდა თავისი ვაგლახი ცხოვრება, უჩიოდა მას. სწორედ იმ ლექსებს, სიმღერის ტექსტებს, რაც ი ყანურში იყო, საჩივარს ეძახდნენ. არც ერთ გურულ სიმღერას არა აქვს იმდენი ტექსტი, რამდენიც ნადურს — ძალაღან ჩშირად მთელი სიმღერა ერთი ან ორი საჩივრით თავდებოდა. ხშირად გაიგონებდით დღეს ნადურზე 20—25 საჩივარი ითქვაო. ამ საჩივარ-ლექსებში, აშკარად ჩანს გლეხთა მაშინ-ლი ყოფა-ცხოვრება და უუფლებობა.

ერთ მთქმელს — მომჩივანს — მეორე მის ბელშივე მყო-

ღი აჰყვებოდა, გამოეხმაურებოდა, პირველის საჩივარს კვერს დაუკრავდა და იმეორებდა.

ამ ორ მომჩივანს შეუერთდებოდა გამყივანი, ანუ გადაძახებელი და მაღალი ომასიანი ხმით უყიოდა, უძახდა, უხმობდა სხვებს, მოუწოდებდა ამხანაგებს. სხვებიც, ტანჯულები არ აჰოვნებდნენ და უერთდებოდნენ, „ებანებოდნენ“ — ბანს ეუბნებოდნენ. — ბანი მარტო სიმღერის კილო როდია, იგი ნიშნავს თანხმობას, აყოლას, აზრის გაზიარებას, ხშირად იტყვიან: ბანი დამაწია, „მომებანა“, ბანი მითხრა, ბანი დამძინა. ბანს შემხმობსაც ეძახიან, შემხმობი ნიშნავს შემხმელებს — ცეცხლში ხველი საწვავის შემკეთებელს. ცეცხლის ამაგიზგიზებელს, და მაღალადურებელს¹ (ამაპრიალებელს). ამრიგად, შემხმობი — ბანი — ცეცხლს აგიზგიზებს, ყმებს აჯანყებისა და ბრძოლისაკენ მოუწოდებს.

მთქმელი მოთავეა, ორგანიზატორი — დამწყები. გამყივანი — გადაძახებელი — საყვირია, განგაშის ამტეხი, შემკრები აგიტატორი. გამყივანის ხმა მკვეთრია — შორს მიდის, ამღერებული ყიყინაა. ბანი კი მასაა და გამარჯვებაც ამ მასაზე არის დამოკიდებული. სიმღერაც სწორედ ბანზე არის დამყარებული, ბანი თუ ძლიერია და სწორი, სიმღერაც გამართული იქნება. ძველი და დახელოვნებული მომღერლების გადმოცემით, თუ სიმღერას სხვები (მთქმელი და გამყივანი) გაამრუდებდნენ, ბანს უნდა გამოეხსოვებინა — კარგი ბანი სიმღერის ბურჯი ყოფილა.

¹ კასბანებზე იტყოდნენ — დალაღადურაო, გოდრით დადგაო, კაი-„შემხახუებელნი“ ჰყავდაო. შეხახუება ონვარი მტაცებელი ფრინველის დაფრთხობაა.

ნადურის თავისებურება ის არის, რომ მხოლოდ და მხოლოდ მარტო ამ სიმღერას ჰყავს გამყივანი-გადამძახებელი. გამყივანი და კრიმანკული სულ სხვადასხვა ხმაა, მათ შორის დიდი ზღვარია.

სიმღერის ტექსტი — ლექსი საჩივრის სახელით მხოლოდ ყანურშია. არც ერთ სიმღერაში ლექსი ისე მნიშვნელოვანი არ არის, როგორც ყანურში. ლექსი აქ ძარღვთაგანია.

დაწყების პირველ „კანში“ სიმღერა უიმედოა, მომღერალთა სახეც ნაღვლიანია, მეორე, „კანის“ სიმღერაში გაცხოველებული კამათია — ბკობა-თათბირი, ცოკმანი. მომღერლებს თანდათან ეტყობათ გამოცოცხლება, ხალისი და გამარჯვების იმედი. მესამე „კანში“ როგორც ყველა მომღერალი, ისე არა-მომღერალი, ამაყი, შეუპოვარი ხდება, ხოლო თვით სიმღერა შეტევა-იერიშზე გადადის.

სიმღერის პირველსა და მეორე მუხლში ბანების ხმა ისე ძლიერი, ჩქარი და შემტევი არ იყო, როგორც ახლა: ჰიო... ჰიო, ჰიო... ჰიო. გარდა ამისა, სიმღერის ამ სტადიაში დიდად საყურადღებოა მომღერალ-მომღეუშავეთა წყობა-დარაზმულობა. ახლა მათი დარაზმულობა ციხის ამღებთა მხედრულ-სტრატეგიული წყობისაა. მხედრული დისციპლინის დაცვით. წყობას წინ უძღვიან მოთავენი. შეთქმულების მომწყობნი, მათ მოჰყევიან ბანები, მუშები, თანამგრძობნი და თანამებრძოლნი.

I

- 1 მთქმელი
- 2 გამყივანი
- 3 ბანები

II

- 1 მთქმელი
- 2 გამყივანი
- 3 ბანები

ჩამყოლი ბანები და სხვა მუშები. თუ მომღეუშავე გლებები ან მგზავრები გაიგონებდნენ ახლო ადგილიდან სიმღერას, თით-

ერთ დროს ეს ქალა თავად შალიკაშვილისა ყოფილა, ერთხელ შალიკაშვილს საჭილოელ აზნაურ კორძაიასათვის ნადი შეუტყვეთია და მასაც იმდენი ნადი მოუყვანია, რომ მთელი ქალა ერთ სვრელად გაუტანია. ამის შემდეგ დარქმევია ამ ქალას კორძაიას სვრელი.

ეს ძველი ამბავია, ამაზე უფრო ახალს მოგახსენებთ, რომლის მონაწილენიც დღესაც მღერიან ნადურს.

მაისაა. კვირა დღე. წირვა გამოსულია, ბახვის ეკლესიას გალავანში ხალხი ჭგუფ-ჭგუფად მუსაიფობს. გალავანთან ცხენი მოაგდო დვაბზუელმა აზნაურმა ზურაბ დათუნაიშვილმა და იკითხა აზნაური მელქის მახარაძე თუ ბრძანდება აქო... გალავნის შიგნიდან მელქისი გამოეხმაურა — აქ გახლავარო.

— აბა, მელქის, ხვალ თუ შეგიძლია ნადი მომგვარე.

— დიდი სიამოვნებით, რამდენი გნებავს?

— რვა ქცევა ყანა მაქვს გასამარგლი ტალაკვანში, შენ სად შეგიძლია იმდენი მომგვარო, მარა, რამდენიც შეძლო იმდენი მომიყვანე.

— მოგიყვან, მარა სირცხვილი არ მაჭამო.

— ზურაბ დათუნაიშვილს როდის უჭამია სირცხვილი — ახლა რომ ვამოს... მოაბრუნა ცხენი და წავიდა.

მელქის მახარაძე გავლენიანი აზნაური იყო. მისი უფროსი ძმა პავლეც დიდი თავმომწონე გახლდათ. ითათბირეს და სადილის შემდეგ ორივემ ცხენით ჩამოიარეს მახლობელი სოფლები და სოფლის თავკაცებს ზოგს 50, ზოგს 60 კაცის მოყვანა დაავალეს.

მეორე დღეს, დილით პირველი წყება ასი კაცი მიადგა დათუნაიშვილს სიმღერით. ზურაბმა ისინი ასაუზმა და სამუშაოზე წაუძღვა. ეზოს ორი კილომეტრით არც კი იქნებოდა და-

შორებული მეორე ასეულის სიმღერა რომ შემოესმა... ყანაში რომ ჩავიდა (ეზოდან 8 კილომეტრზე) მესამე ასეულიც მიემატა, ცხენზე მჯდომი მეთაური აზნაურითურთ. ზურაბს არ სწყენია, თავის სოფლის აზნაურები და შინაური გლეხები აფრინა იქით-აქეთ, ბაზარში თუ ოჯახებში. ჩინებულად ასაეზმა და სადილადაც ხუთი საკლავი დაკლა. გაჩაღდა მუშაობა და სიმღერა. ზურაბის რვა ქცევას სხვისი რვა ქცევაც მიუმატეს.

ცხადია, „ნაუცფათევ“ სადილზე თუ ხუთი ძროხა დაიკლა. ვახშამს უფრო მეტი დასჭირდებოდა: ძროხებს ინდაურებიც წააკლეს და ჭურებიც დაცალეს.

ნადს, საუზმესა და ადრეულ სადილს იქვე ყანაში ხიჩ ჩეროს ქვეშ მიართმევდნენ. ზოგან ასეთი ხე განგებ იყო შერჩეული, ზოგან კი გაკაფვის დროს დატოვებდნენ და მას სასადილო ხეს ეძახდნენ.

სუფრის მაგივრობას სწევდა რცხილის, კოპიტის ან წაბლის ფოთლოვანი შტოები, უწყენო საჭმელსაც მასზე აწყობდნენ. ზარმელსაც აქვე მიირთმევდნენ. ზარმელი თუ შეიგვიანებდა, მაშინ სიმღერას ჩამოარაკრავებდნენ:

„ხარი დაუკალ კაბელაო,
სად ხარ, ჩემო ზარმელაო“

ყანაში „გასუფრაება“ — ხანგრძლივი ჯდომა და შექცევა — არ იცოდნენ, არც სადღეგრძელოები ითქმოდა, რამდენიმე ჭიქას დალევდნენ, ერთიმეორესთან გამარჯობა-გაგიმარჯოს გადავიდოდნენ, შიმშილს მოიკლავდნენ და მუშაობას განაგრძობდნენ. სუფრიდან პირველად ხელისმომკრავი წამოდგებოდა, შემდეგ მონაპირეები და გარბოდნენ ნაპირისაკენ,

მათ სხვებიც მისდევდნენ. პირველი თოხი ხელისმომკრავს უნდა დაეკრა, იგი მუშაობის ბელადი იყო. თუ სამუშაო გათავდებოდა, მას ზევით შეისვრიდნენ, თუ არ გათავდებოდა, თავდაღმა დაჰკიდებდნენ. სამაგიეროდ, ვახშამი ხანგრძლივი, მრავალფეროვანი იცოდნენ. ეზოში სიმღერით მისულ ნაღს თოხით ხის მოთხრის შემდეგ, ზოგს ხელს კი არა, ფეხსაც დააბანინებდნენ. სუფრაზე თამადას ირჩევდნენ და სმაც შეჭიბრებით იწყებოდა, მაგრამ უზომოდ არ თვრებოდნენ. მეორე დღეს კიდევ უნდა ვარგებულიყვნენ კაცად.

გურულის თქმისა არ იყოს, „რადგან ხარჯი ნაქნარი იყო“, ნადის ვახშამს გურული ზოგჯერ შეუფარდებდა — „გამოათანიებდა“ — სხვა რამესაც: ნათლობას, ახალმოყვანილის დაპატიჟებას, ან ვინმეს უცხო და სასიამოვნო სტუმრის მოწვევას.

როგორც მუშაობა, ისე სიმღერა კოლექტიური გახლდათ. ამას ისიც ამტკიცებს, რომ სოფელში თუ ყანაში მუშაობის დროს მუშა კაცი ავად გახდებოდა, კვირას ეკლესიაში მოითათბირებდნენ, დანიშნავდნენ დღეს და ავადმყოფის ყანას ნაღურით დაამუშავებდნენ.

რეაქციის ხანაში პოლიტიკური გადასახლებულის (ან პოლიტიკურ ნიადაგზე მოკლულის), იმპერიალისტური ომის დროს სათადარიგო ჯარისკაცის ყანასაც ასევე კოლექტიურად ამუშავებდნენ, ზოგჯერ (სამივე შემთხვევაში) გამასპინძლებას ყანის პატრონს არ ავალებდნენ, თავიანთი ხარჯით მუშაობდნენ. ისეთი შემთხვევაც ყოფილა, რომ პატრონს ყანის დამუშავება მეორე-მესამე დღეს გაუგია.



გურილი შეძლებული გლეხი

ნადურის საჩივარი

1.

ქალი ვიყავ აზნაური
გლების შვილმა მითხუაო,
ჩემი ნებით არ მივეყვები
ძალით თუ არ მომიტაცა.
მომიტაცა, წამიყვანა
ცხრაი მთაი ზურგით მზილა
მეათეზე დამსვა ზედა.
გლების შვილი ეუბნება:
ქალო, ასე დამიფიცე
შენსა, ჩემსა ჩახოვნასა
არაფერი არ გერჩიოს.
ქალი ასე უფიცებდა:
შენსა, ჩემსა ჩახოვნასა
რიონს ჩაჰრა მირჩევნია.
სტაცა ხელი წაიყვანა,
რიონს პირათ მიიყვანა
დაშნა-ფარი ხელში მისცა
მოაბრუნა კიდევ ჰკითხა:
ქალო, ასე დამიფიცე
შენსა, ჩემსა ჩახოვნასა .
არაფერი გირჩევნია.
ქალი ასე უფიცებდა:
შენსა, ჩემსა ჩახოვნასა
რიონს ჩაჰრა მირჩევნია,
სტაცა ხელი შიგ გადუშვა
მობრუნვალეთ აბრუნებდა.
ტანსა მისსა ბროლისასა,
რიონს ხიდეთ უკეთებდნენ,
ხელსა მისსა ბროლისასა
ვირხიდათა აკეთებდნენ,
თმასა მისსა გიშრისასა
სახელურად უკეთებდნენ.

• 2.

მთას ხონობი დაფრენილა,
დაბლა მერე ტკარცალებდა,
კიკვობაზე კიკვისა სჰამდა,
მოლობაზე მოლასაო.
ბაზიარი შემოსულა
ქორითა და მეძებრითა
იხვს იჭირავს გეზელითა
ნამთავარი ოფოფსაო.
ბაზიარი თავს მოიციმს
ქორი ავად გახთენია,
გამჩენელ ღმერთს აღთქმას აძლევს,
თუ რომ ქორი მომიკვდება,
სამ წელიწადს ასე ვიგლოვ
ხორცს არას ვქამ არაფრისას
იხვისა და ხონბის მეტსო.
უშობელი ძროხის მეტსო,
ტანზე არას არ ჩავიცვა
სკალატის მაუდის მეტსო,
თავზე არას დავიხურავ
ქუთათური ქუდის მეტსო,
ფეხზე არას არ ჩავიცვამ
წალა-წულა ჩექმის მეტსო.

3.

აგერ მოვა წყალი შავი
მას მოჰქონდა გველი შავი,
გაუწვდინე ვაშლის ჯოხი
მოვითრიე კოდმიდანა;
დავდევ ქვასა, დავკარ შუბი
ვაქცევეი სისხლი-შხამი
იგი ავსა მაწყენარსა.

4.

გეგუთისა მინდორშია
 სისვი ცხენი მოგოგავდა,
 ზედა იჭდა ვაჟი-კაცი
 უკან მისდევს კოკლი ქალი
 — შენ ვაჟკაცი, მომიხედე
 — შენ რა გინდა კოკლო ქალო
 — შენი საზრახი არა ვარო.

— — — — —
 — — — — —

5.

აჯაბეთში ტყვია
 შიგ ნადირი ბევრია,
 ვინაა მისი მომრევი
 სამი ძმავი თავდგირიძე.

— — — — —
 — — — — —

6.

- ნადულარას ვალულებდი
- ქალ-ბაღანას ვაპურებდი.

სამწუხაროდ ნადურის საჩივარი ლექსები დავიწყებულია, ძალიან ბევრია დაკარგული. იყვნენ ისეთი მომღერლები (მაგალითად, დვაბზუელი დათა შაფაქიძე), რომლებიც მთელ დღეს სულ ახალ-ახალ საჩივრის ლექსს მღეროდნენ თურმე.

გარდა საჩივრისა, ყანურში მღეროდნენ კიდევ სახუმარო ლექსებს, რომლებსაც ეძახდნენ „ყბამოსაქცევს“ (ყბას ნუ მიქცევ — ნუ დამცინი, სამასხროდ ნუ მზდი).



ღარიბი გლეხის კარმიდამო

ხ ა ნ ი ს ი

სამი ბატონის ყმა ვიყავ,
ხან ის მირტყამდა, ხან ისი,
სამივე ერთ დღეს შომიკვდა
ხან ის ვიტირე, ხან ისი,
სამივეს დარჩა ცოლები
ხან ის მიყვარდა, ხან ისი,
სამივეს დარჩა ქონება
ხან ის შევკამე, ხან ისი.

2.

ჩიტსა ვდევდი მბზაყუნსა
შემოვსტორცნე ხელ-კოდალი
დავამტვრიე მხარ-ბარკალი,
აუხარიქე, ფორჩხს მივკიდე
თავ-თავ რიგად დავარიგე,
ორჯურ ქვაბში რომ ჩავდევი
ურთ ეცეშე არ ჩავიდა.
მეზობლიდან ვინათხოვრე
პაიწალაი, წუქალაი,
რომ ჩავდევი არ ჩანდ იყო,
ასი კაცი ვერ შექამდა
დიდ ვაჭარმა ლუკმათ იგლო.

3.

ქალსა ჰკითხეს რამან შეგქმნა
ასე დიდი მუცლათ სისხო,
ცერცივი ვკამე უხარშავი,
მე მან შემქმნა მუცლათ სისხო.

4.

შარაზედა კვალი ვნახე
პატარაი ნადირისა,
მიეყევე კვალსა დავედევნე,
გზას იქიდან გადუხვია
ჩასულიყო წყაროზედა,
წყალსა სმიდა უხაროდა
რომ შეეხედე შეეშინდა.

— — — — —
— — — — —

5.

ქალო შენი ცხვირსახოცი
წყალს მიქონდა მდინარესო,
ჩაეკარ ხელი ამოვიღე
ჩაგხუტე მდინარესო.

6.

ზეცას ვიყავ, ზეცა ვნახე,
ვარსკვლავებსა დავენახე,
მთვარემ კაცი მომიგზავნა,
აქ თუ იყავ რათ არ მნახე.

ნაღს წყალი თუ უნდოდა, სიმღერაში ლექსით მიმართავდნენ.

მასვი წყალი, ჩაფით წყალი
გაშრა ყორყა, კაცი მოკვდა.

ყანაში სადილის მომტანი რომ გამოჩნდებოდა, ნადი მზიარულად წაუმღერებდა:

შემოსაახე ბიჭო ოსა,
მესადილეც ქე გამოჩნდა,
დადგი გოგო კალათაო,
ჩვენც ჩამოვალთ ბარათაო.

ზოგჯერ მასპინძელი ან ნადის მეთაური ნაღს დაჰპირდებოდა: ამ ნაპირს რომ გაიტანთ საჭმელს მოგართმევთო, როცა ნადი ნაპირს გაიტანდა, სიმღერაში გამოურევდა:

გავიტანეთ ჩვენ ნაპირი,
შევასრულეთ დანაპირი,
მოგვიხარშეთ ძროხის ბეჭი,
მასპინძელო, რაღას გვერჩი.

როცა მასპინძლის ყანას მორჩებოდნენ, მიწვევით ან მოუწვევლად, მეზობლის ყანაში გადავიდოდნენ სიმღერით:

ჩვენ არ გვეყო შენი ყანა,
მეზობელმა წაგვიყვანა.

ბევრმა ცნობილმა ღრმად მოხუცებულმა მომღერალმა ლექსები ველარ მოიგონა და შემოგვჩივლა: ისე აღარ მახსოვს, ნაგრამ სიმღერაში კი მომაგონდებაო. სამწუხაროდ, სიმღერა ველარ მოვაწყვე.

ძველი მომღერლები გულისტკივილით აცხადებენ: „დღეს რომ ყანურია ფირფიტაზე გადაღებული, გურიის „მოსაჩაყი“ არის. ეს რაღაც ყანური სიმღერის „აჯაბსანდალი“ გახლავთ. მასში ლექსი-საჩივარი სულ არ არის და საჩივარი ამ სიმღერის ძარღვი იყო“.

საერთოდ, ყანაში მხოლოდ ყანურს მღეროდნენ.

ე ლ ე ს ა

ელესას ტვირთის აწევისა და გადატანის დროს მღეროდნენ, 40—60 წლის წინათ გურიაში ურმით ტვირთის ზიდვა არ იცოდნენ, არც საამისო გზა იყო და არც ხარები ჰყავდათ. საშენი ხე-ტყის მასალა და ჭირნახული ტყიდან და ყანიდან ზურგითა და მხრით გამოჰქონდათ. ზოგჯერ უგზო-უკვლო ციციბო კლდე-ღრისაგან უნდა გამოეტანათ ისეთი მძიმე ტვირთი, როგორც იყო საწნახელი, საცალფეხო ხიდი, საანძე, დვირო, ჩამური, აფრა და სხვა. საჭიროების შემთხვევაში ნადგამის დაუშლელად ერთი ადგილიდან მეორეზე გადატანა-გადაჩოჩება, ან კიდევ უფრო მაღლა აწევა, მოითხოვდა 50—200 მუშა-

ხელს. მუშაობა იყო ძლიერ სახიფათო, საფრთხილო, საჭიროებდა ნამდვილ კოლექტიურ ერთსულოვნებას, სიფხიზლეს, ერთგულებას, სრულ ჰარმონიას, თორემ საკმარისი იყო რომელიმეს ერთი მცდარი ნაბიჯი გადაედგა, ყველას თან გადაიყოლებდა, კლდეში გადაჩენდა და უბედურება მოხდებოდა, ან რომელიმეს არ აეწია მისი ხვედრი ტვირთი, გამოეჩინა ორგულობა, თაღლითობა, გულგრილობა, ამით ჰარმონია დაირღვეოდა, ერთის ხვედრი ტვირთი მეორეს დააწვებოდა, და, ცხადია, არც ეს შეიძლებოდა. ასევე ერთსულოვნება იყო საჭირო ნადგამის აწევის და გადაჩოჩების დროს. რომელიმე მონაწილეთაგანის მცდარი მოქმედება გამოიწვევდა შენობის დანგრევას და შეიძლებოდა ადამიანებიც ემსხვერპლა.

ზოგიერთისათვის იქნებ დაუჯერებელიც იყოს ამ დროს სიმღერა, მაგრამ გურულებისათვის უსიმღეროდ მძიმე ტვირთის აწევა წარმოუდგენელი იყო. სიმღერის დამწყები-მთქმელი, საქმის ბელადი, სარდალი გახლდათ. სიმღერა ერთი გრძნობით და მისწრაფებით მსჭვალავდა საქმის ყველა მონაწილეს — მთელ კოლექტივს ავიწყებდა სხვა ყველაფერს და მათ გრძნობა-გონებას მიაჯაჭვავდა მხოლოდ და მხოლოდ ტვირთზე, რომელსაც სიმღერა უმსუბუქებდა, სიმღერა ტვირთის შერაქაფება იყო, მძიმე მსუბუქად ეჩვენებოდათ, დალლას არ გრძნობდნენ.

ყველა ტვირთის მზიდავს ყური ბელადისაკენ ეჭირა, ცდილობდა არ გამოპარვოდა მისი სიმღერა, რადგან სიმღერა ხმის აწევ-დაწევით, ნელი და ჩქარი ტემპით, შეძახილითა და გადაძახილით, ამავე დროს იყო ბრძანება, სარდლობა. ის ყველა ამხანაგს აგრძნობინებდა, თუ როდის გადაედგა ფეხი ფრთხილად, ნელა, როდის გაევილო ჩქარა, როდის გამართუ-

ლიყო წელში და როდის მოხრილიყო — მისი სიმღერის კი-
ლო საჭიროების მიხედვით სიგნალიც იყო და განგაშიც. სანამ
ტვირთი სახიფათო ადგილას იყო, მანამდე ელესა ერთპირი
იყო — ერთი ბელადი ხელმძღვანელობდა, მაგრამ როცა
ტვირთს სამშვიდობოზე გადაიტანდნენ, მაშინ ერთპიროვნუ-
ლი დიქტატურა უქმდებოდა და სიმღერა ორპირად, უფრო
მხიარულად და უდარდელად ჩაღებოდა.

ელესა ულექსო სიმღერა იყო და, ბუნებრივითაა, რადგან
ლექსი, რომ ეხმარათ შეიძლებოდა ვისმეს ტვირთი და სი-
ფრთხილე დაევიწყა და ლექსით გატაცებულიყო. ელესა სა-
ჭიროების მიხედვით იყო სარდლური ბრძანება: ელესა და
ასწი ბიჭო! ელესა და დასწი ბიჭო! ელესა და გასწი ბიჭო! ან
კიდევ — თუ სათრევი ტვირთი იყო — ელესა და მოსწი
ბიჭო! — ამას ამბობდა ბელადი, სხვები კი მიაყოლებდნენ —
ბანს ეტყოდნენ: ელესა და ვიო, ვიო, ოო! როცა ტვირთს და-
ნიშნულ ან დასასვენებელ ადგილას მიიტანდნენ, მაშინ ელე-
სას უფრო ჩქარა, უფრო ცხოველი ტემპით მღეროდნენ —
ელე, ელე, ელე-აჰა, ელესა და ვიო და იო.

სამშვიდობოს გასული ხალხი მღეროდა: ელე, ელე, ელე-
სია, ხალხი ჯაფას შეესია. როცა ნადგამის გადაჩოჩება ან აწე-
ვა იყო საჭირო, მაშინ სარდალი-მთქმელი სახლის სახურავზე
დადგებოდა და იქიდან სარდლობდა. ამით სხვებს ამხნევებ-
და ნუ გეშინიათ, თუ მარცხი მოხდება, პირველი მსხვერპლი
მე ვიქნებიო. ზოგ ადგილას, მეტადრე დასავლეთ გურიასში,
ელესას „ვიოს“ ნაცვლად აყოლებდნენ — „კირიოს“. და რო-
გორც ნადურში აღვნიშნე, ელესას ბოლო სამხედრო შეტე-
ვის განგაშს ჰგავდა, რომელიც სრული გამარჯვების ყიყინით
თავდებოდა. ამ დროს ტვირთის მზიდავების სახეც, მიუხედა-


ვად დადლილობისა, აღფრთოვანებული, ყველას თვალი ცეცხლოვანი, იმედიანი და ხალისიანი იყო.

ელესა არის ერთადერთი სიმღერა, რომელშიაც საქმის ყველა მონაწილე როგორც კოლექტიურად მუშაობას, ისევე მღერის და სიმღერაც ისე თავისებურია, რომ ყოველად შეუძლებელია ვინმემ, სიმღერის სრულიად არამცოდნემ, თავისი ხმით სიმღერა გაამრუდოს. ჩემს ჭაღარას თუ ენდობით, ისიც კი მინახავს, რომ ელესას ტვირთის ზიდვის აქტიური მონაწილე მუნჯიც კი თავისებურად მღეროდა და სიმღერას არ აფუჭებდა. მდინარე ბეჟუეში (ქალაქ მახარაძე) ლიხაურელებმა მოათრიეს მუხის საცალფეხო ხიდი, რომელსაც 500 კაცი ეხვეოდა და ყველა მღეროდა. ელესას ნადიც შეიძლებოდა ყოფილიყო მოყვანილი, ან შეწეული. საწნახელი გამომაქვს ტყიდან ან ნადი შემაწიე, დაავალებდა ვინმეს, ან თვით მოაწვევდა. ასეთ ნადს სჭიროდა მხოლოდ ერთი იჯრა და ვისაც როგორც მოსწონდა თავი, ისე გაუმასპინძლებოდა ნადს. ხშირად მასპინძელი სხვა რამ წვეულებასაც „გამოათანიებდა“ და მით ერთი სროლით ორ კურდღელს კლავდა. ამრიგად, ესეც გართობა-დროს ტარების საბაბიც იყო.

დღეს ნამდვილ, ხალას ელესას ველარ გაიგონებთ. მღერიან მის პაროდიას, მღერიან ქეიფის გათავებისა და სუფრის გარეთ გამოტანის შემდეგ. მღერის ისეთი ახალგაზრდობა, რომელსაც ტვირთი არასოდეს აუწევია — ამას ეძახიან სუფრის ელესას.

ხ ე ლ ხ ვ ა ვ ი

ხელხვავე ბარაქასა და სიუხვეს ნიშნავს. ქართლ-კახეთში კალოზე მომუშავეს გამარჯვების ნაცვლად ბარაქას ეტყვიან—



დაწნული კალათები

ამავე მნიშვნელობით გურიაში სიმინდის ამლებს (სიმინდის მტეხავს, კალოზე მრჩეველს და სასიმინდეში შემნახველს) კაი ხვავიო — უსურვებენ და ამით სწამთ, რომ ჭირნახულს ბარაქა-ხვავი მოემატება. ხელხვავიც ამ მუშაობის შესაფერისი სიმღერაა. გურული ქართლელივით სიმინდს ტაროთი ღეროზე კი არ სჭრის, არამედ ტაროებს ცალკე ამტვრევს — სტეხს. ნალიის (სასიმინდის) მახლობლად (ან სხვა მოხერხებულ ადგილას) კალოდ სდგამს. სიმინდის ტაროებს ყრიან მოზრდილხელიან კალათებში. ზურგზე სახვავო გოდორმოკიდებული „მომხვავებელი“ ვაჟი ჩამოივლის, უვსებენ გოდორს

და იმასაც მიაქვს კალოზე და ახეავენ. ჭირნახულის აღების (აქარლები ამბობენ „მიქუჭკების“) დროს სიტყვა ხეავს გურული გამუდმებით ხმარობს: კალათი, გოდორი, უბრალოდ არ იტყვის, არამედ დაუმატებს: სახეაეო კალათი, სახეაეო გოდორი, მომხეაეებელი და სხვა.

სალამოს, მზის ჩასვლის შემდეგ, მთვარის ან ჭრაქის სინათლეზე სიმიანდს არჩევს. ტარობს აცლის „ქურჩელას“; ამას ეძახიან სიმიანდის რჩევას, ან სიმიანდის ქურჩენას. როგორც სახალისო იყო სიმიანდის თესვა და ბარვა, ასევე მხიარულობაში უნდა გურულს გაარჩიოს სიმიანდი. თესვა-მარგვლის დროს მხიარულება, სიმღერა და ლხინით პურის ქამა-შექცევა, ასე ვთქვათ, ავანსად იყო, დღეს კი შრომა განაღდებულია, ჭირნახული მოწეულია, მაშასადამე, მეტი საბაბი აქვს იმღეროს და მოილხინოს, სიმიანდი კოლექტიურად გაარჩიოს, ბუნების წიაღში კოლექტიურად ივახშმოს, იმღეროს, ისიამოვნოს და მეზობლებსაც ასიამოვნოს. სიმიანდის რჩევა უაღრესად შეხმატკბილებაა შრომისა და სიამოვნების. შეიძლება კალოს „თავისწინაის“ შინაურებიც მოერევიან, „ხელმოთაი“ დაარჩევენ, ერთ ღამეს თუ ვერ მოერევიან, მეორე ღამესაც წაიბუშავენ. მაგრამ ეგ მისთვის მოსაწყენია; მასთან გურული ჩქარია, სულსწრაფი, თან კიდევ კალო ცის ქვეშაა, გაავდრების ეშინია, ამას ყველაფერს ანგარიშს უწევს და ამიტომ იწვევს ნადს. მუშაობასთან ერთად ის ეძებს სახალისოს, ცდილობს გაერთოს, კიდევ იმღეროს, იცინოს, იარშიყოს, ილხინოს, სიმიანდის რჩევის ნადიც გურულისათვის ამავე დროს თავის გამორჩენის მიზეზიც იყო. დიდი კალო, კარგი მასპინძლობა და განუწყვეტელი სიმღერა-ოხუნჯობა, მისთვის სატრაბახო გახლდათ.

სიმინდის სარჩევი ნაღი შერჩეული იყო: ქალი და კაცი, ქმრიანი და გასათხოვარი, მოხუცი და ახალგაზრდა; სიმინდის რჩევა ყველას შეეძლო და ნაღშიაც ასეთი თაიგული იყრიდა თავს, ოღონდ კი ხალისით ემუშავა, მუშაობის დროს ემღერა,



ნალია (სასიმინდე)

ეოხუნჯა, ასახსნელი გამოცანა ან კარგი ზღაპარი ეთქვა, ჩქარა გამოსათქმელი სულმოუთქმელად წამოესროლა, ნაცნობ-მეგობრისათვის (იქ მყოფი იქნებოდა თუ გარეშე) დაეცინა;

გაეკილა, გამოეჯავრებინა, მარილიანი ანეკლოტი ეთქვა. ერთი სიტყვით, სიმინდის რჩევა 4—6 საათივც რომ გაგრძელდებოდა, დროც ისე უნდა გასულიყო „სიცილ-კარკაცი“ არ შეწყვეტილიყო, არავის არ მოსწყენოდა და „ძიმითში არ წასულიყო“ (ძიმითი სოფელია ვურიაში და თუ ვინმეს ჩამოეძინებოდა, იტყოდნენ — ძიმითში წავიდაო).

თუ დიდი კალო იყო და ნაღს მოწყენა დაეტყობოდა, (დაიწყებდნენ მთქნარებას) მასპინძელი საქმის მორჩენას არ დაგიდევდა — იტყოდა: კარგი, გეყოფათ, თქვენი მარჯვენა დეილოცა, ერთ კალო სიმინდს კი არ გადავყოფი, ახლა რაცხა სილარების ვახშამია იგი ვჭამოთ და მერე მოვსვენოთ — ხვალაც ამ თვის არის.

ხელხვავი (ხელისბარაქა) სიმინდის რჩევის სიმღერა იყო. როგორც ნადურს თოხს ააყოლებენ, შეუწყობენ, ისე ხელხვავს ხელები უნდა აყოლოდა — გარჩეული სიმინდის ტარობებს სიმღერის ტაქტის მიხედვით ისროდნენ მეორე მხარეს. ყველა ცდილობდა მუშაობა სიმღერისათვის შეეწყო, შეეხამებია, ჰარმონია, რიტმულობა არ დაერღვია. ხელხვავი რჩევის მთავარი ღერძი გახლდათ. როგორც ნადური, ისე ხელხვავი შრომას აადვილებს, ახალისებს და გურულად რომ ვთქვათ, ახვავრიელებს.

გურიაში ბევრი ქალი იყო მომღერალი და მომღებნი (მგალობელიც), მაგრამ იმის მაგალითს ვერავინ იტყვის, რომ ქალს ნადური ემღეროს, სამაგიეროდ, ხელხვავის კარგი მომღერალი ქალები როგორც გათხოვილი, ისე გაუთხოვარი, ბევრი იყო, ხელხვავი ორპირი სიმღერაა და ძლიერ ხშირად ვაყებსა და ქალებს შორის შეჯიბრება იმართებოდა — ერთ პირს ვაყები ამბობდნენ, მეორეს — ქალები.

ხელხვავი იყო მოკლე, გრძელი და სუფრის.

როგორც ყანური, ხელხვავეც არსებითად ერთნაირი იყო, მაგრამ მაინც იყო და დღესაც არის კუთხური ხელხვავე — დასავლეთ გურიის (გურიანთულაი), შუა გურიის, აღმოსავლეთ გურიისა და ქობულეთურაი.

ჭირნახულის მფარველად წმინდა გრიგოლი სწამდათ და ხელხვავეშიაც მას არ ივიწყებდნენ.

„წმინდა გრიგოლ მობრძანდება
ჩვენს კალოზე დაბრძანდება
ხვავს დატიებს წაბრძანდება.

ან კოდევ

წმინდა გრიგოლ ზღვისაო
გამორჩეული ღვთისაო.

არც ანგელოზებს ივიწყებდნენ:

მიქელამ და გაბრიელამ
კალო გაგიხვავრიელა.

სიმინდის რჩევის დროს ხელხვავეც ბევრჯერ ითქმოდა, ამიტომ მრავალფეროვნებისა და სილამაზისათვის სხვადასხვა ლექსებს ჩაურთავდნენ. მაგალითად, ხელხვავეში მღეროდნენ:

✦ 1.

აქარა და ქობულეთი
ციხისძირი ჩაქვიანა,
ექადია, ოზურგეთი,
ბახვი ასკანლებიანათ,
ბაილეთლები ჭილოფით,
აქეთლები ჭურიანათ,
აქანლები ქოთნიანად,
ჭუმათლები გოდრიანად,

ვანელები კეციანა,
ჯვარცხმელები გვიმრიანა,
სურებლები ჩიყვიანა.
სუფსას ერთვის ბახვის წყალი
ყურუფაი ჩხერგიანი,
ბასილეთი, ხიდისთავი,
ნიგოითი და ლანჩხუთი
მისი ლამაზებიანა,
ყველა ხელში გაგვიარა,
არაფერი გვეზიანა.

2.

ამაღლება საქებია
სამებაში დათვებია,
ვანელები ყრუებია
ზომლეთლები ცრუებია.
ქანჭათი განათლებული,
აკეთი გათათრებული,
ძიშითი გაკოტრებული,
აცანა გაქოთნებული.

ამ ლექსებით სხარტად დახასიათებულია გურიის იმ-
დროინდელი ზოგიერთი სოფელი თავისი „ავლა-დიდებით და
ნაწარმით“. სატირა ხუმრობასაც არ არის მოკლებული და
შეიძლება „საჯაოხური ხუმრობა ნახევარი მართალიც“
იყოს. ვიციტ, ზოგს თავის სოფლის მოყვარულს ამ ლექსების
გამოქვეყნება არ ეამება, მაგრამ აქ საწყენი და საძრახისი არა-
ფერია, პირიქით, ამ ლექსით ნათლად შეგვიძლია წარმოვიდ-
გინოთ ძველი და ახალი გურია.

გაქოთნებული აცანა დღეს გაციტრუსებულია, ჩაის გადა-
სამუშავებელი ქარხნით დამშვენებული, გაკოტრებული ძიში-

თი — მილიონერი კოლმეურნეობაა, „გვიმრიანა“ ჯვარცხმა-
სახელმოსხვეკილია, ჩაის უბანი ჰქვია.

3.

მე ვარ ქალი ქვეყნის თვალი,
ეფემია ყენიას ქალი,
საყდარზედა რომ გვევლი
ყოვლი კაცმა დამდვა თვალი.
აგერ მოვა ჩემი კმარი,
რაფერ დაუყლიპავს თვალი
ღმერთო იგი მომიკალი
შემოგწირო ულლათ ხარი,
იმას თუ არ დამჭერდები
ზედ დაგიდო თეთრი ცხვარი.
მღვდელ-ღიაკონს ვაწირვიო
მას მივართვა ბეკი ფხარი
მას ღიაკონი მოყვება
გადაერო ღორის კყანი.

4.

(ქ თ ბ უ ლ ე თ უ რ ა ი ხ ე ლ ხ ვ ა ვ ი)
სელემ-ქელემს მოგახსენებს
რისხენ ალა მენაბდუო,
შუალამემდე რომ გვალხინე
მერე რისთვის გაგვაგდუო.
იმაშიც. მადლობელი ვართ
დილას ადრე რომ გვნახუო.
გამჩენი ღმერთის წყალობით,
ბათომში ფაშად გნახუო,
სამსახურის მოწადე ვარ,
ადგილი შემინახუო.

5.

(ც ი დ ე ვ ქ ო ბ უ ლ ე თ უ რ ა ი ხ ე ლ ხ ვ ა ვ ი)
 ალი ფაშა
 თათარი და რუსი ჩხუბობს
 იგინია ორი „ეში“
 ალი ფაშამ გვიღალატა
 ჩაგვიყვანა კვირიკეთში,
 იმან ფულები აიღო
 ჩვენ ჩაგვტია რუსის ხელში,
 კარგი არც მას დამართნია
 ბაწრით ჩაითრიეს გემში,
 მისი ყვირილი ისმოდა
 სუფსას გაღმა ბაილეთში.
 ღმერთო, იგი მოგვასწარი
 ვქეიფობდეთ ჩვენ ქობლეთში.

როგორც გამოკითხვით გავიგე, ეს ლექსი გამოთქმულია 1877 წელს რუსეთ-ოსმალეთის ომის დროს. მაშინ ვილაც ფაშას, სახელად ალის, ოსმალეთისათვის უღალატია, ღალატი გამორკვეულა და ალი ფაშა ოსმალებს დაუსჯიათ.

6.

ბერი აკვანს ებარება
 — აკვანს კარა, აკვნის დედას,
 — ბერო სული გირჩევნია
 თუ ლამაზი ქალებიო,
 — შენი სული შენდა გქონდეს
 მე ლამაზი ქალებიო.

ზოგჯერ უმატებენ: სულ შავ-შავი თვალებიო .

როცა გურიაში წერა-კითხვა გავრცელდა, როგორც ხელ-

ხვამში, ისე სხვა სიმღერაში წიგნიდან ნასწავლ ლექსებს იყენებდნენ. განსაკუთრებით სახალხო გახდა გუგუნავას მიერ გალექსილი თამარიანი. ხელხვავს, ერთი მხრივ, ვაჟები ამბობდნენ, მეორე მხრივ, ქალები, მაშინ თამარიანის ლექსით ეჭიბრებოდნენ ერთიმეორეს.

ვაჟები: შენი ნახვა მესწრაფოდა
მე სხვა საქმე არ მქონია...

ქალები: შალვა ჩემო სიხარულო,
სიცოცხლეზე მეტად ტყბილო...

ან კიდევ:

თუ როდისმე ქმარს შალირსებს
დიდებული დიდი ღმერთი...

ვაჟები: სად ხარ ჩემო სიყმის შვილო...

მომღერლები ცდილობდნენ ახალ-ახალი ლექსები ემღერათ და ერთი და იგივე ლექსი არ ეხმარათ. ხელხვავში ორივეს მოწონება ჰქონდა — სიმღერასაც და ლექსსაც.

სიმინდის რჩევის დროს იცოდნენ შეჭიბრება და ერთიმეორეს „დანიზლავება“ (სანაძლეო), ქალსა და კაცს შორის, ან ორ ვაჟს შორის — საზომად იყო ერთნაირი ტევადობის გოდორი. მოიგებდა ის, ვინც უფრო ადრე გაავსებდა გოდორს. სანაძლეო სხვადასხვა სახის იცოდნენ. ვაჟისაგან საწელზედაო ჩითი (წელზედა ახლა რომ პერანგს ეძახიან), ქალისაგან მოქარგული პერანგი ან ხაჭაპური და სხვ., ვაჟებს შორის ერთი დღის მოხმარება. მთელი კალო თუგინდ ის 200—300-გოდრიანი (გოდორი 1½ ფუთი მარცვლით) ყოფილიყო, უნდა გარჩეულიყო შეუწყვეტელ სიმღერაში, „სიცოცხლ-ტკარცალში“, ოხუნჯობა-სიამოვნება-შექცევაში. სამუშაოს დამთავრებისას მასპინძელს ყველა მრჩეველი ეტყოდა:

„რავაც აგი სიმინდი სიცილ-ტკარცალში და სიამოვნებაში გავარჩიეთ, ისე ღმერთმა სიცილ-ტკარცალში და სიამოვნება-სიმღერაში შეგაჭამოსო“.

ნადს იქვე მიართმევდნენ ვახშამს, მაგიდის, სკამის და სუფრის (მაგიდის საფარის) მაგიერი იყო სიმინდის ნაქუჩი-ქურჩელა, რომელზედაც მოათენდნენ ხაპის (გოგრის) ფოთლებს და ზედ დააწყობდნენ სამხიო, უწვნო საქმელს: ყალიოთ მოხარშული და შემწვარი ქათმები („საკრეფ-სატეხისთვის“ საგანგებოთ გამოზრდილი), მარილწყალში მოხარშული ბურვაკის ხორცი, ძროხის მოსათალი ბეჭი, სათბილო, გავადუშა, ჩალაღაჯი — საწებლით, ძაღე, ყარაო, ბროწეულის წვენი. ვინც მიირთმევდა, მადის გასაღვიძებლად, არაყსაც სთავაზობდნენ. ცხადია, ღვინოც არ აკლდათ. ზოგს უკვე ჰქონდა საადრეო სამაჭრე ყურძნიდან დაყენებული მაჭარიც (ყანაში ღვინისა და წყლის კურჭლად უფრო ხშირად ხმარობდნენ მწვანე ხაპს). თამადას ირჩევდნენ — სმა შეზარხოშებამდე გრძელდებოდა, სუფრაზე იყო მოლხენა-სიმღერა, ქალ-ვაჟების ცეკვა, ზოგჯერ თოფის სროლაც.

როგორც მუშაობის დროს, ისე ნავახშმევს ნადს მიართმევდნენ შემწვარ ან მოხარშულ ჰყინტ სიმინდს. სიმღერითა და სიამტკბილობით დაიშლებოდნენ. დღეს შენ მოგეხმარა, ზელი წაგიკრა, ხვალ შენ მოეხმარები. მუშაობა და გართობა აქაც კოლექტიური იყო.

სიმინდის რჩევას სიამოვნებით ესწრებოდნენ და აქტიურ მონაწილეობასაც იღებდნენ ქალბატონ-ვაჟბატონებიც — მემამულეები და თავად-აზნაურობა, რადგან ეს მუშაობა იოლიც იყო და სასიამოვნოც, მასთან „წლის მოსავლის“ (ყველა ის,

რაც წელიწადში ერთხელ მოდის) „ხელის შერება“ ყველას უხაროდა.

სიმინდის რჩევაში მონაწილეობდნენ აგრეთვე მოსწავლეები და ჯარისკაცები.

ქ. ოზურგეთში (დღევანდელი მახარაძე) ამ ორმოცი წლის წინათ ორად ორი სასწავლებელი იყო — ოთხკლასიანი სასულიერო (ხუცის შვილებისათვის) და სამკლასიანი „სახორციელო“ — უბრალო მოქალაქეთათვის. ამ ორი სასწავლებლის მოწაფეებს შორის ხშირი იყო მეტოქეობა და კინკლაობა. ქალაქის მცხოვრებთ როგორც ვაჭრებს, ისე სხვებსაც, გარდა მოსულ მოხელისა, ყველას ჰქონდა ყანა და უფროსი კლასის მოწაფეებს (ძლიერ ბევრი საცოლოც გახლდათ) სიმინდის რჩევაში სიამოვნებით იწვევდნენ და ისინიც დიდი ხალისით მიდიოდნენ. უხაროდათ კიდევ, რადგან ხმელი ნადერგალი ყველისა და ტარანის ნატრულები კარგად ისიამოვნებდნენ და თან არავინ დაუშლიდა რჩევის დროს ხელში მოყოლილ ჭყინტი სიმინდის წაღებას. კალოს სხვადასხვა მხარეს შემოუსხდებოდნენ და „სულიერ-ხორციელი“ შეჯიბრება გაჩაღდებოდა როგორც მუშაობაში, ისე სიმღერა-ოხუნჯობაში. მღეროდნენ როგორც ხალხურ სიმღერებს, აგრეთვე სკოლაში ნასწავლს — რუსულსა და ქართულს, ზოგჯერ კალოს გარჩევის შემდეგ სიმინდის ქურჩელაში კიდევ ჭიდაობდნენ. ხშირად მოსწავლეთა ნადი ზღებოდა სასწავლებლის უფროსის ნებართვით და, თუმცა იშვიათად, მაგრამ რომელიმე მასწავლებელი ან სკოლის მეთვალყურე ახლდა, უმეტეს შემთხვევაში, უნებართვოდ მიდიოდნენ, დამშეული მოწაფეები ამგვარ ნადს თვით ეძებდნენ და, თუ ვინმე „ქრისტიანი“ პატივს სცემდა, ხევწნა

არ სკირლებოდათ, თუ გინდ ამ თავხედობისათვის „ბეზაბე-
დათ“ დარჩენილიყვნენ.

1888 წლიდან საქართველოში სავალდებულო გახდა ჯარში
გაწვევა. „სალდათები“ რამდენიმე წელიწადს ოზურგეთში
იყვნენ დაბანაკებული. ახლად გაწვეულმა ახალგაზრდებმა —
გურულებმა, მეგრელებმა და აფხაზებმა მოსწავლეებს დაუ-
კარგეს მოწონება — სიმინდის სარჩევში უპირატესობას ჯა-
რისკაცების დაპატიჟებას აძლევდნენ და ისინიც დიდის სია-
ზოვნებით მიდიოდნენ და კარგადაც მუშაობდნენ. მათი უმე-
ტესობა გლეხის შვილები იყვნენ, მუშაობას მოწყვეტილებს,
მუშაობა ეხალისებოდათ. მასთან „ბორშჩიც“ და „უანოვის“
შავი პურით თავმოებეზრებულები მშობლიურ ღვინოსა და
საქმელს მაღიანად შეეჭყეოდნენ. რჩევაში შეჯიბრება აქაც
ხდებოდა.

როგორც მუშაობაში, ისე სიმღერაში, ერთი მხრით, იყვ-
ნენ მასპინძელი გურულები, მეორე მხრით, სტუმრები — მე-
გრელები და აფხაზები. ჯარისკაცებს ერია რუსებიც, და ეს,
სხვათა შორის, ერთი მიზეზთაგანი იყო გურულებთან მათი
დაახლოებისა. ბევრი როგორც რუსი, ისე მეგრელი, გურულე-
ბის სიძე გახდა, უმეტესობა გურიაში დასახლდა და „გაგუ-
რულდა“ კიდევ.

ზოგიერთ გურულს ყანა ეზოდან 20—50 კილომეტრის
მოშორებით ჰქონდა. ყანის ასაღებად რამდენიმე დღის საგზ-
ლით ცოლშვილიანად მიდიოდნენ, ზოგჯერ აკვნიან ბაეშვებსაც
თან წაიყვანდნენ. დაბინავდებოდნენ კარავში და 5—15 დღე
იქ რჩებოდნენ. მეყანეებმა იცოდნენ ერთიმეორის „ხელის
წაკერა“, ერთიმეორის დახმარება. როგორც სოფელში ახ-

ლად დასახლებული კაცი კარგ მეზობელს ეძებს, ისევე მეყანე ეძებდა კარგ მოთაღრეს. სიმინდის ტეხა უფრო ხშირად ხდებოდა შინაური ძალით, უნადოდ, რჩევა კი—მოთაღრეების მოხმარებით, ერთ ღამეს შეიძლებოდა კოლექტიური ძალით ორი მეყანის კალო გაერჩიათ. მოთაღრეები ერთიმეორესთან გამასპინძლების მხრით დიდად არ ბოდიშობდნენ, ვისაც როგორც „მოელონისკარებოდა“, ისე უმასპინძლებოდა — და ეს არავის არ ეძრახებოდა. აქ ხალისობდნენ ერთად მუშაობით და სიმღერით.

დიდი კალოს პატრონი, თუ ამავე დროს დროსტარებას გუნებაზე იყო და შეძლებაც ხელს უწყობდა, ძაშინ ყანის მახლობელ სოფლის მცხოვრებს, მაგალითად, ასკანელს — შავი ზღვის სანაპიროზე (ასკანიდან) 35—40 კილომეტრზე ყანა ჰქონდა, ის საღმრთოელს (5 კილომეტრზე) დაავალებდა ნადს. ცხადია, ასეთ ნადს კარგი გამასპინძლება სჭირდებოდა. და იგი არც თვითონ ჭამდა სირცხვილს და არც ნადის მომყვანს შეარცხვენდა. შეიძლება საკლაგიც კი დაეკლა.

ა-გიდელა და აგუნა

ა-გიდელა და აგუნას ღვინის კულტის — ბახუსის — საპატივცემულოდ მღეროდნენ. ეს ორივე სიმღერა ერთმანეთს ენათესავება. ა-გიდელა შრომის სიმღერაა, აგუნა კი საახალწლო და ღვინის დედის — ყურძნის — სიუხვის.

50—60 წლის წინათ, მთელი გურია, შავი ზღვისპირიდან თავსუტრებაშდე პრიმიტიულად გაშენებული მაღლარი ვენახის ბაღი იყო. ვენახის გაშენებას არ სჭირდებოდა დიდი შრომა

და ოსტატობა, გურული თოხით ან ბარით ხეს ძირში ამოუჩიჩქნიდა ვაზის დასაფარავ მიწას, წაქცეულად — წაფერდებულად „ჩააკეტებდა“ შიგ ვაზის ლერწს და ცალი ფეხით მიწას მიატკეპნიდა. ასე მირგული ვაზი მესამე წელიწადს ნაყოფს ისხამდა. მერმე მასზე გაწეული შრომა იყო მხოლოდ მოკრეფა და ღვინის დაყენება, ჭურში ჩასხმა, ამოღება და დაღვევა... იშვიათად, 5—6 წელიწადში ერთხელ თუ წალდს წააკარებდა, შესხლავდა და ძველ ვაზს გადამაგინებდა—გადაწვენივით გააახლებდა კარგ მევენახედ და გულ-შემპირნედ ითვლებოდა. ვენახების მეტი წილი ასეთ „მზრუნველობას“ მოკლებული იყო, მაგრამ მაინც უხვად ისხამდა. ახლაც არიან იმისი მომსწრე მოხუცები, რომ ძველ ჩხავერს ღვრიდნენ და ჭურში ახალს ასხამდნენ. ისეთი სიუხვე ყოფილა, ღვინოს რომ ფასი არ ჰქონია და თვითონ დასახარჯავად ვერ მორევიან. მართალია, წინათ არ ლოთობდნენ, მაგრამ ღვინო მაინც ბევრი უნდოდათ, რადგან უღვინოდ არამც თუ იჯრას, არამედ „ხეფსსაც“ არ მიირთმევდნენ. ყანის მუშას საიჯრო ღვინო მუდამ თან მიჰქონდა. ერთი სიტყვით, გურულს თუ ღვინო ჭურში ეგულებოდა, სტუმრის არამც თუ ეშინოდა, პირიქით, ეძებდა კიდევ. ღვინო იყო მისი ოჯახის მასახელებელი, უღვინობა — „მომჯაყველი“. ღვინის დასაყოლებელს ყოველთვის იშოვნებდნენ. კაი მასპინძლობა ჰქონდათ რომ იტყოდნენ, ამას ზეორე დაურთავდა: მასპინძელი რა შუაშია, ღვინო იყო კაი მასპინძელიო.

გურულს „მონათლულობით“, ე. ი. ქრისტიანობით თავი მოსწონდა — ღვინო კი ქრისტიანობის ემბლემაც იყო. ქრისტიანს ღვინო უნდა დაეღვია და, გურულის თქმით ვინც ღვინოს არ სვამდა, უნათლავი იყო. ღვინო იყო ზედაში და ზია-

რება, ორივე კი ქრისტიანობის ბურჯი. რომ ვინმე გარდაიცვლებოდა — ჭირისუფალი თუ კარგ ზედაშეს გააყოლებდა, მიცვალებული „ცხონდებოდა“, კაი ზედაშე გაყვაო, იტყოდნენ. ამიტომ ზედაშის მოყვარული მოხუცი თავის საზედაშე ღვინოს სიცოცხლეშივე იმარაგებდა — ჩემს ტირილზე დახარჯეთო, ანდერძს ტოვებდა. რაკი ღვინის ასეთი პატივისმცემლები იყვნენ, ამის შემდეგ არაფერია გასაკვირი, თუ ვიტყვით, რომ ძველ გურულს ჭურები მარანში განკუთვნილი, გაპიროვნებული და დაგეგმილი ჰქონდა — იცოდა რომელი ჭური როდის (მოეხადა) მოეთხარა:

საიჯრო ჭურში ყოველდღიურად სახარჯო, ულუფის, სუფრის ღვინო ჰქონდა.

საკალანდოს ახალ წელს მოხდიდა მხოლოდ. უნდა ყოფილიყო საუკეთესო „თეთრად გამოღებული“ ღვინო, მაგარი — ცეცხლი უნდა შეყოლოდა.

სადედაღვთისოს 8 სექტემბერს — ღვთისმშობლობას — მოხდიდა.

სადმართო—საუფლისწულო დღესასწაულებში იხარჯებოდა.

საეტლოს — საეტლო წირვის დროს მოხდიდა. ყველა ოჯახის წევრს უნდა გადაეხადა ეს წირვა სიცოცხლეში ერთხელ. ამისათვის მას თავზე შემოარებდნენ ცხვარს, რომელაც უნდა დაეკლათ. ვინც ამას შეასრულებდა, „ეტლგადახდილი“ იყო, „ეტლმოუხდელი“ კი შეიძლება რაიმე ავადმყოფობით ან მარცხით მომკვდარიყო.

იყო საუცოდინარო ჭურიც. ფანატიკოსი მორწმუნე ხუცესს აწირვინებდა და ღმერთს სთხოვდა ყველა ის ცოდვა შე-

შინდე, რაც ჩამიდენია და არ ვიციო — ჩემი უცოდინარობით მომსვლიაო.

საგიორგობო, საფერისცვალებო, სამთავარანგელოზო, საღვთისმშობლო ან სხვ. ჭური ატარებდა იმ წმინდანის სახელს, რასაც ატარებდა ის ეკლესია, რომლის მრევლიც იყო ჭურის პატრონი.

როგორც საკურთხეველში ეკრძალებოდა ქალს შესვლა, ასევე ეკრძალებოდა მას მარანზე მისვლა და ჭურიდან ღვინის ამოღება. თუ მასპინძელი კაცი შინ არ იყო, ან უკაცო ოჯახი გახლდათ, მაშინ მეზობელს სთხოვდნენ ღვინო ამოგვიღეო. მარანს მუდამ სიწმინდით უვლიდნენ... შემთხვევით ჭურის თავზე რომ ღორს გაეგლო ხუცესს მოიყვანდნენ და აიაზმას მოასხურებდნენ. ღვინოს იღებდნენ სიწმინდითა და სასოებით, კრძალვითა და რიდით.

ცხადია, პირველი ქიქით ყოველთვის ღმერთი უნდა ეხსენებინათ, და თავშიშველს სასოებით უნდა წარმოეთქვა: დიდება ღმერთსა, ღმერთო, დიდება შენ, ღმერთმა ყველას გაგიმარჯოს. ახლად ენაამოდგმული ბავშვის პირველი გაკვეთილიც ეს იყო. და ვინც ამას ვერ შეისწავლიდა, ღვინოსაც არ დააღვინებდნენ—იტყოდნენ ჯერ დალოცვაც არ იცისო, რაც ასაკისა და უნიჭობის გამომხატველად ითვლებოდა.

გურული ღვინის კულტის ფანატიკური მიმდევარი იყო და ყოველ ჟამს ცდილობდა ღვინის ღმერთი მადლიერი ჰყოლოდა. ეს მისი პატივისცემა, ალბათ, სიმღერითაც გამოხატა. ეს სიმღერა არის ა-გიდელა და აგუნა.

ა-გიდელა რთვლის სიმღერაა — გურიაში რთველს სტველს ეძახიან (ზოგან — სთველს). რთველი იწყებოდა კრე-

ფა-ტეხის შემდეგ „ნადიმეტრობებს“... მალლარი და განსაკუთრებით ყველაზე მეტად განთქმული ჩხავერი, დათრთვილის შემდეგ უნდა მოკრეფილიყო. რადგან მსუბუქი ყინვა უფრო დაატკობდა ნაყოფს. ყურძნის კრეფა დიდი სახალისო იყო — დიდსა და ზატარას, ასაკისა და სქესის შესაფერი საქმე უჩნდებოდა და ყველა დიდი ხალისითა და მონდომებით აკეთებდა მას.

განსაკუთრებით მხიარულობდნენ ბავშვები. იცოდნენ, რომ ფელამუშს მოადუღებდნენ, ჯანჯუხას ამოავლებდნენ. ისინი მსუნაგი თვალით შესცქეროდნენ ცხელ ფელამუშში ამოვლებულ ჩურჩხელებს, ფელამუშის წვეთები რომ ჩამოსდიოდა, რომელსაც, ცოტა არ იყოს, შეუფერებელი სახელი სკინტი დაარქვეს, მაგრამ ეს სანუკვარი საჭმელი იყო... „ნენა სკინტს თუ მაჭმევ, წყალს მევიტანო“... ოღონდ კი სკინტი გეკმია და უსმენარიც გამგონ-დამჯერე გახდებოდა. 9—12 წლის ბიჭებს ისიც უხაროდათ, რომ ყურძნის კრეფაში ისინიც მიიღებდნენ მონაწილეობას — ხეზე გასვლა და ყურძნის კრეფა თუ არ შეეძლო, გიდელს ხომ გამოუცვლიდნენ. მკრეფავი სავსე გიდელს ზევიდან რომ ჩამოუშვებდა (თოკით) მხიარული და ომახიანი ხმით—სიმღერის კილოზე გადმოიძახებდა ა-გიდელაო... გიდლის გამომცვლელი ყურმახვილად იყო — ცარიელი გიდლით იქით გაეშურებოდა, საიდანაც ხმა მოესმოდა, სავსე გიდელს თოკს მოაშორებდა, ცარიელს დაუკიდებდა და ასძახებდა „მშვიდობით ჩამოდიო“. გიდელს მკრეფავთ შორის შუა ადგილას გოდორში „ჩაცლიდა“. ამრიგად, ერთი გიდელი მუდამ მარჯაფათ-სათადარიგოდ რჩებოდა, ამიტომ ერქვა გიდლის მცვლელი. გიდლის მცვლელი ასაკსაც გამოხატავდა „მაშინ გიდლის გამოცვლა შეემძლო“, იტყოდნენ.

ყურძნის კრეფას წინ უძლოდა სხვადასხვაგვარი სამუშაო და სამზადისი. მზად უნდა ჰქონოდათ საწნახელი (თუ სადმე უონავდა, ლერწმის თესლს დანაყავდნენ და მოზელდნენ, გააკეთებდნენ „საგოზაველს“ და მით „დაგმანავდნენ“. ხმარობდნენ აგრეთვე „ალიზა“ — აყალო — მიწასაც), ჭურები, ჭურის სარეცხი ხელსაწყოები — ორჩხუმი, „ორკოპე“, ჭურში ჩაასხამდნენ წყალს და ორჩხუმით რეცხავდნენ, ორკოპით კინარეცხ წყალს იღებდნენ: ორჩხუმს აკეთებდნენ „ძმერხლისაგან“ (ძმერხლი მაგარი, მუდამ მწვანე ბალახია. სიმაღლით ნახევარ მეტრზე მაღალი. ღეროს ფოთლები ადვილად არ სცვივა, ზამთარში საქონელიც დიდი ხალისით ჭამს. აყვაგების შემდეგ ლამაზ მარცვლებს ისხამს. დეკორატიულია).

მზად უნდა ჰქონოდა აგრეთვე ორწუბი (მწარე კვახისგან გაკეთებული დიდი კოპე — ხრიკა, ორლიტრიანი) — საწნახლიდან მაჭრის ამოსადები. ლაპოტი — ხიდან გამოთლილი ტარიანი ჯამის მაგვარი, რომლითაც საწნახელში ჩამდგარ ტერილს თუ მაჭარს „ამოხაპავდნენ“, ამოწრეტდნენ.

ამრიგად, როცა ყველაფერი მზად იყო ყურძნის კრეფაც გაჩაღდებოდა... თითქოს შეპირებული არიანო. კრეფას ერთსა და იმავე დღეს იწყებდნენ — მართალია, ყველა თავის „მამულს კრეფდა“, მაგრამ რაკი ეს „მამულები“ ერთიმეორეზე იყო მიჯრილი, ყურძნის კრეფაც ნადისებური — კოლექტიური იყო — ერთიმეორეს ხედავდნენ, ეხმაურებოდნენ, სიმღერა-ხუმრობა-ლაზღანდარობა-შაირობაში ეჯიბრებოდნენ. ეს იყო მუშა ადამიანების ცოცხალი ტელეფონი — შორეულ ტერიტორიაზეც კი. გურიანთელი რომ სავსე გიდელს გადმოუშვებდა და მხიარული სიმღერით გადმოიძახებდა ა-ა-ა-გიდელაა-იოო! მას მყის აყვებოდა მეზობლად მკრეფავი, იმას

კიდევ სხვა აყვებოდა და ამრიგად, მთელი სისწრაფით გადამ-
ღერება და გადაკიჟინება თავსურებამდე ავიდოდა... გურიის
საზღვარს მიაღწევდა და ტობახიას ტყე 'შეაჩერებდა მხოლოდ.

ა-ა-ა-გიიდელაა, და იო-იო... ზედიზედ — ტკბილ მუსიკად
გაისმოდა ყველგან. თუ ზოგჯერ ა-გიიდელას სიმღერა შეწყდე-
ბოდა, სამაგიეროდ, სხვა გასართობი იწყებოდა. ეს იყო მო-
თაღრეების ან ერთი სოფლის მეორე სოფელთან გაშაირება...
გურული საშაირო ლექსს უძლებდა და ცდილობდა მოპირდა-
პირესათვის „თავნინამთავნით“ გადაეხადა — უარესი ეთქვა:

მარიობისთვე დაგვიდგა
ცუდი დადგა დარებიო,
ბახმაროდან გადმოვიდნენ
უღლათ ჩემი ხარებიო,
ასკანლებმა გადუკოცნა
ბახველებსა ქალებიო.

ასკანელი მკრეფავი — ყარყუმე სიმღერის ხმით გადაუ-
ძახებდა მოსაზღვრე ბახველს — ასკანელი მკრეფავები მოწო-
ნების, თანხმობის ნიშნით ერთხმათ მიაყოლებდნენ.

ვიო-ვიო-ვიო-ვიო-ვიო.

ბახველიც უპასუხებდა.

სანადიროთ რომ წავედი
გამოვაცხვე მქადებიო,
ასკანლებს თვისიც გაურბის,
რათ უნდა სხვისი ქალებიო.

ბახველი მკრეფავებიც კვერს უკრავდნენ, უდასტურებდ-
ნენ და შესძახებდნენ... ვიო-ვიო-ვიო-ვიო...

ასეთი შაირების მთელი სერიაა — ერთი სოფელი მეორე სოფელს „ყბას უქცევს“, დასცინის... მაგრამ ეს ლექსები მეტისმეტად „სურნელოვანია“, „მწუთხე-კუჭიანი“ და ამიტომ მოყვანილი ნიმუში ვიკმაროთ.

ნადი ყურძნის საკრეფშიც იცოდნენ, ნადს ან თვით მასპინძელი მოიწვევდა, ან სხვას დაავალებდა — შემაწიეო. ხშირად ნადს მეორე და მესამე სოფლიდან მოიყვანდნენ. (30—60 კაცს, ხან მეტს). ცხადია, ნადის დროს მეტი მხიარულება იყო. მუშაობას „სისხამ“ დილაზე იწყებდნენ¹ და მზის ჩასვლამდე მუყაითად „მუშაობდნენ“ — „არც ხელს ასვენებდნენ და არც ყბას“. გურიაში ყბის არ მოსვენება მარტო ჭამას კი არ ნიშნავს, არამედ სიმღერას და მარილიან ოხუნჯობას — ყბაის ქცევას... ჯიბრი ყურძნის კრეფაშიაც იცოდნენ. ჩქარ-ჩქარა ვინც ა-გიდელას იძახოდა, ის ყოჩალი მკრეფავი იყო.

აგუნა. გურულისათვის ყველაზე მეტად „ბედობა“ და „საბძნილო“ დღე გახლავთ კალანდა — ახალი წელი. ძველად გურული ღრმად იყო დარწმუნებული, რომ კალანდას რასაც „დაიბეღებდა“ — რასაც კი ისურვებდა, იმითი მთელ წელიწადს, მეორე კალანდამდე უზრუნველი იქნებოდა. ამიტომ შუალამიდან იწყებდა სურვილების „გოდრით დადგმას“, მთელი დღე სურვილ-ნატვრით იყო გადაქცეული და ეს გრძელდებოდა 6 დღე მაინც — „ნათლიღებამდე“...

ამ სურვილების გამოთქმას ოჯახის წევრები იწყებდნენ

¹ ზოგჯერ ადრე დილით ხის ქვეშ ჩალაბულას ცეცხლს დაანთებდნენ. კვამლი ხეს შეათბობდა, ქირხლს მოაშორებდა და მკრეფავი მერმე გავიდოდა ზედ (დღე პატარა იყო და მზის მოცხოველებას ვერ მოუცდიდნენ).

ალიონზე — დალოცვისას, სადილზე და ბინდისას — აგუნას გადაძახების დროს.

აღსანიშნავია, რომ მუდამ სტუმრისა და „ჯარიანობის“ ნოყვარე გურული, კალანდა ღღეს მეზობლებს მოწყდებოდა. ამ ღღეს ის სასტიკად იცავდა ოჯახურ კარჩაკეტილობას, ალბათ, მისი რწმენით, ამით კერძო საკუთრების განმტკიცებას უწყობდა ხელს... კალანდას ყველაფერი ინდივიდუალური — ოჯახური იყო, ნატვრა და სურვილი მხოლოდ და მხოლოდ ოჯახს ეხებოდა — ეზოს არ გასცილდებოდა.

გურული მდიდრდებოდა ოჯახის საკეთილდღეო სურვილებით: კაცის სულით, ჯან-ღონით, ყოველივე „საყოლით“, ზოლო ღვინოს, მარანს, ვაზსა და მის ნაყოფს საღამოსათვის შემოინახავდა.

დაბინდებისას, მამრობითი სქესის ოჯახის წევრები დიდი და პატარა მარანზე მიიტანდნენ გობს, რომელზედაც ეწყობოდა ღორის თავი, სააგუნე ხაჭაპური და ერთი დოქი ღვინო. ოჯახის უფროსი შუა მარანში ჭურის თავზე, გობს დადგამდა, „სამ ღერ“ შინ ჩამოქნილ წმინდა სანთელს (სიგრძით 6—8 სანტიმეტრი) გობის სხვადასხვა კუთხეში სიმეტრიულად მიამაგრებდა და „მოუკიდებდა“, გობს სამჯერ წაღმა შემოატრიალებდა და ღმერთს ხმამაღლა შესთხოვდა — „მშვიდობის წელიწადი გაუთენოს მის ოჯახს, მისცეს უხვი მოსავალი ღვინის და ყოველგვარი „ნამუშიერის“... სასმისით დაღვევდა ღვინოს, ზედ დააყოლებდა ხაჭაპურსა და ღორის თავიდან ჩამონათალს — ერთ ლუკმას. სასმისს უფროსობის კვალობაზე სხვას გადასცემდა — თითოეული დალოცვის შემდეგ ღვინოს გადაკრავდა და სხვას გადასცემდა. დანაყრების შემდეგ იწყებოდა აგუნას გადაძახება — აგუნას სიმღერა. მიდიან

საწნახელთან, ყველას ხელში აქვს ან კომბალი — ყურძნის ჩასაქყლეტი ურო, ცული, ნაჯახი, როვოტანა (ხვედა), ან მოკლე, მაგრამ მსხვილი „ტუკი“. საწნახლის გარშემო ჩაირაზბებიან და მოიმარჯვენ „იარალს“. გადამძახებელი, ძლიერ ხმამალა მღერის:

აგუნა, აგუნა გაღმეიარე —
ბახვი, ასკანა გაღმოიარეე...

დანარჩენები ბანს შესძახებდნენ: ხო-ხო-ხო-ხო-ხო-იო. და რიტმულად ურახუნებდნენ საწნახელს...
გადამძახებელი განაგრძობს:

ჩვენს მამულში ყურძენიო,
მტრის მამულში ფურცელიო!

ბანები:

ხო-ხო-ხო-ხო და იო-იო!

გადამძახებელი:

ჩვენს ქალებს ჩერია — კვირისთავიო,
მტრის ქალებს „ჩხირი“ და ვირის თავიო.

ბანებიც უბანებდნენ...

გადამძახებელი ზურგზე „მოიკუტურებს“ პატარა ვაჟს, ჩამოეკიდება ხელით ვაჟს (ამით მან ისურვა ვაჟსაც ისეთივე მძიმე მტევნები მოესხა, როგორც მას ჰკიღია ზურგზე) და გადასძახებს, გადაიმღერებს:

ჩვენს მამულში გოდორ-გოდორიო
მტრის მამულში კიმპალ, კიმპალიო.

ბანებიც უდასტურებენ.

ეს სიმღერა-გადაძახება თითქმის ერთი საათი გრძელდებოდა — მთელი კუთხე-მიდამო, მთელი გურია, აგუნას განგა-შით იყო მოცული. ახლო მეზობლები სიმღერას ერთიმეორეს აცლიდნენ, ერთიმეორეს ყურს უგდებდნენ — ერთი რომ ერთ მუხლს იმღერებდა — მეორეს იმღერებდა მეზობელი. ამრიგად, სიმღერა, რახუნი, ბანი რიტმული და ჰარმონიული გახლდათ.

ქალაქის შრომის სიმღერა — ლილინი

როგორც კაცებმა, ისე ქალებმაც იცოდნენ ერთიმეორის ხელის წაკვრა, მოხმარება და ნადი. ქალების ნადში მამაკაცი არავითარ მონაწილეობას არ იღებდა. პირიქით, ქალების ნადასრულასაკოვანი ვაჟიც ვერ დაესწრებოდა. ქალები ქალურ საქმეს აკეთებდნენ, თავისუფლად იყვნენ. მათ სურვილზე მუშაობდნენ და ერთობოდნენ. ქალების ნადი მუდამ ლამიათ იყო. მეზობელი ქალები ერთიმეორეს ვახშობის შემდეგ მიეშველებოდნენ და შემოდგომა-ზამთრის გრძელ ღამეში ნაშუალამემდე მუშაობდნენ: თუ რა საქმეს აკეთებდნენ ამას ქვემოთ მოყვანილი სიმღერა-ლექსიდან მიხვდებით.

ძილო, ნუ დამეძინები
საბრალოსა მეო,
ქმარს პერანგი არ მიცვია
საბრალოსა მეო.
მოუსტავ და მოუკერავ
საბრალოსა მასო.

მასპინძელ ქალს 3—4 საათის მუშაობის შემდეგ ნადისათვის უნდა მიერთმია მსუბუქი ვახშამი, ეგრეთ წოდებული სე-

რის კული¹. თუ სერის კულს შეაგვიანებდნენ, ნადი სიმღერით
მოაგონებდა — ჩამოურაკრაკებდა.

სერის კული არ მაჭამა
მა სერის კულაო.
ვსტვლი, ვეეკლი, ვეეკლუცობლი,
მა სერის კულაო.

სიმღერა-ლილინი იცოდნენ მუშაობის დროს, ხელის შეუ-
ჩერებლად, მღეროდნენ უფრო ხშირად ორ პირად — ტექსტს
რამდენჯერმე იმეორებდნენ.

¹ სერი — საღამო, სერობა — ვახშობა, ალბათ, ეს სიტყვაც აქედან
არის — სერის კული.

II. დღეობა-დღესასწაულები

ექვს ათეულ წელს დავუახლოვდი. სიჭაბუკის ხალისი გაქრა. „სიბერემ კისერში ჩამკრა, ჩამიკაკუნა“, მაგრამ ერთ დროს ხომ მეც ვიყავ პატარა და პატარაობის დროინდელ შთაბეჭდილებებიდან თავისუფალი არა ვარ, და არც მინდა ვიყო. ვიცი, მჯერა, რომ ცელქი, ანცი სიყმაწვილის ნანატრი წუთი არასოდეს არ გამეორდება. მაგრამ სიყრმის ხანას ჟანც ვეტრფი, ველოლიავები: განვლილი და დახარჯული, ნანატრი წუთების მოგონება გულს ესალმუნება, ახალგაზრდობას, ახალ თაობას მაყვარებს. მიყვარს ცხოვრების უმანკო ყვავილები, მტრედივით მოღუღუნე ყმაწვილების დანახვა უკვდავ ვიქტორ ჰიუგოს ლექსს მაგონებს, რომლის შინაარსი ანეთია: „ცა ბნელი, პირქუში, უმთვარო, უვარსკვლავო, მინდორ-ველი გადახრუკული, უბალახო და უყვავილო, ხე უფოთლო და უნაყოფო — ოჯახი უშვილო“.

უშვილო ოჯახი დიანაც, რომ უბედურია, გამხმარი, უნაყოფო ხეა, გადასული, ამოწყვეტილი, უსიცოცხლო. ულაზათო და უხალისოა ისე, ვით უმთვარო ღამე.

ბედნიერი იყო მამაჩემის ოჯახი: დედაჩემი ორ აკვანს უე-

ლიდა „თავმონაწიერი“ შვილებით. არამც თუ წუხდა, არამედ კიდევც ამაყოფდა. ახლის გაჩენა ოჯახს არ აშინებდა, პირიქით, „ახლად შეძენილს“ ოჯახში ახალი სიამოვნება შემოჰქონდა... მამაჩემი მკაცრი იყო, შვილებს სპარტანულად გვზრდიდა, მაგრამ თავის დროზე, შესაფერი სიამოვნება, გართობა და ალერსი არ გვაკლდა.

მე დავიბადე 1872 წელს. ჩემს მოგონებათა წერას რვა წლის ასაკიდან ვიწყებ, მაგრამ ნურავენ იფიქრებს, რომ მე თითქოს აღვწერდე ჩემს პირად ცხოვრებას, პირად განცდას, პირად თავგადასავალს, ზოგიერთი, მართალია, პირადი შთაბეჭდილების მოგონებაა, მაგრამ უმეტესი ნაწილი კი შეკრებილია — მომსწრე პირთა მიერ გადმოცემული. მოგონებათა წერას ვიწყებ კალენდარული წესით.

საზოგადო საზღაღისი და შოგა

წოციერი, პოხიერი, ანუ, როგორც გურიაში იტყვიან, მსუყუე შობის გრძელი ხსნილი გათავდა. 14 გიორგობისთვის, აღების ღამეს, სრული ორმოცი დღით გამოვეთხოვეთ წიწიას და ჭაჭუას (ხორცსა და ყველს). თვით აღების ღამეს ხორცეული ოსე ბლომად მივირთვით, თითქოს აქლემის მოდგმისანი ვყოფილიყავით და შეგვძლებოდა 40 დღის საგზალი შემოგვენახა. მარხვის პირველ დღეს წინა ღამით ნახმარი ჯამ-ჭურჭლეულობა ოჯახის დიასახლისებმა დამდულრეს. გადაუფხეკელი და შდულარე გადაურებელი არც სუფრა დატოვეს. ეს იყო ერთგვარი დეზინფექცია, ხსნილის ჭუჭყისაგან გაწმენდა; დიდებს ასე სწამდათ და პატარებსაც შთაგვაგონეს, რომ თუ სახსნილი რამეს წაეკარებოდა, წაეწყდებოდი. ჯოჯოხეთისა და

რქიან-კუდიან ეშმაკების კი დიდი შიში და რიდი გვქონდა. მარხვის გატეხას კი შეეძლო ეშმაკის კერძი გავეხადეთ.

მართალია, ეს მარხვა ისე მკაცრი არ იყო, როგორც დიდი მარხვა, რადგან გარდა ოთხშაბათ-პარასკევისა, თევზის ჭამა არავის ეკრძალებოდა; მაგრამ იმ დროს თევზი — თუგინდ უბრალო ტარანი ან ქაფშია — უფრო ძნელად იშოვებოდა, და თან ძვირიც იყო, ვიდრე ხორციელი. ქათამი, ყველი და კვერცხი თითქმის ყველა ოჯახში მოიპოვებოდა. მთელი 40-დღე ლობიოს მრავალფეროვანი კერძი ენაცვლებოდა ერთიმეორეს: ლობიო ამოლესილი, კირკვალი, შეზელილი, ურწყულმოსხმული, ნიგვზით, ყარაოთი, ძალით, ტყემლის ტყლაპით, სირსვალი, ქონა მამაკალია, პარკად შენახული ლობიო, სულ ლობიო და ლობიო... იშვიათად კეჟერა მხალი და, თუ მის მოხარშულსა და მარილმოყრილ ხვიტს იჯრამდე გვაჭმევდნენ, სამაგიეროდ, წყალსა და ფიჩხს გვაზიდვინებდნენ. პირის ჩასატკობად გახლდათ შემწვარი ან მოხარშული ხაპი (გოგრაკვანი), რომელიც ძლიერ ხშირად საუზმისა და ვახშმის მაგიერობასაც სწევდა. ზოგჯერ ჯანჯუხასა (ჩურჩხელა) და ტკბილის კვერსაც ჩავაკნატუნებდით, მაგრამ ამას დამსახურება უნდოდა — კარგი ყოფაქცევა ან ცოტა „მოფულურება“ — მცირე ავადმყოფობა.

მარხვის დაწყების პირველ დღეებში ყურძენი, სულ რაღაც ოციოდე მტევანი ჯერ კიდევ იყო შერჩენილი ისეთ ხეებზე, რომლებზედაც გიდლის გატანა არც კი ღირდა. ბევრი იყო აგრეთვე ზღმარტლი, საზამთრო ვაშლი, ხეჭეჭური მსხალი, პანტა და კვიჭიჭა. ბავშვებიც ყველა ამათ მუსრს ვავლებდით, მაგრამ საზამთროდაც ვიმარაგებდით. ამ დროს პანტა (მაჟალო) მშვენივრად ინახებოდა, ბევრჯერ თოვლის აღების

შემდეგაც ხის ქვეშ ახლად მოწყვეტილივით ცოცხალი აგვიკრეფია. პირველი თრთვილის შემდეგ ხურმასაც არ ვიწუნებდით, მსხმოიარე ნაყოფით დახუნძლულ ტოტებს ვამტკრევდით და სამზადი სახლის სხვენზე ვინახავდით.

ხეზე გასვლა, მის კატარში (კენწეროში) მოქცევა ექვსი წლის გოგოსა თუ ბიჭს ყველას ეხერხებოდა. ერთი მარცვალის ყურძნის ან ერთი ვაშლის გულისათვის მაღალი „მოტიალი“ ხის კენწეროში ბევრჯერ „შემიპოპნია“. ხის წვერში გოგობიც მარდად შესრიალდებოდნენ, ოღონდ კი ხელთ ეგდოთ დედოფალას კაბის დასამშვენებლად ვენახის წითელი ბაბილო (ვაზის ფოთოლი).

არ იფიქროთ, რომ ჩვენ, ყმაწვილებს გვანებივრებდნენ, პირიქით, მუდამ გვქონდა ჩვენი შესაფერი საქმე: საბალახოზე ბატები უნდა გაგვერეკა, მისთვის თვალყური გვედევნებინა, ბატებისა და ღორებისათვის ხურმა უნდა ჩამოგვეყარა, გაშობილაში ძროხები გაგვედენა, რიყეში ფიჩხი „მოგვეხიკა“, წყალი გვეზიდა, ეზოში ჩამოცვენილი ფოთლებისათვის ერთ ადგილას თავი მოგვეყარა და სხვა მრავალი „სამოცვეთო“, „საციქციქო“ საქმე, რაც დიდის მოსაცდენად არ ღირდა, ჩვენ უნდა გაგვეკეთებინა. ოჯახის ყველა წევრი შრომობდა და ჩვენც გვაიძულებდნენ მათთვის მიგვებაძა.

დიდრონები კი ამ დროს ერთ „გაწამაწიაში“ იყვნენ. ზამთრის მოსვლას ყველა მეოჯახე მზად უნდა დახვედროდა. მამაკაცები შეშას და ჩალას იმარაგებდნენ, საქონლის დასაბამბინას გვიმრით ან ღომის ჩალით „ფუთნავდენ“, „კონახში“ საქონლისათვის პირის ბაგას აკეთებდნენ.

ძმებმა გაყოფა და ცალკე ოჯახად გასვლაც უფრო ხშირად ამ დროზე იცოდნენ. ამიტომ ძლიერ ხშირი იყო ნადი ნა-

დგამის ერთი ადგილიდან მეორე ადგილას გადასატანად. რაკი ისლი ახალ აღებული იყო, ახალი შენობის დახურვა ან ძველი სახურავის გამოცვლაც ამ დროს ხდებოდა. ერთი სიტყვით, შემოდგომის „თითის სიგრძე“ დღეს, იალონიდან მოკიდებული „თვალით დანახვამდე“, ყველა გაფაციცებით შრომობდა, ზოგი მთვარიან ღამეშიც არ ისვენებდა.

შრომა-გარჯილობაში კაცებს, არც ქალები ჩამორჩებოდნენ. ახლანდელი ქალებისა რა მოგახსენოთ და ჩემი სიყრმის დროინდელ ქალებს კი აუარებელი საქმე ჰქონდათ და დიდი ბეჯითებიც გახლდათ. მამაკაცი ბევრჯერ უმადურია, ოჯახის ბურჯი მე ვარო, გაიძახის, დედაკაცის გამუდმებულ შრომას კი არ აფასებს. მეოჯახე მამაკაცი თავისუფალ დროს დასასვენებლად ან დროს გასატარებლად ხშირად პოულობს. დედაკაცი კი ვერასოდეს ვერ ისვენებს. ქორწილი, ნათვლა, დღეობა და სხვა ამგვარი მამაკაცისათვის დროს ტარებაა, დედაკაცისათვის კი — დაუსრულებელი შრომა. ის ყოველ დროს ცეცხლთან ფუსფუსებს, მუდამ საქმობს. ძველად დედაკაცი მაინც არ წუწუნებდა, არ აყვედრიდა, როცა მისი მეუღლე მზა სუფრაზე სტუმრებთან ერთად შეზარხოშებული მრავალჯამიერს გაიძახოდა, ის ამ დროს „წამოსამატს“ ამზადებდა, წვადს წვავდა, ხაჭაპურს აცხობდა, ღომს ამზადებდა. თავის ხვედრის სრულიად კმაყოფილი, სახეგაბრწყინებული ასრულებდა საქმეს.

დედაკაცის საქმე ოჯახში ყოველთვის დაუღეველი, დაუსრულებელი იყო, მაგრამ შემოდგომაზე „შობის მიწურულში“, ყოველდღიური, ჩვეულებრივი საოჯახო საქმის გარდა, მას სხვა ბევრი საქმეც უჩნდებოდა: საშობ-საკალანდოდ დედაკაცს ოჯახის წევრებისათვის უნდა მოექსოვა შინაური შა-

ლი — საჩოხე და „საკვართუე“, საპერანგე ხამი და ხელით უნდა შეეკერა (ზინგერის საკერავი მანქანა სოფლად არავის არ ჰქონდა). დედაკაცები დახელოვნებული იყვნენ გვირის-ტით მკვიდრი და ლაზათიანი ნაკერის გამოყვანაში, რომელიც ზოგიერთ „მოდისტკასაც“ კი შეეშურებოდა.

შემოდგომის გრძელ დამეში ქალების ნადი ხშირი იყო. ქალი, ოჯახურ საქმეს რომ მორჩებოდა, ივანშმებდა და მერმე მეზობელ ქალს ეშველებოდა. ქალთა ნადის საქმე გახლდათ: მატყლის დაკეკვა, დაჩეჩა, „შესტვა“, მოტოლვა და მოძახვა, ბამბის დაჩიხრიხება, მისი ძაფად ქცევა, ლერწმის გარჩევა სა-ძაფედ, „ბურღლის“ (ბუმბული) დაკეკვა და სხვა მრავალი. ნადში ქმრიან ქალებზე მეტი გასათხოვარი ქალიშვილები ერივნენ, რომლებიც გამოცდილი და დაოსტატებული ქალების ხელმძღვანელობით საოჯახო ქალურ საქმეში იწაფებოდნენ.

სასიამოვნო რამ გახლდათ ქალების ნადი: შეჯიბრება, ერთმეორის საქმეში, ზღაპარში, ასახსნელში, ჩქარა გამოსათქმელსა (სულმოუთქმელად), შეუწყვეტელ სიმღერაში. ხშირად ერთ-ერთი ქალი, ზოგჯერ რიგრიგობითაც, ჩონგურს ან კიანურს უკრავდა, სხვები ღიღინზე ეშველებოდნენ. ხშირად გასათხოვარი ქალის ბედი ქალთა ნადზე წყდებოდა — აქ მოიყვანდნენ გამსინჯავად სადედამთილოს ან მომავალ მულს... ქალების ნადის ყურება წარმტაცი და სასიამოვნო რამ იყო. მაგრამ ამას ვერ დაესწრებოდა ასაკში შესული ვა-ყები. მხოლოდ მცირეწლოვანებს შეეძლოთ დამტკბარიყვნენ მოსაქმე ქალების მარილიანი ოხუნჯობითა და სიცილ-ტკარ-ცალით. ზოგჯერ ახალგაზრდას მოუსურვებია ლაზღანდარა ქალების „წაყურება“ და კარიდან მიუღარაჯებია. ქალებს მზვე-

რავი, აბეზარი თვალი ძნელად გამოეპარებოდათ და მოულოდნელად კარს ისე სწრაფად გააღებდნენ, რომ ვაქს ცხვირიდან სისხლი დაედვარა — შემდეგ კი ცივი წყლით გააგრილებდნენ ღამის რაინდს. ყოველივე ეს განზრახ კი არა, თითქოს უცაბედად ხდებოდა.

სამი, ოთხი საათის მხიარული, მაგრამ ბარაქიანი მუშაობის შემდეგ ნაღს მეოჯახე ქალი მიართმევდა „სერის კუდს“. ვახშმის მაგიერ კი ელოდათ „სამხიო“ საჭმელი: შემწვარ-მოხარშული ხაპი, ჯანჯუხა, ტყბილის კვერი, ფელამუში, მსხალი, ვაშლი, თხილი და სხვ. ცხადია, ვისაც მოესურვებოდა, ცოტაოდენ ღვინოსაც დააყოლებდა ზედ. ვახშმის შემდეგ ქალების ნადი მუგუზლით ხელში თავიანთ ოჯახებში წავიდოდა.

ძლიერ ხშირად ბეჭითი დედაკაცები „გატიალებას“ 2—3 საათით დაასწრებდნენ, ადგებოდნენ და გაჩაღებულ ცეცხლთან ხელსაქმობდნენ. ცეცხლი ყველა ოჯახში თითქმის გაუქმებული იყო... დაწოლის წინ ცეცხლის გამტან მუგუზალს დადარს მიაყრიდნენ — შეახვევდნენ და თან იტყოდნენ: „ცეცხლო, ელოდე, მელოდე, მე მელოდე, მზეს ელოდე, მთვარეს ეთაყვანებოდე, დილით ადრე ადგებოდე, დოჩხაური! დამხედებოდე!..“

დადგა შუამარხვა, „ბარბარობა“ დღე. ორი სამი დღით ადრე მეოჯახე კაცმა ტყეში მოჭრა ველური თხილის წმინდა წნელი, მოიტანა სახლში და მოლობა ძარა, ანუ სასუქი. „ბარბარობა“ ქათმების პატარა დღეობაა. ამ დღეს, დილით ადრე მეოჯახე ქალი ქათმების დაპურების დროს დაიჭერს წინათვე

¹ დოჩხაური — დანაკვეთილზე, ცეცხლის დიდი ნაკარისლები დოჩხირი შეგარულად ცეცხლია.



კ ე რ ი ა

დანიშნულ ქათმებს. მან, „ასი ფრთა“ ქათამიც რომ ჰყავდეს, თითოეულის „მეტრიკა“ და დამსახურება კარგად იცის. სა-

სუქში დასამწყვდევად და შემდეგ დასაკლავად ის არჩევს ბე-
ბერს, ნაკლებად კვერცხისმდებელს, ცუდ „მკეკელს“,
ფრთხუს, უვარგის „მოკვას“ და, საერთოდ, ისეთს, რომელიც
სათესლედ და სადგამურად არ გამოდგება, აგრეთვე ყვე-
რულს—ჭაკოდილს, რომელიც საგანგებოდ საკაიდლოდ ჰყავს
გამოზრდილი. „ბარბარობას“ დაქერილი ქათმების განწირული
კრიახი, დეზებიანი სახლის მამლის ფაფხური, ჩვენ, ბავშვებს,
სიამოვნებით გულს გვიფართქალებდა. კარგად ვიცოდით, რომ
ოცი დღის შემდეგ მსუქანი ქათმის „წიწია“ ლობიოს შესცვ-



ს ა გ ა თ მ ე

ლიდა. ამ დროს ოჯახიდან რაიმეს განათხოვრებას „იბრძინდნენ“, სწამდათ, რომ ავხელს შეიძლებოდა ქათმის მომრავლება გადაჰყოლოდა. დაუცდელი ფეხის სტუმრობაც არ მიაჩნდათ სასიამოვნოდ.

ერთი კვირის შემდეგ განსაკუთრებულ ადგილას საგანგებო სამწყვდევეში ჩასვამდნენ ღორს, ჩვენ მისი ჭყვირილიც კი გვსიამოვნებდა, რადგან ვიცოდით, მას საკალანდოდ კისერში გალესილ დანას „გაულიტინებდნენ“ და მის ხორცს ბევრჯერ ვიგემებდით.

ქათმებიცა და ღორიც სასუქშია, ოჯახის წვრილფეხობას ადრე ადგომა გვეხალისება: ყველა ჩვენგანი ცდილობს სხვას დაასწროს და სასუქში მყოფთ „კეკალი“ დაუყაროს, წყალი დაუსხას. თან უთხრას: „სუქ, სუქ, სუქ!“ ღორი პირველ დღეებში პატივს იფერებს, ხარბად ჭამს, სიმინდის დაყრის დროს როთინით გვხვდება, შემდეგ კი, როცა სიმსუქნე სძლევს, საჭმლით გულს „იმსუყებს“, ზარმაცობა ეპარება, უხალისობა ეტყობა, წვება და ნებივრობას იწყებს.

შობის დღესასწაულის მოახლოება, მიუხედავად ასაკისა, ოჯახის ყველა წევრს ახარებს და ახალისებს, თითქმის ყოველ საღამოს ანგარიშობენ, თუ რამდენი დღე დარჩა ბედნიერი დღის გათენებამდე.

... სიცივემ იმატა, ცეცხლი გატკბა. შემოდგომის სტუმარი ფრინველები ბოლოშავი და ჩიჩხინაკი მწიფე ხურმას და მსხლის „მადას“ (ფითრს) ხარბად შეექცევიან. მასპინძელი შაშვი და ჩხართვი ხურმის გარდა, სუროს მარცვლებსაც არ იწუნებენ. ლენჰუკოში ჩიბუხა ტყის ქათმებიც გამოჩნდნენ, ნადირობაც გაჩაღდა. დიდრონები, მოზრდილი ბიჭები ჩიტებს საჩიტე ფილთით ან ყავალი თოფით ხოცავდნენ, თოფის წა-

მალს ყიდულობდნენ, საფანტს კი ტყვისისაგან თვით ასხამდნენ.

ახალგაზრდა ვაჟები ხეებზე ჩიტებს უგებდნენ მახეს, ირენჭკას — „რენჭკას“. ირენჭკა მშვილდის მაგვარია, თხილის ნედლი წნელისაგან კეთდება, წვრილ თოკგაყრილი, აწყობის დროს მშვილდივით იზნიჭება. მოჭიმულ ირენჭკას ნახვრეტში რიკის შედებით აჩერებენ. რიკზე გადაკიდებულია ორტოლა გასანთლული წვრილი თოკი; ჩიტის მოსატყუებლად რიკის პირდაპირ ჰკიდებენ ღომის თაველს ისე მოხერხებულად, რომ ჩიტი თუ რიკზე არ დაჯდა, ისე მარცვალს კენკვას ვერ დაუწყებს. რიკზე დაჯდომა და მახის აშლა ერთია. ჩიტს ფეხი უსხლტება და თოკი ცალით ან ზოგჯერ ორივე ფეხით იჭერს, ხშირად ფეხებს ამტვრევს. ირენჭკას აგებენ ისეთ ხეებზე (სუროიან ან ხურმის), რომლებსაც ჩიტები ბლომად ეტანებიან. ბევრჯერ ერთ ხეზე რამდენიმე ასეთი მახეა „აწყობილი“.

6—8 წლის ბავშვებიც ჩიტებზე თავისებურად ნადირობდნენ, ნალის ქვეშ აგებდნენ ირენჭკას მსგავს მახეს „თავკავას“, იჭერდნენ წვრილ ჩიტებს: ბელურას, სკვინჩას, თავშავას და ყელწითელას, ლენჭყოში კი ძუის მახით — ტყის ქათმებს.

მონადირეს თავის მფარველ „ანგელოზათ“ ივანე მახარობელი სწამდა; აქაო და ივანე მახარობელი უდაბნოში ნანადირევით იკვებებოდა, ამიტომ ხატრს არ გაგვიტეხს და, თვით მონადირე, ჩვენც დაგვეხმარებაო. თოფის გატენისა და მახის დაგების დროს, ივანე მახარობელო, ხელი მოგვიმართეო, შესთხოვდნენ. მონადირეს ვინც შეხვდებოდა, გამარჯვებასთან ერთად, ივანე მახარობელი შეგეწიოსო, უნდა ეთქვა.


თოფის გავარდნის ხმის გაგონებას ან ირენჭკას, ბავშვები ალტაცებაში მოჰყავდა. ირენჭკას აშლისთანავე მყის მოჰყვე-

ბოდა ფეხებდამტვრეული ფრინველის განწირული წრიპინი. მახის დამგები ხელად შესრიალდებოდა ხეზე, მახეს ისევ ააწყობდა და ნანადირევი ოჯახში მოჰქონდა. სამზადი სახლის კარებთან მონადირეს მეოჯახე ქალი მუჭით ნაცარს შეაყრიდა და თან ეტყოდა: „კიდევ ამდენი, კიდევ ამდენი, შენი ავი თვალითა და ავი გულით შემხედვარეს თვალში ნაცარი, გულში ლახვარი, ივანე მახარობელი იყოს შენი მფარველი!..“ ფრინველს მაშინვე ცივ წყალში დაასველებდნენ, ცხელ ნაცარში ატრიალებდნენ და თან ამბობდნენ: „ასვარია, დასვარია, შენი დედა, შენი მამა, შენი ძამიე, შენი დაიე, შენი ნახული, შენი უნახავი, შენი ნაცნობი, შენი უცნობი — ყველა აქანაი დასვარია“. ცხელი ჩიტი ცოტა ხნით მიტყუპულ ფეხებს შუა ეჭირათ და შემდეგ გაპუტავდნენ, ანუ „გაბურღლავდნენ“.

ჩიტებზე ნადირობა უფრო „ხვავრიელი“ მაშინ იყო, როცა თოვდა, მეტადრე თუ „ბარდნიდა“, ასეთ „ყიამეთ“ ტაროსში, ჩიტებს თოფით ახლოს ეპარებოდნენ და მახეშიც მეტი მოჰყვებოდა. წვრილი ჩიტები თავს აფარებდნენ და საზრდოს „ყუდროში“ ეძებდნენ, გადახურულ შენობაში, სხვათა შორის, ასეთი იყო ის საგანგებო შენობა, საცეხველა, საცა ფეხის ჩამური ედგათ და ღომს ცეხავდნენ. საცეხველას ყველა ჰუჭურუტანებს „დაგმანავდნენ“ ისე, რომ ჩიტი არსად გამძვრალიყო, ღიას სტოვებდნენ კარს, რომელსაც ზემოდან „საჩხინავში“ ბადეს აფენდნენ. საცეხველაში ბლომად უყრიდნენ „ნახორს“. მშიერი და სიცივით შეწუხებული ჩიტები „ნახორის“ კენკვას არხეინად იწყებდნენ, მაშინ უეცრად კარს დახურავდნენ. დამფრთხალი ჩიტები სინათლეს მიაშურებდნენ და იქ ბადეში მოჰყვებოდნენ. საცეხველა ქალებს ეკუთვნოდა და იქ მხოლოდ გოგოები და ქალები ნადირობდნენ. მათ

არავინ ეცილებოდა. პატარა გოგო-ბიჭები, ნალიის ქვეშ ან სახლის მახლობლად ჩიტებს რაგვსაც უგებდნენ. მოკლულ ჩიტებს გაპუტვის შემდეგ „გამოშიგნავდნენ“, დაამარილებდნენ და ინახავდნენ ან დიდრონ ქოთნებში, ან დერგებში (ხალამი). ზოგიერთ ოჯახს ასობით ჰქონდა საშობაოდ შემონახული „გაპუნტულებული“ ჩიტები.

შობის მარხვა მიიწურა, „ჩიჯაზე“ მიდგა. ლობიო მთლად



წიხვილი

გაუგებურდა, ხსნილამდე „ერთი სული გვაქვს“. შობის წინ, 4—5 დღით დაასწრეს და ქალებმა კვერცხები მაგრად მოხარშეს. მის „გარჩევაში“ ჩვენც ვიღებდით მონაწილეობას, ვიხვეწებოდით კიდეც, პატივი ეცათ. მოხარშული კვერცხის ხელის შეხებაც ჩვენთვის დიდი ბედნიერება იყო, მსუნაგ კატასავით შევეცქეროდით, ნაჭუჭმოსორებული კვერცხი არ გვინდოდა ხელიდან გაგვეშვა, „ჩვენი სული კვერცხში იყო“, მაგრამ მარხვის გატეხას ვინ გაბედავდა. მოხარშული კვერცხები ჩეჩოზე დააწყვეს და ოჯინჯალაზე გამოჰკიდეს. ცეცხლის სიმხურვალით კვერცხები ხმება, იმკვარტლება, ქვასავით მაგრდება. გვიხარია, ვჭყლოპინობთ, საქმეს ხალისით ვასრულებთ, ვიცი, რომ ეს კვერცხები ჩვენი მუცლის სალოცავისა და საშობო ღვეზელისათვის უნდათ.

მხიარულება ჩვენ, პატარებს კი არა, დიდებსაც დაეტყოთ, წარბი გაეხსნათ. ტოლ-სწორი გოგო-ბიჭები თავს ვიყრით და სხვადასხვა თამაშობით ვერთობით: „ხვალ შობა, ხვალ შობა, ჩვენი მტერის დარჩობა“. ხშირად ზოგიერთი ცელქი და გაბედული, რომელიმე „წაუკარებელი“ მეზობლის სახელს ჩაურთავდა, მაგრამ თუ უფროსი მოჰკრავდა ყურს, „პირზე ხელს მიაფარებდა“, შეიძლება ყურებიც აეწია.

შობის წინა დღე — „ბრავაწობა“ — გათენდა... ჩვენ სიხარულს საზღვარი არა აქვს. ეს ერთი დღეც და გველირსება გახსნილება. კანში ვერ ვეტევი. გვიხარია, ერთიმეორეს აღარ ვებაძებით, ოღონდ კი რაიმე დაგვსაქმონ და შესასრულებლად კრიმანჭულით გავრბივართ, ვსიამოვნებთ და უფროსებსაც გვინდა ვასიამოვნოთ... „ბრავაწობა“ დილით ოჯახის უფროსმა მეზობლიდან რამდენიმე ოყა „ყირიმის“ თეთრი პურის ფქვილი მოიტანა. ფქვილის გამყიდველი გახლავს ერთი მხნე

მეზობელი, კურტნიანი კარგი ლაფშა ცხენის პატრონი, ხშირად ფოთში დადის, ჩალვადრობს, თან მიაქვს: ხილი, სიმინდის ფქვილი, ღომი, ღვინო, არაყი; იქიდან კი დროს მიხედვით მოაქვს: ტარანი, ფარგა, მარილი, პურის ფქვილი. ოჯახში აქვს სასწორი — „ყანთარი“ და მეზობლებში ყიდის. ეს იყო მაშინ ჩვენი კუთხის დუქანიც და „კომპერანტიაც“. თეთრი პურის ფქვილის შექმნა ყველას არ შეეძლო, კმაყოფილდებოდნენ შინაური თალხი პურით, რომელიც ზოგიერთებს იმდენი მაინც მოჰყავდათ, რამდენიც საკაიდლოდ ეყოფოდათ.

დედაკაცები დილიდანვე შეუდგნენ სახვალიო სამზადისს: პურის ფქვილი მოზილეს და რომ „წალუებულიყო“, ამიტომ სალამომდე თბილად შეინახეს. სასუქიდან ორი ქათამი ამოიყვანეს, დაკლეს, გაპუტეს, „აჩარიქეს“ და ქოთნით ცეცხლზე შემოდგეს, ნიგვზით შეკაზმეს, ხმელი სუნელით შეაზავეს, ზაფრანით ფერი მისცეს და ამრიგად, მისი სუნი მომაკვდავსაც ჰამას მოანდომებდა. ასევე „ჩააზუბზუბეს“ ერთი კარგა მოზრდილი ქოთნით დამარილებული ჩიტები.

სალამო უამს გაახურეს კეცები და დააცხვეს ღვეზლები და მუცლის სალოცავი კვერები. მუცლის სალოცავი პატარა-პატარა კოკრებია ყველით გატენილი და შუაზე ერთი გამხმარი კვერცხია დატანებული, ყველა ერთი ზომისა და ღირსებისაა. ღირსება ყველისა და კვერცხის მეტნაკლებობაშია და თითოეულ სულზე თითო ცხეება. ღვეზელი სამკუთხედიანია, ამასაც სათითაოდ აცხობენ, მაგრამ ის არაა ერთი ზომისა და ღირსების; აცხობენ საუფროსოს და საუმცროსოს, ზოგს თითო 4—5 კვერცხს „მიურთავდნენ“ და ისიც მთელს, ზოგში 2—3 შუა გაჭრილ კვერცხს დააყოლებდნენ. განსაკუთრებით გამოაცხობდნენ აგრეთვე სასტუმრო და მეალილოეს საჩუქარ

ღვეზელს იმის მიხედვით, თუ ვის როგორ მოსწონდა თავი ან როგორ „მოედონისკარებოდა“.

„ბრავაწობის“ ჩვეულებრივი ვახშამი, ხაპიც, გვაჰამეს, თავიც დაგვაბანინეს — „დაგვახვინჭილეს“. ჩვენი ძილის დროც არის, მაგრამ „კერიასთან“ მოსაქმე ქალებს მაინც არ ვშორდებით, ახლად გამომცხვარი ღვეზლის სუნი გვხიბლავს. გვიჯავრდებიან, გვიბრძანებენ, რომ დავწვეთ, ადრე დავიძინოთ, რადგან ხვალ „ცის ალიონზე“ უნდა ავდგეთ. ურჩობას ვერ ვბედავთ, ვწვებით, დაწოლის წინ, ტანისამოსგახდილი, პირჯვარს ვიწერთ და ვამბობთ: „დავწვები დამეძინება, პირჯვარი დამეწერება, ცხრა ხატი, ცხრა ანგელოზი სასტუმალს დამესვენება, ჯვარი მწყალობს ჯვარცმული, ვერას მაწყენს მაცდური, მწყალობს წმინდა გიორგი, ჯვარი პატიოსანი“... (ვისაც, ჯერ კიდევ პატარას არ შეეძლო ეს ლოცვა ზეპირად ეთქვა — მის მაგივრად ამბობდა დედა ან ბებია — მესამე პირში: „დაწობა დაეძინება...“ ვწვებით მაგრამ ღვეზლის ჯავრით დიდხანს არ გვეძინება, ყველას ვეხვეწებით მეალილოეს მოსვლა არ გამოგვაპარონ და ჩვენც გაგვალვიძონ...

გვალვიძებენ... ხელად ვიღვიძებთ და დედას ვეკითხებით:

— რა იყო ნენა, მეალილოე მოვიდა თუ?!

— რაღა დროის მეალილოეა, შვილებო, იგინი რომ მოვიდენ, მაშეინ თქვენ ახალ ჩაძინებული იყავით, ქე გაღვიძეთ, მარა სული ვერ ჩაგიდგით... მამალმა იალონის კიდეც შეიყივლა, ადექით, ტანზე ჩეიცვით, ხელ-პირი დეიბანეთ, პირჯვარი გამეისახეთ და გევიხსნილოთ. „ხაციცი“ მზათ არის (ცხელი, ქაფქაფა ღომი და ჩაზუბზუბებული ჩიტები).

სწრაფად ვდგებით, ცოცხლად, ერთიმეორეს ვასწრებთ

ტანზე ჩაცმასა და ხელ-პირის დაბანას. ხელპირდაბანილი, თმადავარცხნილი მაშინვე დედასთან მივდივართ, დედაც სათითაოდ იღებს ხელში მუცლის სალოცავს, თითოეულს სამ-სამჯერ გვავლებს მუცელზე და ილოცება: „ამისი მუცლის ტკივილი აღმა ქარს, დაღმა წყალს“. მუცელზე შემოვლებული კოკრები მაშინვე შევჭამეთ, ერთიმეორის თავაზობა, თუგინდ ერთი „ფინჩხას“ მიცემაც არ შეიძლებოდა, რადგან ნატეხს ნუცლის ტკივილი გადაყვებოდა და სხვისი ავადმყოფობა ვის რად უნდოდა. რაკი მუცლის სალოცავი მთლიანად შევჭამეთ, ამით მთელი წელიწადი, მეორე შობამდე, მუცლის ტკივილისაგან დაზღვეული გეახელით, ასე გვეგონა მაინც.

გაჩაღებულ ცეცხლის პირად, ცეცხლისა და ქონის ჭრაქის სინათლეზე ოჯახის წევრები შემოვუსხედით დაბალ საოჯახო სუფრას და გიახელით შობის საუზმე „ხაციც“. მშვენიერ საუზმეს, რასაკვირველია, არც ღვინო აკლდა და თითო ჭიქა ჩვენც დაგვალოცინეს. ჯერ კიდევ ისე ბნელოდა, რომ ზოგიერთი „ალატარიე“ გათენებამდე ერთ წაძინებასაც მოასწრებდა.

გათენდა. ყველა ოჯახში მხიარული და კმაყოფილი ყრამულია. „კისრამდე“ გამძღარი ბავშვები ცელქობენ, თამაშობენ, მღერიან, დღეს შობაა, დღეს შობაა, გაიძახიან, ზოგნი ალილოსაც ამბობენ. ალათასა, მალათასა, ხელი ჩავყევე კალათასა, აი ალილოო დაა..

წირვის დარეკეს, გარდა სახლის მცველისა (იგივე სადილის გამკეთებელიც), ყველანი საყდარზე წავედით: ჩვეულბრივ სადად, „ჩალინჩათ“ ჩაცმული თითქმის არავინ არის, შეძლების კვალობაზე ყველა ცდილა „გამოპრანჭულიყო“, საგარეო ტანისამოსი ჩაეცვა. გლეხებს თითქმის ყველას შინ ამოსხმული თავისივე ხელით შეკერილი ქალამანი აცვია. ხანში

შესულებს — „მოკოპილი“, ახალგაზრდებს კი წულის მაგვარი მეგრული, უფრო კოხტა, მაგრამ ნაკლებად თბილი.

წირვის დადგომის დაირეკა, ყველანი ეკლესიაში შევიდნენ. კაცები წინ დადგნენ — საკაცებოში, ქალები კი კაცების უკან — საქალებოში. აზნაურები, სასულიერო წოდების და შეძლებული გლეხები, კაცებიცა და ქალებიც თავის უპირატესობას აქაც არ ივიწყებენ და ეკლესიაშიც სხვებზე წინ ამყადდებიან, ყოყობენ. ხატის წინ სათითაოდ მიდიან და შინიდან მოტანილ, ოჯახში ჩამოქნილ სანთელს ანთებენ, გარეგნულად მაინც სასი.ებით ლოცულობენ...

მღვდელ-დიაკონი იჩქარის, შიმშილიც აწუხებს და სხვა საქმეც აქვთ, საშური და საშოვნი. გამოწირეს. მღვდელ-დიაკონი „სტაროსტის“ თანხლებით ეკლესიიდან გამოვიდნენ და იქვე გალავანში სასაფლაოებს ესტუმრნენ. გარდა „უპატრონო მკვდრისა“, თითქმის ყველა საფლავზე მზად არის საკურთხი, კალათაში აწყვია: ღვებელი, შემწვარი წიწილა, დოქით ღვინო და სანთელ-საკმელი. შემოსილი მღვდელი საცეცხლურით ხელში რიგრიგობით უვლის ყველას და აკურთხებს: განუსვენე უფალო სულსა მონისა (ან მხევლისა) შენისა, სული მისი დაამკვიდრე წიაღსა შინა, აბრამისასა...

„სულიერ“ მამას თან დაჰყვება „ხარჯთამკრეფი“ შეილი, მოჯამაგირე ან სადიაკონოდ აყვანილი, რომელიც უკვე დაკურთხებულ ხორაგს დიდ ხურჯინში და ღვინოს მოზრდილ კურჭელში — „ჭარიკაში“ — აგროვებს. საკურთხის ღვებელი მაინცდამაინც არ იყო საგულდაგულო. აცხობდნენ ისე, ფორმის გულისათვის, მდარეს, მეტადრე მიცვალებულა თუ გამოგლოვილი, ძველი იყო. ნადავლს მღვდელი და დიაკონი იყოფდნენ, ორი წილი — მღვდელს, ერთი — დიაკონს, ცოტა რამეს „სტაროსტასაც“ ახვედრებდნენ.

ეკლესიიდან გამოსული ხალხი შინ წასვლას არ ჩქარობდა, იყო ერთიმეორის მისალმება, ამბების გამოკითხვა, თუთუნის შეთავაზება... საერთო ამბავი — „მომენტის საკითხი“ — წუხანდელი მეალილოები გახლდათ.

— ვინცხა იყო ამ ლუსკუმა ღამეში და იგიც თავპირახოული, რაფერ მეცნო, მარა ისე კი ცხონდა მამისი, გაიდონასავით ტკბილი ხმაი ქონდენ.

— უკაცრავათ, სიტყვას დაგეცილე, მარა იმედია მაპატიებ, ძალუანი ხმაშეწყობილად კი გალობდენ.

— სწორია თუ პროტი იგი არ ვიცი, მარა ასე ჩივიან წუხელის გამთენიეს ჩვენი სოფლის მეალილოებს შეხვედრიან მეორე სოფლის ყეიმას ბიჭები, დაუძახიან და მოუნდომებიან ერთიმეორის გაქუცვა, მარა ორივე კედრით მაგრად ყოფილარიან, მერე შერიგებულარიან და ასე მშვიდობით ქე გათავებულა აგი ამბავი.

— ღვეზლის გულიზა ამ ბედნიერ დღეს ერთიმეორის დახვედრა ვითამ რავა იკადრეს.

— ღვეზლიზა კი არა, ვაჟკაცობიზა, რომელმა რომელს ვაჯობოთო, თვარა ალილოზე ვინც იარება იგი შენი ღვეზლის მშიერი არ არის.

რიგი რომ ასე ბაასობდა, მეორე რიგი, სოფლის პირობაზე უფრო საპატიო პირები, ქალებთან მასლაათობდნენ. როცა გული იჯერეს, ნელ-ნელა სახლისკენ წასვლა იწყეს.

გალავნიდან გადმოსვლამდე ოჯახის მამაკაცი ჯარში შერეულ თავის ნათლიმამას ეძებდა, მისი მეუღლე კიდევ თავისი ნათლიდედას არ შორდებოდა, „ბუდუას“ (ნათლიას) წუხელის „ნათლულიდან“ საშობო ძღვენი მოუვიდა. ფიჭვის ყვარზე დაკრული 30—40-კვერცხიანი „საიასალო“ ღვეზელი

„კურტუმჩაყვითლებული“ ყვერული, ფინჩხაურით ჩხავრის ღვინო და ნათლულის ნახელავი წინდა. სამაგიეროდ, ღღეს მოყვრებმა სადილი ერთად უნდა ჭამონ, ძღვენის — მოსაკითხის — გამომგზავნი ნათლიამ უნდა დაპატიჟოს და სტუმრებიც მოუპატიჟოს. სამაგიეროს ისიც გადაუხდის — იქასაც თავის დრო აქვს.

— რა არის ოჯო, რეტუმ იკადრებთ, რაცხა პაწეი, გამოსაჩენათ რომ არ ღირდა, მოსაკითხი გამოგზავნე, რომ ღირდა ათი იმდენი მომტანიზა გეჩუქებია და სირცხვილში რეიზა მაყენებ, ღღეს კიდევ რელაიზა იხარჯები.

პირის გამოსარეცხათ ბოდიშობს ნათლიდედა, თორემ ისე სახლში უკვე დაიბარა, რომ ის ღღეს სადილად შინ არ მოვა, ბუდუასას იქნება.

ნათლიმამა თუ სხვა სოფლის მცხოვრები იყო, ნათლიას წინ ღამით ძღვენს გაუგზავნიდა და მეორე ღღეს კიდევ ესტუმრებოდა.

ნათლია თუ თავადი ან გავლენიანი აზნაური გახლდათ, ან ბობოლა „ჩინოვნიკი“, მაშინ 60-კვერცხიან ღვეზელს გამოუცხოზდნენ და გარდა კვერცხისა, ახალ მოკლულ 10—15 მსუქან შაშვს, წინასწარ „მონწალულს“ (მდუღარეში ცოტა ხნით ნამყოფს) ჩაურთავდნენ, რომელიც ღვეძლის ცხოვის დროს შეიწვებოდა. ჩხავრის ღვინოსთან ერთად ასეთ ძღვენს ახლდა სანთლის არაყიც.


შობის სადილი იყო „ძირდადგმული“, დარბაისლური. სიმღერა, თოფის ან ფიშტოს სროლა, ჩონგურის დაკვრა და ზედ დალილინება, ცეკვა, ჭამის მადას აღიზიანებდა, მასპინძელი ქალიც წამოსამატს, მწვადსა (შემწვარ ჩიტებს) და ხაჭაპურებს არ ზოგავდა, აურზაური, ჩხუბი წარმოუდგენელი რაჲ იყო.

როგორც სიამტკბილად დასხდებოდნენ, ასევე მოყვრულად გამოეთხოვებოდნენ ერთიმეორეს და გამომშვიდობებისას იტყოდნენ:

— გაის ამ დროს კიდეც ასე კარგად მყოლოდეს თქვენი თავი.

— თქვენიანებ, თქვენიანებ, და თქვენი კარგად ყოფნით,— უპასუხებდა მასპინძელი.

შობის მეორე დღე — „შობის დედაც“ — უქმე იყო და პირის გემო და სიამოვნება ამ დღესაც არ აკლდათ.



ლომის საცეხველა

აღდგომა და მასთან დაკავშირებული

თამაშობა-გართობა

გურულს ძლიერ ბევრგვარი დღესასწაული, ხატობა და სხვადასხვა რიტუალი აქვს და, მაშასადამე, მრავალგვარი მიზეზიც აქვს გაერთოს, ისიამოვნოს, ჯარში გაერიოს, თავი ისა-

ხელოს, მასზე სხვები ალაპარაკოს. ყველაზე მეტად კი ეს მას ეხერხება აღდგომის დღეებში.

გურულს ყველა „ღღესასწაული“ უყვარს, მაგრამ კალანდასა და აღდგომას არაფერი ურჩევნია. აღდგომა პირველი გაზაფხულის ღღესასწაულია, მასში ქრისტიანული, წარმართული ერთიმეორეში ლამაზად არის შეზავებული, სიცოცხლის ხალისი, გამრავლების ლტოლვა არის ჩაწმახნულ-ჩაქსოვილი. ქრისტეს „მკვდრეთით აღდგომას“ ის თავის აღდგომასაც, თავის ცხოვრების გადახალისება-გაუმჯობესებასაც უკავშირებს, ბრწყინვალე მომავლის იმედი აღაფრთოვანებს, როგორც თვით ბუნება იცვლის ფერს, ზამთრის სუსხისაგან გაძარცვული, ტიტველი, მწვანით იმოსება, ირთვება, კეკლუცდება, გურულიც, რაგინდ ღარიბი იყოს, ასევე ცდილობს „კანი გამოიკვალოს“ — ახალ-ახალი ხალათით მოიძროს, მოიკაზმოს, მოძრავსა და ცოცხალ ყვავილს დაემსგავსოს. როგორც ამ დროს ბუნების ყოველგვარი ქმნილება ცელქობს, გალობს, ჟღურტულობს, ტოლ-სწორს ეძებს, ასევე იქცევა გურულიც. ბუნების საერთო ფერხულში ისიც ებმის და ბუნების საერთო ჰარმონიაში მას დისონანსი არ შეაქვს. ამ დროს გურული რჩეულსა და „სანთლით ნაძებარ“ მაყარს მოგაგონებთ, მაყარს, რომელიც ყველაფერში პირველია და ყველაფერი ეხერხება: ცეკვა, სიმღერა, გალობა, მოღზენა, ღვინის სმა, ენამზეობა, გადახტომ-გადმოხტომა, შეხტომა, სირბილი, თამაში, ჭიდაობა, ჭირითი, ნიშანში სროლა, ჩონგურის დაკვრადალიდინება, ლამაზების გულის აფორიაქება.

აღდგომა და აღდგომის დღეები გურულისათვის ნამდვილი ხალხური ოლიმპიადა იყო. ერთი სოფლის, ერთი ეკლეს-

სიის მრევლი, სოციალური და სქესობრივი განსხვავების მიუხედავად, ერთიმეორეს ეჭიბრებოდა სხვადასხვა გართობათამაშ-სიმღერა-ცეკვაში, მორთვა-მოკაზმაში, სილამაზეში, ზრდილობა-სიღარბაისლეში და, თუ გნებავთ, სიტყვა-პასუხშიც და გარებ-გამორებაშიც. „გარებ-გამორება გშვენის...“ (ხალხური ლექსი).

ძლიერ ხშირად აღდგომის დღესასწაულზე სოფლური ოლიმპიადა სასიძოსა და სარძლოს არჩევაში გადამწყვეტ როლს თამაშობდა. აქ, ქალ-ვაჟის ყველაფერს ფასი ჰქონდა, ყველაფერი სასწორზე იწონებოდა: ჩაცმა, დახურვა, სიტყვა-პასუხი, გარებ-გამორება, ჯარში თავის დაჭერა, გაცილება, დამტყნარება, დახველება, ცეკვა-თამაში, დაკვრა, ღიღინი, სიმღერა, მუხლი, მკლავის ძალა, იერი, თვალ-ტანადობა.

ყოველივე ამას გურული მტკიცე ანგარიშს უწევდა და აღდგომისათვის დამარხვების დღიდანვე, ესე იგი 40—50 დღით ადრე იწყებდა საამისო მზადებას.

სააღდგომო სასმელ-საკმელს გურულისათვის დიდი მნიშვნელობა არ ჰქონდა (როგორც საკალანდოთ), მთავარი საზრუნავი იყო საგარეო ტანსაცმელი, ჩაცმა-დახურვა, მორთვა-მოკაზმვა. „თვალი სვამს და თვალი ჰვამს“, იტყოდა გურული და ცდილობდა, ნაღდით იქნებოდა თუ ვალითა და ვახშით, „საგარეო გამოსაჩენი პირი“ ჰქონოდა... ცხადია, ამ მხრივ უპირატესობა ეძლეოდა გასათხოვარს და ცოლმოსაყვანს, ყველაზე ლამაზად, ახლით ჩაცმულ-დახურული ესენი უნდა ყოფილიყვნენ, ამის შემდეგ კი წვრილფეხობა. აღდგომას წირვაზე და სათამაშოზე გაუსვლელი არავინ არ რჩებოდა, ყველა უნდა გამოფენილიყო და, მაშასადამე, ყველას კარგად სცმოდა.

შეუძლებელი და წარმოუდგენელი იყო გურულ ახალგაზრდას, რაგინდ ლატაკი არ უნდა ყოფილიყო, სააღდგომოდ ახალი პერანგი (წითელი კვერცხებისათვის ჯიბედაკერებული) და ახალი წულა არ ჰქონოდა. მაგონდება ჩემი სიყრმე. აღდგომაზე 40 დღით ადრე დამპირდებოდნენ, თუ გამგონი იქნები სააღდგომოდ პერანგსა და პაპუცას (ჩუსტს) გიყიდითო. მეც გულმოდგინედ ვეზიდებოდი წყალსა და ფიჩხს. აღდგომის პერმე მეტყოდნენ: პერანგი დიდხანს გაგიძლებს ამალლებამდე წყლის მოტანას თუ არ დაიზარებო... მეც მჯეროდა და ამრიგად, ერთი პერანგის და მისი გამძლეობის გულისათვის 4 თვეს წყალს „ვთრაქავდი“.

იმეამად 10—12 წლამდე არც ვაჟსა და არც ქალს არ ერცხვინებოდა მარტო პერანგის ამარაც რომ ყოფილიყო, და თუ პერანგის საყელო გვირისტით იყო ნაკერი და მასთან ჯიბეც ჰქონდა, ის ხომ საუკეთესო ტუალეტად ითვლებოდა, ამიტომ დიდსა და პატარას აღდგომის გათენება ძლიერ უხაროდა. გურულს თუ უნდოდა რაიმე ფრიად სასიხარულო და სასიამოვნო აღენიშნა, იტყოდა: „აღდგომის გათენებასავით გამეხარდაო“, ან კიდევ „აღდგომის კვერცხივით მომენატრაო“, „ჩემთვის დღეს აღდგომის დღე არისო“, „აღდგომისფერი დღე არისო“ და სხვა.

ყოველივე ამის შემდეგ გასაკვირი არაფერი იყო, თუ ყველა ცდილობდა თავის შეძლების კვალობაზე აღდგომას მიგებებოდა... მეფართლე ვაჭრები საგანგებოდ იმარაგებდნენ სააღდგომო „ხალათს“ იაფფასიან (არშინი ორი-ხუთი შაური), მაგრამ მხიარულ ჭრელა-ჭრულა ჩითეულს. ხარაზებიც თავისი ნოქრებით დღიან-ღამიან მუშაობდნენ, კერავდნენ ლამაზ

წულებს, უძიროებს, საცეკვაო მესტებს, შვიდაბაზიან ქუს-
ლიან „ბაშმაკებს“... სხვადასხვა ზომისა და ფერის ტყავის
ბურთებს. მეწვრილმანეები აღდგომამდე 15—20 დღით ადრე
გამოფენდნენ კვერცხის საღებავ ჰიაფერს, მეფურნეებიც
იძენდნენ საპასქე ფქვილსა და პასქის მოსამზადებელ სხვა
მასალას.

აღდგომის 15—20 დღით ადრე საფართლო დუქნები მთე-
ლი დღე ვაჭრობდნენ... სოფლად დახელოვნებული ოსტატი
მკერავი ქალები ღამესაც კი „ტეხდნენ“ — გამუდმებით კე-
რავდნენ: კაბას (წელზედას და წელქვედას), ახალუხს და ჩო-
ხას. გასამრჯელოს უფრო ხშირად იღებდნენ ნატურით ან ყა-
ნაში მიხმარებით. ზოგჯერ კი ფულითაც, უმეტესობა სჯერდე-
ბოდა ოჯახური ძალ-ღონით შინ შეეკერილს. აღდგომის ორი
დღით ადრე (წითელ პარასკევს და დიდ შაბათს) დაასუფთა-
ვებდნენ ეზოს, ჩამოხვეტდნენ სამზადი სახლის ჭერს, დააკ-
რიალებდნენ სახლს, დარეცხავდნენ ჯამ-ჭურჭელს, გადაფხე-
დნენ და წყალს გადაავლებდნენ კვერცხებს... შაბათს საღა-
მოს დაამზადებდნენ სააღდგომო სადილს — უფრო საუზმეს
(იმ დღეს სადილისათვის არავის ეცალა), და მხიარული, მო-
ლიმარი სახით ადრე დაწვებოდნენ, რადგან შუალამეზე ყვე-
ლანი უნდა ამდგარიყვნენ.

სწორედ შუალამისას დაირეკებოდა ეკლესიის ზარი, მო-
ხუცები ზარის ხმაზე სასოებით პირჯვარს გადაიწერდნენ და
„დიდება შენდა, უფალო“, იტყოდნენ. ჭრაქის ან ცეცხლის
შუქზე ყველანი მოირთვებოდნენ, ჯიბეში წითელ კვერცხებს
ჩაიწყობდნენ და გარდა საპყრისა და მძიმე ავადმყოფისა,
ეკლესიისაკენ გაეშურებოდნენ, გზას ინათებდნენ ზოგი მუ-

გუზლით და ზოგი ბლის ტყავის ჩირადნებით (ბლის ქერქი ბურეჭში ჩარჭობილი). ეკლესია და სასაფლაო მუდამ ერთად იყო... საფლავების უმცირესობას უბრალო მოგრძო რივის ქვა ჰქონდა „სასტუმლად“, ზოგს კი — ქვის ჯვარი. ყველა საფლავი განათებული იყო ჯვრებზე თუ ქვებზე მიწებებული შინ ჩამოქნილი წმინდა სანთლებით, იქვე ეწყო პატარ-პატარა, ყვითელი კოჭით შეზავებული პასქა და შეღებილი სამ-სამი კვერცხი (აუცილებლად კენტი რიცხვი). ზოგ პასქაში ანთებულ სანთელს არჭობდნენ. ყველა სანთელა ერთნაირი ზომას არ იყო.

რამდენიმე საფლავთან მოგრძო სუფრა ან მრგვალი მაგიდა იყო დადგმული. ზედ ეწყო პასქები, შემწვარი გოჭი, ან ბატკანი, თეფშით წითელი კვერცხები, მარილი, ტაბლა (ლოძის ფქვილიდან აცხობდნენ, რძით ან სველით—შრატით—ზელდნენ და ყველით ხაჭაპურივით ტენიდნენ, მაგრამ ხაჭაპურს ყველი ერთ ფენად აქვს, ტაბლას კი — 2 და 3 ფენად), ღოჭით ღვინო. ეს საკურთხი იმ მიცვალებულს ეკუთვნოდა, რომელიც ჯერ მთლად გამოგლოვილი არ იყო. ყველა საფლავთან იმყოფებოდა თითო ან ორი ჭირისუფალი ქალი ან კაცი მოზარდის თანხლებით.

აღდგომას ღამის წირვა სრულდებოდა შემდეგი წესით:
აღდგომის ლიტანია...

ეკლესიაში შებრუნება... წირვა.. სახარების კითხვა, ორივეს მიერ (მღვდელი, დიაკონი)...

მთავარი დიაკონი: „პირველიდან იყო სიტყვა!“.. მღვდელი საკურთხევლიდან: „პირველიდან იყო სიტყვა!“

მთავარი დიაკონი: „პირველიდან იყო სიტყვა და სიტყვა იყო ღვთისმცემი“...

მღვდელი იმეორებს იმასვე...

ზარების საღმრესაწაულო რეკვა და გალობა. ქრისტე აღსდგა და განათლდი, განათლდი!

წირვის გათავება: ეკლესიიდან გამოსვლა, ერთიმეორისათვის მილოცვა, კოცნა, კვერცხებით მტეხლობა. რამდენიმე ჭაღარა კაცი სამრეკლოზე დაკიდებულ ზარს კვერცხებს ესვრის, თუ მოახვედრა, მთელ წელიწადს მუცელი არ ასტკივდება... სიცილი, ეკლესიიდან შემოსილი მღვდლის გამოსვლა, საკურთხების დაკურთხება, საუზმეზე მიპატიჟება და გახსნილება... თითო-ოროლა ლუკმა და „ქრისტე აღსდგა“... დასებად დაყოფა, ტოლი-ტოლს „ემტეხლება“ როგორც კაცები, ისე ქალები. კვერცხის კბილებზე რაკუნნი... ბავშვები კვერცხს არჩევენ და სჭამენ... შეღებილი ტუჩები... მზის ამოსვლისას ოჯახში დაბრუნება... სახელდახელო სადილი და სათამაშოზე გასვლა.

ს ა თ ა მ ა შ ო ზ ე

სათამაშო მინდორი ყველა სოფელს თავისი ჰქონდა. თუ ეს მინდორი კერძო პირს ეკუთვნოდა, სოფელი მაინც სასოფლოდ, საერთოდ სარგებლობდა და თუ მოხდებოდა ისე, რომ მიწის მეპატრონე მოისურვებდა მიწის შეღობვას, მაშინ სოფელი იძულებული იყო მიწა სასოფლოზე შეეძინა ან სათამაშო სხვა ადგილას გადაეტანა... სასოფლო-სათამაშო ერთგვარი პრიმიტიული სტადიონი გახლდათ.

აქ იმართებოდა ბურთის თამაში, ჭაკუნობია, ცეკვა, ჭიდა-

ობა, სასოფლო საქანელა (სიკორწიალა), თოფის ნიშანში სროლა და ჭირითი. ზოგიერთ სოფელში სათამაშოზე ვარჯიშობდნენ აგრეთვე მძიმე ქვის სროლით. სოფლის ბავშვებიც აქ იწყებდნენ სხვადასხვა ბავშვურ თამაშს. სათამაშო ადგილით სოფელს თავი მოსწონდა. იყო ისეთი მიწის პატრონიც, რომელიც სათამაშოს სოფელს უფასოდ უთმობდა — საბუთის ქაღალდით. ზოგჯერ რომელიმე სოფლის გარეთ გასული სოფლელი, თავის სოფლის გულს იგებდა, სათამაშოს ყიდულობდა და სახსოვრად სოფელს უტოვებდა.

სათამაშო ადგილი განსაკუთრებით სჭირდებოდა სოფელს მთელი 40 დღის განმავლობაში — აღდგომიდან ამალღებამდე — ყოველ კვირაობით. აქ იმართებოდა თამაშობა და დროს ტარება. აღდგომის მეორე და მესამე დღეს კი გაუწყვეტელი თამაში იყო. სათამაშოზე ყველაზე ადრე თავს იყრიდნენ ახალგაზრდები — 8—20 წლის ასაკის ვაჟები, ოლიმპიადასაც ესენი ხსნიდნენ. დაიწყებდნენ სხვადასხვა სახის თამაშს — ჯაფარიკას, ჭიდაობას და სხვა. ორი იკისრებდა თავკაცობას, პირველი იტყოდა — არჩევანი მე, მეორე — არადა-ნი მე, პირველი — გიორგი მე, მეორე — ივანე მე, და მოთამაშეთა თანასწორი რიცხვით შეუდგებოდნენ ბურთის თამაშს.

ბურთის თამაში სხვადასხვაგვარი იცოდნენ. ახალგაზრდობა უფრო ეტანებოდა „ხელგაკვირის“. დაინიშნებოდა ორივე მხრივ მიჯნა — ლელო, და შუა ადგილიდან ერთი მხარე შეისროდა ზევით ბურთს, დაუპირისპირებდა ხელის გულს და გაისვრიდა მოწინააღმდეგე ბანაკისაკენ. მეორე მხარე ცდილობდა ბურთი ჰაერშივე დაეჭირა, შეეჩერებინა და საცა კი შეაჩერებდა, სწორედ იმ ადგილიდან იმგვარათვე გამოისვრი-

და... ხელმარჯვე გასროლილ ბურთს ჰაერში არტყამდა ხელს და უკანვე ისროდა. ხელგაკვრა იყო ორგვარი — უბრალო და „დაირჩენიე“. თუ მოწინააღმდეგე მხარე ბურთს ჰაერში დაიჭერდა ან, როგორც გურიაში იტყოდნენ, „დაირჩენდა“, მაშინ დამრჩენი თავისი ამქრით გამოიქცეოდა და მოირბენდა სწორედ იმ ადგილამდე, საიდანაც ბურთი ისროლეს და იქიდან გაისროდა ბურთს. მოწინააღმდეგე ცდილობდა ბურთი დაერჩინა და იმით მანძილი მოეგო. ყველა ფხიზლობდა, ყველა ცდილობდა გასროლილი ბურთი დაერჩინა, ბურთს დაირჩენდნენ თუ არა, გასროლილის ამქარი დიდი სიჩქარით უკან დაიხვედა და ბურთის გასროლის მანძილზე დადგებოდა, ცდილობდა გასროლილი ბურთის დაჭერას და მოწინააღმდეგის უკან დახვევინებას, დაკარგული პოზიციის დაბრუნებას.

როგორც ხედავთ, აქ თვალი, ხელი და მუხლი ყველა მოძრაობაშია, ზევით შეხტომაც ხშირად უწევს მოთამაშეს, ცდილობს ბურთი მაღლა ჰაერში დაიჭიროს. გამარჯვებული მხარე ის არის, ვინც ლელოს გაიტანს, ესე იგი, ბურთს დათქმულ მიჯნას გადააცილებს. ბურთის პირველი გასროლა და მხარის არჩევა უბრალო წილის ყრით ხდება — მაღლა დანიშნული ქვის შეგდებით, ლელოს გატანის შემდეგ თამაშის განახლება საჭირო არ არის, რადგანაც ახლა მხარეებს იცვლიან და ბურთსაც პირველად ის გაისვრის, ვინც პირველ თამაშში მოპირდაპირე იყო. ხელგაკვრიაში შეიძლება ბურთი იმან არ გაისროლოს, ვინც დაირჩინა, ან ვინც ხელში აიღო. ბურთს გადასცემენ დახელოვნებულ შორსმსროლელს. თამაშობაში მონაწილეობას ღებულობენ 12 წლის ვაჟებიც, უფრო პატარები მოწინააღმდეგე მხარეს დასცინიან, აბრაზებენ, ბურთს დააგდებენ წინ და უცუქედებიან, თან გესლიანად ეუბნებიან

(მისკენ ნეკს უჩვენებენ): „ერის სიგრძე, მერის სიგრძე, მო-
კაკული თითის სიგრძე“.

დარჩენითი ხელგაკვრიას მაშინ თამაშობენ, როცა სათამა-
შო მინდორი ვრცელია. თუ ლელო ახლოს არის, მაშინ ბურ-
თის დარჩენა სიმარჯვეა, ირჩენენ კიდევ, მაგრამ საცა ბურთს
დაირჩენენ, იმავე ადგილიდან გაისვრიან.

გაგლეგ-გამოგლეგიაი

ამ თამაშშიაც ორი დასი — ორი ბრიგადა მონაწილეობს.
ბრიგადირები წევრებს აირჩევენ — არადანით იყოფენ. ყვე-
ლა მოთამაშე — თავისი ბრიგადის პატრიოტია, ამიტომ ყვე-
ლა ცდილობს უკეთესი აირჩიოს, ზოგჯერ ერთი მოთამაშე
ორად ფასობს. ერთის ნაცვლად ნება აქვს ორი აირჩიოს. თუ
ვინ თქვას პირველი „არჩევანი მე“, აქაც წილისყრით გადას-
ჭრიან.

თამაშობა თუ გაახლდება, შეიძლება ახალი არჩევანი —
არადანი ითამაშონ. ამ თამაშში ბურთს ერთ-ერთი მხარე ზევით
აისვრის. ორივე მოქიშპე მხარე ცდილობს ბურთი ხელში იგ-
დოს, დაიჭერს თუ არა, ბურთს გადაუგდებს თავის ამქარს —
ბრიგადის წევრს, „ბურთი არ უნდა გააცივოს“ ან „არ დაამო-
ჭვოს“ (მოჭვა—კრუხი), მაშინვე თავის ამხანაგს უნდა გადა-
უგდოს, მოწინააღმდეგე მხარეც ფხიზლობს, ვერცხლის წყა-
ლივით მოძრაობს.

გამარჯვებული ის მხარეა, რომლის ხელშიაც ბურთი ხან-
გრძლივად არის, აქ ხდება დაჩაგრული ბრიგადის „ხანკის“
მორება-დაცინვა, გამარჯვებული, დამარცხებულს წამოსძა-

ხებს, „პაწიე მეიცაოეთ, ნუ ტირით და ბურთს გაჭმევთ“ (მოგშივდა, მოგშივდა!).

ეს თამაში თხოულობს თვალის, ხელის და მუხლის სისწრაფეს. თითოეულ ბრიგადაში შეიძლება იყოს 20—30 მოთამაშე და აქ ერთგვარი მახსოვრობაც არის საჭირო, შენთან იცნო და ბურთი მუდამ მას გადაუგდო... ზოგჯერ ბურთს მოწინააღმდეგეს გადაუგდებენ და ეს სიცილს იწვევს.

შ ე ხ ვ ა კ ვ რ ი ე

ეს თამაში, საერთოდ, იგივეა, რაც ხელგაკვრიე, განსხვავება აქ მხოლოდ ის არის, რომ ბურთს ხელით კი არ ისვრიან, არამედ ფეხით. ეს თამაშიც შეიძლება იყოს ორგვარი—უბრალო და „დარჩენიეთი“.

შ ე ხ ვ ა გ ო რ ა მ ი თ (შ ე ხ ვ ო რ ი ე)

ეგეც ამგვარი თამაშობაა, მაგრამ ბურთს არ შეიძლება ვინმემ ხელი ახლოს, უნდა აგორო მხოლოდ და მხოლოდ ფეხით, ცხადია, აქ ბურთის „დარჩენა“ (დაჭერა) არ შეიძლება — ორივე მხარე ცდილობს ბურთი ლელოსაკენ ფეხით აგოროს.

ეს იგივე ფეხბურთია, მხოლოდ უფრო უბრალო, პრიმიტიული — აქ შეიძლება მოწინააღმდეგე მხარეები იყოს ჯანუსაზღვრელი, იმისდა მიხედვით, თუ რამდენია თამაშის მსურველი. რა თქმა უნდა, თანაბარი რიცხვით. ფეხგორიეში ბადე არ არსებობს. საკმარისია ბურთი გასცილდეს წინასწარ გა-

შიზნულ მიჯნას და მოგებად ითვლება, უფრო ხშირად მიჯნად არის ღობე, თუ ორივე მხარეს სათამაშო ადგილი შეღობილია...

ბატანიე ბურთი

ყველა ზემოთ მოხსენებული ბურთის თამაში უფრო ჭაბუკების საქმე იყო და მასში მონაწილეობდა წინასწარ განსაზღვრული მცირე რიცხვი. შეიძლება ამ თამაშში ათასი და მეტი მოთამაშეც იღებდეს მონაწილეობას.

გატანიე ბურთი ნამდვილი მასობრივი სპორტია. ერთი სოფელი მეორეს ეჯიბრება, ერთი სამამასახლისო — მეორე სამამასახლისოს, სოფლის ზემოური მხარე — ქვემოურს, ცოლიანი — უცოლოს, ერთი ტიპის სკოლა — მეორეს, ერთი კუთხის მოსახლეობა — მეორესას, მაგალითად, გურულები და მეგრელები, ხონელები და სამტრედიელები და სხვა.

წინათ, ბატონყმობის ღროს, სცოდნიათ თავადებს შორის შეჯიბრება, მაგალითად, ერისთავი და გუგუნავა, გურიელი და ჩაქაშიძე. ალბათ, ამისი ნაშთი იქნებოდა, რაც მე მახსოვს — ჩვენ სოფელში იყო მოაზნაურე შალიკაშვილები, მათ შორისაც იმართებოდა შეჯიბრებით თამაში — ერთი მხრივ იყო გიტო, მეორე მხრივ — კონსტანტინე, დაიძახებდნენ — ვის უნდა ჩემკენ, აქეთ გადმოდგეს — ვისაც ჩემკენ გინდათ, თამაში აქეთ... ამრიგად, სოფელი ორ მოწინააღმდეგე ბანაკად იყოფოდა და მათ შორის სასტიკი შეჯიბრება იმართებოდა.

გურულ-მეგრელები ერთიმეორეს ეჯიბრებოდნენ პირველ შაისს, ქალაქ ფოთში. ძველად გეოგრაფიულად ნახევარი ფოთი გურიას ეკუთვნოდა, ნახევარი — სამეგრელოს. მცხოვრე-

ბლებისა და ვაჭრების რიცხვიც კრელი იყო... ბურთის თამაშს სამეგრელოში მეთაურობდა დადიანი, გურიაში — გურიელი, ერთსაც და მეორესაც გურია-სამეგრელოდან ამ დღისთვის საგანგებოდ ჩამოჰყავდათ რჩეული მოთამაშეები როგორც გლეხები, ისე აზნაურები და თავადები. ბურთი გავარდებოდა (აღრე ნასადილევს) ფოთის პარკში... მონაწილეობას იღებდნენ ცხენოსნებიც. თამაშის საყურებლად (სასეიროთ) დიდძალი ხალხი იყრიდა თავს. საგანგებოდ ჩამოდიოდნენ ორივე მოქიშპე მხრიდან. გურული ქალები გურულებს აქეზებდნენ, მეგრელები — მეგრელებს.

აქვე იყვნენ ღრმად მოხუცებული თავადები, რომლებიც იცავდნენ წესრიგს, და, ასე ვთქვათ, ასრულებდნენ ახლანდელ „მსაჯების“ მაგიერობას. ბურთის თამაშს არ თაკილობდნენ არც მღვდლები, პირიქით, ბევრი ძლიერ კარგი მოთამაშე გახლდათ, მოხუცი მღვდლები კი წესრიგს იცავდნენ...

გატანიე ბურთს თამაშობდნენ ორგვარს: „ღლეტით“ და „არა ღლეტით“ ან „უღლეტია“... (ბურთის ძალით ხელიდან გამოცლა). ერთ-ერთი მხარის საპატიო პირი შეისვრის ბურთს ჰაერში შუა ადგილას, მოქიშპე მხარეები ცდილობენ ბურთი ხელთ ეგდოთ და გაქცეულიყვნენ ლელოსაკენ, მოწინააღმდეგე გამოუდგება, როცა ატყობს დაეწევა, ის ბურთს გადაგდებს, თუ მისმა ამქარმა იგდო ხელში, ახლა ის გარბის. მოწინააღმდეგე, ცხადია, ცდილობს თავის ლელოსაკენ წაიღოს ბურთი, მაგრამ მოხდება ისე, რომ ბურთის გადაგდებას მოწინააღმდეგე არ დააცლის და აქ ბურთი „შეიკვრება“ ორივე მხარეების უფრო ღონიერ, მკლავმაგარ, შეჭგუფებულ მოთამაშეებთან. ვის ხელშიაც ბურთია, ის ცდილობს ბურთი ხელი-

დან არ გაუშვას, მოწინააღმდეგე ეკვეთება და ცდილობს ბურ-
თი ხელიდან „გამოდლიტოს“ — წაართვას. ეს არის ღლეტა...
ბურთის ღლეტის დროს მღლეტელები შეჯგუფებულია, ერ-
თიმეორეს ეწინააღმდეგებიან. ამ ჯგუფს თავისიანები ყიყი-
ნით და ზოგჯერ სიმღერითაც აწვებიან და ორივე მხარე
ცდილობს თავის ლელოსაქენ დასძრან მასა, ზოგჯერ ღლეტა
დიდხანს გრძელდება, ვერც ერთი მხარე ვერ ახერხებს ბურ-
თის განთავისუფლებას, აქ შეიძლება ცხენიდანაც გადაეშვას
მარჯვე მღლეტელი ან ამ ცოცხალ ადამიანთა რგოლში თავით
დაეშვას, ბურთი ხელთ იგდოს და თავისიანს გადასცეს. თუ
ეს არ მოხდა, მაშინ მოწესრიგეები ღლეტას შეაჩერებენ და
ბურთს ნეიტრალურ ადგილას (ღლეტის ადგილას) ზევით შეი-
ძვრიან და ამრიგად, თამაში კალაპოტში ჩადგება. თუ დათქვა-
მენ (მაგრამ ეგ იშვიათი იყო), რომ ღლეტა არ იყოს, მაშინ
ლელოს ერთ-ერთი უფრო ადრე გაიტანდა. ზოგჯერ ისე გამ-
წვავებულა საქმე, რომ ბურთი მქრელი კაყით (ტალით) ღლე-
ტის დროს ნაკუწ-ნაკუწად უქცევიათ (კოწია შეფაქიძეს
თქმით).

გატანიე ბურთის დროს როლებს ინაწილებდნენ, ყველას
მიჩენილი ჰქონდა შესაფერი საქმე: მღლეტელი, გამქცევი,
გზის ამრევი, გამქცევის დამცველი, გზა-გზა დამალული შემ-
ცვლელი, მარქაფა შემონახული მოთამაშეები და სხვ.

ზოგიერთი სოფლის სათამაშო იყო მდინარის პირად, ჭა-
ლაში. მოხდებოდა ხშირად, რომ ბურთი მდინარეში ჩაეარდე-
ბოდა, ბურთის თამაშით დამთერალი, გაბრუებული მოთამა-
შეებიც წყალში ჩაყვინთავდნენ, აბა, ღობეს ვინ ერიდებო-
და — „პინტრიშათ“ გაჰქონდათ, ეზოს ზიანს აყენებდნენ, მა-
გრამ ზარალის ანაზღაურებას არავინ მოითხოვდა, ზოგჯერ

ძალთა ისეთი განწყობილებაც ყოფილა, რომ 5—6 საათის გა-
აფთრებულ თამაშს უშედეგოდ ჩაუვლია, ლელო ვერც ერთ-
ვერ გაუტანია, სამაგიეროდ, ისიც მომხდარა, რომ ერთ-ერთ
მხარეს ლელო ადრე გაუტანია და თამაში ხელახლად დაწყე-
ბულა და თუ დაღამებამდე ლელოს გატანა ვერ მოუხწრიათ
თამაში მთვარიან ღამეშიც გაგრძელებულა.

მეტად კარგი საყურებელი და წარმტაცი თამაში ერთი
სოფლის ცოლიანებისა და უცოლოების „შეჯიბრება იყო, რაც
აღდგომიდან ამდღებამდე გრძელდებოდა. უცოლოები გაიხ-
დიდნენ ჩოხას, შემოიხსნიდნენ ქამარ-ხანჯალს, გადასცემდნენ
გასათხოვარ ქალიშვილებს, ქალიშვილები ჩოხას კაბაზე გა-
დაიცვამდნენ, ქამარ-ხანჯლით ვაჟურად მოირთვებოდნენ...
ახალმოყვანილებიც ასევე მოირთვებოდნენ თავიანთი ქმრების
ჩოხა-ქუდით, ქამარ-ხანჯლით. ქალებიც ბურთის მოთამაშეებს
დასდევდნენ და თავისიანებს ამხნევებდნენ, გასათხოვარი —
უცოლოებს, გათხოვილები — ქმრებს... იყო სიცილ-კისკისი,
ოხუნჯობა, ხანში შესული მოხუცებულებიც კი შეუამხანაგ-
დებოდნენ მოთამაშეებს, ცოლიანები — ცოლიანებს, ქერი-
ვები — უცოლოებს, შეუძახებდნენ: აბა, ბიჭებო, თქვენ იცით,
მარჯვედ იყავით, თვარა თუ მაჭამეთ სირცხვილი და „ყაზილა-
რებმა“ გაჯობათ, ქალები გაგექცევათ, აბა, ბიჭებო! არ გაჯო-
ბოს ცოლიანებმა, თვარა, უცოლოთ დარჩებით და სხვა.

სალამოს მიდიან სიმღერით, ცეკვა-თამაშით, დავლურით,
დაირის და დოლის დაკვრით.

ჯაკუნობია (ახლანდელი ჰოკეის მაგვარი)

ჯაკუნობია ბურთის უძველესი თამაშობაა, ფეხ-გაგორების
მსგავსია, იმ განსხვავებით, რომ აქ იხმარება ხის ბურთი (ხის-

მრგვალი სოკოს მაგვარი — ხორცმეტი“), ფეხის მაგიერ კი ამ ბურთს ურტყამენ ჭაკუნს — კაუჭა ჯოხს (ჭაკუნობია თამაშის სახელწოდებაც აქედან წარმოსდგება). თამაში ითხოვს მეტის-მეტ სიფრთხილეს, სიმარდეს, თვალმჭკრელობას. შეიძლება ხის მაგარი ბურთი მუხლს ქვემოთ კოჭებში მოგხვდეს, ფეხი დაგიზიანოს და მოთამაშეთა „მწყობრიდან გამოგიყვანოს“, კი არ მოგკლას, მაგრამ მაგრად გაგკენწლოს. გამარჯვებად ითვლება არა მარტო ლელოს გატანა, არამედ ისიც თუ რომელ მხრიდან რამდენი „კოჭამოგდებულია“.

ჭაკუნის ბოლო ზოგიერთს კანაფის თოკით ჰქონდა ამობანდული. ხის ბურთის მადლა ასროლა არ შეიძლებოდა, მუდამ მიწის პირად უნდა ეგორებინათ. ჭაკუნობიას თამაშობდნენ მოზრდილები — 17—18 წლისები და უფროსებიც. ამრიგად, ჭაკუნობია ასაკის საზომიც იყო — ჭაკუნობიას თამაში შეეძლო, — იტყოდნენ. ჭაკუნობიას დიდი ხალისით თამაშობდნენ... ტყეში საგანგებოდ ეძებდნენ როგორც საჭაკუნო ბურთს, აგრეთვე კაუჭა ჯოხს.

ს ა ხ ი მ ბ ა

უმთავრესად თამაშობდნენ ვ ა ჯ რ ო ბ ა ნ ა ს... ერთ-ერთი ვითომ ფართლის გამყიდველი ურია იყო და მასთან სავაჭროდ მიდიოდნენ ქალები და კაცები. ქალის მაგიერ ქალურად ჩაცმული ვაჟები. ურია ქალებს ორაზროვანი სიტყვებით სთავაზობდა სხვადასხვა საქონელს, ქალებს ატყუებდა, ვაჟი (ქმარი) მიუხტებოდა ურიას სცემდა, ურია ტიროდა და „ურიულათ“ ლოცულობდა...

საქონლის ვაჭარი. ერთ-ერთი ვითომ ძროხას ან ხარს

კლავს, ასო-ასოდ აქნილს მუშტრებს სთავაზობს, მუშტრები ქალებიც არიან და კაცებიც, ყიდულობს ვისაც რა სურს, მხოლოდ აქ იხახსოვრებენ, ვინ რა იყიდა. საქონელი მთლიანად რომ გაიყიდება, იწყება თამაში. საქონლის პატრონი კითხულობს: თეკლემ რა იყიდა. პასუხი — ბარკალი! ყარყუმი: ბარკალი, თეკლეს ბარკალი, საერთო სიცილი და სხვა.

ხ ბ რ მ ა

ფეხმუწია. მოთამაშე ფეხი ფეხთან მიტყუპებული უნდა გადამხტარიყო, გამარჯვება იმისი იყო, ვინც უფრო შორს გადახტებოდა

გამოქცეული გადახტომა. რამდენიმე მანძილის დაშორებით მხტომელი გამოიქცეოდა და დანიშნული წერტილიდან ხტებოდა. ხტებოდნენ როგორც სიგრძეზე, ისე სიმაღლეზე, შეხტომაც ასევე ორგვარი იყო — სიმაღლეზე შეხტომა — „ფეხმუწიე“ და გამოქცეული.

გადახტომა იცოდნენ აგრეთვე გრძელი საბიჯგი ჯოხითაც. ესეც ორგვარი იყო — გამოქცეული და ადგილიდან. აღნიშნულ წერტილიდან ჯოხს დაეყრდნობოდა და ისე გადახტებოდა.

ნაბაღზე გადახტომა. ეს თამაში აღინიშნებოდა იმისდა მიხედვით თუ ვინ რამდენ ნაბაღზე გადახტებოდა. დაიწყებოდა ერთი ნაბღით და თანდათან უმატებდნენ ნაბაღს (დათა გუგუნავა ხტებოდა სამ ნაბაღზე).

აღდგომის დღეებში „ბურთის გავარდნამდე“ თავს იქცევდნენ სხვადასხვაგვარი ცეკვით და სიმღერით, ცეკვის დროს უკრავდნენ ხან ერთად, ხანაც ცალ-ცალკე.

„ფარცაკუკუ“ ყველაზე უძველესი ცეკვაა, ცეკვავდნენ ქალები, უფრო გათხოვილები, ვაჟები იშვიათად — უფრო ქალებს აჯავრებდნენ. ცეკვის მანერით და ცეკვის დროს სიმღერის ტექსტის მიხედვით უნდა ვიფიქროთ, რომ ეს ცეკვა ქართული ამორძალების (ამაზონელები) ცეკვა უნდა იყოს. ცეკვა არის ჩამჯდარი, წყვილ-წყვილი. შეიძლება ცეკვავდეს 2, 3, 4 და 10 წყვილი. მოცეკვავე ტაშს უკრავს და კიდევ უვლის, თამაშობს, პირველად ხელს ხელზე დაირტყამენ, მეორედ — ორ ხელს მუხლებზე, და მესამედ სხეულის უკანარბილ. ადგილებზე. ამავე დროს მღერიან და ჩამჯდარნი, სიმღერას ფეხებს აყოლებენ, სიმღერის ტექსტი ასეთია:

ფარცა კუკუ, ფარცა დინა!
 ყურსა სისხლი რამ გადინა?!
 ლაშქარს ვიყავ დავიკოდე,
 ყურსა სისხლი მან მადინა..
 ზღვას გადავედ ნემსებითა,
 ზედ გავიარ ჩექმებითა!

ცეკვა სიცოცხლით სავსე და ამავე დროს ვნების აღმძვრელია, მაგრამ არა ისე ვულგარული, როგორცაა ევროპული ცეკვა კეკუოკი ან ტვისტი.

კალმახურიც ძველი ცეკვაა. კალმახურის მოცეკვავე ჭლიერ იშვიათი იყო, უფრო ხშირად ერთპიროვნულად ცე-

კვავდნენ. მოცეკვავე უნდა ყოფილიყო კალმახივით ცოცხალი, სწრაფი და მოძრავი.

გურიამში სურებელ რამიშვილს ჰქონდა საკუთარი საგვარეულო ლოცვა (დღეობა) „ჭაბუკობა“. ეს დღეობა იციან ადრე გაზაფხულზე და იმ დღეს ზვარაკად ჭურის პირზე ცოცხალ კალმახს დაკლავდნენ. ეს არის ჭაბუკობის—ახალგაზრდობის, ტრფობის რიტუალი. ჩემი აზრით, კალმახური ცეკვაც ამასთან უნდა იყოს დაკავშირებული, რადგან კალმახი მეტისმეტად მოქნილი და სიცოცხლით სავსე თევზია, ზვარაკად, მსხვერპლად კალმახი აურჩევიათ მისი სისწრაფისა და სიმარჯვისათვის.

ფოთლით ცეკვა. აღდგომასა და მეორე-მესამე დღეს (ახალ კვირამდე) სათამაშოზე ცეკვა რომ დაიწყებოდა, 10—15 საცოლედ შედგებულნი ჭაბუკი სათამაშოდან მოშორებით, ერთ-ერთ კარგ მოცეკვავე ვაჟს მთლიანად მორთავდნენ მწვანე ფოთლებით, დაამსგავსებდნენ ადამიანის ფიტულს, ქუდი და ქამარ-ხმალიც კი ფოთლებისაგან უნდა ყოფილიყო და ამავე დროს დამალული ჰქონოდა თავის ადგილას კარგა მოზრდილი მწვანე „ფალოსი“. ვაჟი არ უნდა ეცნოთ. როცა ქალ-ვაჟი თავდავიწყებით უვლიდნენ, ამ ფოთლის ვაჟს შემოატარებდნენ, გაარღვევდნენ წრეს და საცეკვაო წრეში შეაგდებდნენ. ის დაიწყებდა ცეკვას და ვაჟს ქალს წაართმევდა, დალიდა ერთს, გაიწვევდა მეორეს, მესამეს და შეიძლება მეტსაც, და როცა თვითონაც დაღლას იგრძნობდა, მაშინ „ფალოსს“ იშვილებდა და იმათ ყველა მხრივ სალამს აძლევდა — „აბაბრიკებდა“. შეიქმნებოდა ქალების წიოკი. დაირცხვენდნენ, მაგრამ ცალი თვალით მაინც უცქეროდნენ, ვაჟები ჟრიაშულობდნენ, იცინოდნენ, ამავე დროს წაეტანებოდნენ მას და ცდი-

ლობდნენ ფოთლის შემოგლეჯას, მაგრამ·ის წრიდან თავის ტოლებს გაჰყავდათ, ზოგჯერ ვერც კი გაიგებდნენ თუ ვინ ცეკვავდა.

ეს ცეკვა, უსათუოდ, გაზაფხულის მიგებებისა და გამრავლების კულტის არის.

მოკვლა-გაცოცხლება. ორი ვაჟი ცეკვავს, ცეკვის დროს ვითომ წაიჩხუბეს, ერთიმეორეზე ხანჯლით მიიწევენ (ისე, რომ ცეკვა არ წყდება). ერთი სძლევს და მეორეს „მოკლავს“ — წააქცევს, გულზე ხელებს დაუკრებს — „გაასწორებს“, გარშემო ცეკვით უვლის, ცეკვის დროს მიუახლოვდება, ყურს დაადებს, რწმუნდება, რომ მკვდარია, აღარ სუნთქავს, თავით „საკუროთხს“ დაუდებს, კიდევ გარს უვლის, ხანჯალს ამოიღებს და შეულოცავს, რაღაც გაუგებარ სიტყვებს ჩასჩურჩულებს, მერე ამ შეულოცვით ხანჯალს „მიცვალებულს“ სიბრტყით სცემს და მიცვალებულიც გაცოცხლდება, წამოიქრება და ორივე მოლიმარი ცეკვავენ.

მიმიკით ცეკვა (პანტომიმა). ორი ვაჟი იწყებს ცეკვას, ჯერ სერიოზულად შეხვდებიან, მერმე ერთიმეორეს ტუჩის, ხელის, ფეხის და უკანა ნაწილის სხვადასხვა სასაცილო მოძრაობით ერთიმეორეს ემანჭებიან, მაიმუნობენ და ეს დიდ სიცილს იწვევს.

ფერხულით ცეკვა თავდებოდა, ეს იყო, ასე ვთქვათ, უკანასკნელი ცეკვის აპოთეოზი... ჯერ დინჯი და შემდეგ კი თანდათან სწრაფი... ეს ცეკვა უნდა იყოს მზის კულტის, ფერხულს საკუთარი სიმღერა და ტექსტი აქვს:

ეწერში კახამბალები,
ზედ შეყურულა ქალები,
ზოგს მოკვდომია ქმარები,

ზოგს საყვარელი ძმანები.
ძმანების მომტირალეზსა
კრემლით საესე აქვთ თვალეზი,
ქმარების მომტირალეზსა
კიდევ სხვანზე აქვთ თვალეზი...

ფერხული იკოდნენ ორსართულიანიც და მეტიც.

მ ი ს ა ლ მ ე ბ ა

სალამი. დილა მშვიდობის — ღმერთმა მშვიდობა მოგცეს.
შუადღე მშვიდობის — იგივე.

ღამე მშვიდობის — ღმერთმა დილა სიხარულის მოგცეს.
აღდგომიდან ამალლებამდე — სალამი და გამარჯვება იყო.
ქრისტე აღსდგა გიხაროდენ! — ჰეშმარიტათ აღსდგა — მად-
ლი მახარობელს! (მუშა კაცს სათესურში წითელი კვერციხი
ჰქონდა შემონახული ამალლებამდე).

მუშაობის დროს: კაი გამარჯვება შენი! გაგიმარჯოს,
ღმერთმა გამარჯობა ნუ მოგიშალოს (მან, ღმერთმა გამარჯვე-
ბით გამყოფოს!).

ქალის გამარჯვებაზე პასუხი — ღმერთმა გადღეგრძელოს.
სიმინდის ტენისა და კრეფის დროს — კაი გამარჯვება, კაი
ხვავი! ღმერთმა გაგიმარჯოს.

რჩევის დროს კალოზე — კაი გამარჯვება თქვენი, კაი
ხვავი, ჯვარი გიწერია. — ღმერთმა გაგიმარჯოს — ჯვრის მად-
ლი გწყალობდეს, შენს ძვალს არაფერი ეტკინა.

ღომის წყობის დროს — კაი გამარჯვება — ნელი ფუტი!..
ღმერთმა გამარჯობა ნუ მოგიშალოს!..

არაყის გამობდის, შალის თელის, ძროხის წველის, ფუტქ-

რის ყრის, ახალი წიწილებისა და აბრეშუმის ჭიის დაპურების, ბოსტანში მუშაობის დროს — ჯვარი გიწერია. ფუტკრის ყრისა და საპონის მოხარშვის დროს, შალის მოთელვის დაწყების წინ ძალს დაუძახებდნენ წინასწარ და მერმე ფეხადობის არ ეშინოდათ. აბრეშუმის ამოღების დროს — კაი ხვავი, კაი ყოლა.

ყანაში მოსადილეებს — გამარჯობა — ბარაქიანი იყოს თქვენი პურის ჭამა.

ყველა, გადაცემა, დალოცვა

გამრავლების, შვილიერების კულტი მთელ საქართველოში ძლიერი იყო და, ცხადია, გურულიც სხვებს თუ არ აჭარბებდა, არ ჩამორჩებოდა. ამოჭიკვე, შენი ჭიკვი ამოვარდა, უძიროდ გადაშენდი, შენი საფესვებელი არ გაიშვა, კერიე გაგიცივდა, შენსას ფუტი არ დეინახა კაცმა, გვარად ამოვარდი, შენი გვარი და გუჯაბი დეიქცა — ყველა ეს და კიდევ სხვა ბევრი ამისი მსგავსი უსაშველო წყევლა იყო, გურულისათვის მეტისმეტად მტკივნეული და აუტანელი. ცეცხლი შენს ენას, მაისის გველმა გიკმინა მაგ ენაზე — დამაწყევარს ეტყოდა და შეიძლება ფიშტოც კი ესროლა. ბევრის დასახელება შეიძლება იმისი, რომ უშვილო გურულ ქალს „ხელოვნურად“ შვილი შესძენია, ბალიშის აკვრით „ორსულობა“ დაუწყია, თავის დროზე „ომშობიარებულა“ და მისთვის სხვისი შვილი „შეუგორებიათ“... უკიდურეს შემთხვევაში ნათესავის შვილს იშვილებდა ან უპატრონოს ეპატრონებოდა.

შელოცვა, გამოლოცვა, ღვთისმშობლის ხატთან ფეხშიშველი მისვლა, ლოცვა, ხატის შეწირვა, სხვადასხვა აღთქმა,

თუგინდ ასეთიც — ღვთისმშობელო დედაო, ოღონდ შვილი მალირსე და ისევ შენვე გამსახურო: ქალი იქნება მონოზნად შემოგწირო და ვაჟი — ბერად. იმის მაგალითსაც დაგასახელებთ, რომ ასეთ „შეწირულ“ ბერ-მონაზნებს სრულ ასაკამდე „უმალაზონ-უბერიათ“, მაგრამ მერმე სულის ცხონებაზე ხელი აუღლიათ და ხორციელს სიამოვნებას შედგომიან, ჩოხანი და ანაფორა გადაუგდიათ (შეიძლება გვარი ბერიშვილი და მალაზონია აქედან წარმოიშვა).

შვილი ჭინჭალასაც კი უყვარსო, იტყოდა გურული, შვილი ღმერთმა გველსაც ნუ მოუკლასო, დასძენდა მეორე. ორსულ ქალს მარცხად მუცელი თუ მოეშლებოდა, დიდ ცოდვად მიაჩნდა და ღმერთს შენდობას ევედრებოდა. მუცლის მომშლელი კაცის მკვლელის თანაბრად ითვლებოდა. ჯვრისწერის გარეშე დაორსულებული ქალიშვილი ან ქვრივი ამჯობინებდა მისთვის კახპა დაეძახათ, ვიდრე მუცელი მოეშალა.

უშვილო ცოლ-ქმარი, გურულის გამოთქმით, ლევანდი მეუღლეები, საერთო პატივისცემით და ნდობით ვერ სარგებლობდნენ, გადასულ კაცს ეძახდნენ და არ აირჩევდნენ სოფლის რაიმე მოხელედ, არც შუა კაცად, რადგან, ხალხის რწმენით, ასეთ კაცს არ შეეძლო საქმის სამართლიანი გაქვრეტა, რადგან არ იცოდა რა იყო შვილის სიყვარული. სამაგიეროდ, მრავალშვილიანს დიდი პატივისცემა ჰქონდა. ნათქვამიდან აშკარაა, თუ რაზომ სასურველი იყო გურულისათვის შვილი — ძე და ასული მისი გვარის და „მოდგმა-გუჯაბის“ გამგრძელებელი და წარმომადგენელი. ამიტომ, ცხადია, გურული ყოველთვის ცდილობდა ცოლის შერთვის დროს არ მოტყუებულიყო, ჯვრის დაწერამდე ან, როგორც გურულნი იტყოდა, „საუკუნე შეუღლებამდე“ კარგად გამოიძიებდა მო-

შავალი მეუღლის და მისი მშობლების შთამომავლობის ვითარებას. საქმროზე მეტად ამას იკვლევდნენ ჭირისუფლები (ორივე მხრივ), წარმოიდგინეთ, მიუხედავად ქონების დასაკუთრებისა, ერთადერთი ქალიშვილის შერთვას ერიდებოდნენ, ვაითუ, ისიც უნაყოფო დარჩესო.



ღმერთმა დაგწყევლოს, დაგკრულოს, შეგაჩვენოს, გაგისკდა მიწა და გეიარე ქვესკნელი, არ დეინახე ცის სინათლე. ქვეყნის საშიშრათ მოგინახა ცა და მიწამ. არ დაგეცალა, არ დაგედავლა, დედის წყევლათ შეგერგოს სმული და კმული. გაგიჩნთა წელკავი, ილანჯუხმა მოგტეხა კისერი, არ აქცილდა სიავე და ფათერაკი, შენს სიცოცხლეში არ გაგახარა შენმა გამჩენმა. აბლაუცა ლოდიარა, თიაქარმა მოგიარა, მიზღემჩი არ გაგიარა. ხუმრობით შელოცვა მტკივან ადგილზე: ქარია, ქარსტეხი ასტკივდი, ასტეხდი, დედალი ჩამოფრინდება, მაშვინ შამოგაფრინდება, ძალლი აყეფდება, მაშვინ აქტეხდება, მამალი დეიწყებს ყივილს, მაშვინ დაგიწყებს ტკივილს, ანდაგიარა, მანდაგიარა რაცხაში გეტეკა არ გაგიარა.



თუ ვინმეს რამე დაეკარგებოდა ან რაიმე ზარალი ნოჟვიდოდა კაცის ხელით და დამნაშავე არ იცოდა, ჯერ ეკლესიაზე აცხადებდა ან თვითონ ან მღვდლის პირით: ეს და ეს ზარალი მომივიდა, ეშმაკს არ უქნია, კაცმა ქენი, შენდა ჯობს გამოტყდი, ან გაპატივებ, ან ნიორთა ნაქურჩალას (ძლიერ ცირე) დაგჯერდები, თვარა გადაწყვეტილი ამბავია გადაგეყმ და მე ცოდვაში არ ვიქნები — თან ასახელებდა გადაცეპის

დღეს, რომელიც კვიმატად იყო მიჩნეული, სახელდობრ, წითელი პარასკევი, დადები — პირველი ენკენისთვე, ძველ-ახლით წირვა, თოთხმეტი ენკენისთვე და სხვები. გადაცემის დროს მიჰქონდა ეკლესიაზე მსხვილი ლურსმანი, სანთელი, მწარე ხაპი ან კიდევ მწარე ბალახი — ანწლი, წალიკა და სხვა. წირვის შემდეგ დაიჩოქებდა იმ ხატის წინ, რომლის სახელზე მისი ეკლესია იყო აშენებული და დაიწყებდა: „ღმერთო და წმინდაო გიორგი“, (ან სხვა წმინდანი) — ასახელებდა ზარალს — ვინც მე აგი საქმე მიქნა, ნუ მისცემ საშველს, გაამწარე სააქავოსაც და საიქიოსაც, კითხე ჩემი ცოდვა მის ძეს და მომავალს, ნუ გაახარებ შვილისშვილამდე, სანამდი არ გამოგწიროს — ასახელებდა ხარს ან ცხვარს იმფერი ნიშნებისას, რაც ან სულ არ შეიძლებოდა ან იშვიათი საშოვარი იყო — სანამდი ფორთხვით არ მევიდეს შენს საფარველში და აგი ლურსმანი კბილით არ ამოაძროს, მანამდი საშველს ნუ დააყენებ, — და არჭობდა ლურსმანს ეკლესიის კედელზე ან გალავანში მდგომ ხეზე რაც შეიძლება მაგრად, შემდეგ სტეხდა ეკლესიის კართან მწარე ხაპს — ღმერთო ასე გაამწარე ჩემი გამამწარებელი — ან მწარე ბალახს უსვამდა კარის საკეტში. ამით და ხალხის ამინით თავდებოდა გადაცემა.



ღმერთმა დაგლოცა, აგაშენა, გაგაძლიერა, წელი და გული გიმთელა, ცოლ-შვილში გაგახარა, მტერი დაგიმორჩილა, სიამოვნებაში და სიტკბოებაში დაგაბერა, ცხოვრება და ცხოვნება არ მოგაკლო, კაი შვილები და შვილისშვილები დაგატიებია.

ბირილის წიგნი

უწყალომან სიკვტილმან „გადაგვილო“ საყვარელი და სასურველი დედა, ჩვენი ფაქიზო გამრჯელაძის ქალი, რომლის ტირილი და საუკუნო გამოთხოვების დღე დანიშნულია ენკენისთვის ხუთს, დღით შაბათს, რისთვისაც უმორჩილესათ გთხოვთ მობრძანდეთ და ანუგეშოთ დამწუხრებული ოჯახი ჩვენი, მწუხარებასა შინამყოფი ლევან, ლომინ და ბიჭია მშრომელიძე.

ქორწილის წიგნი

ამა გიორგობისთვის ოთხს, დღით კვირას, სადილათ მაქვს გათხოვებითი ქორწილი ასულისა ჩემისა გინატრეს, გთხოვთ დამაეალოთ სამუდამოთ და გაინაწილოთ ჩვენი ოჯახის ბედნიერება, რითაც დაეშთებით თქვენგან პატივცემული და საშვილისშვილოთ დავალებული. კაცია ქეიფაძე და შვილები ჩემი გომარონ, თაყა და როსტომი.

წირვა საღმრთო

ეს იცოდნენ ნაახალწლევს. უფრო ხშირად დაკლავდნენ ღორს ან მოზრდილ გოჭს, რასაც წირვის შემდეგ დააკურთხებდა მღვდელი, ნაკვერჩხალს დაყრიდნენ თიხის კურკლის ნამტვრევებზე და ზედ საკმეველს დაადებდნენ, ყველა, ვინც იქ იყო, ღმერთს სთხოვდა ოჯახისათვის მშვიდობის წელიწადს. შემდეგ იწყებოდა სადილი და ერთმანეთის დალოცვა.

წირვა ნაწყევარ-ნაშინცარი

ამ წირვისათვის კლავდნენ თხას, და იმავე წესით როგორც საღმრთოს, აკურთხებდა მღვდელი, თხის ხორცს აწყობდნენ გობზე, უნთებდნენ სანთელს, დააკმევდნენ საკმეველს, ევედრებოდნენ ღმერთს, რომ დაეხსნა ოჯახი, თუ ვინმემ დასწყევლა ან თუ რამე დაიფიცა მის მაგიერ, ან სხვისი დავალებით. შემდეგ იწყებოდა სადილი, აიღებდა მღვდელი სავსე ჭიქას და დაიწყებდა: „ღმერთო დიდებულო (მერმე იმ წმინდანის სახელი, რომლის სახელზედაც მათი ეკლესია იყო აშენებული), შენ იხსენი ჩვენი მასპინძელი ყოველი ჭირისა და ფათერაკისაგან, ნაწყევარი იყოს, ნაფიცარი იყოს, თავზე შამონარები იყოს, ყოველივე შეუხდე და მუუტავე, ცოდვას ნუ კითხავ და შენს მადლს და მოწყალებას ნუ მოაკლებ“. ყველა იქ მყოფი ამავე შინაარსით ლოცავდა მასპინძელს. შემდეგ იწყებოდა ცალკე სადღეგრძელო. თხის თავ-ფეხი, ტყავი და რამდენიმე საპატიო ნაწილი მღვდელს აუცილებლად უნდა წაეღო.

წირვა საბთლო

ეს წირვა ხშირად ბავშვებისათვის სრულდებოდა, ამისათვის აუცილებლად ცხვარი უნდა დაეკლათ. შემოარებდნენ ბავშვს თავზე სანთელ-საკმეველს და მიჰქონდათ მღვდელთან. ამ წირვისათვის მთვარეს არჩევდნენ ასე: ათი დღის მთვარიდან ცხრომამდი, სადილზე იწვევდნენ ახლო მეზობლებს, ბავშვის ბუდუას, ბეზიას, წირვის შემდეგ მღვდელი ბავშვს მიიყვანდა იმ გობთან, სადაც ეწყო ცხვრის ხორცი, იქვე თავ-ფეხი და ტყავი, შამოარებდა ბავშვს თავზე სანთელ-საკმე-

ველს და დალოცავდა, სთხოვდა ღმერთს და მის სალოცავს: „გაზარდე ფერით, ხორციით, ჰკუთით, ცნებით და კეთილი სინდისით“. შემდეგ დააკურთხებდა ხორცს. ყველა იქ მყოფი დააკმევდა საკმეველს და ბავშვს უსურვებდნენ ყველაფერს კარგს. სადილზე პირველი სადღეგრძელო ბავშვის იყო. საეტლოს დიდსაც უწირავდნენ, მაგრამ იშვიათად, რადგანაც დედები ამ მოვალეობას ბავშვობაში უსრულებდნენ შვილებს.

სახლიკაცის წირვა

ყველა ერთი გვარის კაცი მოიყრიდა თავს ერთ ოჯახში, დაკლავდნენ მოზვერს ან თხას, უფრო ხშირად ორივეს, აწირვინებდნენ მღვდელს. წირვის შემდეგ შეჯგუფდებოდნენ ერთად და მღვდელი საერთოდ ყველას შემოარებდა სანთელ-საჟმეველს, ევედრებოდა ღმერთს ივანე ნათლისმცემელს, ანგელოზებს, ადგილობრივ წმინდანს, თუ ეს გვარი სხვა სოფლიდან იყო მოსული, იმ სოფლის წმინდანს. ჩამოთვლიდა ბაბუებს ან პაპებს, „ღმერთო იმათი ნაგრაში ქალი და კაცი, გათხოვილი ქალი შვილიანა გააძლიერე და გაამრავლე, ერთმანეთში თვისებას და ძმობას ნუ მოუშლი“, ერთი სიტყვით, დალოცვა მის მკვერმეტყველებაზე იყო დამოკიდებული, ეს წირვა გამახსენებელი იყო მათი ერთი ოჯახისშვილობის, სადღეგრძელოშიც ყველა ერთმანეთს ამას უსურვებდა, ერთი ოჯახიდან ვართ, დღესაც ერთად ვართ და სამუდამოდ ერთ ოჯახად დავრჩეთო. თუ ვინმე მომდურავი იყო ერთმანეთის, ამ დღეს შეარიგებდნენ. დიდი მხიარულებით სრულდებოდა სადილი. ასეთი წირვა იცოდნენ სამ წელიწადში ერთხელ. ზოგჯერ — წელიწადშიც.

სათესლე სიმიწლის კურთხევა

წინათ გურიაში თესვა იწყებოდა 25 მარტიდან. სთესდნენ უფრო მთაგორიან ადგილებს. სათესლედ საუკეთესო სიმიწლის ტარობებს არჩევდნენ, ფშენიდნენ, ურევდნენ შიგ ლობიოს თესლს და ყრიდნენ თავდია ჭურჭელში. შემდეგ მოჰყავდათ მღვდელი სათესურის საკურთხებლად. იგი წაიკითხავდა სათანადო ლოცვას, შემოაბრუნებდა სამჯერ წალმა თესლით სავსე ჭურჭელს, ასხურებდა აიაზმას და ამით თავდებოდა კურთხევაც. მასპინძელი მღვდელ-დიაკონს უმასპინძლდებოდა შეძლებისდაგვარად. ფულს არ აძლევდა, ამის შემდეგ გაჰქონდა მეყანეს იგი პირველ საყანეში დასათესად.

მარგვლა, თოხვა, წმინდა

თესვას მოსდევდა მარგვლა, მარგვლას — თოხვა, თოხვას — წმინდა, ანუ მესამე თოხი. მესამე თოხი უფრო მაშინ იყო საჭირო, თუ მომავალი წლისათვის მეყანე ღომის დათესვას აპირებდა.

მინწი და ნაღი

მიწის მუშის მკაცრი მბრძანებელი, გარდა იმდროინდელ მემამულისა, ბუნება იყო და არის. თუ მუშამ ბუნებას არ შეუფარდა თავისი მუშაობა, იგი ერთ ჯამ ნამუშევარსაც ვერ გამოიტანს ყანიდან. ამიტომაც ყანის მუშას სულ მოკლე დროის ავადმყოფობაც კი აბანინებს ხელს მოსავლისაგან. ასე

ფი საშიშროების თავიდან ასაცილებლად მიწის მუშებს თავიანთ შორის დაუწესებიათ მაინდი¹. მიწის დამუშავების ხასიათიც იძლევა ამის საშუალებას: რადგან მეყანეები თესვას ერთ და იმავე დღეს არ იწყებენ, ამიტომ მათ მარგვლა-თოხვის დაწყებაც სხვადასხვა დროს უწევს. დღეს შენ უძახი მას საშველად, ხვალ ან ზეგ შენ გიძახის და ასე შემდეგ. თუ ღარიბი მიწის მუშა ყანის დამუშავების დროს ავად ხდებოდა და ამის გამო მისი ყანები დაუმუშავებელი რჩებოდა, იგი ამ შემთხვევაში იწვევდა ნაღს. ნაღიც იმავე მიზნით იყო დაწესებული, რა მიზნითაც მაინდი.

პაპაჯვარი (პაპის, ანუ კამარას ჯვარი)

➤ 20 ივლისს, ანუ „ელიობა“ დღეს, თითოეული მიწის მუშის ოჯახი ლუკუმხის ხისგან აკეთებდა იმდენ პაპაჯვარს, რამდენიც მას ყანა და ბახჩა ჰქონდა. სჭრიდნენ ლუკუმხის გრძელ ჯოხებს, აჭრებდნენ მათ ტყავის ხვეულად გამოღებით, უპობდნენ ჯოხებს თავს და უკეთებდნენ შიგ მისვე ჯვარედინს, შემდეგ წაიღებდნენ და ასობდნენ თითოეული ყანის შუა ადგილას, მიუსობდნენ პაპაჯვარს ძირში იელის ბოლს (ტოტს), იმდროინდელი რწმენით, პაპაჯვარი „პატიულობდა“ ყანებს ავი სულისაგან, იელი კი — ელვა-ქუხილისაგან.

¹ მაინდი — ურთიერთდახმარების სახე. ჩემს დამხმარეს (მეზობელს) იმავე სახისა თუ ოდენობის დახმარებით უნდა ვუზღო (ილია ჭყონიას განმარტებით).

ძველი წლის ბოლო და ახლის დასაწყისი იყო პირველი ენკენისთვე. ამიტომაც ეწოდებოდა მას დაღეგი, რაც ნიშნავდა ძველის წასვლას და ახლის დადგომას. ამ დღეს, მაშინდელი წარმოდგენით, თავიანთი მოღვაწეობის წლიური ანგარიში უნდა ჩაებარებინათ კუდიანებს (მზაკერებს) როკაპისათვის და თანაც მიერთმიათ ახალი მსხვერპლი. როკაპი წარმოდგენილი იყო ტახტზედ დამჯდარი დიდ კბილებდახვანულ არსებად. თითოეულ კუდიანს უნდა მიეხალა იმ დახვანულ კბილებზე მისგან მიტანილი მსხვერპლი (მაგალითად, პირუტყვი, ნივთეულობა, ჩამური, ყანა და სხვ.) თუ მსხვერპლი როკაპს მოეწონებოდა, იგი გადაიხვიხვინებდა — ნიშნად კმაყოფილებისა. რომ ოჯახს თავი აერიდებინა მსხვერპლისაგან, იგი თავის წევრებს თმას უბეჭდვიდა თაფლის სანთლით, აწებებდა სანთელს სახლს, კარს, პირუტყვებს, ბოსტანს და ყანებს. უკანასკნელს ოთხივე კუთხეში შებეჭდვიდნენ და თანაც გადაიკაჟინებდნენ: „შენი სვი და შენი ჭამე, ჩემსას ჯვარი დამიწერე-უუუ“.

დავის თავა ავადმყოფისათვის

თუ რომელიმე ოჯახის წევრი ავად გახდებოდა, მას ღამეს უთევდნენ მეზობელი ოჯახის წევრები. ასეთი ჩვეულების მიზანი იყო: ერთი მხრივ, ავადმყოფის გართობა და, მეორე მხრივ, ავადმყოფის მომვლელთა დამდამობით დასვენება. ღამის მთევარნი ავადმყოფის ოჯახში თავს იყრიდნენ ნავახშობებს და დილაამდე ართობდნენ მას სხვადასხვა სასაცილო

თამაშებით, შაირებით, ჩონგურზე დაკვრით და სხვა, ავად-
მყოფს აძინებდნენ, საზოგადოდ, ჩონგურითა და ღილინით.
ხოლო თუ მას ძილი მაინც არ ეკარებოდა, იმ შემთხვევაში
ცდილობდნენ მოხერხებული ოხუნჯობით გაეცინებიათ ავად-
მყოფი და მით შეემსუბუქებიათ მისთვის ტკივილების გადა-
ტანა — დროებით მაინც. გათენებისას ღამის მთევარნი მიდი-
ოდნენ თავ-თავიანთ სახლებში.

ბ რ ძ ნ ი ლ ო ბ ე ბ ი

ქალის თავშიშველი დაჯდომა, კარზე ჩამოჯდომა „წელ-
შიშველი“ ანუ შეურტყმელი, პირჯვრის დაწერა, კარზე ორი-
ვე ხელებით მიდგომა, პირდაუბანელი სალამის მიცემა, ფუ-
ლის ან სათესლე რაიმეს ხელში მიცემა. ოთხშაბათ, პარას-
კევს, ახალ მთვარეზე ორშაბათსაც ყველის და კვერცხის გა-
ცემა, კვიმატი ღღეები — იანვარი 2, 8; მაისი — 3, 6; ენკენის-
თვე — 3, 6. გადაცემა იცოდნენ უხმარი ქოთნით და ახალი
მამლით, რომლებსაც დატოვებდნენ ეკლესიის გალავანში, მა-
მალს სახურავზე შეაფრენდნენ, შემდეგ ეკლესიის კედელში
ლურსმანს მიაჭედდნენ. გადაცემა იცოდნენ კიდევ მწარე ხა-
პით — „სტკლეცდნენ“ გალავანში წყევლა-კრულვის შემდეგ.

ნარი. მელობინე ქალი

გამოაცხოვდნენ ღომის გულს, შიგ შეურთავდნენ ნიგოზს,
ხახვს, ბროწეულს. ბროწეული ბავშვს კარგ ფერს მისცემსო,
ხახვი — კარგ ხორცს, ნიგოზი — სიმსუქნისათვის. თუ ხსნი-
ლ იყო ყველსაც შეაყოლებდნენ. დადებდნენ ტაბლას გობზე,

¹ ბრძნა — რაიმე საქმის არქმნა ან სიტყვის ართქმა.

შემოუნთებდნენ სამ ღერ სანთელს, ტაბლაზე დაადებდნენ ერთ ნაჭერ საქონლის ხორცს, თხის არ შეიძლებოდა. ბებიაქალი ხელში დაიჭერდა სამ ცალ ნიგოზს და ღომის ჩხოს, დამსწრე ქალთაგანი ერთი დაიკავებდა ბოთლით ღვინოს. გობთან ახლო დასვამდნენ დედას მისი ბავშვით. პირს მიაბრუნებინებდნენ აღმოსავლეთისაკენ. ბებიაქალი უვლიდა გარშემო და აგორებდა მიწაზე ნიგოზს და რამდენიმე ადგილს როხაზავდა ჯვარედინად მიწას, ჯვრის შუა გულზე ამოტიკნიდა დანის წვერით მიწას და დამსწრე ქალი ჩაასხამდა შიგ ღვინოს. ბებიაქალი შიგ ჩაყრიდა ჩხოს და ტაბლიდან მოციტქნილ ფინჩხებს. ასე მეორდებოდა სამჯერ, მერმე წინ, აღმოსავლეთისაკენ წააჩოჩებდნენ გობს და ქალ-ბავშვს. გობზე წემორების დროს ბებიაქალი ამბობდა: ნერჩო ბედნიერო, ნერჩო მშვენიერო, ღვთისაგან ნაბრძანებო, საბედნიეროთ, საკეთილდღეოთ ლოცვა მოგვიხსენებია, მიწა გაგვიჭერებია (სახელი დედის და ბავშვის) საკეთილდღეოთ, საბედნიეროთ, ჯანსაღობა მიეცი, ტანის სიმრთელე, გულის სიმხიარულე, აღმატება წაღმ ყოფნა. იხსენი ყოველი ფათერაკიდან, იხსენი დაავადებისა და ავი საქმისაგან. თავდებოდა ასე: უნერჩო ბავშვზე იტყოდნენ — ფერხორცი არ ექნება, ვერ ისწავლის, ბლაუცაო და ბაიტარაი იქნებაო, უნერჩოს დაძახება დიდი შეურაცხყოფა იყო.

მუცელატკენილ ქალთან ბებიაქალი რომ მოვიდოდა, წელიდან სარტყელს იხსნიდა, შემოავლებდა თავზე მშობიარეს. „ღვთის მშობელო დედავ, გზაი ხსნილი მიეცი, მშვიდობით გადაარჩინე. ღვთისმშობელო, შენ გახსენი მისი გზაი“. ამბობდა ამას და მუცელზე ხელს აუხს-დაუხსობდა. მორჩენის შემდეგ ცეცხლს მიუტანდნენ და ჰკითხავდნენ: „მარია ამ ალი გი-

ნახავს, სამჯერ“, პასუხი იყო — კი. სასთუმალს ბადეს დაუ-
ყიდებდნენ, მუთაქას ქვეშ დანას ან მაკრატელს დაუდებდნენ.
მნახველები რომ მოდიოდნენ, პირველად მივიდოდნენ ცეცხლ-
თან და შემდეგ მელოგინესთან მისალოცად. თოფის გასროლა
აუცილებელი იყო ვაჟის დროს, მშიშარა იქნება თუ თოფი არ
ვისროლეთო. ვაჟის ჭიპის მოჭრა ხდებოდა წიგნზე, ხანჯალზე
ან ცულზე. ქალის—გარდა წიგნისა, კიდევ რაიმე სახელსაქმონ
ნივთზე. ორმოც დღეს ქალს დიდი პატივისცემით ინახავდნენ,
რჩეული საკმლით კვებავდნენ, საქმეს არიდებდნენ. ლო-
გინობაზე თუ ქალი გაილახა. სამისდღემჩიოდ წახტებო.
სალოგინო საკმელი თაფლით, ღვინით, პურისა და ღომის
ფქვილისაგან კეთდებოდა, რასაც „ხავიწი“ ერქვა. ქალი რომ
მორჩებოდა, იმ დღეს ოჯახიდან არაფერს გასცემდნენ, ბავ-
შვი ქურდი იქნებო.

მ ო ი ს ა რ ო ბ ა

გააკეთებდნენ ფეტვის ცომს, არგვალეზდნენ თვალეზივით,
შუაზე მასრით დანიშნავდნენ. დაიდებდნენ ხელის გულზე,
თვალის სიახლოვეს ატრიალებდნენ ხელს და ლოცულობდნენ
ასე:

„ხატო მოისარისაო, თვალი გაგვინათლე, გული გაგვიმზი-
არულე, მშვიდობის წელიწადი მოგვეცი, ჩემ თვალს აამორე
ყოველივე მავნე და ახილე ყოველივე კარგი“. ამ ცომს, რამ-
დენიც იყო ოჯახში, ყველა შემოივლებდა თვალზე ამ ლოც-
ვით. შემდეგ ერთი წაიღებდა და ჩააგდებდა მდინარეში და
იტყოდა: „ჩვენი თვალს ტკივილი დაღმა წყალს და აღმა
ქარს“.

გოსლოზა

სალამოს გამოაცხობდნენ ქონიან მკადს. დიდი ჭიქით აღნიშნავდნენ და ამბობდნენ ამდენი ცხენის ჯოგი, პატარა ჭიქით — ამდენი ძროხის ჯოგი, ორკაპი ფიჩხით — ამდენი თხის, ცხვრისა და ქათმის ჯოგი. ამ ჭადს, გამოცხობის შემდეგ, შემოუნთებდნენ სანთელს. ოჯახის უფროსი კაცი იკითხავდა: ბოსლო შინა ხარო, ერთი უპასუხებდა — შინ გახლავარო. ცხენი რამდენი გყავს — ჯოგი, ძროხა — ჯოგი, ცხვარი და თხა — ჯოგი, ღორი — ჯოგი, ქათამი — ჯოგი და თავდებობდა ამით.

გოჯის ხუთშაბათი...

ამ დღისთვის შენახული ჰქონდათ კალანდის ღორის ყბა. თუ ეს არ იყო, გოქს კლავდნენ, კალანდის ნარჩენ ღვინოს ხაჭაპურს და ყბას შემოუნთებდნენ სანთელს და ლოცულობდნენ. „წმინდა ბასილის ძალო და მადლო, კალანდას თუ რამე ლოცვა დაგვაკლდა, ახლა შეგვისრულებია. მშვიდობა და ბედნიერება ჩამეიყვანე ჩვენს ოჯახში, კაი წელიწადი მოგვეცი“

მერცხალი რას ამბობს

მუშის უპატიო ქალი ცეცხლო დაწვი, ნავთო დაწვი,
მუშის მოპატიჟე ქალი სამოთხისა კარსა დასვი.

ვარდენ გუგუნავას თქმული

საზოგადო მიზნები ასახსნელად არის მალი
რა შეიქნას თექვსმეტი წლის კაცი იყოს გინდა ქალი,
სადმეიდან გაუჩთება სიყვარულის ნაპერწკალი,

ზოგს დასწევას და ზოგსაც ნელათ მოედება მისი ალი.
წელში წვრილი და მაღალი თეთრ ლოყებში შავი თვალი,
წარბები ერთათ შეყრილი გველის სახით განათალი.

შეწყენილის ლოცვა

სახელითა ღვთითა, მამითა, ძითა, სულით წმინდითა, ანი იძრა, ბანი იძრა, ცაი იძრა, მიწა იძრა, ზღვაი და ხმელეთი იძრა, მარმარილოს კოშკი იძრა, ცის კიდის კიდემდე სულიერი და უსულო იძრა, ვისაც ულოცავ დრომდი სასიკეთოთ საწაღმართოთ გასაზღელი ბავშვი იძრა, ანი დადგა, ბანი დადგა, ცაი დადგა, მიწა დადგა, ზღვაი და ხმელეთი დადგა, მარმარილოს კოშკი დადგა, ცის კიდის კიდემდე სულიერი და უსულო იძრა და დადგა, ვისაც ულოცავ იმის მუცელში სასიკეთო ბავშვი დრომდი დადგა, ელესიეს მინდორში გველესიეს ზიდე დევს, დეიდაი, მამიდაი კიდობანში წევსა, უძრავი ეიძრა, კიდევ მაგრათ ზისო, ადამ დეიბა და სამი დეიძახა, ციხე აშენდა, კოშკი დამაგრდა, ვისაც ულოცავ იმის მუცელში დრომდე სასიკეთო ბავშვი დამაგრდა.

ნათგალევი

მე გილოცავ თვალყვისასა, ქალისა და კაცისა, ბრძენისა და რეგვენისასა, შიგნისა და გარისასა, დაბლისა და მაღლისასა, წითურისა და დიაცისასა, მევიდოდა შავი წყალი მას მოქონდა შავი გველი, ჩავყავ შავი ყავარჯენი, ამევილე გველი, გავკერი, გამევილე წელი, შევკიდე ლობესა ჩარჩხსა, ფარჩხო კანისასა, იგი ღრებოდა, ჭკნებოდა, გაქარდებოდა ისე, ვისაც

ულოცავ იმის ავი თვალთ შემხედვარე ღრებოდა, ჭკნებოდა, გაქარდებოდა. ისისირი, მისისირი, მას სიკტილი, პაპასკირი, მან გევიდეს მთაზე, თავი დაკრას ქვაზე, გული სამართებელზე, თვალი გველის ფხაზე, გასკდა რვალი, წავარდა თვალი, რაც სულიერმა ავი თვალთ, ავი სულით, ავი გულით ვინც შეხედდა, იმას წავარდა მისი სამხერი თვალი, ავი თვალისას თვალში ნაცარი, გულში ლახვარი, ვაი და ვუი, ქვაი და რკუი, გველისა ფხაი, ეჭვისა რქაი, წმინდა გიორგის რისხვა, ბოძალი ჰერუკულმართი, ბარდი და ეკალი, ჯინჭრისა კატარი, აღულებული კუბრი, გახურებული შანთი, გასკტა და მოხთა მის თვალსა და ყურს, რაც სულიერმა ავი თვალთ და ავი სულით და გულით შეხედა, იმას წავარდა მისი სამხერი თვალი, ავი თვალისას თვალი წაჰარდა, ავი სულისას — სული გავარდა, ავი გულისას — გული გუუსკტა, თავი გუუხმა. თეთრი კაცის თვალი ეცა, თეთრმა ზღვამა გადიტანა, წითელი კაცის თვალი ეცა, ნაპერწკალმა გადიტანა. გასკტა რვალი და წავარდა თვალი, ავი თვალისას და ყურისას დასწერე ღმერთო ჯვარი შენი და არგე ლოცვა ჩემი.

მარიამ იჯდა სამოთხისა კარსა, ქსოვდა ქსელსა ძეწეულისასა, ქრისტეს კვართისასა. ცამა ნახა განიხარა, კაცმა ნახა განიხარა. შამევიდა ერთი ევა როსკიპი ქალი, შვიდ თვარეს შექნილი, შაფათ დღეს დაბადებული, გამითვალყვა ქსელი ჩემი, ვერ ავიღე მხარი ჩემი, ნურას ტირი მარიამ დედაო, ღვთისაო, ნურას ჩივი, ნურას გოგოთობ, ნურას ყრი მარგალიტისა კურცხალსა, ჩადი ველისა ბოლოსა, ცეცხლი ანთია, დაასხი ძმარი, დააფსე ცეცხლი, დიეფსება თვალი და ყური მისი. რაც სულიერმა ავი თვალთ და ყურით შეხედა, იმას წიეფსება თვალი და ყური მისი.

შენახთომო დედიანო, შენახთომო ბაბიანო, შენახთომო შვილიანო, შენახთომო ძირიანო (სახელი) თუ ორშაფათს შეხვედროდე, თუ სამშაფათს შეხვედროდე, თუ ოთხშაფათს შეხვედროდე, თუ ხუთშაფათს შეხვედროდე, თუ პარასკევს შეხვედროდე, თუ შაფათს შეხვედროდე, თუ კვირეს შეხვედროდე, თუ წარმოს შეყროდე, თუ უკუნს შეყროდე, თუ დღეი შეყროდე, თუ ღამე შეყროდე, თუ ძილში შეყროდე, თუ ღვიძილში შეყროდე, თუ გზაში შეყროდე, თუ მგზავრობაში შეყროდე, თუ წყალში შეყროდე, თუ ხმელეთათ შეყროდე, თუ დაცემაზე შეყროდე, თუ ადგომაზე შეყროდე, თუ თანაშობაზე შეყროდე, თუ გულის მოსლაზე შეყროდე, რათაც ფერათ შეიყარე, იმ ფერათ გიეყარე... რომელი ხარ წმინდამან გიორგიმ დალახვროს ამის მაწყენარი, უჟმური შენახთომი წმინდამან გიორგიმ დალახვროს. აგი ბავშვი მონათლულია, ქრისტიანია, ქრისტიანის შვილია, მარონცხებულია, ნათელღებულია, ჯვარი სწყალობს ჯვარცმული, ვერას აწყენს მაცთური, სწყალობს წმინდა გიორგი, ჯვარი პატიოსანი. მამა აცვია, ძე არტყია, სული წმინდა გარემოსია. სამი ძმაი თავდგირიძე, შვიდი ძმა რუსაძე, მივიდოდა ფთასა, ხელი სტაცა ფხარსა, შეიყვანა სახლსა, დააჟინა კარსა, სამსა ძმასა აღსა, ხვალ დასკრიან თავსა. ვაი აღის თავსა, საჩეჩელი გვერდსა, ზადე სასტუმალსა, ფთას ირემი დუუკლავენ, თავი შენდა შუუჯანგან, იქ წადი, იქ ჭამე, იგია შენი სასმელ-საჭმელი. გამოშორდი უჟმურო შენახთომო (სახელი) ტვინში ხარ, ძვალში გამოდდი, ძვალში ხარ, ბილში გამოდდი, ბილში ხარ კანში გამოდდი, კანში ხარ კარში ოფლათ გამოქარდი, გამოშორდი

უემურო შენახთომო (მლოცველს ამ დროს ძუჭში უჯიოავს ჩხოი და ნაცარი (და ეუბნება გუუშვი და გაგიშობ) და მუჭავს ხელს), მერმე ნაცარს და ჩხოს ყრის უკანა კარებში.

ნათლისღებას წყლის კურთხევაზე, ვისაც ცხენი ყავდა ზედ ჯდებოდა და წყალში იდგა. ქალები ნაკურთხ წყალში სანთელს აქრობდნენ და ინახავდნენ, ელვა-ქუხილის დროს ყაქს დაუნთებდნენ. მოხუცებულები ყმაწვილებს აფრთხილებდნენ: ჩიტებს აწი ნულარ სდევთ, ველარ მიეპარებით, ნაკურთხი წყალი დალია და თვალი გაუნათლდა, თან კიდევ აწი მოჭვაც არის და გამრავლებას იწყებსო .

კლიმოზა — 28 იანვარი

ამ დღეს აუცილებლად ღვინიან ჭურებს მოხტიდნენ თავს და ღვინოს მოაკლებდნენ, ლოცვა არაფერი იცოდნენ, მხოლოდ ხაჭაპურს გამოაცხობდნენ და რამდენიმე მეზობელი ერთად შეიყრებოდა და რიგრიგობით ერთმანეთის ღვინოს გასინჯავდნენ. ამას ძალიან მხიარულება და ოხუნჯობა ახლდა. „იმის ღვინო ვკლიმეთ, მარა არ ვიცი როდის შესვამს“. ასე ყველასთვის რასმეს იხუმრებდნენ.

სულთა შაბათი

ამ დღეს ხორცეულისაგან საკურთხს გააკეთებდნენ და ეკლესიაზე აგზავნიდნენ: უმეტესად ბავშვების ხელით. წამლებს სასტიკად უკრძალავდნენ უკან მოხედვას.

ჰველიერის ორშაბათი

ამ დღეს არაფერ საქმეს არ აკეთებდნენ — იგი დღეი ყვე-
ვილ-ბატონებს ეკუთვნისო — წიგნის წაკითხვა მაინც ძალიან
აკრძალული იყო — ბატონები თვალს დუუფსებსო.

ჰველიერის ხუთშაბათი — ილოროგა

გამოაცხოვდნენ ძალიან დიდ ხაჭაპურს, რაც შეიძლება
მეტი ყველით სავსეს — ძროხა კაი მეწველი იქნებაო. გააკე-
თებდნენ ძროხის ცურნესავით ცომს, ამასაც ყველს უზამდ-
ნენ და გამოაცხოვდნენ. საქონლებს რქებზე სანთელს დაუნ-
თებდნენ და ლოცულობდნენ: „ღმერთო და ილორის წმინდაო
გიორგი, იხსენი ჩვენი საქონელი ჭირისა და ფათერაკისაგან,
ნადირის კბილისაგან, ძვალი ტვინით გუუფსე, ძარღვი სისხ-
ლით გუუფსე, ტყავი ხორცით გუუფსე, ცურნე რძეით გუუფ-
სე, და პატრონს მშვიდობაში და სიამეში მოახმარე“. სა-
ქონლებზე თავშემორებული სანთელი ეკლესიაშიც მიქონდ-
ნენ და წმინდა გიორგის ხატს უნთებდნენ.

ჰველიერის შაბათი — ცოცხლის სულთა

ამ დღეს ეკლესიაში უეჭველად აგზავნიდნენ საკურთხს:
ყველსა და კვერცხს, ხაჭაპურს — პირწყარილს, აუცილებლად
ოთხ კუთხით შემოკეცილს. საზოგადოდ, საკურთხზე დასადე-
ბი რამე — კვერცხი, ჯანჯუხა და სხვა — კენტი უნდა ყოფი-
ლიყო, წყვილს „იბრძნიდნენ“.

ლ ა მ კ რ ი ბ ა

პირველი თებერვალი, ანუ მიგებება სალამო. ამ სალამოსათვის ბავშვები ძალიან აღრიდან ემზადებოდნენ, რომ კარგი ლამპარი ჰქონოდათ, რასაც აკეთებდნენ უფრო ხშირად ბალის ტყავისგან, ნასხვენიდან, ანწლის ღეროსგან, ჩალისგან და სხვა. კარგად რომ დაბნელდებოდა, ოჯახის ყველა წევრი, დიდიან-პატარიანა, თითო ლამპარს გამოიტანდა ანთებულს, ამნაირად, მთელი არემარე განათდებოდა, ბავშვები ყოყინებდნენ, ლამპრობაო — იყო სიცილი, ხუმრობა, ლამპრის ლამპარზე დარტყმა. სოფელი სოფელს ეჯიბრებოდა და ოჯახი — ოჯახს — ვის კაი ლამპარი აქო. ვახშამი იმ ლამეს განსაკუთრებით კარგი კეთდებოდა. მეორე დღეს — მირქმას — კიდევ კარგი სადილი. ყველა ეკლესიაში მივიდოდა და იქაც წინა დამის ლამპრის შესახებ ლაპარაკობდნენ. ძველი კაცები გაზაფხულის მაგიერ გალამპრობას ხმარობდნენ. — გალამპრობაზე ძროხა წველას იზამსო და სხვა ასეთები. ლამპარს კიდევ უძახოდნენ ჟინქლს და ფაკლას. ჟინქლივით ლოყები აქო, ფაკლასავით იენტოვო, ხმარობდნენ ასე ლაპარაკში.

ჯ მ რ ი ს წ ე რ ა

ქალსაც და კაცსაც დედები არიგებდნენ ჯვრისწერის დროს, ფეხის ფეხზე დადგმა მოასწარი და შენი მორჩილი იქნებაო. ეკლესიის კედელზე მიწოლა ან ხელის დამჯიღვა არ შეიძლებოდა — შვილი არ ეყოლებოდა, ჯვრისწერა რომ თავდებოდა, მეფე-დედოფალი სამხრეთის კარებიდან გამოყავ-

დათ, ორი კაცი კარის თავზე ხანჯალს გადააჯვარედინებდა და იმის ქვეშ გამოდიოდნენ. მლადე ნამწვავ სანთლებს ერთმანეთს ჩუმად აზომებდა და რომელიც მეტი დამწვარი იყო, მისი აზრით, უწინ ის მოკვდებოდა ნეფე-დედოფლისაგან. მლადს კარგად ასაჩუქრებდნენ, ეშინოდათ, თუ გულს შეაკლდა ქორწილის ღამეს „ჭინქს გამოსკნის“ და შვილი აღარ ეყოლებათ.

დედოფალს სახლში პირველად მარჯვენა ფეხს შეადგმევინებდნენ. პირში შეაქარს ჩაუდგებდნენ, ჩხოს მოაყრევიანებდნენ, კალთაში ბავშვს ჩაუგორებდნენ, „ზანტუკზე“ დასვამდნენ — მდიდარი იქნებაო. მეორე დღეს ღომით სავსე ჭურჭლიდან რასაც საომჩხულე ერქვა, ღომს გადმოაყრევიანებდნენ კარდლის გამოსაწყავად და დასამზადად.

შაბათი საღამო

შაბათს უფრო ხშირად ყანაში სადილი აღარ მიჰქონდათ, მიუშები შინ ადრე ბრუნდებოდნენ. ამ დღის ნახევარი სისუფთავისათვის ზრუნვას ეკუთვნოდა. ქალები ეზო-მიდამოს და სახლ-კარს ასუფთავებდნენ, ძველს და ახალს რეცხავდნენ, კერავდნენ, აუთოებდნენ, თავისა და ტანის დასაბან წყალს ათბობდნენ. ბოლოს წარბს იღებავდნენ — გუნდა ლოხოსტაკით, რასაც ადგილობრივ ყიდულობდნენ, უფრო ხშირად კი ურიასთან, მთელი წლის საყოფს — მარიამობის, პეტრეპავლობის ან ჯუმათობის ბაზარზე. შინ კიდევ ბროწეულის გამხმარ კანს ინახავდნენ, ამას ფესეს ეძახოდნენ, გუნდას წვაენდნენ, ნაყავდნენ, ლოხოსტაკს ლესავდნენ, ამ სამს ერთად აურევდნენ, ისლის კალამზე გაწეწილ ყაფს დაახვევდნენ და ამით იცხებდნენ წარბზე, ზოგი ცალ-ცალკე, ზოგიც წარბებს

აერთებდა საღებავით. ამას გირა-შესვნილი ერქვა. ხანში შესული ქალები წამწამებსაც იღებავდნენ, თვალში სინათლეს გვმატებსო, ამბობდნენ. ეს შაბათის განუშორებელი საქმე იყო. თან კიდევ კარგი ვახშამი. „ვინ იცის, ვინ წავა და ვინ მუა, იტყოდა ოჯახის დედა ქალი, ღვინო დღის სინათლეში ამეიღე კაცო“ — შაბათ საღამოს საღვინე ჭურჭლის მთლად დაცლა არამც და არამც არ შეიძლებოდა: ანგელოზი ჩამეიარს, ჭურჭელში ჯოხს ჩაყოფს და თუ მშრალი ამოყვა, დაფსებული ყოფილაო, იტყვისო, გვიანამდი არ წვებოდნენ, რადგან სტუმარს ელოდნენ ვახშამზე: მიცვალებულებს იგონებდნენ, შესანდობარს სვამდნენ.

წარმო და უკუნი

ახალ მთვარეზე ხუთშაბათი, შაბათი უკუნია, დანარჩენი დღეები — წარმო. ძველ მთვარეზე შეცვლით ხუთშაბათი და შაბათი წარმოა, სხვა—უკუნი. კვირა და პარასკევი არც წარმოა და არც უკუნი. უკუნზე იცოდნენ ხის მოჭრა, ახალ სახლში შესვლა, მიცვალებულის დამარხვა და სხვ. წარმოზე — საძირკვლის დასკვნა, ბავშვის წიგნის დაწყებინება, თმის გაკრეჭა, დარგვა, დამყნა.

მეიშობა და მკურნალობა

საბჭოთა ხელისუფლების დამყარებამდე მთელ გურიის მოსახლეობას ემსახურებოდა ერთადერთი მაზრის ექიმი ორი ფერშლით. უმთავრესად იმათი მოვალეობა იყო უკვე მომხდარი ფაქტის დადასტურება და „სათანადო ოქმის“ შედგენა,

ესე იგი, „მართლმსაჯულების დადგენა“ განზრახ ან უცაბედად ჰკვლევლობის შემოწმება და დაწვრილებით გამოკვლევა, ტყვიან ან ცივი იარაღი“ რა ადგილას აქვს მოხვედრილი ან დარტყმული. ექიმს თან უნდა ხლებოდა გამომძიებელი და ორ-სამი მოწმე.

კანონის ძალით მოკლული უნდა შეემოწმებინათ დამარ-ზვამდე, მაგრამ ძლიერ ხშირად უღრობის გამო ვერ ასწრებ-დნენ და უხდებოდათ 15—20 დღის შემდეგ მიცვალებულის საფლავიდან ამოღება, გაჭრა და შემოწმება... ყოველივე ეს ხდებოდა სასამართლოში დანაშაულის გამოსარკვევად.

იმ დროს ექიმის მოსაწვევად სააჟისო შეძლებაც რომ ჰქონოდათ, ექიმის თავის დროზე შოვნა არ შეეძლოთ და იძუ-ლებული იყვნენ შინაური ექიმებისათვის მიემართათ, რადგან ერთი ექიმი და ორი ფერშალი მთელ გურიას როგორ მოუვ-ლიდა. 80-იან წლებში ქ. ოზურგეთში საჯავახოელი სოფრომ ხუნდაძე ხსნის აფთიაქს. აფთიაქის შენობის გვერდზე დგება სტუდენტი მედიკი იაგორ თაყაიშვილი, მართალია, თაყაი-შვილს საექიმო ფაკულტეტი დასრულებული არ ჰქონდა, მაგ-რამ კეთილსინდისიერი იყო და მასთან ადვილი მისადგომი... ადრე გაითქვა სახელი და მთელ გურიას დიდი ენერგიით ემსა-ზურებოდა და ხალხსაც ძლიერ უყვარდა... მეტისმეტად პუნქ-ტუალური ადამიანი იყო. ავადმყოფისათვის საქმლის მოსამ-ზადებელ ჰურჭელს ამოწმებდა, კარგად ახეხინებდა, დაწვრი-ლებით ასწავლიდა ყველას, თუ როგორ გაეკეთებინათ ქათმის ბულიონი, კისელი და სხვა. თუ მარხვის დროს ავადმყოფი მარხვას არ „გატეხდა“ (იშვიათი იყო მარხვის გამტეხი), მა-

შინ ის ურჩევდა კანგაცლილი თეთრი ლობიო და მოლოქა მხალი ეჭმიათ მისთვის.

ექიმი დავიდიანცის რჩევით ხალხმა დაიწყო ბახმაროს აგარაკით სარგებლობა და, საზოგადოდ, ჰაერის გამოცვლა. დიდი უმადურობა იქნება არ აღენიშნოთ აგრეთვე დავიდიანცის მახლობელი თანამშრომელი ფერშლები: პროკოფი ბერეჟიანი და ბესარიონ კალანდაძე. ორივე ფერშალი მთელი გურიის მოსახლეობის სანდო და საყვარელი ადამიანები იყვნენ. ესენი იყვნენ პირველი მერცხლები და მათ შეჰქმნეს ერთგვარი ტრადიცია — სიკვდილამდე ყველა პირნათლად ასრულებდა თავის მოვალეობას...

1890 წლიდან გურიას ემატება ექიმი დიმიტრი ერისთავი — საზოგადო მოღვაწე, იშვიათი ადამიანი. დაბებსა და მოზრდილ სოფლებში ჩნდებიან ახალგაზრდა ფერშლები, იხსნება აფთიაქი ჩოხატაურში (ჩხანის ფიალკოვსკი — უცხოელი) და ლანჩხუთში (კოჩინაშვილი — იმერელი). ამრიგად, სოფლური ექიმობა თანდათანობით ქრება, მაგრამ სავსებით ის დღესაც არ არის დავიწყებული. ჩემი სიტყბუჯის ასაკში შინაურ ექიმობას საპატიო ადგილი ეჭირა.

შინაურული ექიმობა იცოდნენ როგორც ქალებმა, ისე კაცებმა. ყველა სოფელს ჰყავდა თავისი ექიმი ქალი და კაცი. ქალები უმთავრესად კურნავდნენ შინაგანი სნეულობით დაავადებულებს, კაცები დასტაქრობდნენ.

ექიმობაში ქალები შელოცვითა და სხვადასხვა სამკურნალო ბალახით მკურნალობდნენ. ზოგიერთი მათგანი თავის სოფლის გარეშეც ცნობილი იყო და შორეული სოფლიდანაც მოჰყავდათ, ავადმყოფთან მიჰქონდათ შემზადებული წამალი. მაგალითად, ფოჩხისჯვარელი „გელის ქალი“ (შარაბიძის ასუ-

ლი), ჰანჭათელი „მესანაკე“ მონოზანი დარეჯან ფიცხალაი-
ჭვილის ქალი (გოგუაძის ქვრივი), უნაგერაზე (სუფსა) ნინო
ტაკიძისა და ბევრი სხვაც დიდად იყვნენ განთქმულნი.
პირველმა ორმა იცოდა სხვადასხვა წამლისა და მაჯუნის შემ-
ზადება. ექიმობდნენ საყმაწვილოს, უემურს და ქრონიკული
ჩველით დაავადებულთ.

ნინო ტაკიძისამ იცოდა დამწვრისა და დამდუღრულის წა-
პალი, მისი მოურჩენელი არავინ იყო. ერთ თვეს რომ აფთია-
ქის წამალმა ვერაფერი უშველა დამწვარს, ნინოს ძალამომ
ორ დღეში მოაშუშა. იმანვე იცოდა საქონლის ექიმობაც. ჰან-
ჭანთელმა ანუკი გოგუაძის ქალმა (წულაძის ქვრივმა) იცოდა
თვალის ექიმობა. სამწუხაროდ, მისი ცოდნა მას არავისთვის
დაუტოვებია. დარეჯან ფიცხელაიშვილის ექიმობა შეისწავლა
მისმა უფროსმა რძალმა ბარბაღე ნინიძის ქალმა და ისიც გან-
თქმული იყო, მაგრამ „მემკვიდრეობა“ არავის არ დაუტოვა.
ასევე ითქმის ნინოს შესახებაც.

ექიმი ქალები გასამრჯელოს იღებდნენ, მაგრამ მათ სასა-
ხელოდ უნდა ითქვას ისიც, რომ ხარბი არ იყვნენ, გასამრჯე-
ლოს იღებდნენ განკურნების შემდეგ და ზოგჯერ „რაც შენი
ნამუსი იყოს“ ჯერდებოდნენ. ექიმმა ქალებმა იცოდნენ ყო-
ველგვარი სამკურნალო ბალახების სახელი, გამოცნობა, ათვი-
სება და მოხმარა, ზოგს კიდევ რგავდნენ ბოსტანში... ზოგ
ავადმყოფს სხვადასხვა ბალახიდან ნახარშის აბაზანასაც უკე-
თებდნენ. ასეთი აბაზანა მე გამიკეთა მშვიდობაძის ქალმა —
„ვადაკკორიას ქვრივმა“ — და ციებით დახუთული კიდევ მო-
მარჩინა. ექიმმა ქალებმა იცოდნენ აგრეთვე სხვადასხვა წამ-
ლის ლესვა. ამ გასალეს წამლებს ყიდულობდნენ ზოგს აფ-
თქაში და უფრო მეტს კიდევ მეწვრილმანეების დუქნებში.

შინაურ ექიმ კაცებიდან ყველაზე სახელმოხვეჭილი იყო როსტომ არობელიძე და მისი მოწაფე გაბრიელ არობელიძე (სოფელი ბოხვაური — ოზურგეთის მახლობლად). მოტეხილის, დაჭრილის და ნადრძობის იშვიათი ექიმი — გურიის აურმანიძეები.

არობელიძე თავის გვარის წარმოშობას და გურიაში დასახლებას უკავშირებს ისტორიულ თორნიკე ერისთავის ხანას და, ამბობენ, თითქოს მათი წინაპარი ყოფილიყო არობელიძეები, და იმ ომში, რომელსაც თორნიკე სარდლობდა, არობელიძე ყოფილიყოს ჯარის ექიმი — დასტაქარი. როსტომს მეტვით არ მოვსწრებივარ, პირადად არ ვიცნობდი, მაგრამ მის შესახებ ზღაპრული გადმოცემით, თავის ხელობის პირდაპირ ჯადოქარი ყოფილა, ამავე დროს თავისი საქმის დიდი მოყვარული — გატაცებული, ავადმყოფს თვით ეძებდა და ძლიერ ბევრი უკურნებელი განუკურნავს თურმე... მისი ასული აპირაოზი (მდინარაძის ქვრივი, ვაკიჯვრელი) გურიიდან ზემო აჭარაშიაც კი მიჰყავდათ, ან მასთან მოჰყავდათ მძიმედ დაჭრილი ავადმყოფი. მეორე მისი ასული ელისაბედ წულაძისა, ისიც ცნობილი ექიმი იყო და თავისი ცოდნა მის შვილს ნესტორ გაბრიელის ძეს გადასცა.

გაბრიელ არობელიძემ მხოლოდ ხელის მოწერა იცოდა, რუსეთ-ოსმალეთის ომში (1878 წ.) ჯარს ახლდა ექიმ ქირურგად, დაჯილდოებული იყო წმინდა გიორგის ჯვრით, ეძლეოდა პენსია, ეხმარებოდა არა მარტო გურიას, არამედ აჭარასაც და იმერეთ-სამეგრელოდანაც ჰყავდა ავადმყოფები, ხშირად სახლშიაც ეწვა რამდენიმე თვეობით დაჭრილები თუ დასახიჩრებულიები. როგორც როსტომი ისე გაბრიელიც ავადმყოფთან იყვნენ მეტისმეტად მკაცრი მკურნალობის დროს, ისე კი —

მეტად ჩვილი გულის, კაცთმოყვარე. ყოფილი პაციენტებიც ამას არ ივიწყებდნენ და ყველა ნათესაური გრძნობით იგონებდა, ჭირსა თუ ლხინში არ აკლდებოდნენ.

ფაქტია, რომ გაბრიელს რამდენიმე ათეული ისეთი ავადმყოფი „სად-სალამათად“ მოურჩენია, რომლის შესახებ პროფესორებსა და ექიმებს ხელისა თუ ფეხის მოკვეთა ურჩევიათ. არობელიძის მალამო ისევე ნაქები იყო, როგორც თურმანიძის. გაბრიელი ხალხს ემსახურა 70 წელიწადზე მეტი, ემსახურა უანგაროდ. არ იყო არც ის და არც მთელი ზემოთ ჩამოთვლილი საგვარეულო ფულის ხარბი... ავადმყოფის განკურნება თუ მის ცოდნა-გამოცდილებას აღემატებოდა, მაგალითად, თუ საჭირო იყო დაუყოვნებლივ ოპერაცია, თვით უწყობდა ხელს და ავადმყოფს სხვაგან ისტუმრებდა. ღრმად მოხუცებულს კიდევ შესწევდა მუშაობის უნარი. გარდაიცვალა 1935 წელს. თავისი ცოდნა და გამოცდილება გადასცა თავის რძალს ანიკოს (ელიზბარ ლოლუას ასულს), რომელიც თავისი სიმამრის კვალობაზე უანგაროდ და კეთილსინდისიერად ემსახურებოდა ხალხს.

პ ა ტ ა ჯ ვ ა რ ა

გურიისში დიდად იყო გავრცელებული და დიდი ზიანი მოჰქონდა კატაჯვარას. ეს ავადმყოფობა უმთავრესად ყმაწვილებს ავლებდა მუსრს და ამიტომაც მას ავადმყოფობის პირველ სტადიაში საყმაწვილოს ეძახდნენ. საყმაწვილო თუ გართულდა — ჯირკვლები მოსდევს, ჯირკვლებსა და მეტ გართულებას კატაჯვარა, რომელიც შემდეგში ფილტვებზე გადადის, ჭლექად იქცევა და მკურნალობაც ამაო იყო. საყმაწვილოს

წამლობა გურიაში ძლიერ ბევრმა ქალმა იცოდა (დღესაც იციან), მაგრამ ჭირკვლებსა და კატაჯვარიანს კი ვერას შეელოდნენ. შემდეგ ამისი შეუღარებელი ექიმიც გამოჩნდა. მას მთელი საქართველო კი არა, რუსეთი და აზერბაიჯანი იცნობდა. ავადმყოფს თვით ექიმები და პროფესორები უგზავნიდა და მკურნალობა სოფლური საშუალებით მთავრობიდანაც ნებადართული ჰქონდა. ეს ექიმი იყო ლევა პაჭკორია და მისი მეუღლე ელისაბედ ხავთასის ასული. დვაბზუელი კოწია ხავთასი ცნობილი გლეხი იყო, შეძლებული და ფხიზელი. ყავდა ცქრიალა, სიცოცხლით სავსე გოგონა ელისაბედი. რვა წლის ასაკიდან ელისაბედს კატაჯვარა გამოაჩნდა. მამას არაფერი დაუზოგავს, მაზრის ექიმ დავიდიანცსაც უჩვენა. ექიმმა ფილტვების სისუსტეც შეამჩნია და ავადმყოფი სოხუმში გასწერა. ერთ წელიწადს სოხუმშიაც ჰყავდა, მაგრამ უკეთესობა არ დაეტყო. ჯოგის პატრონი დათუნაიშვილი, კოწიას მეზობელი, იცნობდა ზუგდიდელ მეჯოგეს ლევა პაჭკორიას, იცოდა რომ ასეთ ავადმყოფს აქიმობდა... პაჭკორიამ იკისრა ელისაბედის მორჩენა. დაუწყო ექიმობა და ოთხი წლის მკურნალობით სავსებით გაჯანსაღებული კიდეც შეირთო, გურიაში სოფელ სუფსაშიც დასახლდა.

ამრიგად, 40 წლის განმავლობაში ეს ცოლ-ქმარი ერთად მუშაობდა. მათ საქმიანობას ბრწყინვალე შედეგიც ჰქონდა. ლევას კარზე ყოველდღიურად რიგში იყვნენ ჩამდგარი შეკვეთილი წამლის მისაღებად თუ ახლის შესაკვეთად... სიყმაწვილის ჭირკვლებს და კატაჯვარას წარმატებით აქრობდნენ. ლევას მკურნალობა 20 წლის ასაკიდან შეუსწავლია, თვით ყოფილა კატაჯვარით დაავადებული, მოურჩენია ხორგელ ნიკო ფაციას და წამლობაც მასვე უსწავლებია, ლევას სიტყვით,

რომ ვთქვათ, „მისი სულის სამადლოდ“. იმჟამად ამ ორ ადამიანს 3.000-ზე მეტი ავადმყოფი მოურჩენია. აღსანიშნავია, რომ ლევაც არ იყო თურმე ფულის მოყვარული, პირიქით, ავადმყოფს საშუალებას აძლევდა იაქიმნა და მორჩენილიყო. ოთხი ავადმყოფი ქალიშვილი, ჭირისუფლების მიერ მიტოვებული, ამ ოჯახმა შეივრდომა, განკურნა და თავისი ხარჯით გაათხოვა...

ლევა კოლმეურნეობის საამაყო წევრი იყო, მთელ კუთხემიდამოს საყვარელი, კოლმეურნეობის გამწევ ცოცხალ ძალას უვლიდა, მის მიერ შეშადებული საქონლის მალამო — პაქკორიას მალამო აფთიაქშიც იყიდება. მანვე იცოდა ცოფისა და შეშლილის წამლობა.

III. გიცვალეზულის კულტი გურიაში

მეზოზოლოგა ზირსა და ლხინში

ეს ამბავი ჩემი სიყრმის დროინდელია. იწყება 1880 წლიდან და წყდება 1905 წელს. როგორც ვიცი, ამ წლიდან პეტელსაქართველოში, განსაკუთრებით კი გურიაში, დიდი გარდატეხა მოხდა. ძველი ჩვევა, ადათი, სხვადასხვა კულტი თუ სავსებით არ აღმოიფხვრა—შეგალდა, განელდა, შეირყვნა, ახალმა სიომ დაბერა და ძველი „პირსარჩული“ შემოაცალა... ბევრი დავიწყებას მისცა, ზოგიერთი კი ახალი დროის შესაფერად მორთო-მოკაზმა. ამის განხილვას მე არ შევუდგები და, ამ მოკლე წინადადობილას შემდეგ ძველს ამბავს მოგიტხრობთ.

ერთი სოფელი, ერთი ეკლესიის მრევლი (შემავალსაც იტყოდნენ), ერთიმეორესთან მჭიდროდ იყვნენ დაკავშირებული და კარგი მეზობლობაც ჰქონდათ. ერთიმეორის დახმარება, შემოძახება, ნუგეში, ჭირისა და ლხინის გაზიარება, გასესხება-ჩასესხება, მაინდი, ყანის, ძროხის, ღორის და ცხენის მოზიარება, მურღუ-ნათლულობა, დედაშვილ-შვილობილობა, ერთად პურის ჭამა, გადაპატიყება-გადმობატიყება, ერთიმეორეში მოსაკითხის გაგზავნა, ჩვეულებრივი იყო.

ოჯახის უფროსი ქალისა თუ კაცის შესახებ თუ იტყოდნენ, კაი სამეზობლო არისო, ეს დიდი ღირსება გახლდათ... ნე რა

ვარ, კაი მეზობლის წყალობით, ქე შიდგია სულიო. — ხშირად გაიგონებდი ხელმოკლე ოჯახის პატრონისაგან. — ისეთი კაი მეზობელი მყავს, რომ თუ რამეზე მივდექი მისგან გაწიბლება არ იქნება, მისი რომ არ ჰქონდეს, სხვისაგან მიშონის და ხელს გამიწყობსო.

— კაი მეზობელი კვიდრ ძმაზე უკეთესია.

— იმისთანაი კაი მეზობელი მყავს — თვალში რომ ჩამივარდეს, თითს არ ამოვისობ.

— იმისთანა კაი სამეზობლო დედ-მამა მყავს, ღმერთო მისი გულიზა მომკალიო, ნატრობენ მისი მეზობლები (გასათხოვარი ქალის შუამავალი იტყოდა).

— რა ვქნა, რა გამეწყობა; ავია თუ კაია მაინც ცეხლიკერის მეზობელია, რაც უნდა მაწყყინოს მომდურება მაინც არ შემიძლია, ცეხლი რომ გამიჩნდეს, მაინც მისი იმედი მაქვს. მან უნდა მომაშუროს, უცბათ გული წამივიდეს — წყალი მან უნდა „შემაშეშხოს“... შორეულ ნათესავს მაინც მირჩევნია.

რამდენადაც ქებული იყო ადამიანი კარგი მეზობლობით, ორი იმდენად აძაგებდნენ „გლახა“ მეზობელს, ასეთი მეზობელი კეთროვანივით განდევნილი, გარიყული, ყბადალებული იყო, „კუთხე-მეზობლების საჯაყავად გაჩენილი — სოფლის სასირცხო“... ნათქვამის შემდეგ ცხადია, მეზობლობაში უბრობა (დამდურება), ხმის არ გაცემა საძრახად, სათაკილოდ იყო მიჩნეული.

— ისეთი კაი სულიერია, რომ მის მომდურავს, სანთლით რომ ეძებო, ვერ ნახავო, — იტყოდნენ.

— რა უნდა გითხრათ, ვის უნდა დავაბრალოთ ჩემი ღაზარალება, არავის ვემდური და არავინ მემდურის... — იტყოდა რითიმე ღაზარალებული.

ამრიგად, გურულისათვის მეზობელი ყველაფერი იყო და მთელი სოფელი იმას ცდილობდა ერთიმეორეში კარგი მეზობლობა ჰქონოდათ, სოფლის შეხმატკბილება და ჰარმონია არ დარღვეულიყო. თანხმობა, თვისება, ერთიმეორის გატანა მთელი სოფლის საზრუნავი გახლდათ. დამდურებული და ერთიმეორეში უბრად მყოფი მეზობლების შერიგება, სიამტკბილობის და მეზობლური კავშირის აღდგენა ყველას სავალდებულოდ — მთელი სოფლის საერთო საქმედ მიაჩნდათ. უბრობა, ხმის არგაცემა მეტისმეტ სათაკილოდ ითვლებოდა უსათუოდ ამით აიხსნება ის გარემოება, რომ 1904—1905 წლებში გურიაში ფართოდ შემოღებული ბოიკოტი გურულებისათვის ყველაზე სასტიკი სასჯელი იყო და ბევრი ბოიკოტკვეშ მყოფი იხვეწებოდა — მომკალით მირჩევნიაო. მეზობლებს რომ ერთიმეორეში მტკიცე მეზობლური კავშირ-თვისება ჰქონოდათ, მათ შორის მომდურავობა და უბრობა რომ არ ყოფილიყო, ამისათვის გურულებმა რამდენიმე მიჩნეულა დღე დანიშნეს, აღნიშნულ დღეებში მეზობლები უნდა შერიგებულიყვნენ, ერთიმეორე გადაეკოცნათ და ძველი მეზობლური დამოკიდებულება აღედგინათ. მთელი სოფლის გადაწყვეტილებას უარს ვერც ერთი ვერ ეტყოდა.

მომდურავთა შერიგება ხდებოდა: კალანდას, აღდგომას, ზიარების მიღების წინ და შემთხვევების დროს, როგორც იყო, მაგალითად, მძიმე ავადმყოფის სიკვდილამდე. ეიღესიაზე თუ სათამაშოზე მთელი სოფელი თავს იყრიდა. ერთიმეორეს კოცნიდნენ, ულოცავდნენ, ყოველივე კეთილს უსურვებდნენ და, ცხადია, მომდურავებიც და ერთიმეორის უბრებაც ამ დღეს უნდა შერიგებულიყვნენ — მთელი სოფლის მზიარულება და ერთობა არავის დაერღვია. ავადმყოფს თუ

სიცოცხლეში არ შეურიგდებოდა, მაშინ ტირილი და ჭირის-
უფლისათვის სამძიმრის გამოცხადება არ შეეძლო. ეს კი დიდ
„აიბათ“ და აუგ საქმედ იყო მიჩნეული — მთელი სოფლის
სირცხვილად ითვლებოდა. შერიგება ხდებოდა აგრეთვე სა-
სახლისკაცობისას (საგვარეულო წირვის დროს და
ქორწილობას) გათხოვ-მოყვანის და ნათლობის წინ.

ამგვარად, სოფელი ჭირსა და ლხინში ერთსულოვნად
უნდა ყოფილიყო, ერთიმეორის დანდობა და გატანა უნდა შე-
ძლებოდათ — კეთილმეზობლური ჰარმონია არაფრის არ უნდა
დაერღვია. ტირილი, ქორწილი, ნადი, ერთიმეორის „ხელის
წამოკვრა“ საერთო გახლდათ და ამ ფერხულში ყველას უნდა
მიეღო მონაწილეობა. მომდურავ მეზობლებს რომ ცეცხლი
გასჩენოდა მის ჩაქრობაში ყველაზე უფრო მეტი მონაწილე-
ობა მომდურავს უნდა მიეღო და თუ გულგრილობას გამოი-
ჩენდა და „მოშაირესავით“ შორიდან დაუწყებდა ცქერას —
მთელი სოფლის გულისწყრომას დაიმსახურებდა. მთელი ერ-
თი სოფელი, ერთ ეკლესიაში შემავალი, ასე ვთქვათ, ერთ
ერთეულს წარმოადგენდა. მაგრამ ჭირსა და ლხინშიაც მათ-
შიაც იყო დაყოფა. (ახლანდელი გაგებით, ბრიგადებად იყო
დაყოფილი). სოფელი იყოფოდა ერთი გვარის მიხედვით —
სახლისკაცობით ან „ხევისკაცობით“, რომ ადვილი გასაგები
გახდეს, მოვიყვან მაგალითს... ჩემს სოფელ ჭანჭათში 1880
წლებში 130 კომლი ითვლებოდა: წულაძე, ვადაჭკორია, გო-
გუაძე, მგელაძე და ჩიჩუა. მათში ყველაზე მეტი იყო წულა-
ძე, შემდეგ ვადაჭკორია და ასე შემდეგ, როგორც ზემოთ
არის ჩამოწერილი. სოფელი იყოფოდა ოთხ სახევისთაოდ
(იგივე სასახლისკაცო). წულაძე, ვადაჭკორია და გოგუაძე წარ-
მოადგენდა თითოეულ სახევისთაოს. მგელაძე და ჩიჩუა ერ-

თად იყვნენ და ეს ორი სხვადასხვა გვარი ერთ სახევისთაოდ ითვლებოდა.

სოფელში იყო თითო-ორი მოსახლე ჩასიძებული ან ჩამოსახლებული სხვა მაზრიდან, ან კუთხიდან: ბოქორიშვილი, ბერძენიშვილი, ცინცაბაძე, თორაძე, შალიკაშვილი. ესენიც არ დარჩენილა „კოლექტივისა და ბრიგადის“ გარეშე და თავისი სურვილის თანახმად მიწერილი იყვნენ იმ გვარზე, ვისკენაც „გული უფრო მიერჩოდათ“. თითოეულმა ხევისკაცობამ, ჭირსა თუ ლხინის დროს გამოიმუშავეს სავალდებულო წესები და მასთან ერთიმეორეში მეზობლური დამოკიდებულება. თვისების გარეშე ნათესაურის მსგავსი კავშირი ჰქონდათ, გაჭირვების დროს ჭირისუფლად ითვლებოდა და ისე უნდა მოქცეულიყო, როგორც მახლობელი — განაყოფი სახლის კაცი. მაგალითად, ტირილის დღეს ქალები თმაგაშლილი ჭირისუფლად უნდა დამსხდარიყვნენ, კაცებს ყველას მიჩენილი საქმე გაეკეთებინა და მასთან, ურთიერთშორის შეთანხმების მიხედვით, ტირილის დღეს უნდა მოეტანა თითოეულ სახევისთავოს წევრს: (ერთი ოჯახიდან) 1 ოყა ღომი, 1 ოყა ლობიო (ზოგჯერ ლობიოს ნაცვლად 3—4 ყველი 1 კილომდე), $\frac{1}{2}$ ოყა-ნიგოზი, ერთი დოქი ღვინო (ნახევარ ვედრომდე). შესაწიერი ეს ნუსხა ყველგან ერთნაირი არ იყო. დროსა და გარემოების მიხედვით ის იცვლებოდა, შესაწიერის რაოდენობა ხშირად დამოკიდებული იყო სახევისთავოს წევრთა რაოდენობაზე — მცირერიცხოვან სახევისთავოს შესაწიერიც მეტი უნდა მოეტანათ, მაგალითად, ზოგ სახევისთავოს 3 ოყა ღომი, 3 ოყა ლობიო და სხვა. თითოეულ შესაწიერის მიმტანს ფულად უნდა მიეტანა ზოგან 25 კაპ., ზოგან კი — 50 კაპ., ერთი სიტყვით, შესაწიერით და „წასაბურავით“ უნდა გასტუმრებულ-

ლიყო ყოველივე ხარჯი და ზოგჯერ „წაქცეულ“ ოჯახს კიდევ რჩებოდა ცოტა რამ — სურსათიც და ფულიც.

მიცვალებულის ოჯახში, მიცვალებულის დასაფლავებამდე „ცეცხლი არ დაინთებოდა“, ესე იგი, საკმელი არ გაკეთდებოდა. ყოველდღიურად მზა სადილ-ვახშამი რიგრიგობით მოჰქონდათ ხევისკაცებს და „ყურის მეზობლებს“, არამც თუ მართო მიცვალებულის ოჯახის წევრების საყოფი, არამედ შავის შემკერავი მეზობელი ქალების, კუბოს გამკეთებელის და, საზოგადოდ, მოსამსახურეების დასაკმაყოფილებელიც.

მიცვალებულის კულტში ყველა ეს რომ აღსანიშნავია, ამაში შემდეგ დარწმუნდებით. კვირა დღეა... სოფლის ეკლესია მლოცავი ქალებითა და კაცებით სავსეა. წირვა გათავდა. შემოსილი მღვდელი ადგილობრივი ეკლესიის მთავარ ხატთან (ვის სახელზეც არის აშენებული ეკლესია) მიდის და ხჰამაღლა, ვედრება-ხვეწნის კილოზე მიმართავს ხატს: „მთავარანგელოზო, ძლიერო, შენს დიდებასა და ძლევამოსილებას შენს მლოცავთ... მახარობელ მახარაძე ავათ არის, და ჩემი ცოდვილი და უღირსი პირით გვევდრება მოუოხე და მოარჩინე ყოვლად ძლიერო და ყველაფრის შემძლე“. ამ სიტყვებთან ხატს ადგილიდან დასძრავს, ზევით ასწევს... მლოცავებიც ყველა ერთხმად შესძახებს: „მოარჩინე, მოარჩინე მთავარანგელოზო, ძლიერო“. ეს არის ავადმყოფის „ხატის აძვრა“.

ხატი აუძრეს — ეს იმის ნიშანია, რომ მძიმე ავადმყოფია. მთელმა სოფელმა გაიგო და ვისაც რითიც კი შეუძლია ვალდებულია ავადმყოფს მიხედოს. ეკლესიიდან რომ გამოვლენ, სანამ საყდრის გალავნიდან გადავიდოდნენ, მანამდე შეიქმნება კითხვა-გამოკითხვა — რა მოუვიდა, რა „წიეკიდა“, რამდენი ხანია რაც ავათ არის. ავადმყოფს თუ მომღურაფ-

უბარი ჰყავს, იქვე ურჩევნ მივიდეს — ნახოს, შეურიგდეს; დაწყევლილი ან ხატზე გადაცემული თუ ჰყავს — დალოცოს, გადაცემა უკანვე დაიბრუნოს — მოხსნას.

— ახლა თუ არ შეურიგდი, რომ „გაწყრეს ღმერთი“ და მტერი და ავი, მოკდეს, მერე გვიან იქნება, სატირლათ არ მიგიშობს ჭირისუფალი და სამეტრო-სასიცოცხლოთ, სამისღემ-ჩიო (სამუდამოდ) გადაკიდებული იქნებით. ამ საჯაყ საქმეს ნურც თავს უზამ და ნურც კუთხე-მეზობლობას... ნუ იზამ ამფერ გლახა საქმეს შენც და მასაც ძე და მომავალი გყავს, ჩვენი ხათრი და მორიდება თვარ გაქ, შენი შვილების გული-ზა მაინც შეურიგდი. თოფი არ გაეარდნილა თქვენში და კაცი არ მომეტარა. რაცხა ერთი მწვადი მიწიზა დამდურდით, სა-ზღვარზე ეიშალეთ. ყველაი მიწაში ჩავალთ, მიწა ყველას გაგვაძღობს... კაცის მკვლელს შეურიგდნენ და ერთი ნაწეკვაი მიწის გულიზა თქვენ შორის მტყუან-მართალი ვინ არის ახლა ზაგის გაკითხვის დროი არ არის — იგი ავათ არის, შენ კარგათ ხარ და კარგათაც გამყოფა ღმერთმა — შენ უნდა დას-თმო და შენ უნდა შეურიგდე.

გარემოებისა დროს შესაფერი სიტყვებით კაცები მომდურავ კაცს იმორჩილებდნენ, ქალები — ქალს. ბევრი მახსოვს შემთხვევა, რომ მომდურავი ქალი თუ კაცი, ხატის აძვრის დღესვე დაუჯერებიათ, შეუყვანიათ ეკლესიაში და იქ საჯაროდ ხატისათვის მიუბარია ეს: „მთავარანგელოზო, ძლიერო, მუხლმოდრეკილი გევედრები, მე რომ პეტრე კილაძე დავსწყევლე და გადავეცი — ნუ ისმენ უფალო, ჩემი წყევლა და კრულვა ლოცვით მოგვარე და მოარჩინე, ყოვლად ძლიერო და ყველაფრის შემძლე“.

ოჯახში დაბრუნებისა და სადილის ჭამის შემდეგ ბევრი წა-

ვიდოდა ავადმყოფის სანახავად. თუ ვის წაეყვანა მომღურავი და მოეხდინა შერიგება, ამას ეკლესიაზე ათავრიგებდნენ. ზოგჯერ ისიც მოხდებოდა, რომ ავადმყოფი მომღურავს მოინატრებდა, მაჩვენეთ, შემარიგეთო მოითხოვდა.

მიცვალებულს თუ მომღურავი ჰყავდა, სწამდა, რომ მას „მიწა არ მიიღებდა“, ამიტომ ცდილობდნენ სიცოცხლეშივე რომხდაჩიყო შერიგება და ხმის გაცემა. თუ ეს არ მოხდებოდა, მომღურავი მიცვალებულს მაინც უნდა შერიგებოდა — უნდა ეტირა (ხმით) და ეს იყო მისი გარანტია, რომ მიცვალებულს წიწა აღარ „დაიწუნებდა“.

მნახველები ავადმყოფს „შემოუძახებდნენ“, გაამხნევებდნენ, ავადმყოფობას გაუადვილებდნენ, კიდევ გაეხუმრებოდნენ, ღამესაც უთევდნენ და ჩონგურის დაკვრით და დადილინებით ართობდნენ. ზოგ ავადმყოფთან შესაფერი „მოსაკითხიც“ მიჰქონდათ. მისვლის ხანს ეტყოდნენ: „მოგარჩინოს ღმერთმა და შენმა სალოცავმა“... წამოსვლისას ასევე უსურვებდნენ მორჩენას და აღრე ფეხზე დადგომას. რაც უნდა მძიმე ავადმყოფი ყოფილიყო, მნახველი მასთან მაინც თავს იჭერდა, ნაძალადევი მხიარულობით ეჭირა თავი — ავადმყოფს არ აშინებდა. ჳირისუფალს — მახლობლებს გამოკითხავდნენ ავადმყოფობის მიზეზს და ყველა თავისებურ რჩევას აძლევდა, თუ როგორ მოქცეულიყო. მკითხავს (მარჩიელს) მიასწავლიდა, ზოგი სოფლის ექიმ ქალს ან ცაცს, ზოგი ფერშლის ან „დოხტურის“ მოყვანას ურჩევდა... ზოგიც ხელის გამართვას — ფულის სესხებას, ცხენის თხოვებას, ან გაგზავნ-გამოგზავნას შესთავაზებდა, თუ რითიმე შემიძლია დაგეხმარო, აბა, მეტი რა დღეიზა გინდებვარო.

იმ დროს სამაზრო ექიმი ჰყავდათ. ხალხი დიდად არც

ეტანებოდა, მაგრამ ვისაც მათი რაიმე სწამდა, არც იმას შეეძლო ესარგებლა, რადგან ხალხისათვის მათ არ ეცალათ. გამომძიებლის დავალების ასრულებასაც (მოკლულის გაკვეთა და შემოწმება) თავის დროზე ვერ ასწრებდნენ (ხშირი იყო მოკლულის, დამარხვის 15—20 დღის შემდეგ საფლავიდან ამოღების, გახრწნილი გვამის შემოწმების შემთხვევა) ექიმი სხვა ერის იყო და თუ იშოვნინდი, თარჯიმანი უნდა გეძებნა (აქა-იქ, 3—4 მოზრდილ დაბა-სოფელში იყვნენ ყოფილი ჯარისკაცები, რუსები). რეცეპტის დაწერა არ შეეძლოთ და არც უფლება ჰქონდათ. პირველ ხანებში აფთიაქიც ერთი იყო. რამდენიმე წლის შემდეგ მოემატა კიდევ ორი და, ამრიგად, მთელ გურიას სამი აფთიაქი ემსახურებოდა (ოზურგეთში, ჩოხატაურში და ლანჩხუთში). ცხადია, ხალხი მომხდარ უვიცობას შესთხოვდნენ ხატს, იწვევდნენ შემლოცავ-გამომლოცავ დედაბრებს, მიმართავდნენ მკითხავს, მოჰყავდათ სოფლური ექიმობის მცოდნე დედაკაცები. სწამდათ ავი თვალი, ავი ფეხი, კუდიანი და ქარჩხავ-მზაკვავი.

ბევრი ვიცით იმისი მაგალითები, რომ შვილი დედას გაშორებია, სამოსახლო გამოუცვლია და მზაკვრობაში შეწამებულ დედას ჩამოშორებია. მის ავთვალს მორიდებია. ამის შემდეგ არაფერი გასაკვირი იქნება, თუ ავადმყოფის ჭირისუფალი, მისი ავადმყოფობის მიზეზით, ვინმე „კუდიანს“ უთვლიდა და თუ ამას მკითხავი შეუთვლიდა „კუდიანს“ — ყოველივე ეჭვის გასათანტავად, „თუ მას თავი მართლათ კი მიაჩნდა“, მოსულიყო, ავადმყოფი ენახა, დაელოცა და, ასე ვთქვათ, გათვალვის ყადაღა მოეხსნა. ცხადია, შეწამებული ამას ასრულებდა, რადგან თუ ასე არ მოიქცეოდა, მაშინ თავის „პროფესიას“ თვით ამტკიცებდა. ქარჩხავ-კუდიანი, გუ-

ჭულის აზრით, ქალიც შეიძლებოდა და კაციც, მაგრამ უფრო ჭკვირი „ეშმაკის სულის მიმყიდველები“ ქალები (მოხუცები) იყვნენ. ერთი სიტყვით, ავადმყოფის ყველა მნახავი თუ ჭირისუფალ-ნათესავი, ყველა ცდილობდა ავადმყოფობის მიზეზი გამოენახა, ყველას თავისებური დიაგნოზი მიაჩნდა უებარ წამლათ და ჭირისუფალიც ცდილობდა „გული შეეჭერებინა“ და ყველას რჩევა-დარიგება მიეღო“...

ძუძუმწოვარა ბავშვის ავადმყოფობის მიზეზად იტყობდნენ: ლოგინაულებელია, უნათლავია — მის სახელზე ჭერ სანთელს თავი არ მოსწვიაო. ბებიაქალი იქნებ უკმაყოფილოა... უნათლავი ბავშვის სიკვდილი არამცთუ ოჯახის დიდ უბედურებად ითვლებოდა, არამედ მთელ კუთხე-მეზობლობას „ცოდვით მოექითხებოდა“... ამიტომ ბავშვი აკაღ გახდებოდა თუ არა, „ნაუცბათევად, წანათლავდნენ“, ლოგინსაც აუღებდნენ, ჭიწასაც შეაჭერებდნენ და ბებიაქალსაც პატივს ცემდნენ, „მის აყვანილს“ დაალოცვინებდნენ. და, ცხადია, ყველა ამ რიტუალის დროს წმინდა სანთელსაც „თავი მოეწობოდა“... ამავე დროს არ მოაკლებდნენ აგრეთვე სხვადასხვაგვარ შელოცვა-გამოლოცვას: „ნალვალევის, ნაუქმურევის, მიწიდან ანაყოლის, სიყმაწვილის, პილწის ქარის, დასუნულის“ და სხვა. ეს ეხება დიდსა და პატარას. ხატის და ღმერთის „მოქრთამვაც“ სავალდებულო იყო. თავზე შემოარებდნენ მის სიგრძე სანთელს (ავადმყოფის სიმაღლის ზომისას), ზედ თეთრ ფულს დააწებებდნენ და მის სალოცავ ხატს შესაწირავად აღქვამდნენ, საეტლო თუ არ ჰქონდა მოხთილი — თავზე ცხვარს შემოარებდნენ, ცხვარს მარჯვენა ყურს გაუჭრიდნენ, თუ ცხვარს ასე „მოსწრებათ“ ვერ იშოვნიდნენ, მის მაგივრად გიტაოს — სპილენძის მოზრდილ ჭურჭელს, ღირებულებით

მეტს შემოარტყამდნენ და ცხვრის დაკვლამდე არ იხმარდნენ. გირაოდ ან საწინდრად ხმარობდნენ თოფს, ქამარ-ხანჯალს.

გურულებს იმ დროს სწამდათ თავისი ეტლი — ბედი. არსებობდა ხელნაწერის სახით საეტლო წიგნი, წიგნი დაყოფილი იყო თვეების მიხედვით. სხვადასხვა თვეში დაბადებულს წიგნი სხვადასხვა ბედს უქადდა. მაგალითისათვის მოვიყვანოთ (სიტყვასიტყვით) ერთი თვისას:

ეტლი მაისის (სამამო).

ტყუპსა ზედა რომელი იშვას, ტანად და პირად კარგი, ცუდი ზრახოს, ნიშანი ჰქონდეს მხარსა, მკლავსა, მახვილსა და ცეხლსა უფროთხილდეს, დიდი კაცობა უყვარდეს, შეიქნას მწიგნობარი, ანუ ხელისუფალი მისი დღესიმიოთ მოჰამოს, საქონელი მიხდეს, ურიგოთ წააგოს, სიტყვით გამარჯვებული, სხვათა ანადვლოს, შვილისაგან საპყრობილობა გამოსცადოს. ორი ცოლი შეირთოს, მეორისაგან დიდი საქონელი მიხდეს, მტერმოყვარიდან ბედი არ მოაკლდეს, ორპირი იყოს, ყოველი კაცისაგან ბედი ჰქონდეს, დიდი კაცისაგან ბედი ჰქონდეს, სულისათვისაც უნდოდეს შაბათს ქმნას, ოთხშაბათს ეკრძალოს, ტანისამოსი ფერქცეული ჩაიცვას. ხელი ისწავლოს, თუ ესენი იქნას გაიხაროს. ა/წ ავათ გახდეს, (ვ) (ფ) (ზ) (იბ) (12). 3 (20) მ. (40) თუ დარჩეს რვა (106) წელი დაყოს.

სადედო ეტლი:

მაისის ეტლი სადედო, ტყუპსაზედა რომელი იშვას, ნიშანი ჰქონდეს მხარსა, ანუ ფეხსა. იყოს თეთრფერვანი, თვალყოფო, სახლის მაშვენებელი, საუბარი იამებოდეს, მჭკრეტელი, სტუმრის მოყვარე, პირმცინარი, ხელი ისწავლოს, სადაც რძლათ შევიდეს მარჯვენა ფეხი შეიდგას, იგი ოჯახი აშენდეს, ზელსა გაიხსნის ბალღამის წამალსა აიღებდეს, დიდი საცხოვ-

რებელი შეიქნას, დიდი პატივი მიეცეს, ქმარი მისი ბედნიერი
შობდეს. ტანისამოსი ფერქცეული ჩაიცვას, ბექედი ბასოსა,
ქაქონელი და საყოლო ენამთ დასდვას. 1 წლით ავით გახდეს,
5, 10, 25, 45 თუ გადარჩეს 80 წელი დაყოს.

საეტლო წიგნი მღვდლის ოჯახში ჰქონდათ და ზოგიერთ
შწიგნობრობის მიმდევარ ოჯახშიაც შოიარდა... იყო ისეთი
ძონხეტიალე მღვდელი, რომელიც კარიკარ დადიოდა და მსურ-
ველს თითო თვის საეტლოს თითო შაურად უკითხავდა...
ავადმყოფის პატრონიც წააკითხვინებდა ეტლის წიგნს და მით
გებულობდა თუ როდის უწერია ავადმყოფობა ან სიკვდილი.
ეტლის მოხდა ცხვრის დაკვლით და წირვით სავალდებულოდ
მიაჩნდათ. ეტლით წირვა უნდა გადაეხადათ ეტლის წიგნის მი-
ხედვით, როგორც მის ეტლში „ეწერა“. მაგალითად, მასში
დაბადებულს (ვაყს) ავადმყოფობის წლების მიხედვით — 1
წლისას თუკი გადარჩებოდა უნდა დაესწრო სამი წლის ასა-
კამდე, მერე 8 წლის, 12, 20 და 40 წლის, ესე იგი, სულ 5-ჯერ
უწევდა „ეტლის მოხდა“ (ქალს 4-ჯერ).

ყოველთვის ცხვრის დაკვლა და წირვის მოხდა სავალდე-
ბულო არ იყო. შეიძლებოდა ცხვრის მაგიერ დაეკლათ 9 იტრე-
დი, დაკვლის წინ ეს თავზე შემორებული მტრედები უნდა
გაეძლოთ მღვდლის მიერ ნაკურთხი პურის ან სიმინდის მარ-
ცვლით. შეიძლებოდა აგრეთვე 9 ახლად დაჭერილი — სი-
ცოცხლე დაუქარგავი თევზი — ამას სჭირდებოდა ნაკურთხი
მარილი. გარდა ამისა, ავადმყოფობის გამოწვევა შეეძლო კი-
დეც „ნაწყევარ-ნაფიცარ-გადანაცემარობას“ და „თავზე შე-
მონარებობას“, წირვის თავის დროზე არ გადახდას, წირვა
უნდა გადაეხადათ და თხა უნდა დაეკლათ. მღვდელს ეწირა და
ღჯახის ყველა წევრისათვის თავზე სანთელი შემოერო და

ღმერთის მისამართით ეთხოვა: „დიდებულო, დიდო ღმერთო, ძმანო მიქელგაბრიელ მთავარანგელოზო. რომელიც თქვენ შემოგვედრენ ჩემის ცოდვილის და უღირსი პირით, თქვენ შეიწირეთ ზვარაკი ესე ნაწყევარი იყოს, ნაღივარ-იყოს, გადანაცემარი იყოს, ანუ თავზე შემონარები იყოს — ნუ უკარნახებთ და ნუ მოსთხოვთ პასუხს. იგი თქვენს წინაშე, რამეთუ სცოდავ უვიცობით შენდობილ უყავით უმეცრება მათი“. ამ წირვის შემდეგ სწამდათ, რომ ღმერთი შეუნდობდა თუ ვინმემ ცრუ ფიცი მიიღო ან თუ ვინმე სხვის მიერ დაწყევლილი, ან ხატზე იყო გადაცემული, ანდა კიდევ თუ ვინმე ავადმყოფს თავზე შემოარეს გირაო-საწინდარი (სპილენძის ჭურჭელი, თოფი, სახლი). ავადმყოფი მორჩა, მაგრამ ხატს აღქმული არ შეუსრულეს, საწინდარი არ დაიხსნეს.

ყველაზე საშიში იყო „გადანაცემარი“. რა იყო გადაცემა? მოვიყვანოთ მაგალითი: „გურულს დაეკარგა ხარი, ეძება, ვერ იპოვა, ჩემი ხარის ქურდი თუ ხარს არ მომიყვანს იცოდეს მასაც „გადავცემ“ ხატზე და იმასაც, ვინც იცის ჩემი ხარის ქურდი და მალავს“. ეს გაფრთხილება ზოგჯერ სჭრიდა — „დაბნეული“ ხარი პატრონს აკითხავდა. იმედდაკარგული ხარის პატრონი მუქარას ასრულებდა, ზოგჯერ მთელი სოფლის თხოვნით ვადას აგრძელებდა. „ნაწირვობევს“ მიდიოდა მთავარ ხატთან, აუნთებდა სანთელს, შესწირავდა თეთრყელას და დაჩოქილი „გადასცემდა“: მთავარანგელოზო, ძლიერო, შენ გევედრები, ნუ მისცემ საშველ-სახიდებელს ჩემი ხარის ქურდს და მის ხელის შემწყვეს. ნუ გაახარებ, ნუ მოასვენებ, შენი რისხვა იყოს მის ძესა და მომავალზე, აყვირე, ამაზე, რაკ ვაც გამამწარა, ამომავლო და დამავსო, ისე გამამწარე და გამმხამე მისი ოჯახი. ზოგჯერ ადგილობრივ ხატს არ ჯერდებოდ-

ნენ და ეძებდნენ ყველაზე „ძლიერ ხატს“, როგორც იყო ლომის კარელი, ეს ხატი იყო თავსურებში, რასაც ძლიერ ხშირად საგასტროლოდ „დააბრძანებდნენ“ საპატიო თოფთან ყარაულობით, არამც თუ გურიისში, არამედ გურიის გარეშეც.

ხარისა და ცხვრის ქურდის დამკარგავი გადიოდა სამეგრელოში და იქ ილორის ხატზე გადასცემდა... ამრიგად, ხატი გურულების რწმენით, აღმასრულებლის როლს თამაშობდა.

იცოდნენ კიდევ სხვაგვარი გადაცემაც. ეკლესიის გალავანში ურთხლის, მუხის, ცაცხვის ხეზე ან ეკლესიის კედელზე, ან სვეტზე ძლიერ მაგრად მიაჭედდნენ მკედლის მიერ გაკეთებულ გრძელ ლურსმანს და ღმერთს შესთხოვდნენ: „ღმერთო დიდებულო. სანამდი აგი ლურსმანი მისი კბილით არ ამოაძროს ჩემი ცხენის ქურდმა, მანამდე ნუ მისცემ მოსვენებას, ნუ გაახარებ მის ნურაფერ სასიკეთოს“.

გურულის რწმენით, გადაცემას მოჰყვებოდა ავკაცობის ჩამდენის (ან მისი შვილის და შეიძლება მეუღლის სულიერი შერყევა, გადარევა).

გადაცემა და დაწყევლა ყოველთვის ერთნაირად „არ კვეთდა“, ესე იგი, ერთნაირად არ მოქმედებდა, სწამდათ, რომ ის „დაუცვეთელი“ იყო „გამუალ დღეებში“. ესე იგი, ისეთ დღეებში, რომელიც წელიწადში ერთხელ იყო ხოლმე. მაგალითად, კალანდას, შობას, აღდგომას, დადევს (1 სექტემბერს), წითელ პარასკევს და სხვა. სწამდათ, რომ ამ დღეებში გადაცემა და დაწყევლა „კვეთდა“ „დაუცვეთელი“, ესე იგი, აუცილებლად პირველხარისხოვანი გადაცემაც ასეთ დღეებში იცოდნენ, უბრალოსი კი — კვირაობით.

სავალდებულო იყო აგრეთვე საღმრთოს წირვა (გოჭით, ქათმით), სხვა სოფელში გათხოვილი ქალი, ან სხვაგან წასული

ვაჟი თუ წელიწადში მისი ეკლესიის ხატის დღესასწაულს (გიორგობა, ღვთისმშობლობა, დიმიტრობა, კვირიკობა და სხვ.) არ დაესწრებოდა „არ მოულოცავდა“, ხატს შესაწირავს არ მიუტანდა, ამასაც შეეძლო ავადმყოფობის გამოწვევა. ამრიგად, ავადმყოფობის დროს ყველა ეს უნდა გამორკვეულიყო და ხატისათვის აღქმა უნდა მიეცათ — ვალს გადავიხდით და მანამდე „საწინდარი“ იქმარეო.

რამდენადაც ავადმყოფობა გართულდებოდა და რამდენადაც ავადმყოფი პატივისაცემი გახლდათ — ხატს იმდენად მეტს ქრთამს აღუთქვამდნენ: ეკლესიის შესაწირავს, სხვადასხვა წირვის გადახდას, სალოცავი ხატის მოლოცვა-გამშვენიერებას, ხატის ვერცხლით მოჭედვას, ეკლესიის ზარის შეწირვას, ხატისათვის მამულის უვადოთ ან ვადით შეწირვას, 1 ან 3—5 წლის სახსნილოს (ხორცეულის) ჭამის „დათმენას“ — აკვეთას (ვადით და საუკუნოდ), ეკლესიაზე ფეხშიშველ გასვლას, ოჯახის რომელიმე წევრის ბერად ან მოლოზნათ შედგომას. თითონ ავადმყოფი თუ უცოლო იყო ან გასათხოვარი, ღმერთს აღუთქვამდნენ, ოღონდ კი გადაარჩინე და შენი მონა იქნება — ბერად ან მოლოზნად შემოგვიწირავსო. ბატონყმობის ხანაში, ბატონს, თავადსა ან აზნაურს გლეხისშვილს შემოარებდნენ თავზე, ავადმყოფი ბატონის მაგიერ ეს ინებე, თუ მის მაგიერ ან ინებებ და არ მოკლავ, შენ შემოგწირავო. აქედან წარმოსდგა (უმთავრესად) საეკლესიო გლეხები. გვარი შეწირულიც აქედან არის. ავადმყოფის დედა საყვარელ შვილს შემოარებდა: „ღმერთო, ეს გადამირჩინე და მე მიმიღე მის სანაცვლოთო („თავზე შემორებული ხომ არ ვარო“, გურული რომ ხშირად იტყვის, აქედან არის წარმოშობილი).

საწინდრად და გირაოდ არ ზოგავდნენ სახლს, ბელელს, ნა-

ლიას და რომ ეს საწინდარი უფრო მტკიცე და ურყევი ყოფილიყო, სახლს ოთხი კუთხით წოწინარს ამოსდებდნენ, შეანგრევდნენ — თავზე შემორების მიმსგავსებას აკეთებდნენ — სახლის სახურავზე ერთი მხრიდან მეორე მხრით თავს გადაისვრიდნენ — ამით საწინდარს აბეჯითებდნენ, თითქოს კრავდნენ და ასეც იტყოდნენ — სახლი შეკრესო. ზოგჯერ იტყოდნენ — „სახლი დაუხსნელი აქვსო“...

მძიმე და ხანგრძლივი ავადმყოფობით შეპყრობილს თავზე შემოარებდნენ რიყის ქვას (თითქმის $\frac{1}{2}$ — ფუთიანს). წაიღებდნენ მოშორებით, ჩაფლავდნენ ღრმად მიწაში და იტყოდნენ: ღმერთო, ძლიერო, და მოწყალეო, სანამ აგი უძრავი ქვაი მისით მოძრავი არ შეიქნეს, მანამღე მისით სული არ ჩაედგას, ჩემს ავადმყოფს, ვისი თავზე შემონარებიც არის ნურაფერს გაუჭირვებ, ქვასავით მაგრათ ამყოფე და მუდამ შენი დიდების მაქებ-მადიდებელი ვიქნებით.

იმ სახლს, საცა ავადმყოფი იწვა, თუ სახურავზე ყორანი გადაუფრინდებოდა, ყორანს ქვას მიაყოლებდნენ, ისე რომ ქვას სახლის სახურავზე გადაევლო. იმავე ქვას აიღებდნენ და მოშორებით ბებერი ფულუროიანი ხის ძირში ღრმად „დამარხავდნენ“ და იტყოდნენ: ღმერთო, დიდებულო, ამ ოჯახიდან თუ ვინმე სასიკვდილოთ გნებავს, მოხუცი მოკალი და მოზარდი მაჩუქეო.

ფოცხვერი თუ ვინმეს ეზოში სახლის მახლობლად თავისი უსიამოვნო ხმით დაიძახებდა, ცუდი ნიშანი იყო, ოჯახის რომელიმე წევრის სიკვდილს ნიშნავდა, მაგრამ არა ბებერისას, არამედ ახალგაზრდისას. იტყოდნენ, მოზარდი მოკვდება და მოხუცი ფოცხვერით დაიმარხებაო.

ავადმყოფის ეზოში ღამით ბუს დაძახებაც სიკვდილის მო-
მასწავებელი იყო, „დაცდილი გვაქვსო“, იტყოდნენ.

თუ ავადმყოფი განწირული იყო — „სიკვდილი შუბლზე
ეწერა“ — გურულის თქმით, მას არაფერი არ წაადგებოდა და
თანდათანობით პირს საიქიოსაკენ იჭერდა, „საცნაურის“ და-
კარგვამდე მეზობლები ჭირისუფლებს ურჩევდნენ (თუ ავად-
მყოფი წლოვანი იყო): ზიარებით კაცი არ მოკვდება და მით
არაფერი დაშავდება მღვდელი მოვიყვანოთ, ვაზიაროთო. ჭი-
რისუფალი მამაკაცები ადრე თანხმდებოდნენ, მაგრამ გურუ-
ლი „საბძნელი“ ქალები არ იყვნენ ადვილი დასათანხმებელი.
მოყვებოდნენ წუწუნს: — აგი რა გეიგონა ჩემმა დასაფსებმა
ყურებმა... სასიკვდილოთ ზიარება რავა უნდა დუუმედო!
ვაი, ჩემს დღეს, ვაი, ჩემს მოსწრებას!..

ბოლოს მაინც გადაწყდებოდა მოეყვანათ მღვდელი და
„ხატის პირის ნაბანიც“ თან წამოეღო. მღვდელი ადგილობრი-
ვი ეკლესიის მთავარ ხატს „პირს დაბანდა“ და „პირის ნა-
ბანს“ ბოთლით თან მოიტანდა. მღვდელი ავადმყოფს ჯერ
ნუგეშს აძლევდა, გაამხნევებდა, ცოდვების მონანიებას და
აღსარების თქმას ავალეზდა და „ხატის პირის ნაბანით“ —
ხელ-პირს მოსწმენდდა. თუ ავადმყოფს შეეძლო, აღსარებას
ეტყოდა, თუ ვერ შესძლებდა, „წმინდა საიდუმლოს იესო
ქრისტეს სისხლსა და ხორცს“ პაწია კოვზით ჩააყლაპებდა...
როგორც მღვდელი, ისე სხვა დამსწრე პირები ჩვეულებისა-
მებრ იტყოდნენ: „სულის საცხონებლათ და ხორცის საჯან-
მრთელოთო“... ავადმყოფი თუ ზიარებას მიიღებდა და იო-
ლად გადაყლაპავდა, ეს კარგი ნიშანი იყო. მღვდელი იტყო-
და: წმინდა საიდუმლო წაღმა დაბრუნდა და ღვთით მორჩე-
ბიო. თუ წამოაღებინებდა — ეს ცუდი ნიშანი იყო — ავად-

მყოფის უეჭველ სიკვდილს მიასწავებდა და ამავე დროს ცოდვილადაც ითვლებოდა.

ზოგი ავადმყოფი, შეტადრე მორწმუნე მოხუცი, თვით მოითხოვდა მაზიარეთო... ზიარების მიუღებლათ სიკვდილი, გურულის აზრით, „მეორე სიკვდილი“ იყო, უზიარებელი მოკვდიო, წყევლად იყო მიჩნეული. ზიარების „ძალა-გამძლეობა“ ერთ წელიწადს გასტანდა. მაგალითად, ავადმყოფი ეზიარადიდმარხვის პირველ კვირაში (თებერვალ-მარტში), მეორე ასეთივე მარხვის პირველ კვირამდე დაზღვეული იყო, რომ მომკვდარიყო უზიარებელი მოკვდაო, ვერავენ იტყოდა. ზიარების მიღება 4 წლის ასაკიდან წელიწადში ერთხელ მაინც სავალდებულო იყო ყველასათვის — მოხუცი წელიწადში 2-ჯერაც ეზიარებოდა.

მეცხადება

ავადმყოფს, როცა „საცნაური შეეშლებოდა“, ეს იგი, როცა დაეკარგებოდა ლაპარაკის უნარი და აღარც ვისიმე შეეძლო ცნობა, უცხო სიტყვით რომ ეთქვათ, აგონიაში ჩავარდებოდა, მახლობელი ქალები უკვე იწყებდნენ ხმადაბლა ტირილსა და გულ-მკერდში მჯილის ცემას, მახლობელი მეზობლები თუ არ იყვნენ — ატყობინებდნენ და ისინიც სასწრაფოდ მოდიოდნენ. წინასწარ „ნუ უბედებთ“, ცოდვავა, იქნება ქე ეყურება, თუ ღმერთი გაწყრა, მერეც მოესწრებით, ეტყოდნენ ქალები. როცა ავადმყოფი სულთაბრძოლას იწყებდა, „სასტუმალს“ გამოაცლიდნენ, ბალიშს ქვეშიდან მუთაქას გამოიღებდნენ. „სასტუმლის გაშლა“ უკვე მოასწავებდა უკანასკნელი

წუთების მოახლოებას. წყევლაოაც იყო შემოღებული „სას-
ტუმალის გაგიშალესო“. კაი ექიმის საქებრათ იტყოდნენ, სას-
ტუმალგაშლილ ავადმყოფს მიუსწრო და გადაარჩინაო.

ს უ ლ თ ა ბ რ ძ ო ლ ა

ხშირად მოხდებოდა, რომ მომაკვდავის სულთაბრძოლა
დიდხანს გასტანდა — ჭირისუფალი ღმერთს შესთხოვდა „მიი-
ღე უფალო მისი სულიო“... მღვდელს მოიყვანდნენ და ის
„საღმრთო წიგნიდან“ (კურთხევანიდან) „სულთა ბრძოლისას“
წაიკითხავდა და ისიც შუამდგომლობდა ღვთის წინაშე ავად-
მყოფი ადრე გასცლოდა ამ წუთისოფელს. თუ მღვდლის ვედ-
რებაც არ გასჭრიდა და „სული კიდევ არ ეყრებოდა ხორცს“,
მაშინ მოიტანდნენ წირისთავს (ღომის საცეხველის ნაწილია)
და ავადმყოფის სასთუმალთან ტახტზე ან სახლის კედელზე
მაგრად არახუნებდნენ...

ასეთი ავადმყოფის შესახებ იტყოდნენ, ცოდვილიაო.

მომაკვდავის ბინიდან გარეთ გამოჰყავდათ ყველა. იქ რჩე-
ბოდა მხოლოდ ერთი ან ორი მხნე და გამოცდილი ადამიანი
ქალი ან კაცი, რომელთაც ევალეობდათ ავადმყოფის უკანას-
კნელი სამსახური „მოკვდინება“ — ფეხის გასწორება, გულზე
ხელის ჯვარედინად დაკრება, თვლების დახუჭვა და პირის
მოკუმვა... ჭირისუფლები ამ დროს ეზოში არიან და ხმადაბ-
ლა ტირიან და მოსთქვამენ, როცა ყველაფერი მორჩება —
„ავათმყოფმა ღმერთს სული ჩააბარა“... ვინც ავადმყოფი „მო-
აკტინა“ დაღონებული, ნელის ნაბიჯით, გარეთ გამოდის და
თავში ხელს წაიშენს! ეს არის ნიშანი იმისა, რომ ყველაფე-
რი გათავებულია და ახლა ყველას ნება აქვს იტიროს და ივა-

გლახოს. არც აყოვნებენ და მაშინ შეიქნება ხმამალალი, შემზარავი, უსიტყვო და უტექსტო, თუ გურულ ქალებს არ ვაწყენინებ, კივილ-ჩხივილი — შეცხადება, რომელიც 2—3 კილომეტრის მანძილზედაც კი ისმის. რაც ხმამალალი, ხანგრძლივი და „ჩარი სულისაგან“ იქნება შეცხადება, მით მეტა ეფექტიანია, მით მეტად ამტკიცებენ, რომ მიცვალებული დიდად უყვარდათ.

— განსვენებული ისე გულმოკლულად შეიცხადეს, რომ მთლათ ჩააქუხეს ყველაფერი... ქვა-ქვაზე დაადუღეს, ცას მისცეს იმ მადლიანმა ქალებმა.

შეცხადებას მთელი სოფელი შეიტყობდა, ვინც ვერ შეიტყობდა ან ვერ „შეიმხრობდა“ ვისას იყო შეცხადება, მეზობელი გადაუძახებდა. მახლობელი კარის მეზობლები, ზოგი უკვე იყო მიცვალებულის ოჯახში და, ვინც არ იყო, ცოტაოდენი ტანისამოსის „მისწორ-მოსწორებით“ ჩქარი ნაბიჯით მოდიოდა, ნათესავ-მოყვარე გზადაგზა სიარულის დროს თმას იშლიდა და ეზოში ისიც შეცხადების წესით კივილ-ჩხივილით ჩამოვიდოდა. შეცხადება ქალების საქმე იყო და ჩინებულადაც ასრულებდნენ. დამსწრე კაცები მიცვალებულის მახლობელ კირისუფალ ქალებს მკლავში აფრინდებოდნენ, არ აძლევდნენ ნებას გაშლილი თმა დაეგლიჯათ, ლოყა ფრჩხილებით დავაკწრათ, თავი კედელზე ან ხეზე „მიერახუნებიათ“. მიუხედავად ყოველგვარი ცდისა, ზოგი ქალი (დედა, ცოლი, დაი) სახეს მაინც „დაიფხაჭნიდა“ — სისხლს იღენდა. შეცხადება ხდებოდა გარეთ — ეზოში. ის გრძელდებოდა 10—20 წუთს. ამის შემდეგ დაიწყებოდა მოთქმა-ტირილი, შედიოდნენ მიცვალებულთან და იქ გრძელდებოდა მოთქმა-გოდება.

შეცხადების ხმა შორს მიდიოდა, თითქმის მთელი სოფელი გაიგებდა, რომ ესა და ეს მეზობელი გარდაიცვალა და მეზობლური ვალის მოხდაა საჭირო და სავალდებულო, უნდა მოვიდეს „მიუმტკივნოს, სამძიმარი უთხრას — მიუსამძიმროს“... მიცვალებულის კულტი გურიაში, არ შევცდები თუ ვიტყვი, რომ ერთგვარი სახიობაა — ერთგვარი (არ ვიცი რა ვუწოდო) წარმოდგენაა, თეატრალურია, რამდენიმე სურათად არის, მეორე სურათი სამძიმარია, მესამე და მთავარი — ტირილი. სამძიმარი, ასე ვთქვათ, ტირილის რეპეტიციის მსგავსია, ზოგიერთისთვის განსაკუთრებით — ახალგაზრდა ქალ-ვაჟისათვის — დებიუტია, სამძიმრით ეჩვევა ტირილს...

გაიგო თუ არა მეზობლებმა ვისას იყო შეცხადება, მეზობელი მეზობელს „შეიპირებს“ სამძიმარზე ერთად წავიდეთო და შეცხადების რამდენიმე საათის შემდეგ იწყებენ ჯგუფ-ჯგუფად წასვლას, თალხ ტანისამოსში გამოწყობილი კაცები ქალებს წინ წაიმძღვარებენ და მიცვალებულის ოჯახში ისე შედიან. ტირილს იწყებენ ეზოში ჩასვლისთანავე... ზოგჯერ იქ, სადაც ზეწარგადაფარებული მიცვალებული ასვენია. ჭირისუფლის ტირილი არ მოისმის (ისვენებენ, შეიძლება იქ რონელიმე მთავარი ჭირისუფალი არ იყო, მაშინ მას ატყობინებენ მესამძიმრეთა მისვლას და ისიც მიცვალებულთან მიდის და ტირილს იწყებს), მაგრამ შემოესმებათ თუ არა ეზოდან ტირილის ხმა, დამნთურებიც დაიწყებენ ტირილს. ტირილის სიტყვები — ტექსტი როგორც ჭირისუფლების მხრით, ისე მოსამძიმრეთაგან უნდა ყოფილიყო შეხამებული, შეგუებუ-

ლი, „მისადაგებელი“ მიცვალებულისა და სამძიმრის გადამხდელის ურთიერთობასთან.

მაგალითად, მეზობელს მოუვიდა სამძიმარზე მისი ყანის მოზიარე მეუღლით.

მოსამძიმრე ქალი: გიორგი ძმაო, ჩემო ტკბილო, გაუწყენებელო მეზობელო, ჩემი ოჯახის კეთილისმდომელო, ჩემი ქმრის მარჯვენაში ამომდგარო, აბა, შენ იცი, თუ შენებურა მომეგებები და შენებურა მეტყვი — შენ და შენს დამკარგავ უბედურ ჩემს ქმარს, ყანაში სადილათ რა გიამება მოგიტანო, ჩემო ტკბილო ძამია...

მიცვალებულის მეუღლე: ვაიმე, ვაიმე!.. გიორგის ნუ სტირი, ჩემო დაია კელასი, მე პიტირე, მე უბედურ გაჩენილ დღეს... გიორგი, ჩემო გაუხარელო გიორგი, შენ ასე უზდელი რომ არ იყავი, ახლა რა წაგეკიდა, ადექი, კაცო, შენებურა მიეგებე, შენი ძმასავით საყვარელი ყანის მოზიარის ცოლი მევიდა, შენ ძალიან გიყვარდა მისი ნახელავის ჭამა, ყოველთვინ იმას მიჩივოდი კელასის ნახელავს არაფერი სჯობია — ლობიეი, რომ გააკეთოს თითს ჩაატკვერ შითო... ვერ მოსცილდები და ვერ გაძლებიო... ვაი, ვაი! ახლა რას იტყვი, რას უბარებ, ხვალისა რას ინატრებ, რა მოგიტანოს ყანაში, უი, უი, მეტი არაა ჩემი მტერი, ჩემო დაია, კელასი, მაგან აწი არაფერი ჭამოს, ისე არაფერი ჭამა მისმა მაწყევარმა...

მოსამძიმრე ტირილითა და შერჩეული სიტყვების წარმოთქმით თავზე წაადგება მიცვალებულს, შეიძლება ცხედრის წინაშე კიდევ დაიჩოქოს... ზოგმა შეიძლება მიცვალებულს პირს საბურავი ახადოს, და მიცვალებულის ნახვამ, მძაფრი და გულის ამაჩუყებელი სიტყვები ათქმევინოს:

— ვაი, ვაი, ვაიმე, ამას რას ხედავს ძმაო, გიორგი, ჩემი

დასავსები თვალები, რავა დაგიკრეფია ბიჭო, გულზე მაგი მშრომელი ხელები — აწი რა ეშველება ბიჭო, შენს უბედურ ცოლ-შვილს. აგია ბიჭო, ვაჟკაცობა, ფუი შენს ნამუსს... სხვაი თუ არ გეცოდებოდა უბედური დედაშენი ძადლის საკმელათ როგორ გეიმეტე. ღმერთმა გაცხონოს, სასუფეველი დაგიმკვიდროს... ვაი, ვაი...

მიცვალებულის დატირების შემდეგ თითოეული სამძიმრის მომხდელი მიდის მახლობელ ჭირისუფალთან და ეუბნება „სამძიმარს“... (მოსული და დამხდური ერთიმეორის გულითადი თანაგრძნობის ნიშნად ერთიმეორეს ეხუტებიან).

მოსული მიცვალებულის ქვრივს: — შე უდრფოდ გაუბედურებულო, რა უნდა გითხრა, რაით უნდა განუგეშო, კაი ქმარი დაგეკარგა მარა, ახლა გმართებს ქალობის გამოჩენა... მის დატიებულს ობლობა არ უნდა შეატყობინო, ღმერთმა გიცხონოს, ღმერთმა შოთმინება შოგცეს. ვაი, ვაი!..

ჭირისუფალი: ვაი ჩემს დღეს, ვაი ჩემს მოსწრებას, თუ აგი დღეი მომელოდა მე, რეიზა ვერ მოვასწარი სიკვდილი — ქე ვიცი რომ არაფერი ნუგეში მომეწყობა. ვაი, ჩემს უბედურებას... მაღლობელი ვარ, ღმერთმა მისი დანაკლისი შეგმატოს, მაგიერი სასიკეთოთ გადამეხადოს... ვაი, ვაი!

სამძიმრის მოხდა მეორე დღესაც გრძელდება. სამძიმრის მოსახდელად მოვიდოდა აგრეთვე თუ ახლოს იყო ოჯახიდან გათხოვილი ნათესავ-მოყვარე ან მურდუ-ნათრული. გზასთან მოახლოებისას შეიცხადებდნენ (თითქოს ახლა გაიგეს) და მათ მოსვლას შინაურებიც შეცხადების კილოთი, წივილ-კივილით შეხვდებოდნენ... „სამძიმრის მოხდა“ 1—2 დღეს გასტანდა.

შეცხადების პირველი გამგონი და, ზოგი მათგანი მონაწილეთაგანი, იყო ხევისკაცობა და, როგორც კი შეცხადება გათავდებოდა (გარდაცვალებიდან 1—2 საათის შემდეგ), თავმჯდომარეს არავინ ირჩევდა, მაგრამ თათბირი-ბჭობა სრული წესრიგით დაიწყებოდა, ყველა სოფელს და თითოეულ სახევისთაოსაც ყოველთვის ჰყავდა მოთავე „ჭკუა საკითხავი“ კაცი, რომლის სიტყვა, რჩევა-დარიგება სხვებისათვის „ბეჭედიც“ იყო. ის გამოირჩეოდა გამოცდილებით, სიღარბისლით, ჭკუა-მანვილობით, ზნეობით, ის იყო თავის გვარისა და კუთხის დიდი პატრიოტი, მის გარეშე მის დაუკითხავად და უდასტუროდ ოჯახური საქმეც არ გადიჭრებოდა, მით უმეტეს, სასოფლო. ამრიგად, ხევისკაცობას ჭირისუფალთან შეთანხმებით უნდა გადაეწყვიტა ტირილისა და დასაფლავება-დაკრძალვის ყოველივე წერილმანი.

პირველ ყოვლისა, უნდა გადაწყვეტილიყო ტირილისა და დაკრძალვის დღე. საზოგადოდ, მიღებული იყო მიცვალებული უნდა დამარხულიყო გარდაცვალებიდან მესამე დღეს, მაგრამ ყოველივე ეს არ შეიძლებოდა ზუსტად დაეცვათ. სხვადასხვა პირობების გამო შეიძლებოდა დაკრძალვა მე-4 და მე-5 დღესაც მომხდარიყო, იშვიათ შემთხვევაში კი მეორე დღესაც.

დაჩქარებით დასაფლავება ხდებოდა მცირეწლოვანის — „ანგელოზის“ გადამღები სენით დაავადებულის და ზოგჯერ ისეთი მიცვალებულის, რომლის „შენახვა“ 3—4 დღეს შეუძლებელი იყო, რადგან „მწოლარეს ჰქონდა მკვდრის სუნი“.

მცირეწლოვანის ჩვეულებრივი ცერემონიით ტირილი არ

იცივნენ, „დიდ ხარჯს არ სწევდნენ და არც შორეულებს ატყობინებდნენ“, ამიტომ მისი მიწის მიბარებაც ადრე შეიძლებოდა. გაღამდები სენით (ყვავილ-ბატონები, ტიფი, შავი ჭირი) მკვდარს ადრე მარხავდნენ, არც არავის ატყობინებდნენ და არც არავინ „წაეკარებოდა“. მარხავდნენ სულ ახლობლები, „გამსვენებლის“ შოვნაც ჭირდა და ყოფილა შემთხვევაც მიცვალებული საფლავზე ურმით მიუსვენებიათ. ზოგჯერ ადრე დამარხვის მიზეზი იყო ოჯახის მღვდმარეობა, თუ ოჯახში მეორე ავადმყოფი იყო, მაშინ ეს გარემოება აიძულებდათ ადრე დაემარხათ.

ასეთ შემთხვევაში ტირილი სხვა მოხერხებული დროისათვის უნდა გადაედოთ... ყვავილბატონებიან ოჯახში მიცვალებულის არც შეცხადება შეიძლებოდა, არც შავის ჩაცმა და, არც ტირილი. ბატონები გაჯავრდებოდნენ, შეიძლება „პირიც ებრუნებიათ“ და ყველა დაეხოცათ... დრო გაივლიდა „ბატონები წაბრძანდებოდნენ“ და ამის შემდეგ რამდენიმე თვის წინათ მიცვალებულს, ახლად გარდაცვლილის მაგივრად „შეიცხადებდნენ“ და „ნიშნით“ იტირებდნენ. შეიძლებოდა ერთსა და იმავე დღეს ორი და სამი ერთად ეტირათ. სახევისთაოს თათბირი ყველაფერს ანგარიშს უწევდა და ჭირისუფალთან შეთანხმებით ტირილის დღეს და ტირილთან დაკავშირებულ სხვადასხვა საკითხს სწყვეტდა. ეს საკითხი ბევრგვარი გახლდათ: ტირილი დღის დანიშვნა, ტირილი ზარით თუ უზაროთ, რითი იტირონ, ესე იგი, საჭმელი რა მიაართვან მოტირალს და რამდენი რა არის საჭირო... რამდენი არშინი შავი კმარა და რამდენი სურათი, მატირალთა დასაპატიჟებელი სიის შედგენა, „ტირილის წიგნით“ მოსაწვევისა და სიტყვიერის, („სახლის“) კუბოს გაკეთება და სხვა. თუ რომელ დღეს დაენიშნათ

ტირილი ამასაც სჭიროდა კვლევა-ძიება, სხვადასხვა გარემო-
ების გათვალისწინება.

ორშაბათი „დამრჩვალის დღე“ იყო. იმ დღეს შეიძლებო-
და დაესაფლავებინათ მხოლოდ და მხოლოდ წყალში დამხრჩ-
ვალი. პარასკევი ქრისტეს ჯვარცმის დღე იყო. გურულის აზ-
რით, იმ დღეს არ შეიძლებოდა ქრისტიანისათვის რკინის ია-
ჩალის ხმარა, მაშასადამე, არ შეიძლებოდა საფლავის „გაქრა“,
ძლიერ ბევრი მორწმუნე პარასკეობით არც ღვინოს სვამდა.
მიცვალებული „უზედაშოთ“ „შეუნდობელი“ არ დაიმარხებო-
და. ამრიგად, ამ ორ დღეს არ ანგარიშობდნენ. ტირილის
დღედ ყველაზე უკეთესი იყო შაბათი, რომელიც მიცვალებუ-
ლის დღედ ითვლებოდა. თუ შაბათს არ ხერხდებოდა, მაშინ
შეიძლებოდა სამშაბათს, ხუთშაბათს და უკიდურეს შემთხ-
ვევაში ოთხშაბათსაც. მაგრამ აქ კიდევ სხვა პირობებიც იყო
გასათვალისწინებელი „მთვარე და წარმო-უკუნი“. მთვარეს
გადამწყვეტი მნიშვნელობა არ ჰქონდა. აქ შეიძლებოდა დათ-
მობაზე წასვლაც. რაც შეეხება წარმო-უკუნს, აქ კი ლაპარაკი
ზედმეტი იყო. მიცვალებული უნდა დაემარხათ უკუნზე,
გურულებისათვის ამ მეტად „საბნელო“ დღეებს ასე ანგარი-
შობდნენ:

კვირა დღე არც წარმო იყო და არც უკუნი. ახალ მთვარე-
ზე ხუთშაბათი და შაბათი უკუნი იყო, წარმო კი—ორშაბათი,
სამშაბათი, ოთხშაბათი და პარასკევი. ძველ მთვარეზე — წი-
ნაალმდეგ: ხუთშაბათი და შაბათი — წარმო, დანარჩენი —
უკუნი. ძველი მთვარე იანგარიშებოდა — ცხრომის შემდეგ
15 მთვარიდან. გურულების ღრმა რწმენით, ზოგი საქმის გა-
კეთება შეიძლებოდა (და სასურველი იყო) უკუნზე, ზოგის —
წარმოზე. მიცვალებული უნდა დამარხულიყო უკუნზე —

„უკუნითი უკუნისამდე“ — იქნებოდა განსვენებული და, რაც მთავარია, ოჯახს „უკუნისამდე არ მოიკითხავდა“ და ოჯახის წევრი არ მოკვდებოდა... მიცვალებულის დამარხვას, თუკი ეს შესაძლებელი იქნებოდა, არჩევდნენ ძველი მთვარის უკუნს, რადგან იგი მიაჩნდათ გამძლეობისა და ხაგრძლივობის ნიშნად. ღრმა და მასთან ჭარმაგი მოხუცი კაცისა თუ ქალის შესახებ იტყოდნენ: მაგას რა მოკლავს. ან რა მოახუცებს, ძველი თვარის უკუნზე არის დაბადებულიო.

ხეს რომ ფიცრად დახერხილს მეტი გაეძლო და არ დაეფოტრა, ძველი მთვარის უკუნზე უნდა მოეჭრათ, ასევე უკუნზე სჭრიდნენ დამის წნელს. „სასხო ხეებს“ — საწნახელს, ნავისა თუ სახიდე (ბოგირის) ხეს და სხვა (შესაძლებელია, აქ ხალხი ანგარიშს უწევდეს მთვარის მიმოქცევას და ხეში წვეწვის მოძრაობას). ახლად აშენებულ სახლშიც გურული უკუნზე შედიოდა, ბედელსა და ხულასაც უკუნზე „შესძრავდა“: სტუმარს თუ წასვლა მოუგვიანდებოდა იტყოდა: უკუნზე მოველ და ჩემი წაუსვლელობა ნუ გიკვირთო.

ალავერდ-იახშიოლს შორისაც გაიგონებდი ამგვარ გადაკრულ სიტყვას — გვადირსე მამაო, მაგი ღვინის დაღევა — მე წარმოზე დაგილიე და შენ უკუნით ნუ აქცევო. წარმო ღღეს გურული წამოიწყებდა ახალ რამეს, როგორიც იყო: ახალი მოსახლეობის დაწყება, სახლის საძირკვლის „დადგმა“, სახლის გადადგმა, „კაპეტი“ (ყამირი) მიწის საყანედ გაკაფვა, ყანის ხელის მოკვრა („პირველი თესლი“), ბოსტნის დათესვა, სასიმიინღებში სიმიინღის შეყრა და ბედლის შეღობვა, სამგზავროდ წასვლა, ვაჭრობის დაწყება და სხვა ამგვარი საქმე-სწამდა, რომ საქმეს ადრე და წარმატებით გაათავებდა.

მიცვალებული აუცილებლად ზარით უნდა ეტირათ. იგი

იყო, თუ შეიძლება ასე ითქვას, მიცვალებულის სამგლოვიარო მარში — ტირილისა და გლოვის მუსიკა. ტირილის აკომპონი-მენტი — უსიტყვო და უტექსტო გალობა, სჭიროდა სამი კა-ცი: დამწყები, მოძახილი და ბანი. ზარი მიცვალებულის პა-ტივისცემაც იყო და მოტირალსაც ტირილს უადვილებდა. თავის დროზე მოტირალს ორი საპატიო, დარბაისელი ამოუ-დგებოდა, მოტირალი ქალი თუ იყო და ისიც მიცვალებულის მახლობელი — ჭირისუფალი — ლოყები რომ არ დაეკაწრა ან გაშლილი თმა არ დაეგლიჯა, ორივე მკლავს გაუკავებდნენ და ნებას არ აძლევდნენ ხელები თავისუფლად ეხმარა... მო-ზარეები წინ დაუდგებოდნენ (ცხადია, ზურგშექცევით) და „ზარს აუშვებდნენ“, გალობას დაიწყებდნენ, და მოტირალნიც ზარს ტირილის სიტყვებს ტექსტს შეუწყობდნენ, შეუხამებდ-ნენ, ისე როგორც ჩონგურს ხმას შეუწყობს ლექსის დამდილი-ნებელი. ზოგჯერ მოტირალი მოზარეს წინაწარ აძლევს გაფრ-თხილებას მაღალი ან დაბალი თქვას... მოზარეები გალობით მოტირალს კუბოსთან მიაცილებენ და გალობას იქაც განა-გრძობენ მანამდე, სანამ მოტირალი მიცვალებულის „და-ტირებას“ მორჩებოდეს. ხელში ჩამკიდვ ამავე დროს წესრი-გის დამცველებიც იყვნენ და ჰეროლდის როლსაც ასრუ-ლებდნენ; მოტირალი კუბოსთან ორივე მუხლით იჩოქებდა, ხელში ჩამკიდებელიც ცალი მუხლით იჩოქებდა, მოტირალს ნებას არ აძლევდნენ გადამლაშებისას — აყენებდნენ და მიჭ-ყავდათ „ნუგეშის სათქმელათ“ ჭირისუფლებთან. სრული წეს-რიგის დაცვით, ესე იგი, პირველად მიცვალებულის ყველაზე მახლობელთან და ასე შემდეგ, ზოგი მოტირალი პირადად არ იცნობდა (ეს იმ დღეს არ შეეძლო ეცნა) ჭირისუფალს — ხელ-ში ჩამკიდვ აცნობდა... მოტირალი ჭირისუფალს ხელს კი არ

ართმევდა, არამედ ნიშნად გულითადი თანაგრძნობისა ერთ-
ურთს გულით ეხუტებოდნენ. ნუგეშის ცემის, ანუ მისამძიმ-
რების შემდეგ ხელში ჩამკიდებელს მოტირალი გარეთ გამოჰ-
ყავდა. (მახლობელი ნათესავი მოტირალი ქალი შიგ რჩებო-
და, ჭირისუფლებთან ჯდებოდა, ან დადგებოდა) მოზარეე-
ბიც გარეთ გამოდიოდნენ და ახლა მეორე მოტირალი შემოჰ-
ყავდათ.

თავმომწონე და „დიდი მტერ-მოყვარის“ მიცვალებულის
პატრონს მეორე პირი მოზარე ჰყავდა გაჩერებული კუბოსთან
და პირველი მოზარე კუბოსთან მიცვალებულს მიიყვანდა თუ
არა მოტირალს გადააბარებდა, უკან გაბრუნდებოდა და „მეო-
რე წყება“ მოტირალი შემოჰყავდა.

ეს იყო ჩვეულებრივი, ასე ვთქვათ, ოჯახური ზარით ტი-
რილი. მაგრამ იყო კიდევ მეორეგვარი ზარით ტირილი. მიც-
ვალებულის ჭირისუფალი თუ ნათესავი მოყვარეს „ტირლის
წიგნით“ თუ ატყობინებდა „თავისწინაი“ მცტირეო, მაშინ ნა-
თესავი ვალდებული იყო სატირლად წასულიყო მარტო (ოჯა-
ხის წევრებთან) და თან არც თავისი მოზარე, არც სხვა „დამ-
შვენებლები“ არ წაეყვანა. თუ ასეთი წინასწარ გაფრთხილება
არ იყო, მაშინ ნათესავ-მოყვარეს თუ თავი მოსწონდა და მი-
ცვალებულსაც პატივს სცემდა მაშინ ის უნდა ეტირა ზარით,
ესე იგი, თან უნდა წაეყვანა თავისი მოზარე სამი კაცი, ორი
ხელში ჩამკიდე და რამდენიმე ქალი და კაცი „კაი ტან-ფენით“
(თავისი ტანისამოსით კარგად ჩაცმულ-დახურული) „საგა-
რიოთ გამოსაჩენი“ დარბაისელი ხალხი, რაც მეტი იახლებო-
და მით უკეთესი იყო. ადგილობრივ ეკლესიის მღვდელსაც
თუ იახლებდა თავის მოწონებაც იყო და მიცვალებულის „გა-
პატიოსნება“, ცხადია, დამშვენებლები ამჯობინებდნენ წაეყვა-

ნათ თავადი, აზნაური და ჯვარ-მეფლიანი გლეხი. თან უნდა წაეღოთ აგრეთვე „კელექტარი“. კელექტარს აკეთებდნენ ასე: აიღებდნენ ისლის მალალ ღეროებს სიგრძით 1 არშინზე მეტს, მჭიდროდ მიაწყობდნენ ერთიმეორეზე „მკლავის სისხოს“ (მეტსაც). გარედან მაგრად შემოახვევდნენ ორ-სამ წყებად წმინდა სანთელში გაყლენთილ და ამოვლებულ მიტკალს, ასე მომზადებულ კელექტარს ჩაარჭობდნენ ღურგლის მიერ ჩარხზე (კოჭის) სამფეხში და ეგეც თან მიჰქონდათ, და როცა მიცვალებულის ეზოში ჩავიდოდნენ კელექტარს უკიდებდნენ და „გაბდლიალებულს“ წინ გაიმძღვარებდნენ — მიცვალებულის კუბოს თავთან დადგამდნენ.

მიცვალებულის პატივისცემა და სიყვარული ზარითა და კელაპტრით ფასდებოდა — რამდენმა იტირა ზარითო, რამდენი კელექტარი მოუვიდაო, იკითხავდნენ. ზოგი მოტირალი ზარით დამშვენებული მოვიდოდა. ერთი პირი მიცვალებულს დაადგებოდა თავზე და იქ გალობდა, მეორეს მოტირალი შემოჰყავდა, ამ დროს შინაური მოზარები ისვენებდნენ. ზოგჯერ მეტადრე თუ ზარით მოსული სხვა კუთხის (სამეგრელო ან ქვემო იმერეთი) ან შორეული სოფლიდან იყო, მაშინ შინაურ და სტუმარ მოზარეებს შორის ერთგვარი თავაზიანი შეჯიბრება ხდებოდა. ვთქვათ, ზარით მოტირალს — მოტირალი მოჰყვა „ჯარით“—7—12 სული. 5—7, რომ ატირდებოდა მოსული მოზარე, მერმე შინაურ მოზარეებს სთხოვდნენ — გვეცით პატივი და ახლა თქვენი კაი ზარით ატირე ჩვენი მოტირალიო.

ეს იყო ერთგვარი გამოწვევა, რომელსაც შინაურები მცირეოდენი „გაპირების“ შემდეგ იღებდნენ. სამაგიეროდ, მოსულებს სადილის მორთმევის შემდეგ შინაური მოზარეები მო-

სულელებს შესთავაზებდნენ — გვეცით პატივი და თქვენი ზარით ჩვენი მოტირალი ატირეთო.

გალობით მიცვალებულის პატივისცემით თავმოყრილი ხალხი სიამოვნებდა, ერთიმეორეში ბაასი შეწყდებოდა და მოზარეებს გულისყურით უსმენდნენ — ზარის მოქმედებას ერთიმეორეს აღარებდნენ, თავიანთ აზრს გამოსთქვამდნენ — ზოგის მოსწონდათ, ზოგს იწუნებდნენ. იმდენი და ისე კაი მოზარეებით იტირეს წასაწყემელი რომ იყოს, მაინც ცხონდებაო, იტყოდნენ.

ზარის მცოდნეს მოწონება ჰქონდა, ერთგვარი ხელობა იყო, სარგებლიანი. თითოეულ სახევისათაოს თავისი მოზარე ჰყავდა და ეს სამი კაცი — სახევისთაოს წევრები მიცვალებულის სხვა სამსახურისაგან თავისუფალი იყო. თუ მოზარე სახევისთაოს არ ჰყავდა, მაშინ მეზობელ სახევისთაოდან მოიყვანდნენ. ზარით მოტირალი (სხვა სოფლიდან მოსული) მოზარეს გასამრჯელოს აძლევდა ან ფულით, ან მაინდით, მაგრამ მაინდი პირდაპირი არ იყო, ერთი დღის ნაცვლად ყანაში ორ დღეს უნდა მიხმარებოდა და მასთან თუ ცხენი იყო საჭირო, ცხენის ქირაც უნდა გადაეხადა. მოზარე უნდა ყოფილიყო ტანადი, კარგად ჩაცმულ-დახურული, ამიტომ ცხადია, მოზარეები მოსახლეობის უფრო შეძლებული ფენიდან იყვნენ, სხვებთან შედარებით თავმომწონე — შავი საქმის მოძულე.

ზარის მასწავლებელს გასამრჯელოს აძლევდნენ უფრო ბშირად ნატურით, როგორცაა, მაგალითად, ჩექმა, სიმინდი, ჩოხა, ღომი, ღვინო ან 10—20 ღლით ყანაში მოხმარება. ზარის თქმა ოჯახში (თუ მიცვალებული არ ესვენა) „საბძნილო“ იყო, არ „დაიბედებდნენ“ „ზარი გავიგონე შენსასო“, მაგარი წყევლა

იყო, ამიტომ ზარს სწავლობდნენ ეკლესიის საყარაულო ქობ-
ში (სასაფლაოზე) ან ტყეში, „ღარდაში“ ღელის პირად. სწამ-
დათ, რომ ცეცხლმოკიდებულ თავლიდან ცხენს სხვა ვერავი-
თარი საშუალებით (ვერავითარი „მამაო ჩვენოთი“) ვერ გა-
მოიყვანდნენ თუ არა ზარით. ზარს ეტყოდნენ და ცხენიც გა-
მოყვებოდა. ეს გურულისათვის უდავო იყო. ასახელებენ ამის
ფაქტებს, და ეს დასაჯერებელიც არის. „გველსა ხვრელით
გამოიყვანს ენა ტკბილად მოუბარი“ — აქვე შეიძლება,
ცეცხლისაგან დამფრთხალ პირუტყვს გალობა აწყნარებდეს,
ასულებდეს... ასევე ითქმის მიცვალებულის ახლობელი ჭირი-
სუფლის შესახებაც — ზარი გულმოკლულ მოტირალს უსა-
თუოდ აწყნარებს, ამშვიდებს, თავდავიწყებიდან გამოჰყავს —
არანორმალურს ნორმალურად ხდის.

ზარით ტირილი ორივე მხრიდან იწვევდა ხარჯს; ზარის
მომყვანს მოზარეებისა და დამამშვენებლებისათვის გასამრჯე-
ლო უნდა მიეცა, თუ პირდაპირ გასამრჯელოს არ აძლევდა,
ივალებდა მაინც, სამაგიეროდ, პატვისიცემა რითიმე უნდა გა-
დაეხადა, გარდა ამისა, კარგი, სანაქებო სადილი მიერთმია,
ნამდვილი ტირილი ლობიოთი იყო ან თევზით. ზარის წამსე-
ლელი თავის „საპატიო ამაღას“ ქორწილის შესაფერი სუფ-
რით უმასპინძლდებოდა — ზოგჯერ საკლავიც კი იყო საჭი-
რო. სუფრიდან მხიარული დგებოდნენ და გზაშიც მოგზაუ-
რობა. მაყრულს უფრო ჰგავდა, ვიდრე მატირალს, მეტადრე
თუ ეს ტირილი უფრო ფორმალური იყო და არა დიდად
„გულსაწვავი“. მაგალითად, გათხოვილ ქალს საჭირისუფლო-
ში გარდაეცვალა ღრმად მოხუცებული ბებია, ან ბაბუა და
თუგინდ მშობელი. „ქვეყნის შესახედავად“ ზარით იტირებ-
და, მიცვალებულის კუბოსთან გულმომწვავ სიტყვებსაც იტ-

ყოფდა, „კურცხალსაც გააყოლებდა“, მაგრამ ოჯახსა და გზაში სიცილიც იყო, ოხუნჯობაც და ხშირად მხიარული სიმღერაც, მეტადრე — „ვალის მოხდის შემდეგ“ — უკან დაბრუნებისას.

მასპინძელიც — მიცვალებულის პატრონიც — ზარით მოტირალს ღირსეულათ უნდა დახვედროდა — სადილი მიერთ-მია, მაშასადამე, ისიც უნდა „დახარჯულიყო“... თან უხერხულობას კიდევ ის იწვევდა, რომ მასპინძელმა ზუსტად არ იცოდა რამდენი სურსათ-სანოვაგე დასჭირდებოდა ზარით ტირილს — არ იცის რამდენი მოზარე მოუვა და ვის რამდენი სული იახლება დამამშვენებელი. შეიძლებოდა ზარით მოტირალი 15—20 სული ყოფილიყო და ზოგჯერ 100-ზე მეტიც. 1892 წელს სოფელ აკეთში გარდაიცვალა თავად თავდგირიძის მეუღლე კულაშელი სიდლიკიტა მიქელაძის ასული. გარდაცვალებულის საჭირისუფლოდან მოვიდა მთელი ზარით 150 ცხენოსანი... მათში მოტირალი იქნებოდა 8—10 სული. სამეგრელოდან „დილაბნელზე“ წამოსული 50 ცხენოსანი მოზარე (მოტირალი მხოლოდ სამი იყო, ქალი და კაცი) ყველა შავი ცხენით, შავი ტანისამოსით, ასკანაში მოვიდნენ მზის ჩასვლის ქამს.

ცხადია, ზარით ტირილი ეკონომიურად ზარალის გამომწვევი იყო. თათბირიც ამას ანგარიშს უწევდა და თუ დრო და გარემოება ხელს არ უწყობდა მიცვალებულს ტიროდნენ უზაროთ — „თავისწინაი“...

1890 წლიდან, ცხოვრების გართულებამ ამას ანგარიში გაუწია და სიტყვიერად და გაზეთის მეშვეობით გაჩაღდა კომპანია ზარით ტირილის საწინააღმდეგოდ და, სულ რაღაც, ათიოდე წლის განმავლობაში, არამც თუ ზარით ტირილი, არამედ „თავისწინაი“ ტირილიც კი გადავარდა. ზოგჯერ ავადმ-

ყოფი სტოვებდა ანდერძს ზარით მიტირეთო, ეს ანდერძი 1922 წელს შეუსრულეს სოფელ კვირიკეთის მცხოვრებ კალისტო ლომინაძეს. ეს იყო უკანასკნელი და გამოსათხოვარი ზარი.

ორი საკითხი გადაწყვეტილია, რა დღეს მოხდეს დაკრძალვა და ტირილი ზარით თუ „თავისწინაი“. ახლა უნდა გადაწყდეს, თუ რითი იტირონ მიცვალებული — სამარხვო თუ სახსნილო საჭმელით. ცხადია, დასაფლავების დღე თუ მარხვა იყო ეგ საკითხი უკვე გადაწყვეტილად ითვლებოდა, მაგრამ თუ ხსნილი გახლდათ, მაშინ კითხვა გადაჭრასა და მსჯელობას ითხოვდა... საზოგადოდ, ტრადიციად მიიღეს ახალგაზრდა, „მეტათ გულსაწვავი, ცხოვრებით გაუმადლარ-გაუხარებელი“, ზორცეულით—სახსნილოთი არ ეტირათ, არამედ თევზეულით და, საერთოდ, სამარხვო საჭმელით, როგორიცაა: ლობიო, სოკო, ზეთისხილი და ბრინჯის ფლავი სამარხვო ზეთით. თევზი ნახევარ სამარხვოთ ითვლებოდა, მაგრამ ქრისტიანის მიერ ყოველთვის არ შეიძლებოდა მისი ჭაჭა, მაგალითად, მთელი დიდი მარხვის განმავლობაში (ზედიზედ 48 დღეს), გარდა ორი—ბზობა-ხარება — დღისა. ამასთანავე თევზის ყიდვას ფული სჭიროდა და თუ მიცვალებული ღარიბი იყო ამასაც ანგარიშს უწევდნენ.

ამგვარად, თათბირი ცდილობდა ისედაც „წაქცეული ოჯახი“ ტირილის მიერ გამოწვეული ხარჯიდან კიდევ უარესად არ წაქცეულიყო, ვალი არ დასდებოდა ოჯახს. და თუ ოჯახი შეძლებული იყო და თუ კიდევ მასთან მიცვალებულს „მისი არჩივი ცხოვრება მოკმეული ჰქონდა“, მაშინ, პირიქით, ცდილობდნენ ჰირისუფალს სირცხვილი არ ეჭამა — „არ მოჯახულიყო“—და მიცვალებული საკადრისი პატივისცემით „ხეფ-

სით და ზედაშით“ ღამარხულიყო, შეიძლებოდა საკლავიც დაეკლათ და თუ თევზით მარხვა არ იყო, მაშინ ნელს თევზსა და „თართის დოშსაც“ არ შეურევდნენ. სასტიკი მარხვის დროს კი სხვადასხვანაირად შეკმაზული ლობიოთი, სოკოთი, ზეთის-ხილითა და ფლავით ტიროდნენ. ზოგი მოხუცი ფულსაც სტოვებდა და ანდერძსაც, ხორციით მიტირეთ და „კაიზელაში“ (კარგი პურ-ღვინო) გამაყოლებო.

სრულწლოვან მიცვალებულს აუცილებლად ზედაშე უნდა გაყოლოდა, ყველა ვალდებული იყო მიცვალებულის შესანდობარი მეტი თუ არა თითო ჭიქა ღვინო მაინც დაეღია. ღვინის დაღვეამდე კი ორი-სამი წვეთი ღვინო პურზე დაედვარა (ან პურის ნატეხი ჭიქაში ჩაეწო) და ეთქვა „ღმერთმა აცხონოს, საუკუნო სასუფეველი დაუშვედროს, მის დატოვებულს შეიდობა მისცეს“... ღვინოზე უნდა დაეყოლებინა ერთი ლუქმა ღვინოგადაარებული პური. ვიმეორებ, ეს სავალდებულოდ იყო აღიარებული, მაშასადამე, ტირილისათვის რამდენი ხარჯი იყო საჭირო თათბირი ვარაუდობდა, ცოტაოდენი მორჩენოდა ის ერჩია, ვიდრე მოკლებოდა და „საუკუნის სირცხვილი ეჭმია ოჯახისათვის“.

საჭმელ-სასმლის მოკლება ან ურიგოდ გაკეთებულის მირთმევა მარტო ოჯახის სირცხვილი და „მოჯაყვა“ კი არ იყო, არამედ მთელი გვარის, მთელი სახევისთაოს და თუგინდ მთელი სოფლისაც (ზოგჯერ კი მთელი გურიისაც: იტყოდნენ მეგრელები, იმერლები გვიტირებს და სირცხვილი არ ვაჭამოთ გურიასო).

„ცხოვრება გაუხარებელი“ მიცვალებულის ტირილი, გარდა იშვიათი შემთხვევისა, უნდა „გადაეხადათ“ თუ ხსნილი იყო თევზით, მაკარონით, ან ზეთით გაკეთებული ფლავით,

სირცხვილად არ ითვლებოდა თუ პირველი კერძი იქნებოდა კარგად შეკაზმული ლობიო, ცხაღია, ყველიც შეიძლებოდა.

მარხვა თუ იყო, მაშინ მთლიანად სამარხვო საჭმელები უნდა შეემზადებინათ. ლობიო ამოლესილი, მოზელილი, ურწყულით ან კირკვალი; ზეთისხილი, ფლავი ან მაკარონი — სამარხვო ზეთით შემზადებული.

ხნიერი — „დრომოკმული“ — მიცვალებული არ იძრახებოდა „ეტირათ ხორციტ“. დაეკლათ საკლავი და გაეკეთებინათ ორი თავი ხორცეული — წვნიანი (ხარჩო) და მშრალი ხორცი — „მოსათალი“... მახლობელი ნათესავები, მიცვალებულის „სულის ახსნამდე“ ხორცეულს არ სჭამდნენ, ტირილში აუცილებლად იქნებოდა ბერები და მოლოზნები, არც ესენი მიირთმევდნენ და, ამიტომ სახსნალოსთან ერთად რამდენიმე „სულის საყოფი“ უნდა ჰქონოდათ სამარხვო საჭმელიც — ლობიო და ნახევრად სამარხვო თევზი, ცხაღია, ყველიც. მიცვალებულის სახსნილოთი ტირილი სავალდებულო იყო აღდგომა ახალკვირესშუა, შობა დღიდან ნათლისღებამდე (25 დეკემბრიდან 7 იანვრამდე)... ამ დღეებში სამარხვო საჭმლის ჭამა „ღვთის გმობად“ მიაჩნდათ, ისეთივე ცოდვით ითვლებოდა, როგორც მარხვაში ხორცეულის ჭამა.

მცირეწლოვანი „ანგელოზათ“ ითვლებოდა... „სამძიმრის მომხდელებიც მშობლებს ამ სიტყვით ანუგეშებდნენ: „ანგელოზი იყო ანგელოზმა წაიყვანა — მისი ტირილი ცოდვაა, მის სულს დაამძიმებთ“. ასეთი მიცვალებული ჩვეულებრივზე ადრე დაიმარხებოდა „ცას და ქვეყანას“ არ ატყობინებდნენ, აცნობებდნენ მახლობლებს და უბრალოდ, შინაურულად „თავისწინაი“ მიწას მიაბარებდნენ. წარმოიდგინეთ სამგლო-

ვიარო შავს ნაკლებად იკერავდნენ — ზოგიერთ მშობლისათვის სავალდებულო არ იყო. არც ზარს საჭიროებდა.

„შავის შეკერვის“ წესი ასეთი იყო: ქვრივი ქალი ან კაცი, წლამდე ატარებდა ძაძას — ხამის სრულიად უბრალოსა და იაფფასიან შავს (ძაძა-ფლარი), მაგრამ მეტისმეტად გულის შემზარავს, ამავე დროს სრულიად უშნოდ, ულაზათოდ შეკერილს — ტომარისებურს. მხარზე წითელი ძაფით ჯვარს გამოხატავდნენ. მახლობლები: შვილები, დები, ძმები, რძლები იკერავდნენ „შავს“. შეძლებულები „შავშალს“ ძვირფასს, დაშორებული მოყვარე-ნათესავი ვაჟები შავს გადიკერავდნენ ჩოხის „გულთათაზე“ (სამასრეზე) და თუ ატარებდნენ ხანჯალსაც შავით „ჩამასავლენ“. ამ გლოვის ნიშანს ატარებდნენ 40 დღემდე — „მიცვალებულის გამოტირილამდე“ და ზოგჯერ მხოლოდ ერთი დღითაც, ამიტომ შავის თხოვებაც კი იცოდნენ. სახლის კედელზე, სვეტებზე და ჭისკარზე შავის გაკვრა არ იცოდნენ. მიცვალებული თუ მხედარი იყო, მის ცხენს შავით მორთავდნენ და ეზოში ჰყავდათ დაბმული.

სახევისთაო თათბირს მიცვალებულის ოჯახის წევრებთან ერთად. უნდა გამოიკრკვიათ, თუ რამდენი არშინი და „რა და რა სოის“ შავი, რამდენი ყუთი პური და სხვა რამ სურსათ-საწვავე იყო საყიდელი, მე „ლანდათ“ მახსოვს, რომ იცოდნენ თორნის პატარ-პატარა კვერების ცხოზა. დიდ ჭურს იყვანდა და ბოლოს გადასტეხდნენ და თორნეც მზად იყო. შესაწირის სახით მოტანილს ფქვილს მოზელდნენ და კვერებს აცხობდნენ, ღომს ამზადებდნენ და „პურის ხარჯი“ ან სულ არ იყო, ან ძლიერ ნაკლები. ბათუმის აღების შემდეგ კი ტირილში მჭადის ხარჯი თითქმის სავსებით გადავარდა, ღომისა და პურის ხარჯი შემოიღეს. ღომი „ინჯრათ“ საკმარისი უნდა მიერ-

თმიათ. პური კი უმთავრესად მისი შემოდების პირველ წლებში „არჩივათ“ იყო, ყველას მისი ულუფა მიერთმეოდა, შეეძლო სუფრაზე ეჭამა, შეეძლო შინ წაეღო — არავის არ ეთაკილებოდა (ხშირად ერთიმეორეს სთავაზობდნენ: „ბაღნიანი ბრძანდები და ჩემდა ნახელავად შენს ბაღნებს წაუღეო“) პურს თითოეულ სულზე ნახევარ გირვანქას მაინც ანგარიშობდნენ.

„სერვიზი“ — საინი, ჭიქა, ბოთლი, დანა-ჩანგალი და სხვა ამგვარიც ანგარიშგასაწევი გახლდათ, მაგრამ უბრალოთ კმაყოფილდებოდნენ. სასოფლო ჰქონდათ ნაყიდი 100—200 ხის ჯამი და რამდენიმე ცალი უბრალო ყუფრები. მთლიანი განიერი გრძელი ფიცრები ფეხებგაყრილი (ტირილიდან ტირილში მიჰქონდათ). სხვა შემთხვევის დროს ამათ არავინ იზმარდა, „იბრძნიდა“, ღომს, მჭადს, და პურს პირდაპირ „სუფრაზე არიგებდნენ“... (სამღვდელოებას და სხვა დიდად მოსარიდებელ მოტირალს მიართმევდნენ ჯამით — ან საინით) ჭიქებს მეზობლები მიიტანდნენ თითო-ოროლა, ბოთლი საჭირო არ იყო, მერიქიფე დოჭიდან დაუსხამდა ყველას. 1880 წლებიდან ჯამის ნაცვლად საინები შემოვიდა ხმარებაში და ბევრ სოფელს სასოფლო ჰქონდა, ზოგჯერ კი ჭიქა-საინი იმავე დუქნიდან მოჰქონდათ სანათხოვროთ, საცა პურს ყიდულობდნენ. თათბირი ყოველივე ამას ითვალისწინებდა, გეგმას ადგენდა, წევრებს თავის შესაფერის სხვადასხვა საქმეს ავალებდა და ისინიც ნაკისრ საქმეს შეუდგებოდნენ.

ტირილის წიგნი. სახევისთაოს თუ არ ჰყავდა (ძლიერ იშვიათი იყო) ტირილის წიგნის დამწერი, მაშინ მოიწვევდნენ ვინმეს სხვას და მას უნდა დაეწერა რამდენიმე ათეული ცალი ტირილის წიგნი, რომელიც შორეულ ნათესავ-მოყვრ. ბ-

ში აღრე უნდა დარიგებულიყო. ტირილის წიგნის შინაარსი ასეთი იყო.

„ღრმა მწუხარებაში მყოფი ძმები: სტეფანე, კიმოთე და პავლე ვადაჭკორიები, გაცნობებს გარდაცვალებას ჩვენი საყვარელი დედის ელისაბედის, რომლის ტირილი და დაკრძალვა დანიშნულია მაისის ექვს, დღით ხუთშაბათს და გთხოვთ მობრძანდეთ და ანუგეშოთ დამწუხრებული ოჯახი ჩვენი“. იმ შემთხვევაში თუ სახევისთაოში და მრევლში წიგნით მოყვარეს არავინ პატიუობდა, მაშინ ყველა ოჯახში კაცი ჩამოიარდა და სიტყვიერად აცნობებდა... გარეშეებს კი წინასწარ შედგენილი სიის მიხედვით მისამართს წააწერდნენ და განსაკუთრებულ კაცს უნდა დაერიგებინა (ცხენით თუ ფეხით). ტირილის შესაფერისი მისამართი უნდა დაეწერათ, მაგალითად, თავადს: მის ბრწყინვალეობას თავადს როსტომ თავდგირიძეს, აზნაურს: მის მაღალკეთილშობილებას აზნაურს როსტომ მგელაძეს. გლეხს: მის პატიოსნებას გიორგი წულაძეს. მღვდელს: მის კურთხევას მღვდელს ივანე წულაძეს. „ჩინოვნიკ“-მოხელეს: მის მაღალკეთილშობილებას გუბერსკი სეკრეტარს ილარიონ მგელაძეს.

მიცვალებულის „სულიერი მამა“ — ადგილობრივი მღვდელიც — მოდიოდა ამ დროს და მიცვალებულის ჭირისუფლებს (მეტადრე თუ მიცვალებული „სუქანი“ იყო) ურჩევდა მოეწვიათ სხვა, მახლობელი ეკლესიის მღვდელი, ადგილობრივი ბლალოჩინი, მონასტრიდან არქიმანდრიტი (გურიაში სამი არქიმანდრიტი იყო: შემოქმედელი, ჯუმათელი და ნათლისმცემელი — ამადლებაში). შეიძლებოდა ისეთი შეძლებული და მასთან დიდად თავმომწონე ჭირისუფალი ჰყოლოდა მიცვალებულს, რომ ეპისკოპოსიც მოეწვია თავისი კრებულთ. რაც

მეტი და რჩეული სამღვდელობა შემოსილი დაადგებოდა კუბოსთავს და „ღაღადითა“ და ლოცვა-გალობით მიცვალებულის „წიაღთა შინა აბრამისა და განსვენებას“ ღმერთს შესთხოვდა, მიცვალებულის პატივისცემაც იყო და ჭირისუფლის საამაყოც. მაგრამ ყოველივე ამას ფული უნდოდა. უცხო მღვდლისათვის უნდა მიეცათ ეგრეთ წოდებული „საწირაჲ“ 2-3 მანეთი, ბლალოჩინისათვის — 3-5 მანეთი, არქიმანდრ. იტისათვის — 5-10 მანეთი, ეპისკოპოსისათვის თავის კრებულებით — 100 მანეთი, გარდა ფულისა, საჭირო იყო ნათვის განსაკუთრებული სასმელ-საჭმელი: მღვდლებს ერთმეორეში კავშირი ჰქონდათ — სხვისი ხარჯით ერთმეორეს პატივს სცემდნენ, ამასაც მრევლში ვინმე გარდაეცვლებოდა და სამაგიეროს გადაუხდოდა. მღვდლებს ჭირისუფლის დასტურით, მღვდელი მოიწვევდა წერილით ან სიტყვიერად. რამდენიმე წლის შემდეგ შემოიღეს წერილების კონვერტებით დარიგება, ნიშნად გლოვისა კონვერტს შავ ხაზს შემოაყოლებდნენ მსხვილად (ზოგი შავი ლუქითაც კი ბეჭდავდა) — კონვერტიან წერილს უგზავნიდნენ უფრო მოსარიდებელს, წერილის დამტარებელი არასოდეს მისამართის მიხედვით ოჯახში არ ჩავიდოდა „ჭიშკარს არ გასცილდებოდა“... მასპინძელს იქ „გამოიხმობდა“ და გადასცემდა... ზოგჯერ მიმღები არც კითხულობდა. წერილის მომტანიდან სიტყვიერად იტყობდა შინაარსს და წერილს იქვე ხევდა-ეზოში ჩატანას „არ იბედებდა“.

წერილის დამრიგებელი ზოგიერთ შემთხვევაში წინასწარ იყო გაფრთხილებული თუ როგორ მოქცეულიყო. მაგალითად, ვათხოვილ ქალიშვილს ატყობინებენ დედის ან მამის გარდაცვალებას, ასეთ შემთხვევაში წერილის დამრიგებელი, მეზო-

ბელს ატყობინებდა — მეზობელი მეზობელს და მეზობლები მოხერხებულად, დროს შერჩევით „შეაპარებდნენ“ სამწუხარო ამბავს, „შეცხადებაზე“ მიეშველებოდნენ და კიდევ მიუ-სამძიმრებდნენ.

ასეთი სამწუხარო ამბავის „უცბათ დატაკება“ სირცხვილად ითვლებოდა.

კუბო. სიტყვა კუბოს თქმა ძლიერ ეზარებოდათ — ამბობდნენ მიცვალებულის „კონახი“, სახლი, ბინა. უწინ კუბო არ სცოდნიათ, ხმარობდნენ „ჯალამბერს“. ჯალამბერი საკაცეს მსგავსი სცოდნიათ (ორი მსხვილი 4—5- არშინიანი ჯოხი გაბანდული ტყიური მიწის სუროთი ვენახიან „წირეხვით“ — დელექტით) ტანგაბანილ მიცვალებულს მთლიანად შესუდრულს (ვისაც შეძლება ხელს ეწყობდა სუდარს გასანთლავედა, წმინდა სანთელში ამოავლებდა და ამ „გალიყულ“ სუდარში შეახვევდა სრულიად უტანისამოსოდ) დაასვენებდნენ. ზედ, საფლავში ხელით ჩაასვენებდნენ. ჯალამბერის მახსოვარი ახლაც არიან.

ჯალამბერი შესცვალა უთავო კუბოს მაგვარმა ყუთმა, უბრალო ფიცრიდან „შეკერილმა“, ამაშიაც შესუდრულ მიცვალებულს ჩაასვენებდნენ, საფლავთან, ამოიღებდნენ და მიცვალებულს საფლავში ჩაასვენებდნენ. კუბო-ყუთი იქვე რჩებოდა, შეიძლებოდა სხვასაც ესარგებლა. თუ არავინ ისარგებლებდა, ეკლესიის ღამის დარაჯი, ან ეკლესიასთან დაბინავებული მოლოზანი შეშად იხმარდა... ასეთი კუბო-ყუთის მომსწრე მეც ვარ. შემდეგ შემოიღეს კუბო, მაგრამ პირველ ხანებში ბევრი მორწმუნე თავის მიცვალებულს კუბოდან იღებდა და უკუბოლდ მარხავდა, სწამდა ანდერძის აგების ლოცვის ერთი ადგილი: „მიწა ხარ და მიწათ იქეცი“ და როცა ადრე

მიწად იქცეოდა მადლად მიაჩნდა, კუბო ამის ხელის შემშლელი იყო. ამასთან ერთად გამოცდილებით იცოდნენ, რომ უკუბოლოდ დამარხული მიცვალებულის ძვლები რამდენიმე ათეული წლის შემდეგაც „ოქროსავით“ იყო შენახული, „თეთრად კიანთობდა“, კუბო კი დიდად ამახინჯებდა — „ნიგუზალივით აშავებდა“...

კუბოს შემოღების პირველ წლებშივე — კუბოს აკეთებდნენ მთლიანი ხისას — ნავის ან ყურძნის საჭყლეტ საწნახლის მსგავსად. მოჭრიდნენ ხეს (მიცვალებულის ტანის შესადარს), მიცვალებულის სიმაღლის შესაფერად გამობარავდნენ, ერთი მხრიდან ერთ მესამედს „ჩამოიღებდნენ სიგრძის ხერხით“ — კუბოს თავათ, დიდ ნაჭერს ერთად ამოართმევდნენ გულს და, ამრიგად, ამ ვარცლის მაგვარ კუბოში მისივე თავმისადაგებულში ჩაასვენებდნენ მიცვალებულს.

ძუძუმწოვარა ბავშვებს თავისი აკვნით მიასვენებდნენ სასაფლაომდე და იქ უკუბოლოდ ასაფლავებდნენ, აკვანი იქვე რჩებოდა.

რამდენიმე წლის შემდეგ მთლიანი კუბო შეცვალა ღურგლის მიერ „შეკერილმა“ კუბომ... კერძო მეკუბოე სამაზრო ქალაქ ოზურგეთშიაც რომ არ იყო, ეს მე კარგად მახსოვს. კუბოს აკეთებდნენ მიცვალებულის ოჯახში — აკეთებდნენ სრულიად უბრალოს — სადას. ეკლესიიდან ქირაობდნენ (50 კაპიკად) ფარჩას და ამას გადაათარებდნენ, სილამაზის გული-სათვის... შემდეგ წლებში დაიწყეს კუბოს სხვადასხვაგვარად ვალამაზება და ასე წარმოიდგინეთ ზოგი კუბოსთავს პატარა-პატარა ორ სარკმელსაც კი უკეთებდა იმ ანგარიშით, რომ მიცვალებულის პირისახე გამოჩენილიყო. უწინ კი მიცვალებულის სახის დანახვა ცოდვად მიაჩნდათ... შემდეგ და შემდეგ

მიცვალებულს თავლია კუბოში ტიროდნენ, სანიტარულ-ჰიგიენის მხრივ თუ გავსჭვრეტთ, ეს რეგრესია და არა პროგრესი.

მიცვალებული კუბოში ჩასვენებამდე თბილი წყლითა და საპნით უნდა დაეხანათ (მამაკაცს მამაკაცები და დედაკაცს დედაკაცები). ამ საქმეს კისრულობდნენ ხანში შესულები — ს.ხალისო არაფერი იყო და ზოგჯერ მისი შემსრულებელი საძებარი და საჭირაოც კი იყო. მეტადრე თუ მიცვალებული რაიმე გაღამდები სენით გარდაიცვალა. მონასტრის ბერები და „მოსენაკე მოლოზნებიც“ აკეთებდნენ ამ „სამადლო“ საქმეს. გასამრჯელოთ აძლევდნენ მიცვალებულის ტანისამოსს. „ნამკვლრევი“ ტანისამოსს შინაურები მაინც ვერ მოიხმარდნენ — ერიდებოდნენ...

ამრიგად, ორი-სამი და ზოგჯერ მეტი დღეც სახევისთაოს ქალები და კაცები ყველა საქმობდა და ცდილობდა ტირილის დღეს არ შერცხვენილიყვნენ.

ტირილი

ტირილის დღეს სახევისთაოს წევრები განსაკუთრებით მამაკაცები, გათენებისთანავე მოიყრიდნენ თავს და შეუდგებოდნენ თავიანთი ფუნქციების შესრულებას.

შესაწირავის მიმღებს უნდა მიეღო მთელი თითოეული წევრისაგან შესაწირავი და შეედგინა სია თუ ვინ რა მოიტანა, ღომი ღომთან ჭურჭელში ჩაეყარა, ლობიო ლობიოსთან, ღვინო — ღირსებისა და ფერის მიხედვით ორნაირ ჭურჭელში ჩაესხა — კარგი ღირსების, სამღვდლოებისა და საპატიო სტუმრებისათვის შემოენახა.

„ჩოხაო, ან ჩიხაო“ უნდა მიეღო მთელი სურსათ-სანოვა-
ვე და მას გამოზოგვით საჭიროების მიხედვით ეძლია მზარე-
ულებისათვის და მერიქიფისთვის (ეს უცხო სიტყვა ახალი უნ-
და იყოს და ის, ალბათ, შემოიღეს „საღნიკათ“ გამყოფებმა —
გერმანული „ცეპენგაუსიდან“). პურის დამთლელის მოვა-
ლეობა იყო „თვალის გაზომვით და ხელის ცნობით“ დაეთე-
ლა — დაეჭრა „გოგორა“ პურები ერთნაირი წონის სტანდარ-
ტული ნაჭრები, ყველას ერთნაირი ულუფა, არჩივი უნდა
მოსწეოდა, გული არავის სტკენოდა... პური იმ დროს ნანატრი
ხილი გახლდათ, მეტად სანუკვარი იყო ბავშვებისათვის. აპე-
ზარსა და მტირალა ბავშვებს პურით აწყნარებდნენ... მიცვა-
ლებულის ბავშვებს, რომ არ ეტირათ, ტირილის დღეს პურს
მუდამ აძლევდნენ...

მეხონჩეები. ხონჩა იყო მთლიანი, ფართო (განით არში-
ნი და სიგრძით 2 არშინი. ფიცარი — ბოლო სწორი და ორი-
ვე მხრივ სახელურდაყალბებული). ხონჩას ირგვლივ ერთი
გოჯი სიმაღლე კარბა ჰქონდა. ამ ხონჩაზე აწყობდნენ ულუ-
ფა-ულუფად დაჭრილ პურს და ის ორ მარჯვე კაცს მიჰქონ-
და მაღლა აწეული, მიიტანდნენ სუფრასთან და იქ გაუჩერდე-
ბოდნენ სუფრის გამრიგეს.

სუფრის გამრიგე უნდა ყოფილიყო ზრდილი, დარბაისე-
ლი, კარგი მოლაპარაკე, მისი მოვალეობა იყო ხონჩით მირთ-
მეული საკმლის ჩამორიგება, თავ-თავისი ულუფის ზრდილო-
ბიანად მირთმევა, ყველასათვის უნდა ჩამოერიგებინა ღირსე-
ბის მიხედვით, უფროს-უმცროსის დაცვით (მეხონჩეებიც და
პურის დამთლელებიც ფხიზლობდნენ. დაჭრილი პურის გატაცე-
ბას ან „აცოცებას“ კარგა მოზრდილი ბიჭებიც არ თაკილობ-
დნენ).

მესტუმრეს მოვალეობა იყო უჭმელი და „ზედაშე გადაურებელი“ არავინ დარჩენოდა. სტუმრები მიელო, წინ გასძლოლოდა, ყველა თავის შესაფერ ადგილას „დაებრძანებინა“, ცხადია, ისიც უნდა ყოფილიყო ზრდილი და ენაწყლიანი, დარბაისელი, საპატიო კაცი — „მოსარიდებელი“.

მერიქიფეების მოვალეობა იყო ცარიელი ჭიქის ღვინით შევსება. ეს საქმე ევალეობდა საერთო სამსახურის ახლად დამწყებ ახალგაზრდობას, ასე ვთქვათ, დებიუტი გახლდათ; ამათზე უმცროსებს კიდევ ევალეობდათ:

ცხენების ჩამორთმევა. ცხენოსან მოტირალს უნდა მიგებებოდნენ, ცხენი ჩამოერთმიათ. თუ ცხენი ოფლიანი იყო, უნდა ეტარებინათ. მერმე დაებანათ, წასვლის ხანს ცხენი „მიერთმიათ“ და უზანგი დაეწიათ.

მერიქიფეობა და ცხენის ჩამორთმევა ცწლოვანების აღსანიშნავიც იყო, იტყოდნენ: მე მაშინ მერიქიფეობა შემეძლო, და ეს რომ გარდაიცვალა, მის ტირილში ცხენის ჩამომრთმევად ვიყავიო.

მზარეული. მზარეულზე ძლიერ ბევრი იყო დამოკიდებული. მას შეეძლო კარგი სანოვაგე გაეფუჭებინა და, პირიქით, ამიტომ ხშირად მეორე-მესამე სოფლიდანაც კი მოჰყავდათ დახელოვნებული მზარეული, გასამრჯელოს აძლევდნენ და დამხმარებსაც მიაპირებდნენ.

ღომის დამამზადებელი რამდენიმე კაცი იყო. ნამდვილი „ღომის“ დამზადება ადვილი საქმე არ იყო, გამოცდილება და ცოდნა სჭირდებოდა. რთული საქმე იყო „ჭურჭლის გამორწყვა“, ესე იგი, თუ რამდენი ჩაეყარა ჭურჭელში, არც მეტი (ჯარჯი) მოსვლოდა და არც თხელი გამოსვლოდა, არ უნდა დაზარებოდა ღომის რამდენჯერმე გადარეცხვა, ცეცხლი

ზომაზე შეეკეთებინა, არ უნდა დასწვოდა, კარგად დაემუშავებინა და კარგად დაეზილა, ლამაზად ამორიგებაც უნდა შესძლებოდა. „ლომის ნათალაი“ ერთი ზომის უნდა ყოფილიყო. თითოეულ ლომის დამამზადებელს თანაშემწე ჰყავდა, კიდევც ეხმარებოდა და კიდევც იწაფებოდა.

სამარის გამჭრელი ორი კაცი კმაროდა, კუბოს ზომას აიღებდნენ და სასაფლაოზე დილის საუზმის შემდეგ წავიდოდნენ... საამისო იარაღი: ბარი, მოკლეთარიანი თოხი და ხის ნიჩაბი ეკლესიის სადარაჯოში ინახებოდა — სასოფლო იყო... სადილს იქვე მიუტანდნენ. სასაფლაო უფრო ხშირად ეკლესიის გალავანში იყო ან ნაეკლესიარზე... მიწა, საერთოდ, „ნაკურთხი“ იყო, მაგრამ წინათ ამას არ სჯერდებოდნენ და სასაფლაოს გაჭრის წინ მღვდელს მიწა უნდა ეკურთხებინა. უკურთხ მიწაში დაგმარხეო, წყევლა იყო. უნათლავი, ცოდვამოუნანიებელი და არაქრისტიანი ნაკურთხ მიწაში არ დაიმარხებოდა. ფირალად გავარდნილს პოლიცია უკურთხ მიწაში მარხავდა, მაგრამ ჭირისუფალი მოიპარავდა და ნაკურთხში დაასაფლავებდა. სასაფლაო ყველას ჯერ გვარების და მერმე თითოეული ოჯახის მიხედვით თავისი ჰქონდა, საზღვრის დარღვევა — „სხვისი წყენა“ — სასაფლაოს მითვისება არ შეიძლებოდა — უსიამოვნებას იწვევდა. იყო ასეთი მაგალითიც: ერკეთის თემის მცხოვრებმა აზნაურმა მაგალობლიშვილმა გლეხს სასამართლოში უჩივლა — მიცვალებული ჩვენს კუთვნილ სასაფლაოზე დამარხაო. სასამართლომ გლეხი იძულებული გახადა რვა თვის მიცვალებული მოეთხარა და სხვაგან დაემარხა.

წასაბურავის მიმღები და მწერალი. ყველა, წერილით თუ სიტყვიერად დაპატიჟებული, ვალდებული იყო „წაებურა“,

ანუ მოეტანა „წასაბურავი“, ესე იგი, „წაქცეულ ოჯახს“ დახმარებოდა ჭეულით. ეს იყო „სესხი და ვალი“. წასაბურავი იწერებოდა, დასტურდებოდა მიმღების და მწერლის მიერ. მაშასადამე, ისიც ვალდებული იყო „სესხი და ვალი“ მსგავსი შემთხვევის დროს გადაეხადა, თუ მეტი არა, რაც მას მიუტანეს იმდენი მაინც. სია სიფრთხილით, ვექსილივით ინახებოდა და შემთხვევის დროს ათვალთვლებდნენ და ვისაც რამდენი „წაუბურავს“ იმდენივე მიჰქონდა — ვალს პირნათლად იხდიდნენ.

სიტყვა წასაბურავი ძველი ქართულია. როგორც ზემოთ აღვნიშნე მიცვალებულს მთლიანად ბურავდნენ მარტო სუდარით. ამრიგად, სუდარა ყოფილა წასაბურავი—სახისა და სხეულის დასაფარავი — და რაკი უწინდელი მიცვალებული მხოლოდ „წასაბურავს“ ითხოვდა და მეტს არაფერს, ალბათ, ამ ფულად შესაწირსაც დაერქვა წასაბურავი — სუდარის შესაძენი დახმარება. მიცვალებულის პირისახის დანახვა ცოდვად ითვლებოდა—„ქამოშას“ მოასწავებდა, „წაბურვაც“ ამიტომ იყო სავალდებულო.

„წაბურვიანი ტირილი“ ყოველთვის არ ხდებოდა, მაგალითად, მცირეწლოვანი „წაუბურავათ“ იმარხებოდა. ზოგიერთ შეძლებულ ოჯახს სასახელოდ მიაჩნდა თავისი მიცვალებული (მეტადრე მოხუცი) „ქვეყნის შეუწუხებლათ“ დაემარხა. იყო ისეთი მოხუციც, რომელიც „თავის სამარხს“ სიცოცხლეშივე უყრიდა თავს და ანდერძს ტოვებდა „წაუბურავათ“ მიტირეთო.

ზოგ შემთხვევაში მიცვალებულს „წაუბურავათ“ იტირებდნენ. მაგრამ ახლობელი მოკეთებები ნაუცბადევადა „ხელს

ქვეშ“ შეეწეოდნენ. ესე იგი, ვისაც რამდენი შეეძლო გაუხმაურებლად შეეწეოდა — არ იწერებოდა.

1905 წლის შემდეგ „წაბურვიანი“ ტირილი მოისპო. მაგრამ ტირილის ხარჯი ოჯახს თავზე მძიმე ტვირთად რომ არ დასწოლოდა, ამის ნაცვლად შემოიღეს ეგრეთ წოდებული სამარხი „კასსა“. ეს იყო დაზღვევის მსგავსი. წასაბურავის მიმღებად — (მოლარედ) ირჩევდნენ დარბაისელ მოხუცს — ანგარიშის მცოდნეს — მართალ კაცს, გვერდით მოუსვამდნენ მწერალს.

თითოეული „წამბურავი“ მიდიოდა მასთან და ვის რამდენი სურდა, ან რამდენით ვალდებული იყო, იმდენი ფული მიჰქონდა. არანათესავ-მოყვარეს მიჰქონდა აბაზიდან დაწყებული 2—3 მანეთამდე. ნათესავ-მოყვარეს კი როგორც თავი მოსწონდა 2—10 მანეთამდე. თითოეული „წამბურავი“, თუ ის გლები არ იყო, თავის „ღირსებას“ აქაც არ კარგავდა და მწერალს აწერინებდა სრულად მის „ტიტულს“...

„წასაბურავის“ სია ასე იწერებოდა:

„წასაბურავის“ სია — გარდაცვალებულის

ოთარ თალაკვაძის 1893 წელს სექტემბრის

10 მან. — კაპ.

1. აზნაურმა ივლიანე შავარდნაძემ ერთი მანეთი 1 „
2. მღვდლის შვილიშვილმა ივლიანე ჯაველიძემ ათი შაური 50
3. სიმონ ნაცვალაძემ ორი აბაზი 40

მოლარე ფულს ინახავდა ყელზე გადაკიდებულ ყაბალახში, ან პატარა ყუთში...

„წამბურავის“ უმეტესობა ყოველთვის ცდილობდა შეემოწმებინა—სისწორით ჩაიწერა თუ არა მის მიერ „წაბურული.“

ფულის მიმღებს ჰქონდა კიდევ მეორე სია, სადაც წერდა გასავალს... მაგალითად, მასპინძლის ნებით მიეცა მღვდელს ნიკიფორე ინწყირველს საწირავი ერთი მანეთი, გაიცა სამოწყალო ერთი შაური და სხვა.

მიცვალებულის გასვენების შემდეგ ფულის მიმღები ლობიოს მარცვლების დახმარებით — მასპინძელს ანგარიშს აბარებდა... „წასაბურავის“ მიმღები შეიძლებოდა ყოფილიყო სახევისთაოს არაწევრიც, მაგრამ ერთ ეკლესიაში შემავალი.

საერთოდ, ტირილის ყოველგვარი სამსახური უმთავრესად ევალეობოდა სახევისთაოს და მას დახმარებას უწევდა მთელი სოფელი — რაიმე დავალებას არავინ არ თაკილობდა. ყველა ცდილობდა რიგიანად ემსახურათ — სოფლის თავმოსაწონი — ზრდილობიანსა და მართებულ სამსახურში სოფელი სოფელს ეჭიბრებოდა... ტირილისას იკითხავდნენ როგორი ზარი იყო, როგორი პურ-ღვინო და როგორი სამსახურიო.

„წასაბურავის“ მიტანა ტრადიციად გადაიქცა, თუ არ „წაბურავდი“ ეს იმას ნიშნავდა, რომ გარდაცვალება არ გწყენია, „შენი წაუბურავი მოვკვდეო“, იტყოდნენ და ეს ერთგვარი ფიცის მომასწავებელი იყო... ხშირად წერილობით ან სიტყვიერად დაუპატიჟებელიც კი მოვიდოდა, მიცვალებულს იტირებდა და „წაბურავდა“ ან თუ არ მოვიდოდა „წასაბურავს“ ვისიმე ხელით აგზავნიდა, სამაგიეროს გადახდაც სავალდებულო იყო.

ამასთან დაკავშირებით მაგონდება ერთი კუროზული ამბავი. 1894 წელს გარდაიცვალა ალექსანდრე მესამე. იმ დროს ოზურგეთის მაზრის უფროსად იყო ზ. ალშიბაია, რომელმაც მოინდომა დაემსახურებინა მთავრობის მეტი ყურადღება. 4—

5 სამოსახლოს მცხოვრებლებს ერთად მოუყარა თავი. დიდის მწუხარებით გამოუცხადა, რომ — „დაობლდა მთელი რუსეთი, უდროვოდ განისვენა ჩვენმა მამამ, ხელმწიფე იმპერატორმა ალექსანდრე მესამემ (თვითონვე ქუდი მოიხადა და ყრილობის ხალხსაც ქუდი მოახდევინა). გურულებო, შვილებო და ძმებო, ყოჩაღები ხართ და იმედი მაქვს ახლაც იყოჩადებთ და სხვების წასაბად მაგალითს იზამთ, გამოიღეთ ძმებო და შვილებო კომლზე ხუთი შაური და ამით ხელმწიფე იმპერატორს ძეგლი დაუდგათ“... მოწოდებას ხალხი მღუმარედ შეხვდა... გლენს, საერთოდ, ყოველთვის ეშინოდა მუღმივი ყოველწლიური გადასახადის, და, ალბათ, იფიქრა, რომ ეს იქნებოდა მუღმივი ბეგარა. ასე რომ ფიქრობდნენ ეს გამოამყლავნა ერთმა გლენმა: — „ბატონო უფროსო, ხელმწიფიზა კი არა ჩემისთანა ფეხბურდლიზა ხუთ შაურს რაფა არ წავებურავთ, მარა იგი თუ ყოველ წელიწადს დაგვედვა გადასახადათ კი ვართ უკაცრავათ, მარა არ შეგვიძლია“. გლენის სიტყვა მაზრის უფროსმაც თავისებურად გაიგო, იწყინა და მრისხანედ დაუყვირა:

— აგი რა თქვი შენ ენა გასახმობო, ერთი ხელმწიფის სიკვდილს ვერ გადავიტანთ და შენ გინდა წელიწადში თითო ხელმწიფე მოკტეს — მანამდე შენ ამოგხდა სული...

როცა გამოირკვა რომ ეს იქნება მხოლოდ ერთდროული გადასახადი, ყრილობაც დათანხმდა კომლმა ხელმწიფეს „წაბუროს“ ხუთ-ხუთი შაური.

ჭირისუფლების და მოსამსახურეთა დილის სადილი. ტირილის დღეს ჭირისუფლებს და მოსამსახურეებს საუზმის დროს სადილი უნდა ექამათ. იცოდნენ, რომ ვახშმობამდე ჭამის დრო აღარ ექნებოდათ. მიცვალებულის ოჯახის წევრე-

ბის გარდა ჭირისუფლად ითვლებოდნენ: განაყოფი სახლის კაცები — ბიძათაშვილები და სახევისთაოს წევრებიც. ამათ შორის მამაკაცებიდან კუბოსთან იდგნენ ოჯახის სრულწლოვანი წევრები, ქალები კი ყველა თმაგაშლილი ჭირისუფლობდა, კუბოს მახლობლად გაშლილ ნოხზე, ფარდაგზე ან კილოფზე ჩამჯდარი გამუდმებით და ხმამაღლა თუ არ ტიროდნენ, დროგამოშვებით რიგრიგობით მოთქვამდნენ, მაშასადამე, დილით ამათაც უნდა ესადილათ. მოსამსახურეებიც პირველ რიგში სადილს მიართმევდნენ მოტირალ ჭირისუფლებს... სულ მახლობელმა ჭირისუფალმა ქალებმა დიდი „გაპატიყება“ იცოდნენ. დიდი ხვეწნა და დარიგება სჭირდებოდათ, რომ „პირი გაეღოთ და ლუკმა ჩაეცდინათ პირში“. მეტად განაზება იცოდნენ ქმრის დამკარგავებმა — ქვრივებმა — საკმლის არკამა უზომო გლოვად მიაჩნდათ. „რა ვქნა, მე ძალღის დასაქმელმა, რაფერ ვკამო, პირი ავაფჩინო, ყორყაში გამეკეტება ლუკმა — ვერ გადავყლაპავ. — ზლუქუნით იტყოდნენ: — ვკამ მე უბედური, გენიის ცეცხლზე გაჩენილი, მარა რომ არ მინდა“...

მოტირალი ჭირისუფლების შემდეგ ყველა მოსამსახურე ისადილებდა, 3—4 ჭიქა ღვინოსაც დალევდნენ, ადრე ადგებოდნენ და მოტირალთა პატივსაცემ საქმეს შეუდგებოდნენ.

მომსახურეებთან დილის სადილს არ ჭამდნენ მოზარეები, ხელში ჩამკიდებები, წასაბურავის მიმღები და მწერალი. ამათ აკმევდნენ ადრე, პირველ რიგში, ტირილის ცერემონიის დაწყებამდე.

ნამდვილი ტირილი და საუკუნო გამოთხოვება. ტირილის დღეს ადგილობრივ ეკლესიაში მიცვალებულის სულისმოსახსენებელ „შესანდობარ-საცხონებელი“ წირვა სავალდებულო

იყო. ცხადია, წირვას ასრულებდა ადგილობრივი მღვდელ-
დიაკონი და თუ ერთი მღვდლის ნაცვლად, მღვდლის რჩევით
და მიცვალებულის ჭირისუფლის თანხმობით, მახლობელი
სოფლის მღვდლებიც მიიღებდნენ მონაწილეობას, მეტი სასახე-
ლო იყო, განსაკუთრებით სასახელოდ მიაჩნდათ თუ ამ წირ-
ვას შვიდი ხუცესი შეასრულებდა (ალბათ, „შვიდი საიდუმ-
ლოს“ და „შვიდი ცოდვათა მისატყვევლად“ აღსანიშნავად¹).
წირვას ჩვეულებრივზე ადრე „გამოიყვანდნენ“, წირვის მომს-
მენი გარდა ეკლესიასთან მყოფ მესენაკე მოლოზნებისა, არა-
ვინ იყო. წირვის შესასრულებელი „ქრისტეს სისხლი“ — სა-
ზედაშე ღვინო — მიცვალებულის ოჯახიდან გაიგზავნებოდა
ერთი პატარა ბოთლი, ნაწირობევს, ეკლესიის „სტაროსტა“
(მნათე) მღვდლის შესამოსელს დაკეცავდა, გამოკრავდა ფუ-
თაში და მიჰქონდა მიცვალებულის ოჯახში, თან წაიღებდა აგ-
რეთვე საცეცხლურს, საკმეველს, რამდენიმე ათეულ ღერ
წმინდა სანთელს (სხვადასხვა ზომისა და ფასის), საეკლესიო
ხუცურ წიგნს — კურთხევანს. მოგვიანებით, რუსული ეკლე-
სიის გავლენით შემოდებული იქნა აგრეთვე საეკლესიო დრო-
შები („წმინდანების“ სურათით და სირმიანი ფოჩებით). „სა-
ღმთო მოვალეობის“ შესრულებით კმაყოფილი „სულიერი
მამების“ ხროვა, მხიარული ხორხოცით, მაგრად გაძლომისა და
ფულის ადების მოლოდინში — „შავი ყორნები ლეშისაკენ
მიისწრაფოდნენ“, „სხვათა ჭირი“ მათთვის ღზინი იყო —
„ალილო და მოწყალეო-გაძლომისთვის ვისწავლეო“.

ოჯახში მისვლისთანავე მღვდელს ხელის საბან წყალს

¹ „შვიდეული“ გადაუხადე, შვიდ მღვდელს ერთად ვაწირვინეო—სასა-
ხელოდ მიაჩნდათ.

მიართმევდნენ. ამ მოვალეობას ორი ახალგაზრდა ასრულებდა: ერთს თუნგით წყალი ეჭირა — უსხამდა, მეორე პირსახოცს მიაწოდებდა. შემდეგ საპატიო ადგილას, სუფრის თავში დააბრძანებდნენ, „სამღვდელოების პატივსაცემად მათ გვერდში მესტუმრის მიწვევით დასხდებოდნენ სოფლის ბობოლები, ამათი გამასპინძლება ჩვეულებრივი ტირილის არ იყო, რჩეული კერძი და საუკეთესო ღვინო უნდა მიერთმიათ... მათი ჯდომა და პურობაც ხანგრძლივი იყო. საზოგადოთ, ტირილში მოსადილე სამ-ოთხ ჭიქა ღვინის მეტს არ სვამდა — პირველი ჭიქა იყო ღვინის დალოცვა: „დიდება ღმერთისა, ღმერთის დიდება შენ, ღმერთო შენს მოწყალებას ნუ მოგვაკლებ, ღმერთმა ყველას გაგიმარჯოს“... სუფრაზე ხუცესიც თუ იჯდა, მაშინ დასძინდნენ: „შენდობა მამაო“, მღვდელიც ეტყოდა — ღმერთმა შეგინდოს! ან „შენდობილ იყავ“, მეორე ჭიქიდან ღვინოს პურზე დააპკურებდნენ და იტყოდნენ: ღმერთმა შეიწყალოს ამ ოჯახის მიცვალებული, აცხონოს და საუკუნო სასუფეველი დაუმკვიდროს. მესამე ჭიქაზე: ამ ოჯახის მიცვალებულის დატოვებულს ღმერთმა მშვიდობა მისცეს, მოთმინება მისცეს, აკმაროს აგი ერთი და მიცვალებული არ დაავიწყოს (ესე იგი, ამაზე მეტი „გულსაწვავი“ არ მოუკლასო, გულისხმობდნენ).

მეოთხე ჭიქა იყო სამშვიდობო: ღმერთმა ყველას მშვიდობა მოგცეს. სასიკეთო საქმეზე შევეყრილიყავით ამ ოჯახში.

ამის მეტი ღვინის დაღევა ტირილში აიბი იყო — სირცხვილი და სიხარბე. ცხადია, თამადა არ იყო საჭირო. სუფრის რომელიმე უფროსი წევრი იწყებდა და ყველა მას ბაძავდა... ხანგრძლივი ჯდომა „გასუფრავება“ საძრახისად მიაჩნდათ. ერთი რიგი (50—60 სული) ადგებოდა, მეორე რიგი უნდა

დამჯდარიყო, ორჯერ დაჯდომა ხომ მთლად „მოკიცხვა“ (სირ-ცხვილი) გახლდათ. სუფრაზე მიირთმევდნენ ღომს. პურს იშვიათად.

სამღვდელოება, ცხადია, აჭარბებდა, ერთიმეორის სადღე-გრძელოსაც გახლებოდნენ და თუ ღვინო გოეწონებოდათ კიდევ „ოქროპირამდე“ შეჭიკჭიკებულნი მიცვალებულის მახლობელ ჭირისუფალს გამოიხმობდნენ და მისი თანდასწრებით მიცვალებულის სულის შესანდობარს მეორედ მიირთმევდნენ. მიცვალებული თუ მოხუცი იყო, მრავალყამიერის მაგიერ, მრავალყამიერის ჰანგზე „საუკუნოთ იყოს ხსენება იმისი!“, „ჩააღაღადურებდენ“. მერმე თვით მასპინძელს ადღეგრძელებდნენ, შეაქებდნენ, რომ მიცვალებულს პატივისცემა, კაი პურ-ღვინო და კაი წირვა-ლოცვა გააყოლა.

„წირვის დადგომის“ რომ დაირეკებოდა, იმავე სოფლის მცხოვრები მოტირალეები იწყებდნენ „ტირილში წასვლას“, ყველაზე ადრიაანად მიდიოდნენ უფრო ახლო მეზობლები და უფრო დაკავშირებულნი მიცვალებულის ოჯახთან — ისეთები, რომლებიც ტირილის დღეს ოჯახს რაიმე სამსახურს გაუწევდა... ესენი მიცვალებულს იტირებდნენ შინაურულათ, უზაროთ.

ნამღვილი ტირილი, ზარით და ცერემონიით იწყებოდა „დაბალი სადილობის“ შემდეგ. ზარის მთქმელებს, ხელში ჩამკიდევებს და სხვა საქმის ამსრულებელ პირებს, სადილს მიართმევდნენ და ამის შემდეგ „ზარი აიშვებოდა“ და, თუ შეიძლებოდა ასე ითქვას, ტირილის წარმოდგენა-გათამაშებაც იწყებოდა. თამამად შეიძლება ითქვას, რომ გურული ტირილი და, ისიც ზარით, ნამღვილი თეატრალური სანახაობა იყო: დრამ-მელოდრამა, ოპერა და, თუ გურულები არ მიწყენენ,

კომედიაც კი ერთიმეორეში იყო არეული. მსახიობთა როლს უმთავრესად ასრულებდნენ მიცვალებულის ჭირისუფლები, თმაგაშლილი, მჭილისმცემელი, შავითა თუ ძაძა-ფლასით ჩაცმული კაცები — მთავარ როლებში გამოდიოდნენ. მეორეხარისხოვან როლს ასრულებდნენ მიცვალებულის ოჯახს გარეშე მყოფი ნათესავები — ქალები და კაცები. მესამეხარისხოვანი როლის შემსრულებლები იყვნენ უბრალო „ვალის მომხდელები“, „ზეპირათ მოტირალები“, გულს რომ არ ეწვის, გინდ მკვდარი, გინდ ცოცხალი, მისთვის სულ ერთია, იქნებ კიდევ უხარია, მაგრამ „ქვეყნის შესახედავათ“ ვითომც ისიც ტირის, გლოვობს.

მე თვით ვყოფილვარ ხელში ჩამკრდებლად და ბევრჯერ შემხვეწია მოტირალი ქალი „გავიწიწები“, მარა შენ მაგრად ჩამაფრინდიო... მეც მიხუმრია და მაგრათ რომ გაიწიწა, თმის დაგლეჯა ან ლოყის „დაკაწვრა“ მოინდომა, არ შემიჩერებია და გამწყრალ ქალს „გადმოუჩუჩულებია: „რას შვრები შეწყეულო, ჩამაფრინდიო“.

ზოგიერთი ჭირისუფალ-ნათესავი, თუ ახლო მეზობელი გარინდებულა, ჩამჯდარი ან ამდგარია, ხმას არ იღებს, ცრემლს იწმენდს, ოხრავს. მიცვალებულის პატივსაცემად მოსულები უმთავრესად სანახაობის მაყურებელი არიან. ზოგი მართლა გულით არის მოსული და მსახიობთა „თამაშს“ განიცდის, მათებრ ტირის და გლოვობს, ზოგი კიდევ „მოშაირეთ“, გულგრილ მაყურებლად არის მოსული, დამცინავია, მჭურდავი, მეჭორე, სხვათა ტირილი მოთქმა-გოდებას ფხიზლად უყურებს, ცდილობს არაფერი გამოეპაროს, არაფერი გამორჩეს — ტირილიდან წავა და მოტირალ ქალს ან კაცს დასცინებს, „გამწარებული ჭირისუფლის ნათქვამ სიტყვას ორაზ-

როვან მნიშვნელობას მისცემს — „გადაასხვაფერებს“, გაკი-
ლავს, ტირილს სასაცილოდ გახდის, დრამას გაათარსებს... ასე-
თი „მატირალი“ ქალებისა და კაცების მიერ ძლიერ ბევრი ანეკ-
დოტური სასაცილო ამბავია შექმნილი. აქ გასაკვირი არაფე-
რია, ზოგიერთი ჭირისუფალი თუ უბრალო არა, ნათესავი მო-
ტირალი, მართლაც, „ნაკურთხ“ მსახიობს მოგაგონებს. თუ-
გინდ არ ეტირებოდეს, გულს არ ეწოდეს, მაინც შეძლებს დი-
დი გულმოწვიით იტიროს, ცრემლები დაღვაროს, ლამაზი სი-
ტყვებით მიცვალებული შეამკოს, სიტყვები ზარს შეუწყოს —
შეუხმატკბილოს. არამც თუ მაყურებელი, არამედ „ქვა აატი-
როს“... ბევრი ქალისა თუ კაცის შესახებ იტყოდნენ: „ისეთი
კაი მოტირალია, ჯირკვეი რომ იტიროს, ქვას აატირებსო“. იმისი
მაგალითიც ვიცი, რომ ტყის პირად მომუშავე ყანის მუშებში
გამორევიან ხელოვანი მათირალი — ჯირკვისთვის ჩოხა გადა-
უფარებია და უტირია, ყველა აცრემლებულა და სანაძლეო
მოუგია.

ტირილს თეატრალური დისციპლინაც აქვს. თავისებური
წესრიგი. ზარის მოტირალი ოპერის მსახიობს მოგაგონებს...
ზარი აკომპონიმენტია — „ზარი აუშვეს“. ზარის ჰანგს, მის
კილოს, მოტირალმა ხმა უნდა ააყოლოს — შეუწყოს, რო-
გორც ჩონგურის ხმას დამლიღინებელი შეუწყობს ხოლმე.
ამავე დროს მოტირალი არჩევს ლამაზ სიტყვებს, მიცვალებუ-
ლის კარგი თვისების დამახასიათებელს, ურთიერთშორის,
ოჯახურსა და საზოგადოებასთან აღსანიშნავს, აქ შეიძლება
მოტირალმა მიცვალებულის ცხოვრებიდან მოიგონოს მისი
თავმოსაწონი ეპიზოდი. მოკლედ, ტირილით მოტირალი ცდი-
ლობს მაყურებლის ყურადღება და ქება დაიმსახუროს: ზარ-
ზე ხმის შეწყობით, ლამაზი შინაარსიანი და გულის ამაჩუყე-

ბელი სიტყვების თქმით, კარგი ქართულით. ამავე დროს უნდა ეცადოს „არ წამოცდეს“ და ტირილის დროს არ იხმაროს „გასაკილავი“, „უკან ჩამოსართმევი“ სიტყვები — ორაზროვანი „წაღმა-უკუღმა გასაგები“.

მოტირალთა შორის ყველაზე მეტად ეს ეხება ქალებს. ქალების ტირილს, მათ მიერ წარმოთქმულ სიტყვებს, ყოველთვის მეტი ყურადღება ექცევა, ვიდრე კაცისას.

ამრიგად, ყველაფერი მოწესრიგებულია, მოტირალები ეზოში ჩასავალთან, ჭიშკრის მახლობლად რიგში დგებიან. ერთი ოჯახიდან ცოლ-ქმარი თუ არის მოტირალი, პირველმა ქალმა უნდა იტიროს. თუ ქალი მიცვალებულის დიდი ახლობელია, მაშინ მის ხელში ჩამკიდები ორივე მკლავში „ჩააფრინდებიან“ და თუ შორეულია და არ „იბრძვის“ — ლოყას არ იკაწრავს, თმას არ იგლეჯს, მაშინ „ფორმისათვის“ ორივე გვერდით ამოუდგებიან, წინ მოზარეები დადგებიან და „ზარს აუშვებენ“. ზარის კილოს მოტირალიც თავის „სატირალ“ სიტყვებს მიაგუებს, შეაწყობს. მაგალითად, მეზობელი ქალი ტირის ქალს — ქმარ-შვილიანს: ჩემო დესპინე, ჩემო დაია, კალმით დახატულო ქალო, აბა, შენ იცი და შენმა ქალობამ, თუ არ მემდური იმით მივხვდები, რომ შენებურა გამომეგებები, შენებურა მომაფართქალდები, ჩემი მოსლა ყოლთვის გიხაროდა, მარა ვაი, ჩემს დღეს, ვაი, ჩემს მოსწრებას, დასტურ თუ აღარ მყავხარ... მე თუ გინდა ქე მომიძულე შე ქალო, მარა შენი ნაკვდავ-ნაწყტავთ ოჯახში შენი უბედური ქმარი და შენი მარგალიტის კაკალივით ბაღნები რაფერ შეიძულე (ეს გზად, კუბოსთან მისვლამდე, კუბოსთან დაჩოქილი)... ვაიმე, ვაიმე, ამას რა ხედავს ჩემი დასავსებელი თვალები, დასტურ აღარ მყავხარ, ჩემო დესპინე, ჩემო გამორ-

ჩეულო დაია, ჩემო ქვეყნის უკეთესო... ღმერთმა გაცხონოს და შენგან განწირული შენი ბაღნების ცოდვა არ მომკითხოს... (ხელში ჩამკიდე აყენებს და ნუგეშის მისაცემად მიყავს განსვენებულის მეუღლესთან).

— რა უნდა გითხრა ძმაო ლევანტი, დესპინეს დამკარგავს ყბას ვერ მოგიქცევ. აფერი ნუგეში არ მოგეწყობა, მარა რას იზამ შე საცოდაო, მისი დატიებული ბაღნების გულიზა თავს უნდა შემოუძახო და უდედობა არ შეატყობინო, ღმერთმა გიცხონოს, ღმერთმა მოთმინება მოგცეს...

მიუბრუნდება ახლა შვილებს:

— კაი დედა გადაგეღოთ თქვენ უბედურებო, მარა რა გიეწყობა, — დედა უნდა მოკტეს და შვილი დარჩეს. უნდა ვითმინოთ და დიდმა პაწას უნდა მიხედოს, ვაი, ვაი!

„ნათლული“ როგორ იტირებს თავის „ბუღუას“ (ნათლიას).

— ჩემო ბუღუა, ჩემო ქვეყნის უკეთესო, ჩემს ოჯახში მირონის შემომტანო, ჩემო დამამშვენიებელო, ჩემო სასახელოვ, ჩემო წყალობელო, კაი დღეის გათენება შენით მიხაროდა, ყორიფელს დაჭუჭკულს მიგზავნიდი, შენი ნათლულები და დედამისიც პეპელასავით გყავდა გამოწყობილი. აწი, რალამ უნდა გამახაროს, ყორიფელი დაბნელებული და ჩალუსკუმებულია ჩემდა, ვაი, ჩემს დღეს და ვაი, ჩემს მოსწრებას. თუ მეტი დღეი არ ჭონდა, უბედურ ვასკვლავზე გაჩეხილს შენს ნათრულს, ნეტაი, სულაც არ გამეცანი, ნეტაი, თვალითაც არ მენახე, ჩემდა გულის მოსახარჩავათ და გულის მოსაჭეჭკათ იყავი კაი და სახელოვანი...

ვაიმე, ვაიმე! ამას რას ხედავს ჩემი დასაფსები თვალები, ერთ სოფელში არ ეტეოდი, ორ თვალ ოდაში ვერ დაეტიე,

პალატზე ოთხთვალა ოდა დეიდგი და ახლა ამ ერთცახა! კონახში რაფერ ხარ, უიმე, უიმე! იმე!!...

როგორ ტიროდა გათხოვილი ქალიშვილი დედას. გათხოვილ ქალს სიფრთხილით შეუცხადებდნენ დედის გარდაცვალებას. ისიც თავის ქმარეულში შეიცხადებს, „იკივლებს, იჩხივლებს“... მეზობლებიც მოიყრიან თავს, მიუსამძიმრებენ... იქაც თათბირობენ, თუ როგორ სცენ მიცვალებულს პატივი, უმეტეს შემთხვევაში შვილს დედა ზარითა და კელეპტრით უნდა ეტირა, კიდევ „წაებურა“, რაც მეტი „დამშვენებული“ წავიდოდა სიძე, მისი სახელი იყო. ქალი და სიძე შავს იკერავდნენ, სხვები კი თალხს იცვამდნენ. გზა თუ 4—5 კილომეტრზე მეტი იყო გასარები, ცხენით მიდიოდნენ. მიცვალებულის ეზოს რომ დაუახლოვდებოდნენ მოტირალი ქალები (გათხოვილი ქალი, მისი დედამთილი, მული, რძალი) თმას გაიშლიდნენ... მახლობელ მოტირალს გათხოვილს ქალს ორი მარჯვე კაცი ხელში ჩამკიდე, ორივე მხრით „ჩამოუდგებოდნენ“. მოესმოდათ თუ არა ტირილის ხმა, ქალიშვილიც ცხენზე იწყებდა კივილ-ჩხავილს-შეცხადებას: ვაიმე, უიმე, უიმე, ვაიმე... ცდილობდა თმა დაეგლიჯა, ლოყები დაეკაწრა, მაგრამ ხელში ჩამკიდეები ამის ნებას არ აძლევდნენ „გაკაიპებული“ ჰყავდათ... უფრო დაბალი ხმით, მოთქმის კილოზე „ებანებოდნენ“ მხლებელი მოტირალი ქალებიც... ეზოში შესვლისთანავე ცხენიდან ჩამოხტომაში ეშველებოდნენ და ყველა დინჯად დაიქერდა ადგილს — ჩაირაზმებოდნენ (სხვა რიგითი მოტირალეები თავის რიგს სთმობდნენ). ზარით მომსვლელებს თუ მღვდელი იახლა წინ, ჯერ ის დადგებოდა, მერმე მოზარდები, მერმე

მოტირალი (ქალი გათხოვილი თავისი ხელში ჩამკიდევებით, უკან დამამშვენებელი ქალები და კაცები). სულ წინ წაიძღვარებდნენ კელეპტარს, რომელსაც დამხდურები ჩამოართმევდნენ, აუკიდებდნენ და მათ შეჰქონდათ. „ზარი აიშვებოდა“ და დედის მოტირალიც ზარს ხმას შეუწყობდა (ზოგჯერ მოტირალი მოზარეებს აფრთხილებდა, თუ როგორი ზარი ეთქვათ — მაღალი თუ დაბალი).

— ნენავ, ნენავ, ნენავ, ჩემო ჭუჭუელა, ნენავ, ვაი თუ დასტურ აღარ მყავხარ, ნენავ, ვაი თუ დასტურ მიღალატე, ნენავ, ვაი თუ დასტურ დამაობლე, ნენავ, უბედურ ბაბას, ბაბას, უშენოდ რა ეშველება, რა ეხიდება, ნენავ, შენს სიკტილს ვერ დავიჯერებ, ნენავ, არ მემეტებოდი ჯერე.

პროცესია იძვრის ნელა, დინჯი სიარულით უახლოვდებიან კუბოს — გათხოვილი ქალის დანახვისთანავე კუბოსთან ჩამჯდარი ჭირისუფლებიც იწყებენ ხმამალლა ტირილს: „მევიდა შენგან დაობლებული, შენი ქალიშვილი, დამშვენებულათ მოვიდა, ზარითა და კელეპტრით გტირის, მარა შენ რას ხედავ“ და სხვა მსგავსი. გათხოვილი ქალი „ახლა ფაქტის წინაშეა“ იქაჭება, იწეწება, მთელი ძალ-ღონით ცდილობს ხელები გაინთავისუფლოს და ლოყა დაიკაწროს, თმა დაიგლიჯოს... რაც შეიძლება ხმამალლა შეიცხადებს (მესამედ), ვითომ ეს არის ახლა გაიგო: უიმე, უიმე, უიმე, ვაი, ვაი, ვაი!... დამხდურებიც შეცხადების კილოზე ებანებიან. აწი რა ვქნა, ნენავ, აწი რა ვქნა, უშენოთ აგი ოჯახი აწი რაფერ იქნება ნენავ, რაფერ შემაძულე აქაურობა, ნენავ! ნენავ! (დაემხობა კუბოს, ცდილობს კუბოს თავი დაარტყას)... ნენავ, ნენავ, ნენავ, რას მემდური, ნენავ, მითხარი რაცხა, ნენავ, ჰკუაზე დამარიგე, ნენავ, შენს ჰკუას ვენაცვალე, ნენავ. (ძალათ აგლეჯენ

კუბოს, აყენებენ, მიყავთ მამასთან, ჯერ შორიდან უსაყვედურებს):

— ბაბავ, ბაბავ, შე უბედურო, ბაბავ, რა უყავი ჩემი ნენაი, ბაბავ, რაფერ დამახვედრე, ბაბავ, მარტუაი შენ რათ მინდებხარ, ბაბავ! (ჩაეხვევა) ახლა მეცოდები, ახლა მეცეცხლები, ბაბავ, ვინ მოგხედავს აწი, ვინ მოგისტავს, ვინ შეგიკერავს, ვინ გაგირეცხს, თბილ საჭმელს ვინ გაჭმევს, ბაბავ?! იქნება მიაკელი რამე, იქნება მეინატრა რამე, მითხარი ბაბავ, ნურაფერს დამიძალავ, ბაბავ!

მამა ხან შუბლზე, ხან გულზე მჯილს მაგრად ირტყამს, თავს უნუგეშოთ იქით-აქეთ იქნევს და შვილს ეუბნება:

— ნუგეში არ მომეწყობა, შვილო, კაი აფხანაკი დამეკარგა, სულ წარბში მიმზერდა, აფერი ვაწყეინო, მეც აფერი მომიკლია, მარჩიელი არ დამიტიებია, წირვა და ლოცვა არ მომიკლია, აფერი გამივიდა და რა ვქნა, ცავ, რა ვქნა შვილო!.. სახლიანებ ყორიფელი შამუარე თავზე, მარა დიდება მის სახელს, მაინც წამართვა ღმერთმა.

გათხოვილი ქალიშვილი ჰირისუფლებში ჩაჯდებოდა და სახლში წასვლამდე ისიც ჰირისუფალივით სტიროდა... მთელი შემადგენლობა როგორც შევიდნენ იმავე წესით უკან გამობრუნდებოდა და მეორე მოტირალით შეიყვანდნენ სიძეს, მესამეთ — დედამთილს, მამამთილს და ასე შემდეგ.

მოტირალი ყოველთვის თითო-თითო შეჰყავდათ, ჯგუფური ტირილი არ იცოდნენ. მოტირალ მამას, დედას ან სხვა მახლობელს შეყვებოდა მცირეწლოვანი, მოზარდი ახალგაზრდა, ჯერ ხამი, გამოუცდელი და ის ტიროდა ცრემლით, უხმოდ. ყველა მოტირალი რიგში ჩამდგარი გლოვის ნიშნით გულზელდაკრეფილი იდგა, ამასთან კაცები თავშიშველა.

მესტუმრე ფხიზლად ადევნებდა თვალს, ტირილს ვინც მოათავებდა ყველას მიიწვევდა „ზედაშეს გადასაშობათ“ და შენდობის სათქმელათ, ცდილობდა არვინ გამორჩენოდა... ზარით მოსულებს, ცხადია, ერთად მიიწვევდა... გათხოვილი ქალი, თუ სხვა დიდად ახლობელი ნათესავი მოტირალი გაინაზებოდა, „გაიპატიუებდა“, მაგრამ ხვეწნა-განმარტების შემდეგ იმასაც დააჯერებდნენ, რომ ეს საჭიროა — მიცვალებულის პატივისცემა მოითხოვს. სადილის მირთმევის შემდეგ გათხოვილი ქალი (სხვა ახლობელი ნათესავ-მოყვარე ქალიც) ისევ შებრუნდებოდა და ჭირისუფლებში ჩაჯდებოდა, კიდევ ტირილობდა... როცა წასვლის დრო მოაწევდა, მას ატყობინებდნენ, დროა წავიდეთო... იხვეწებოდა ცოტა კიდევ მამყოფეთ, ტირილით გაეძღეო... როცა კიდევ მოაგონებდნენ წასვლის დროს, მიუჩოქებდა კუბოს და მოთქვამდა: ნენავ, უნდა გადაგიხადო მაგიერი, რავაც შენ მიმატიე ისე მეც უნდა მიგატიო, მაპატიე, ნენა, თუ რამე გაწყეინე, შენ რომ გეკადრებოდა ისე პატივი ვერ გეცი, დამლოცე, დამლოცე, ჭუჭუავ, გეცოდებოდეს შენი ნაკვდავ-ნაწყვეტი ოჯახი, უკან აღარ მეიხედო, საცოდავი ბაბაიც არ წეიყვანო, არ წამართვა და თლა ცეცხლათ არ დამტიო... შენ იქინეი სხვაიც კი დაგბთება, ჩემი უდროვოდ გამოწყვეტილი ძამიეი იქინეა, იმან მილალატა და იმან წამართვა შენი თავი... მშვიდობით ნენა, მშვიდობით ნენა, ადრე მოგეწია შენგან დაობლებული შენი კესარიე.

ძალით „ააგლეჯენ“ კუბოს და გამოყავთ გარეთ... ეზოში გაიარ-გამოიარს და „მოუმოთქმებს“. თითოეულ საგანს, მიცვალებულის მოსაგონებლის შესაფერი სიტყვებით აღნიშნავს: ნენავ, ბატონო, ნენავ ვაი, მეოჯახე ქალო, აწი, შენ ამ სამზად სახლში ველარ დაგინახავ, დილაბნელზე რომ წამოხტებოდი,

დააკრიალებდი, მიაჭუჭკებდი და მერე ცეხლს დაანთებდი, უშენობით ფუტი გაცივდება, ნენავ! ქათამს ვინ დააპურებს, ტურას სისოს ვინ შეუძახებს, ტურამ და მგელმა შექამა შენი უბედური კესარიე... ბაღია ისე ქონდა შეღობილი ჩიტი ვერ ჩაფრინდებოდა შით, ყორიფელი სუნელი გქონდა შით, აწი ვინ მიხედავს, რამდენი რა ვიტურო, რამდენი რა უნდა ჩამოვთვალო, ყორიფელი შენი ხელშენარებია ჩემო ნენავ, სხვაი თვარ გეცოდებოდა, საცოდავი ბაბა რეიზა არ შეიცოდე, მარა ყორიფელი ჩემი ძამიეს ბრალია, მისმა სიყვარულმა ყორიფელი დაგავიწყა და მას მიაშურე, ნენავ...

მახლობელი ვინმე ტირილს, მოთქმას შეაწყვეტინებს: „კაი-აწი, გეყოფა, თავს ნუ გადააყოლებ, მას ვერ გააცოცხლებ და თავს ქე დეიგლახებ, მაგი არც მიცვალებულიზაა კაი და არც ცოცხლიზა“... ისიც წყნარდება, ხმით აღარ მოთქვამს, მაგრამ ქვეითინებს... მოაგონებენ, რომ თმა „დეიპწნას“, თმაგაშლილი სახლში შესვლა არ ვარგა, „საბძნილოა“... „თვალკურცხლიანიც“ არ უნდა ჩავიდეს ეზოში...

ზოგჯერ ავადმყოფ დედას გათხოვილი ქალიშვილი „თავს ედგა“, უვლიდა. დედა გარდაიცვალა — ქალიშვილი სახლში არ წასულა, დარჩა, ტირილის დღეს. სიძე დამშვენებული ზარით მოვიდა, „გათხოვილი ქალიშვილი ქირისუფლის ადგილს ტოვებს, გამორბის გარეთ — შეუერთდება ქმარეულიდან მოსულებს და იმავე წესით იტირებს, როგორც ზემოთ ავწერე — ვითომც და ახლა გაიგო. კიდევ შეიცხადებს და კიდევ იკივლებს... თავის „როლს“ უნაკლოდ გაითამაშებს.

ქალიშვილი თუ მშობლებისავე სოფელში იყო გათხოვილი, სიძე თავს იმით მოიწონებდა, რომ მოზარეს, უცხოს — მეო-

რე-მესამე სოფლიდან მოიპატიებდა, დამამშვენებლებსაც „უცხო“ სოფლიდან იახლებდა.

ტირილი, საზოგადოთ, გრძელდება „მაღალ ზამლობამდე“ (სამხრობამდე) უცდიან მოტირალთა მოსვლის „მოთავებას“ და როცა უკვე მეტს აღარ მოელიან, მაშინ შეუდგებიან მიცვალებულის სასაფლაოზე გასვენების თადარიგს. ზაფხულის დიდი დღე თუ იყო, შეიძლებოდა მოტირალისათვის მეორე ჯერის ვახშამიც მიერთშიათ, უმეტეს შემთხვევაში, ერთი ჯერი იცოდნენ... როცა გადაწყდებოდა, უკვე დრო არის გასვენების, მაშინ ყველა მოსამსახურე — სახევისთაოს წევრი მამაკაცები მიჩენილ საქმეზე ხელს იღებენ, ერთად შექუჩდებიან (კოლექტიურად) წინ უხუცესს წაიმძღვარებენ და მიცვალებულს ზარით იტირებენ. ამრიგად, სახევისთაოს წევრები სამჯერ ტირიან, სამძიმარი, ტირილის დღეს დილით, და ტირილის დღეს — უკანასკნელად. ამის შემდეგ იწყება მღვდლის მიერ წესის (ანდერძის) აგება, წესის აგება ხდებოდა სახლში ან ეზოში. სახლიდან მიცვალებულის გამოსვენებისას ქალები კიდევ მართავდნენ შეცხადებისებურ კვილ-ჩხვილს: ვაიმე, ვაიმე, უიმე, რომ მიხვალ, სად მიხვალ, რაფერ მიხვალ, ვის გვიტიებ შენ მაგიერს!.. ვაი! ვაი! ვაი!.. საეკლესიო შესამოსელით შემოსილი მღვდელი (ან მღვდლები), გაჩაღებული საცეცხლურით ხელში, დიაკონისა და მგალობლების დახმარებით იწყებდა „ღვთის მსახურებას“, ყველას, ჳირისუფლებსა და სხვა დამსწრე პირებს, ხელში უჭირავთ ანთებული წმინდა სანთელი... საღმრთო წერილის ლამაზი და დროს შესაფერი სიტყვები, — ამქვეყნიური ადათების გამომხატველი, სანთლის ლიცლიცი, საკმევლის სუნი და კვამლი, თმაგაშლილი ქალების მწუხარება და მღუპარება და მეტადრე წესის აგების საგალო-

ბელი „სულთათანა განუსვენე“... მეტისმეტად გულის ამაჩუყებელი სურათია, დამაღონებელი, სევდის ამშლელი, ადამიანის მომშლელი—მოიშლები, სასოწარკვეთილება გიბყრობს, „კაც ვითარცა ყვავილი ველის“ ეგრეცა აყვავდეს და ეგრეცა ჩაჭკნეს“... „ჰოი, რასა მტირით მე, გუშინ თქვენთან ვიყავი“... „ერთბაშათ წარსდგებიან წინაშე უფლისა მდიდარნი და გლახაკნი, ბრძენი და მეფენი“... გესმის მსგავსი სიტყვები და რწმუნდები, რომ დღეს ხარ, ხვალ აღარ იქნები — სიკვდილი ყველას ათანასწორებს. გალობის ჰანგიც ამ განწყობილებისაა და ამ სიტყვების შესაფერი, ის ყველაზე მოქმედებს და ასე წარმოიდგინეთ ჭირისუფალ ქალებსაც კი ამშვიდებს, აწყნარებს. „აცხონე უფალო, ღვთისმშობელო შეიწყალე“... წესის აგება თავდება მაღალი „მოხსენიებით“ მრავალყამიერისებური გალობით: „საუკუნოთ იყოს ხსენება მისი“.

მიცვალებული სახლიდან უნდა გამოასვენოს ახლობელმა ნათესაებმა, უმთავრესად მოგვარებმა. კუბო აუცილებლად წადმა, მარჯვნივ უნდა მოაბრუნონ და ფეხით წინ და თავით უკან გაასვენონ. წესის აგება თუ სახლში მოხდა, მაშინ მიცვალებულს ცოტა ხნით ტახტზე ან სკამებზე დაასვენებენ — ეზოდან გასვენებამდე კიდევ დაიტირებენ. ზოგი, ვისაც სასაფლაოზე გაყოლა არ შეუძლია ან ეკრძალება, აქვე გამოეთხოვება... მიცვალებულს დასვენებენ და კიდევ შეიქმნება ქალების მიერ შეცხადებისებური კივილ-ჩხავილი. გურულის თქმით, „ერთ საწყენს მეორეც უნდა მიემატოს“. მიცვალებულის ეზოდან გადასვენებამდე ეზოშივე უნდა მოეჭრათ ხე. რამდენადაც შეიძლებოდა „საწყენი ხე“, თუგინდ ეს ხე ვენახიანიც ყოფილიყო. ასე მიასვენებენ ჭიშკრამდე. ამის შემდეგ კი სასაფლაომდე მახლობელი ქალები კუბოს მოთქმით მისტირიან.

სამგლოვიარო პროცესიას წინ მიუძღოდნენ ანთებულნი კვ-
ლეპტრებით... იმას მოჰყვებოდა — „სულის საგძალი“ შაუ-
რიანი პური, საგანგებოდ აცხობდნენ („საკურთხის“ პურს-
უძახდნენ), ბოთლი ღვინო, აღდგომის დღეები თუ იყო, მა-
შინ ერთი პატარა პასჟა, 1 ან 3 წითელი კვერცხი და ბოთლი
ღვინო. ბავშვი თუ იყო ფოჩიან კამფეტებსაც წაუმატებდნენ.
ყოველივე ეს ეწყო ფრიალ თეფშზე და ედგა მიცვალებულს
კუბოს თავთან. სასაფლაოდან ყველა ეს მღვდლის საგზალი
გახლდათ, მას მიჰქონდა შინ, ამიტომ იყო მღვდლის ოჯახში
ყოველთვის სხვადასხვანაირი თეფშები და ბოთლები.

ჩირადნებსა და სულის საგზლის შემდეგ ადგილი ეჭირა
შემოსილ ხუცესს...

სასაფლაოს რამდენიმე ნაბიჯით რომ მიუახლოვდებოდნენ,
ეკლესიაზე სამგლოვიარო ზარს ჩამოჰკრავდნენ... მიცვალე-
ბულს ეკლესიის ირგვლივ სამჯერ შემოატარებდნენ და მერმე
დაასვენებდნენ სამარის პირას. სამარის დანახვაზე ქალები იწ-
ყებენ კივილ-ტირილ-მოთქმას. ამ სოფლის ქალები ახლად მი-
ცვალებულს ტოვებენ და მიაშურებენ თავიანთ მიცვალებულის
სასაფლაოს — ჯერ კიდევ გამოუგლოველს და თავიანთ მიც-
ვალებულს ტირიან, ახლად მიცვალებულის „სტუმრობას“ აც-
ნობენ, ეუბნებიან, რომ ჩვენს აქაურ ამბავს ის მოგიტანსო...
ბევრი მოტირალი, მეტადრე გარდაცვალებულის ახლობელი
ჭირისუფალი, მიცვალებულს ტირილს არ აკლებდა, მაგრამ
სხვის მიცვალებულზე მეტად. თავისას ტირის, ახლად გარდაც-
ვალებულს — ჯერ კიდევ დაუმარხავს — ბევრგან დავალებას
აძლევს. მაგალითად, ასე: „შენ იცი და შენმა ქალობამ ჩემო
კესარია, დაიავ, ჩემს საცოდავ ბაღანას თუ მიხედავ და საი-
ქიოს ჩემს მაგივრობას უზამ, კი გიცნობს მისი ჭირიმე, შენო

ძუძუ ნაჭამია, მოგეფართქალდება და შენც მეესიყვარულე, უთხარი, რომ ძალღის დასაჭმელი დედამისი ქე იარება ფეხზე, მარა დღეი და ღამე მტირალი არის, მარა სიკვდილს არ ეღირსა თქვა“...

„საზომისაებრ ჩემისა მადლისაგან ნიჭისა და ხელმწიფეზისა, ყოვლად წმინდისა და ცხოველისა სულისა მიერ მოცემულისა, მაცხოვრისა ჩვენისა იყო ქრისტეს მიერ საღმთოთა და სამღვდელოთა თვისთა მოწაფეთა და მოციქულთა, შეკვრისა და გახსნისა ცოდვითათვის კაცთა, რომელსა რქვა მათ მიიღეთ სული წმინდა, რომელთა მიუტევენთ ცოდვანი — მიუტევენ მათ და უკეთუ ვიეთნამე შეიპყრენით — შეპყრობილ იყვნენ, ხოლო რაოდენნი შეპყრათ და გახსნათ ქვეყანასა ზედა იყავნ შეკრულ და გახსნილ ცათა შინა. ხოლო მათ მაგივრად მათ მიერ ჩვენდა ერთი ერთ არს მიცემულისა მადლისა მიერ იყავ შენდობილ სულისა მიერ წმინდისა, საყვარელო შვილო (სახელი, მაგალითად, პეტრე), რაოდენი სცოდე წინაშე ღვთისა ვითარცა კაცმან ხორციელმან: სიტყვით, საქმით და გონებით, ნებსით და უნებლიეთ და ყოვლითავე სახითა უკეთუ წყევასა და შეჩვენებასა ღვდელმთავრისასა, გინამღვდლისასა შთავარდი, ანუ დედისა, ანუ მამისა, ანუ თავით თვისით კრულ იქმენ, გინა თუ ფიცსა გარდახველ, ანუ ეამთა ვითარებისაგან სხვათა ცოდვათა შინა შთავარდი ვითარცა კაცი და იგი ყოველივე სულიერსა მამასა შენსა აღუარე და მის მიერ მოცემული კანონი გულითა კეთილითა შეიწყნარე და აღასრულე ამათ ყოველთა კრულებათაგან ხსნილ იყავნ და განთავისუფლებული და შენდობილი, ყოვლად ძლიერისა ხელმწიფეზისა და მადლისაგან სამღთოსა და თაყვანის საცემლისა სულისა მიერ და რაოდენი დაგავიწყდა ვერ აღიარე ყო-

ველივე შეგინდევს მოწყალემან ღმერთმან თვისით კაცი მოყვარეობითა, მეოხებითა ყოვლად კურთხეულისა დედოფლისა ჩვენისა ღვთის მშობელისა და მარადის ქალწულისა მარიამ მისათანა და წმინდისა მოციქულისა სწორისა ნინოსითა და ყოველთა წმინდათა მისთათა—ამინ“.

ეს იყო ცალკე ფურცლად, ხუცური ასოებით დაბეჭდილი, მიცვალებულის „საიქიოს პასპორტი-საგზური“. ქაღალდის ამ ფარატინას წყალობით „ქრისტეს მოადგილე“ ხუცესს ნება ეძლეოდა მიცვალებულისათვის ყოველივე შეცოდებანი შეენდო—ეპატიებინა. ეს კი ჯდებოდა სულ რაღაც ერთი მანეთი (შენდობის წიგნის ფასი 1 მანეთი იყო). ამის წაკითხვის შემდეგ კუბოს თავს დასჭედდნენ და მიცვალებულს საერთო ტირილსა და ქვითინში საფლავში ჩაუშვებდნენ.

ყველას „სამადლოთ“ მიაჩნდა თითო პეშვი მიწა მიეყარა, რის შემდეგ ქალებს საფლავს ამორებდნენ და მამაკაცები სამარეს მიწით ავსებდნენ და ფეხებით მაგრათაც სტკეპნიდნენ. სამარის სიღრმე სავალდებულო იყო კუბოს სიგრძის. თმაგაშლილი ქალები იქვე, ეკლესიის გალავანშივე თმას „დაიპწნიდნენ“, ნამტირალეგ თვალებს ამოიწმენდდნენ და წყნარი ნაბიჯით უხმოთ სახლისაკენ გაეშურებოდნენ... გზაში „წატირება“ და ოჯახში ტირილით მისვლა არ შეიძლებოდა. სასაფლაოზე გამყოლთა ნაწილი თავიანთ სახლებში წავიდოდნენ, ნაწილი კი — სახევისთაოს წევრები, მოსამსახურეები და ოჯახის წევრები — მიცვალებულის სახლში ბრუნდებოდნენ, ეზოში ჩასვლისთანავე მათ „მაკავით“ (ღვინით) ხელს დააბანინებდნენ, ივანშმებდნენ და თავიანთ სახლებში წავიდოდნენ.

თმაგაშლილი ვინც ტიროდა, უმთავრესად კი ვინც ქირისუფლად იჯდა, „ნაჭირისუფლევი“ თმა შინ მისვლისთანავე

უნდა დაებანა, უნდა გაერეცხა აგრეთვე „ნაკურცხლი“ ცხვირ-სახოცი.

მიცვალებულის დამარხვამდე მეზობელი ქალი თავს არ დაიბანდა, თუ შუაზე გამქარვანე მდინარე არ ჩამოდიოდა.

მეზობელს არ შეეძლო აგრეთვე საკრავს ჩასჯდომოდა. სწამდა, რომ მიცვალებული იტყოდა: „მოისტი და მოიკერე“, „დაიბან-დაირეცხე და უკან მომეწიე“.

პირველი შვილის დამკარგავი დედა შვილს სამარის კარამდე ვერ მიაცილებდა, თუ გზაზე მდინარე ჩამოდიოდა, მიაცილებდა მდინარის პირამდე და უკან დაბრუნდებოდა. მიცვალებულის ოჯახში უნათლავი ბავშვი თუ იყო მიცვალებულის ეზოდან გადასვენებამდე უნდა მოენათლათ, სწამდათ, რომ ბავშვის უნათლობა მიცვალებულს „ცოდვით მოეკიდებოდა“.

ტირილიდან სხვის ოჯახში გამოვლაც „საბძნილო“ იყო.

ს უ ლ ი ს ა ხ ს ნ ა

გურულის რწმენით, მიცვალებულის სული, სანამ მას „სულს არ აუხსნიდნენ“, დაბმული იყო, არც სამოთხეს იყო და, არც ჭოჯოხეთს. საზოგადოდ, სულის ახსნა ხდებოდა მესამე დღეს, დღეებს შორის სულისათვის ყოველთვის ამჯობინებდნენ შაბათს, სამშაბათს, ხუთშაბათს და კვირას. დანიშნულ დღეს, მღვდელს წინა დღით უგზავნიდნენ საზედაშეღვინოს და სანთელ-საკმეველს. მღვდელიც მიცვალებულის სულის საოხ-შესანდობარს სწირავდა და წირვის შემდეგ მიდიოდა მიცვალებულის ოჯახში. სულის ახსნის მსხვერპლი— ზვარადი, უფრო ხშირად იყო ცხვარი, მაშასადამე, მღვდელს უნდა დახვედროდა მიცვალებულის სახელზე დამზადებული

„საკუთარი“ ცხვრის ხორციდან ხარჩო და მოსათალი ხორცი, წვნიანი ქათამი, შემწვარი ქათამი, ღომი, ხაჭაპური და მშრალი პური. ყველა ამას მღვდელი დააკურთხებდა — გადაიხდიდა მცირე პანაშვიდს, ლოცვაში მიცვალებულს მოიხსენიებდა და ღმერთს შესთხოვდა „რათა დაამკვიდროს სული მისი წიადსა შინა აბრამისასა — საცა მართალნი მისნი მკვიდრ არიან“... ლოცვისა და საკმევლის თითოეულის მიერ დაკვეთის შემდეგ მღვდელი მოჰრიდა ხორცის ნაჭერს, მარილზე დააწებდა და თითოეულ ჭირისუფალს პირში ჩაუდებდა... ზოგი „საბძნელი, კევატი“ ქალი გაჯიუტდებოდა, არ მიიღებდა, მას არწმუნებდნენ, რომ ამით ის მიცვალებულის სულს ამძიმებს და სანამ მის ხორციელს არ ჭამს, მიცვალებულის სული დაბმულია და ყოველდღე რომ მის საფლავზე ულუფას გადადებენ, სულის ახსნამდე ის მიცვალებულს არ არგია. ძალით ჩასჩრიან პირში, ისიც დაიწყებდა უმადოდ ღეჭვას, გული აერეოდა და პირიდან ლუქმას გადააგდებდა, მაგრამ ფორმალურად მაინც იყო „სული ახსნილი“... ზოგი კი მადიანად ჩალუქმავდა... ამ ცერემონიის შემდეგ სუფრა გაიშლებოდა და სადილს შეექცეოდნენ... ზოგიერთი ჭირისუფალი, უმთავრესად დედა ან ცოლი, სუფრაზე მაინც არ ჭამდა ხორციელს, ყველსა და კვერცხს სჭამდნენ, ზოგი კიდევ შეპატიჟების შემდეგ მიირთმევდა, ცხადია, სუფრაზე მიცვალებულის სულის შესანდობარს პირველად მიირთმევდნენ.

ზოგ მიცვალებულს, მეტადრე მოხუცს, სულის ახსნის საკურთხხს დასაფლავების დღეს გაუკეთებდნენ და სულს იმავე დღეს ვახშამზე აუხსნიდნენ — წირვა კი შეიძლებოდა „ნისიათ“ — რამდენიმე დღის შემდეგ ეწირა მღვდელს. საკურთხი და „არჩივი“ — მღვდელს შინ წასაღები კერძი (ცხვრის თავ-

ფეხ-ტყავი, ცხვრის კარგი ნაკრები, მოხარშული შემწვარი ქათამი და ხაჭაპური) — ავანსად ჰქონდა მიღებული. გარდა ამისა, მას აძლევდნენ ფულით საწირავს ათი შაურიდან ერთ მანეთამდე. მარხვაში სულის ახსნის წირვას გადაიხდიდნენ, მარხვის შესაფერ საკურთხსაც შეაძლევდნენ. ზოგი მიცვალებულს თუთუნით სავსე ქისას დაუკურთხებდა, მონადირეს — თოფს და იარაღის მოყვარულს — ხმალ-ხანჯალს.

არჩივი, საკურთხი და ალაპი

40 დღემდე სასაფლაოზე საკურთხის გატანა არ იცოდნენ, სამაგიეროდ, მიცვალებულის სახელზე ყოველდღე, ყოველ იჯრაზე, ესე იგი, ყოველ სადილ-ვახშამზე, „ოზანდარაში“ (კედელზე მიშენებული კარადა—წალოსებური) დგამდნენ მიცვალებულის არჩივს — ულუფას, ჯერს, ანუ მის იჯრას... მათხოვარს ან მგზავრს თუ შეხვდებოდნენ არჩივს სიამოვნებით მიართმევდნენ, და თუ არა, მაშინ სადილის არჩივს ვახშამზე დახარჯავდნენ, ვახშმისას — სადილზე. ამრიგად, კერძი მიცვალებულს მუდამ ედგა 40-მდე. მეორმოცე დღეს „გადაიხდიდნენ“, არჩივთან ერთად დგამდნენ ერთ ჰიქა წყალს ან ღვინოს, ბავშვის რძეს. მეორე ტირილს — ეგრეთ წოდებულ „გამოტირილს“ და ამის შემდეგ თავთავის დროზე არჩივს შესცვლიდა საკურთხი. სწამდათ, რომ მიცვალებულის სული საჭმელს ითხოვს, ამიტომ მიცვალებული უპატრონოდ თუ არ არის, მას საჭმელი არ უნდა მოაკლდეს. საკურთხი არჩივთან შედარებით უფრო მსუქანია. არჩივი ერთი სულის ულუფაა, საკურთხი — რამდენიმე სულის, თან საჭმლის მხრივ მრავალფეროვანია, რაც მიცვალებულს სიცოცხლეში უყვარდა, აქ

ივიწყებდნენ. მიცვალებულმაც საკურთხი მეორე საკურთხამდე უნდა გამოიზოგოს და თუ მიაკლდა მისივე მდგომარეობაში მყოფი მეზობლიდან „ისესხოს“... საკურთხის და არჩივის მიკლება დიდ ცოდვად მიაჩნდათ... ზოგ კირისუფალს ან კირისუფლის მეზობელს, სიზმარში მიცვალებული „გამოეცხადებოდა“ და უსაყვედურებდა: „შემშლით მკლავთო“.

საკურთხის დღედ შაბათი იყო მიჩნეული, მიცვალებულის კირისუფალიც ცდილობდა წლამდე ყოველ შაბათს, ხსნილში სახსნილო და მარხვაში სამარხვო, სასაფლაოზე გაეტანა საკურთხი. უკირისუფლო გადასულ მიცვალებულის სახელობაზე „თავის სულის სამადლოთ“ ზოგჯერ არა ნათესავი, არამედ მიცვალებულის ნაცნობი ამზადებდა საკურთხს. შორს (მეორე კუთხეში ან მაზრაში) გათხოვილი ქალიშვილი ან ახლო ნათესავი თავის საყვარელი მიცვალებულის სახელზე აკეთებდა საკურთხს ან თავის ოჯახში მიიწვევდა მღვდელს და დააკურთხებინებდა, ან თავის ეკლესიაზე გაიტანდა.

გარდა უბრალო შაბათისა, საკურთხის სასაფლაოზე დაკურთხება სავალდებულოდ მიაჩნდათ: ხორციელისა და ყველიერის შაბათს („დაუწყების“ შაბათს), დიდი მარხვის პირველ შაბათს — თედორობა დღეს, ბზობის წინა შაბათს — ლაზარობას, აღდგომას ლიტანიაზე, სულთა დღეს (სული წმინდის მოფენის დღეს) და შაბათს, 25 დეკემბერს. ამ დღის ნაკურთხები განსხვავებული უნდა ყოფილიყო. ყველა დროს საკურთხებიდან გამორჩეული უნდა ყოფილიყო აღდგომის საკურთხი. 48 დღის ნამარხულები ხალხი აღდგომას „გაიხსნილებდა“, და ეს გახსნილება ხდებოდა სასაფლაოზე, ამიტომ მიცვალებულის თავმომწონე კირისუფალი მიცვალებულს დაუკურთხებდა შემწვარ მთელ გოქს, ბატკანს, ქათამს, პასქას, რამდენიმე

ცალ წითელ კვერცხს (უსათუოდ, კენტ რიცხვს), დიდი დოქით ღვინოს. არაყის, კონიაკის და სხვა ამგვარი სპირტეულის დაკურთხება არ იცოდნენ და ეს, ალბათ, აიხსნება იმით, რომ საკურთხი როცა შემოიღეს არაყს მაშინ არ ხმარობდნენ, ზოგიერთ საფლავზე დადგამდნენ მოგრძო სუფრას და, როცა მღვდელი საკურთხს აკურთხებდა, ეკლესიაზე მყოფ მლოცველებს ყველას ეპატიჟებოდნენ გაეხსნილებინათ და მიცვალებულის შესანდობარი ღვინო დაეღიათ. აღდგომის ლიტანიაწირვა შუადამეზე იწყებოდა და მთელი სასაფლაოც წმინდა სანთლის სხივებით „გადაკაშკაშებული იყო“. არ დარჩებოდა არც ერთი საფლავი, არც ძველი და არც ახალი, გაუნათებელი და უსაკურთხო.

საკურთხის ნაწილი (ზოგჯერ უმეტესი) მიჰქონდა მღვდელს, მის დიაკონს და მნათეს. აღდგომისა და შობის საკურთხი მღვდელს იმდენი შეხვდებოდა, რომ ზოგჯერ ორი კაციც ძლივს წაიღებდა სახლში. მღვდლის ოჯახში ძლიერ ხშირი იყო საკურთხის ჯერი. ამიტომ ძლიერ ხშირად ხუცის შვილებს საკურთხით გაზრდილებს ეძახდნენ.

აღნიშნულ დღეებში საკურთხი სავალდებულო იყო წლამდე, აღდგომისა და შობის საკურთხი კი (პასქა და ღვეზელი) უვადო გახლდათ — პეპერასაც კი მოიგონებდნენ.

მიცვალებულის სულის საოხი და მისი ხსოვნის პატივისცემა იყო კიდევ ალაპის. გამართვა, ალაპის გადახდა. ალაპი ბერძნული სიტყვაა (სიყვარულის ინახი) — ჩვენებური ქელეხია, განსხვავება მათში ის არის, რომ აღმოსავლეთ საქართველოში ქელეხი გარდაცვალებულის დასაფლავების დღეს იცოდნენ, გურიაში კი ალაპი მიცვალებულის დასაფლავების რამდენიმე ხნის შემდეგაც შეიძლებოდა გადაეხადათ, ერთი.

წლის შემდეგაც. უწინდელი აღაპის მიზანი იყო გლახაკთა, მათხოვართა, ხეიბართა და მშვიერ-მწყურვალთა გაძღობა და მათთვის მოწყალეების მიცემაც კი.

ღროთა ვითარებაში აღაპმაც სახე იცვალა და აღაპზე გაძღრებსაც კი პატიუებდნენ, აღაპის გადახდა უმთავრესად იცოდნენ მოხუცი ქალისა და კაცისათვის, უძეოდ და უმკვიდროდ „გადასულისათვის“. აღაპს საკმელ-სასმელის სიუხვე ამშვენებდა და აღაპზე მაგრად გაძღობა არავის არ ეთაკილებოდა, „ისე გაეძეხი, როგორც აღაპშიო“, იტყოდნენ შემთხვევის დროს. „შენს აღაპზე გაეძეხიო“, ცალი ყბით ეტყოდნენ მოხუცს. მოხუცი ამას არ იწყენდა და უპასუხებდა: „გაგიგონა ღმერთმაო“. აღაპი არც ღზინ-ღრეობა იყო და არც გლოვატირილი. ერთიც იყო და მეორეც — ნარევ-შეზავებული, ერთიმეორეზე გადაბმულ-ჩასკვნილი. აღაპზე საეკლესიო გალოჯნ-ძლისპირი ითქმოდა, „საუკუნოდ იყოს ხსენება მისი“ დააგუგუნებდნენ, გრძელ მრავალქამიერსაც დასკექდნენ და ხასანბეგურასაც შემოსძახებდნენ, თოფსაც ისროდნენ და ფიშტოც ბევრჯერ გავარდებოდა. ამრიგად, აღაპი გლოვის „გამოსათავი“ იყო. მიცვალებულს საუკუნოდ ხსენება, საიქიოს განსვენება, ცოცხალს მრავალქამიერ დღეგრძელობა და კარგად ყოფნა, ეს იყო აღაპის მრწამსი და გლოვის დასასრული, ღზინის დასაწყისი.

მომსწრე ვარ რამდენიმე, ასე ვთქვათ, ავანსი აღაპის. მაგალითისათვის დავასახელებ ერთს, 1904 წელს, ქ. ოზურგეთის მცხოვრებმა, ოზურგეთის საკრებულო ტაძრის მნათემ მაქსიმე ურუშაძემ თავისთავს და მის მეუღლეს გადაუხადა სანაქებო აღაპი, საკლავიც დაკლა, ხუცები, ბერები და მონოზნები ზიპატიუა, საწირავ-სალოცავი გასცა, მათხოვარ-გლახაკებს

სამოწყალო უბოძა — მეზობლები და ნათესავ-მოყვრები მოიწვია. თამადამ, როცა მისი და მისი მეუღლის შესანდობარად დღია „საუკუნოთ იყოს ხსენება მისი“ მგალობლებს თვით მიეშველა — „მიეზანა“. ფიშტო თვითონ გაისროლა და ამ 90 წლის მოხუცმა კიდევ იცეკვა და მისი „ბალიშის მოზიარეც“ აცეკვა. ალაპის დასასრულს შეზარხოშებულ სტუმრებს დიდი მადლობა გადაუხადა და ყველას უთხრა, რომ ის სიკვდილის შემდეგ ტირილსა და გლოვას არავის ავალეებს: „თქვენ იცოცხლეთ და იღლეგრძელეთ, მე კი ჩემი არჩივი ქვეყანა მოვკამეო“... წლისთავზე გარდაიცვალა.

გ ა მ ო ტ ი რ ი ლ ი

გარდაცვალებიდან მეორმოცე დღეს იცოდნენ მიცვალებულის „გამოტირილი“. გურულის რწმენით, 40 დღეს მიცვალებულის სული თავის ოჯახს არ სცილდება, საუკუნო ადგილას არ ბინავდება. 40 დღის შემდეგ კი გაფრინდება, ოჯახს მოშორდება, გამოტირილი რომ 40 დღის შემდეგ მოხდეს, მიცვალებულის სული ვერ გაიგებს, „დაიბნევა“, ამიტომ გამოტირილის 2—3 დღით დასწრება შეიძლებოდა, მაგრამ გადაცილება კი — არა. გამოტირილი, ასე ვთქვათ, პატარა შემოკლებული ტირილი იყო. დანიშნულ დღეს მოიწვევდნენ ახლობელ ნათესავ-მოყვრებს და ახლო მეზობლებს. მღვდელს წინასწარ ატყობინებდნენ, რომ მან იმ დღეს მიცვალებულის სულის მოსახსენებელი სწიროს. მოწვეული პირები დილიდანვე იყრიან თავს ოჯახში. წირვის გამოსვლის დროს ყველანი სამგლოვიარო ტანისამოსით და „მოწყენილი სახით“ მიდიან სასაფლაოზე, თან მიაქვთ მიცვალებულის ტანისამოსი — ნიშანი,

შავალითად, კაცისათვის ჩოხა-ახალუხი, ქალისათვის კაბა. ეკლესიას რომ მიუახლოვდებიან, იწყებენ ტირილსა და მოთქმას... ტანისამოსის წამლები მოტირალთა პროცესიას წინ გაუსწრებს და წინდაწინვე მოსუფთავებულ საფლავს გადააფენს ნიშანს. ყველანი მოვლენ ამ ნიშანთან, ზოგი მიუჩოქებს, ზოგიც ჩაჯდება და ხმამაღლა ტირიან, გოდებენ და მოთქვამენ, ნიშანზე ხელს უსობენ, ესიყვარულებიან. კაცები ადრე მოათავებენ ტირილს, ქალები კი ნახევარ საათს (თუ მეტს არა) ტირიან, ისე როგორც ნამდვილი ტირილის დღეს. მიცვალებულის ცხოვრებიდან იგონებენ სხვადასხვა ეპიზოდს, აძლევენ მიცვალებულს 40 დღის ანგარიშს, უამბობენ, თუ რა მოხდა მისი სიკვდილის შემდეგ, ვინ როგორ იტირა, ვინ რა პატივი სცა და სხვა.

შეიძლება რაიმე საპატიო მიზეზით ნამდვილ ტირილს ვერ ღაესწრო, სულ ახლო ნათესავი — და, ქალიშვილი, დედა — ასეთები ძველ ვალსაც იხდიან, „ორმაგად“ ტირიან, შეიძლება საფლავთან მისვლის ხანს კიდევ იკივლოს, შეცხადების ინსცენირება გააკეთოს, ლოყების დაკაწვრა და თმის დაგლეჯაც მოინდომოს....

გამოტირილი გათავდება, მღვდელი საფლავზე მცირე პანაშვიდს გადაიხდის და ყველა სახლისაკენ ამავე წესრიგით წავა, როგორც ტირილის დღეს გვაქვს აღწერილი... სახლში ყველას მიერთმევა დროს შესაფერი სადილი, ტირილზე ცოტა უკეთესი და ამ სადილზე ღვინოც მეტი დაილევა და პურობაც მეტი ხანგრძლივი იქნება, ვიდრე ნამდვილ ტირილში. თუ მიცვალებული „დრომოჭმული“ იყო, შეიძლება ყველასათვის თუ არა, უმეტესობისათვის გლოვაც გამოტირილით გათავდეს (ზოგი შავს 40 დღემდე ატარებს).

საზოგადოთ, 40 დღემდე მიცვალებულის გლოვა ყველა მეზობელმა იცოდა, მით უმეტეს სახევისთაომ. გლოვის მიზეზით არ შეიძლებოდა მომხდარიყო ქორწილი, ნათვლა, დღეობა და სხვა ამგვარი, რაც გამომწვევი იყო ლხინისა და სიმღერის. წარმოიდგინეთ, ნადიც რომ ყოლოდა მგლოვიარე მეზობლის მორიდებით ყანურ სიმღერასაც არ იტყოდნენ. თუ დაემთხვეოდა ასეთი შემთხვევა, მაგალითად, გათხოვ-მოყვანა, რომლის გადადება აღარ შეიძლებოდა, მაშინ შემთხვევა „როყოით“ სადად ჩაიარდა — არ იმღერებდნენ. ზოგჯერ მიცვალებულის ჭირისუფალს მოციქულს მიუგზავნიდნენ, ბოდის მოიხდიდნენ და სიმღერის ნებართვას მოითხოვდნენ. ასეთი შემთხვევაც ვიცი, მიცვალებულის მეზობელს მეზობლის მიცვალებამდე ქორწილი ჰქონდა დანიშნული, მიცვალებული დაიმარხა, ქორწილის გადადება არ ხერხდებოდა. მიცვალებულის ჭირისუფალი თვით მიდის და აძლევს წინადადებას ქორწილი არ მოშალოს, კიდევ ილხინონ და კიდევ იმღერონ — ეს მას არ ეწყინება. ერთი სიტყვით, ერთიმეორის პატივისცემა დიდი ჰქონდათ — ჭირი და ლხინი საერთო სჯამე იყო. სხვა შემთხვევის მოწამეც ვარ. კაცს ქორწილი აქვს, მგლოვიარე მეზობელს ჯერ 40 არ გადაუხდია, ქორწილში მსახურობს... მისი მორიდებით სიმღერას არ ამბობენ. მეფე-დედოფლის საღვთაგვარად დაილია და ეს მგლოვიარე კაცი, შავით მოსილი მრავალყამიერს იწყებს, ამით ის ლხინის ნებან იძლევა და სხვები მადლიერები, სიმღერაში ჩაებმებიან და განაგრძობენ; თვითონ კი მეტს არ მღერის. გამოტირილის შემდეგ მღვდელს აწირვინებენ „ოჯახის სამშვიდობოს“ — ეს გვიკმარე აწი „მშვიდობა ჩამოგვარეო“. რასაკვირველია, ეს წირვა კარგი სადილის გარეშე არ იქნებოდა.

ზოგჯერ სხვადასხვა მიზეზის გამო არ მოხერხდებოდა ბუნებრივი ტირილი, ტირილი კი აუცილებელი იყო და სხვა დროს უნდა გადაეხადათ, თუგინდ რამდენიმე თვის შემდეგ ტირილის გადადების მიზეზი სხვადასხვა გარემოება შეიძლება. მაგალითად, გარდაცვალების მიზეზი იყო ყუავილბატონები, ან წითელბატონები, ან სხვა რამ გადამდები სახადი. იმავე ოჯახში სხვაც არის ავად, ამის მიზეზით ტირილი უნდა გადაედვათ — ვიდრე ოჯახი ასე თუ ისე ზომიერ კალაპოტში არ ჩადგებოდა. მეორე მიზეზი შეიძლება ყოფილიყო მიცვალება უცხო მხარეში, შორს, საიდანაც მიცვალებულის ოჯახში მოსვენება ჭირისუფალს არ შეეძლო. მესამე მიზეზი იყო — დიდი თოვლი, გზების შეკვრა. ასეთ შემთხვევაში მიცვალებულს მიწას მიაბარებდნენ უტირლად, ტირილს კი მოხერხებულ დროს გამართავდნენ.

ტირილი რომ სანახაობა იყო, თვით ეს გამოთქმაც ადასტურებს — ტირილის გამართვა. კაი ტირილი გაუმართა მის მიცვალებულსო, კაი გამართული ტირილი იყო, იტყოდნენ. და რომ ტირილი თეატრალური იყო, ამას ქვემოთ აწერილი, ეგრეთ წოდებული ნიშნით ტირილი, სავსებით ადასტურებს. რამდენიმე ხნით გადადებული ტირილის საბადლოდ იბარებს ნიშნით ტირილს, ნამდვილი ტირილის დროს მოტირალი ტიროდა ნამდვილ ცხედარს. ნიშნით ტირილის დროს კი მიცვალებულს ტიროდა წარმოდგენით, მიცვალებულის ნიშნით.

როგორც ნამდვილი ტირილის შემთხვევის დროს სწორედ იმგვარად მოიწვევდნენ ნათესავ-მოყვრებს და მეზობლებს,

ისევე იყო ხარჯი და ყოველგვარი ცერემონია, მიცვალებულის მაგიერ კი იყო მისი ნიშანი, მისი მსგავსება და ხატება, ისლით ან ღომის ჩალით გააკეთებდნენ ფიტულს, ჩააცმევდნენ „ნამკვდრევ“ ტანისამოსს, ფეხსაცმელსაც კი, ცდილობდნენ მიმსგავსებული პირის სახეც გაეკეთებინათ, ფიტულს „დაასვენებდნენ“ ლოგინზე — ორივე ხელში წმინდა სანთელს ჩაუდებდნენ და ამ მიცვალებულის მსგავსებას — ნიშანს — ისეთავე ხმით, მოთქმით, შეცხადებით და ზარითაც კი ტიროდნენ, როგორც ახლად გარდაცვალებულს და „ჯერ კიდევ არ გაცივებულს“. ეს სავსებით ჰგავდა გადაღებულ წარმოდგენას. ზოგისათვის კი არა, მაგრამ უმეტესობისათვის მიცვალებული გამოგლოვილია, სულ არ არის „ტირილის გუნებაზე“, ხოლო რაკი „ბილეთი შექენილი“ აქვს ვალს იხდის და ხელოვნურად, არტისტულად ტირის... ცხადია, ნიშნით ტირილი, რაც უნდა ეცადონ ისე „გულმოწვით“ და ცრემლით არ შეიძლება „გაითამაშონ“, როგორც ეს შეიძლებოდა ნამდვილ ტირილში.

მაგონდება ასეთი კურიოზი. სოფელ სურებში ყვავილით მკვდარს ნიშნით ტირიან... ტირილი მოთავდა. „მიცვალებული“ სახლში მარტო ასვენია. განის კარიდან სახლში ხბო შევიდა და ნიშნიდან ჩალა გამოძურწა და ჭამა დაუწყო... პატარა ვაჟმა შენიშნა და უფროს ძმას დაუძახა: „ბიჭო, გადენე ფხოი, თვარა ქე შეჭამა ბაბაიე“. ბოლო წლებში ფოტოგრაფიული სურათების გავრცელების შემდეგ, მიცვალებული თუკი იყო გადაღებული, ნიშნად ფოტოგრაფიულ სურათს ხმარობდნენ.

ტირილის „გადაღება“ და ტირილის ეპიზოდები

მიცვალებულის ტირილი სავალდებულოდ რომ იყო მიღებული, ამას ამტკიცებს, სხვათა შორის, ასეთი თქმა, დაწ-

ყველა: შენი უტირალი ღმერთმა ნუ მომკლას, შენი ტირილის ღირსი არ ვყოფილიყო, ისე მომკვდარიყავ, არავის ვეტირო. ამრიგად, მიცვალებული ეტირებოდა თუ არ ეტირებოდა, ჭირისუფალსაც უნდა ეტირა და მეზობელ-ნათესავ-მოყვარესაც. ზოგჯერ ეს ტირილი რომ ფორმალური იყო, ჩვევა-ტრადიციის ასრულება შემდეგნაირად მტკიცდება. აღვნიშნავ მომხდარ ფაქტს.

ახალი წლის წინა დღეს — „ცხემლის ჭრას“—გურულისათვის ბედობა დღეს, სოფელ ჭანჭათში გარდაიცვალა მოხუცი დედაქალი. გურული გაფაციცებით ემზადება ძველი წელი მშვიდობით გაისტუმროს და ახალს მხიარულად შეეგებოს, ტირილს ვერ „დაიბედებს“, „იბრძნის“. მისი რწმენით, კალანდას თუ ატირდა, მთელ წელიწადს ტირილში გაატარებს, ამას თავის ოჯახს ვერ „დაუბედებს“. არც თვითონ წაიმწარებს ამ დღეს და არც მეზობლებს „წაამწარებს“... ლხინი, სიამოვნება, დღესასწაულის მხიარულად გათენება „მოსასწრები“ა, არ გადაიდება, მიცვალებული კი ხომ „არ გაიქცევა“, მის ტირილს მერეც მოასწრებს, ოჯახის დიდი ხნის ნაამაგარ „დედაბრის“ სიკვდილს მთელი ოჯახი „მდურეთ“ შეხვდა, ხმა არ ამოუღიათ. სამზადი სახლის უკნიდან მოდგმულ „საფურეში“ დაასვენეს. და „შემცხადიების“ ნაცულად საკალანდო ღორს კისერში დანა „გაულიტინეს“ და ააქყვირეს. კარგი დღეები ჩვეულებრივად, სიმღერით, ქეიფით და თოფის სროლით გაითენეს და ნათლისღების მეორე დღეს, ესე იგი, ერთი კვირის შემდეგ, შეიცხადეს, როგორც ახლად მიცვალებული. მიცვალებულის ასე ხანგრძლივ შენახვას ხელს უწყობდა თოვლი და მკაცრი სიცივე. მეორე მაგალითი. ქ. ოზურგეთის მცხოვრებ ი. ნ. ხავთასს ქალიშვილის ქორწილი აქვს დანიშნული. სეფა გაკეთე-

ბულია. მოსაწვევი ბარათები დარიგებულია. საკლავი დაკლულია... ქორწილის წინა დღით უეცრად გარდაიცვალა ოჯახის ერთგული წევრი, ხავთასის ახლობელი ნათესავი — სირინოზი (ურუშაძის ქვრივი). კრინტი არავის დაუძრავს... მიცვალებული გადამალეს. ნაყიდი თოვლით შეინახეს, ქორწილი გადაიხადეს, ცხადია, ქორწილს რომ შეშვენის ისეთი ლხინით. მეორე დღეს სეფა აიღეს, ყველაფერი „მიაკუჭკეს“ და სირინოზი „შეიმცხადეს“ და დიდის „გულმოწვით“ იტირეს, გარდაცვალებიდან მე-5 დღეს.

სხვადასხვაგვარი ტირილი

ტირილის პირველი მუხლი, შესავალი — დაწყება არის „შეცხადება“. ეს ქალების საქმე არის (ვიცი ისეთი შემთხვევაც, რომ ღრმად მოხუცებული გარდაიცვალა, ოჯახში მარტო ერთი ქალი იყო, მეზობელი კაცები კი ბევრი, ამ ერთ ქალს შეცხადებაში ქალური ხმის მიმსგავსებით აყვნიენ კაცები — მიეშველნენ, მაგრამ ეგ იშვიათი ამბავია). როგორც თვით სიტყვა გამოხატავს შეცხადებით, ხმამაღალი უტექსტო, უსიტყვო კივილ-ჩხივილით, მეზობლებს უცხადებს, ატყობინებს ავადმყოფის სიკვდილს. ტირილის ეს ერთი „სანახაობა“ მეტისმეტად მკაცრია, გულის მომკვლელია, გამგონეს შიში და ძრწოლა ეუფლება.

მეორე არის ხმით ტირილი, მოტირალი უზაროთ ან ზარზე ხმის შეწყობით, ლამაზი და შესაფერი სიტყვებით, გამოხატავს მიცვალებულის ცხოვრებაში დამოკიდებულებას მასთან და აღნიშნავს, ზოგჯერ დიდი გადაჭარბებითაც (მიცვალებულის კარგ მხარეებს, კარგ თვისებას).

მესამე არის მოთქმით ტირილი, ტირილის ეს სახე დინჯია, დარბაისლური, „სულდათქმული“, იგივე ხმით ტირილის მაგვარია, მოთქმას ზარი არ სჭირია, მოთქმაც ქალების საქმე არის. მოთქმის თითოეული სიტყვა წინასწარ მოფიქრებულია, აწონილ-დაწონილი, დინჯად და გრძლად გამოთქმული... ზოგჯერ რომელიმე მოტირალი ჯერ ხმით იტირებს და რამდენიმე ხნის შემდეგ „მუუთქვამს“. მოთქმა იცოდნენ სულ ახლო ნათესავეებმა: ქვრივმა, ქალიშვილმა, ნათლიედამ, დამ და სხვებმა. მოთქმა საჯაროთაც იცოდნენ და ერთპიროვნულიც, საჯაროს უსმენდნენ, პირველი გაჩერდებოდა — სხვა დაიწყებდა... მოთქმით ჭირისუფალი თავის მიცვალებულის მთელ ბიოგრაფიას მოყვებოდა, აცნობებდა მსმენელებს ავადმყოფობას, როგორ უვლიდნენ, რა ზომები მიიღეს გადასარჩენად, რას ჭამდა, რას ნატრულობდა, რა დაიბარა და სხვა. დასაფლავების შემდეგ ოჯახში და სასაფლაოზე მიცვალებულის ტირილის დროს, სხვა მიცვალებულს, მეზობელს ან ნათესავ-მოყვარეს თავის მიცვალებულსაც „წაატირებდა“, მოთქმით ახლად მიცვალებული დავალებას აძლევდა გადაეცა ესა თუ ის ამბავი ოჯახში მომხდარი განსაკუთრებით გამოტირალამდე ქვრივი ქალი ან შვილგარდაცვლილი დედა ხშირად მოთქვამდა... უბრალო რამ მიზეზი კმაროდა რომ მოთქმით ნახევარ საათს ეტირა. მოვიყვანოთ მაგალითი.

გვრივი ქალის მოთქვა

(ჩავა ეზოში, თვალს გადაავლებს ქმრის ნამოქმედარს — „ხელშენარებს“ — აუჩუყდება გული და მოთქვამს).

მე უ...ცე...ცხლოთ დაამწვარი, უმდულროთ მოხარჩული, მე უწყლოთ დამრჩვალნი, მე უდანოთ დაკლული, მე ყველა ქალში გამოწყვეტილი, რაფერ ვარ და რაფერ მიდგია სული შენს დამკარგავს, რაფერ მზიდავს მიწაა?! კაი რომ იყავი, დაყურსულე ოქრო რომ იყავი, ახლა მივხთი მე უბედური... ჯერ კიდევ შენით უდგია სული შენს უდროოთ მოძულეებულ ცოლ-შვილს... ყორიფელი კაი ნახელავი იცოდნი... შენი გალობილი ღობე წაიქცევა, შენსავით მაგრათ ვინ დაასობს სარს, ან შენსავით ღობეს თავს ვინ მუუხვოს. საზამთრო შეშას კვირკობისთვის გაგანია სიცხეში მეიხაზირებდი, ღოჯეში მიაყუდებდი, ხეზე მიაყუდებდი, დაასაყადელებდი... ნალიას გააძიძინებდი, ხულას დაბეკნიდი, ჭურებს გააფსებდი, ხარი კაი გყავდა და ურემი... „სედლოიანი“ ცხენით გიორგობას რომ შინ წამიყვანდი, ხატს მომალეცვიებდი, აწი რა მეშველება, აწი რა მეხიდება... რაფერ გიყვარდი და რაფერ მომიძულე, ძაღლის საკმელათ რაფერ გამიმეტე შენ სულგანათლებულო, მარა ჩემი ცოდვა საიქიოს რავა მოგასვენებს, მე კი დამჩაგრე, ჩამაბნელე და ჩამალუსკუმე, მარა წასაწყმედათ მაინც ვერ გაგიმეტებ გულო... (სიტყვა გულოს — ყოველ წინადადების ბოლოს ამბობს).

ამას გარდა იცოდნენ კიდევ უსიტყვო და უხმო ტირილი „კურცხლიანი ტირილი“ და გულამომჯდარი ზღუქუნით ტირილი... ზოგი (უმთავრესად კაცები) ტიროდნენ მარტო ცრემლით, უტექსტოთ, ზოგს კი გული ისე ეწოდა, რომ ცრემლსაც აფრქვევდა და ქვითინსაც იწყებდა... ეს იყო მოზარდი თაობის საქმე — ტირილის „დებიუტანტები“... მაგრამ, ცხადია, კურცხლით ტირილი იყო წრფელი, უხინჯო...

„ჩამხრული“ ტირილი

კაცს „ყველაზე გამორჩეული და სასიკეთო“ მეგობარი, ამხანაგი (თუგინდ ეს ყანის მოზიარეც ყოფილიყო) კაცი გინდ ქალი რომ მოუყვდებოდა, მას ტიროდა „ჩამხრული“, მარჯვენა მკლავს სავსებით გაიტეცვლებდა, პერანგის, ახალუხის და ჩოხის სახელო „ეკონწიალებოდა“, ტიტველ მარჯვენას გულზე დაიკრეფდა და ისე ტიროდა. ეს იყო იმისი ნიშანი, რომ მიცვალებული მისთვის იყო „მისი სალოცავი მარჯვენა ხელი“ — ყველაფრით დამხმარე და თანამგრძნობი და მისმა სიკვდილმა მას „მარჯვენა გაუკავა — შეახმო“. ტირილსაც ამისი შესაფერი სიტყვებით იწყებდა:

„ჩემო მარჯვენა ხელის გამხმობო, შენ იყავი ჩემი მარჯვენა ხელი, მე შენით მედგა სული, აწი მარცხენა ხელით მე რაღა უნდა გავაკეთო“. ეს იყო ძველად, მაგრამ ამისი მახსოვარი ახლაც არიან. ტირილის ეს სანახაობა, მართლაც, რომ ტრაგიკული იყო... მე ვფიქრობ, რომ სიტყვა „ჩამხრული“ დამახინჯებულია და უნდა იყოს ცალმხრული—ცალი მხარით. „ჩამფხურით გიტირისო“ წყევლით ახლაც იტყვიან.

დაძირავებული მოტირალი, ანუ ვეჰილოვით ტირილი

ძველ დროს, ჩემს მახსოვრობამდე, სკოლნიათ მოტირალის დაქირავება — დაქირავებული ქალები, ქალის მაგივრად იტირებდნენ, კაცი—კაცის მაგიერ. ზოგისათვის ეს პროფესიად გადაიქცა, მცირეოდენ გასამრჯელოს იღებდა და სხვის მიცვალებულს, სხვის მაგიერ ტიროდა და, ალბათ, აქედან წარმოიშვა გურიაში დიდად გავრცელებული ანდაზისებური თქმა

„ყველას სატირალს ცენტერადის მოლოზანი ტიროდაო“... დროთა მსვლელობაში, სასამართლოების შემოღების გავლენით დაქირავებული მოტირალი შესცვალა ვეჟილობით მოტირალმა, რაც არსებითად ერთი და იგივეა. ვეჟილობით მოტირალი „რწმუნებას — ვეჟილობას“ რამდენიმე პირისაგან ღებულონდა. შეყვებოდა ზარს, იტირებდა ერთის მაგიერ, გამობრუნდებოდა და რამდენიმე ხნის შემდეგ — მეორის ნაცვლად. თუ როგორ ეტირა, რა სიტყვები ეთქვა, ამის დავალებას აძლევდა მარწმუნებელი, ვეჟილიც დახელოვნებული იყო და თუ ახალს არ მიუმატებდა, შეალამაზებდა, არას მოაკლებდა... ზოგჯერ მის მაგივრად მოტირალს თვით უსმენდა და თუ ტირილი მოეწონებოდა ორშაურს, აბაზს ზედმეტს აჩუქებდა. ვეჟილის გამოგზავნა იცოდა აგრეთვე ავადმყოფმაც, ან ისეთმა, რომელსაც არ ესერხებოდა ტირილში მისვლა... ვეჟილი ტირილის დაწყების წინ აცხადებდა, თუ ვის მაგივრად ტირის, ვინ არის მისი „მარწმუნებელი“. მიცვალებულის ტირილის შემდეგ ჭირისუფალიც მარწმუნებლის სახელით მიუსამძიმრებდა, თავის კლიენტს ბოდიშს მოუხდიდა, აღნიშნავდა, თუ რა მიზეზით თითონ არ ტირის მისი მარწმუნებელი. ვეჟილის „ნავეჟილევი“ (გასამრჯელო) აბაზიდან ათშაურამდე იყო. წინათ იცოდნენ აგრეთვე ჩამკიეველებელი ერთი ან ორი-სამი ქალის დაქირავება და ტირილში თან წაიყვანდნენ. ჩამკიეველებელი მიყავდა ახლობელ ნათესავ-მოყვარეს, კივილ-ჩხივილი იგივე შეცხადების მსგავსია, უსიტყვო. კივილით მოტირალი ხატავს თავის უსაზღვრო მწუხარებას. ეს არის, ასე ვთქვათ, პირველხარისხოვანი გლოვის გამომხატველი. ეს რომ ასეა, ამას ამტკიცებს ის ფაქტიც, რომ ყველა მიცვალებულს არ „იმცხადებენ“, არ კივიან.

ბრძანებით ტირილის ერთი მაგალითი ჩვენ უკვე აღვნიშნეთ, როცა მოვიხსენიეთ გენერალ ტოლმაჩოვის სატრაპულო ამბავი... გენერალი პოლიციური რეჟიმის უფროს-მბრძანებელი იყო. პოლიციაზე უფრო ადრე გლახობას გენერალ-მბრძანებელი ჰყავდა ფეოდალები, ბატონები. ბატონყმობის დროს ქალბატონები, თავად-აზნაურის ცოლები თავიანთს მიცვალებულის ტირილსა და გლოვას ბრძანებით ავალეზდნენ ყმა გოგო-ქალებს, თვითონ ნერვებს არ იშლიდნენ. ყმებს კიდევ უხაროდათ ბატონისა თუ ქალბატონის სიკვდილი, მაგრამ ისინი ვალდებული იყვნენ კიდევ ეკივლათ, კიდევ ეტირათ, შავიც კი ჩაეცვათ და თუ ყმა ქალები თმას დაიგლეჯდნენ და ლოყას დაიკაწრავდნენ — სისხლს იღებდნენ, მით მეტი ერთგულის სახელს დაიმსახურებდნენ. ჩემთვის მომსწრე ყოფილ ყმებს უამბიათ შემდეგი: თავად თავდგირიძის ქალბატონს ძმის გარდაცვალება შეატყობინეს... „ქენინამ“ ყმა გოგოს უბრძანა: „გადი, გოგოვ, გარეთ, შე სასიკტილეე და ხმამაღლა გადაიკივლე — გუგუნავასაკენ — (თავადებია) და ყველას შეატყობინე ჩემი საყვარელი ძამიკოს სიკვდილი — აბა, ჩქარა, სიკვდილი იქნას შენი და არგადარჩენა“. გოგოს მეტი რა გზა ჰქონდა, დაემორჩილა და ბრძანება შეასრულა — გავიდა ეზოში, შედგა მომადლოთ, შეტრიალ-შემოტრიალდა და დაიკივლა: „გოგოვ, გუგუნავასაკენ გადაიკივლე, გოგოვ, შალიკაშვილისაკენ გადაიკივლე, ვაი და უი ჩემს ქალბატონს საყვარელი ძმაი მოუტა-თქო (ხმის დაწევით), მარა არც მეტირება და არც მეკივლება, უი, უი“, თითები ლოყაზე ჩამოისვა.

ტირილი იცოდნენ არამც თუ ნათესავ-მოყვრის, მეზობლის და ნაცნობის, არამედ სრულიად უცნობი გადამთიელი, „გამრები-მეშაირეც“ კი ტიროდა მათთვის სრულიად უცნობ მიცვალებულს... მგზავრიც, გურული სამეგრელოში, ან პირუქუ—მეგრელი გურიაში, ტირილს ჯერ შორიახლოდან „წააყურებდა“, გაიგებდა მიცვალებულის სახელს და შემდეგ ისიც „დიდი გულმოწვით“ იტირებდა, დაისვენებდა — სადილს სჭამდა და კმაყოფილი თავის გზას გაუდგებოდა... ცხადია, ეს ეხერხებოდა კაცებს და არა ქალებს.

მართალია, ეს მარტო გურიას არ ეხება, მაგრამ სასურველია, მომავალი თაობისათვის აღინიშნოს, რომ ხელმწიფის სიკვდილის გლოვა ყველა მისი ქვეშევრდომისათვის სავალდებულო იყო. გლოვის შავი ნიშანი კი უნდა ეტარებინათ მოხელეებს, არამც თუ დანიშნულ მოხელეს, არამედ ხალხის მიერ არჩეული მამასახლისიც ატარებდა გლოვის ნიშანს.

მიცვალებულის „საიქიოს წასაღვრი“ კატივისცემა

საიქიოს ცხოვრება, სამოთხე და ჯოჯოხეთი, ცხონება და წაწყმედა გურულებს სწამდათ. მართალი, კარგის მოქმედი, მონათლული, ყოველ წელიწადს აღსარებათქმული, დაზიარებული, მარხვის შემნახავი, მისი აზრით, ცხონებულია, ამის წინააღმდეგ მოქმედი კი წაწყდება. ცხონებულის განსასვენებელი ადგილი სამოთხეა, „საცა არის ნეტარება და ცხოვრება დაუსრულებელი“, წაწყმედილები ჯოჯოხეთში ჩაცვივდებიან, კუპრის ცეცხლში იხრაკებიან, საუკუნო სატანჯველში ჩავარდებიან, ცხონებულის — სამოთხის მეთვალყურენი და მასიამოვნებლები არიან ანგელოზები, ჯოჯოხეთის შვილები კი —

სატანისა და ბელზებელის ხელში მყოფნი — ეს სხვადასხვა „ხარისხის“ ეშმაკები არიან მათი მუდმივი ჯალათები. ყველა ეს კი იმისი დამამტკიცებელია, რომ გურულს სწამდა სულის უკვდავება და ეს სული კი „საიქიოს“ ან ცხონებული უნდა ყოფილიყო, ან წაწყმედილი. ცხონება და „საუკუნო სასუფეველში განსვენება“ კი შეეძლო ლოცვასა და ღვთის ვედრებას, ყველა იმ საღმრთო წესების შესრულებას, რაც დადგენილი იყო „უმაღლეს სამღვდელთა“ კრების მიერ. ყველა იმისი ჩამოთვლა თუ რა წესები ჰქონდათ ხუცებს ქრისტიანის მიერ სავალდებულო ასასრულებელი — შორს წაგვიყვანს.

სულის უკვდავებას, გურულს რომ სწამდა, ამტკიცებს სხვადასხვანაირად გამოთქმული ფიცი: ღედის სულს გეფიცები, სული ნუ წამიწყდება, ისე ღმერთი ჩემს სულს გაანათლებს და სხვა. კიდევ საუბარში ჩასართავი თქმა: ნეტარება მის სულს, ღმერთმა გაცხონოს და საუკუნო ნეტარება მოგცეს, სამოთხის ღირსი ქალია, ჩემი მადლი გაცხონებს, ჩემი ცოდვა წაგწყმედს, ჯოჯონეთის ღირსია და სხვა. გურულის სული „ეშმაკის არჩივი“ რომ არ გამხდარიყო და „სამოთხის ნეტარება არ დაკარგოდა“, ამისათვის ის სიცოცხლეში მეცადინეობდა, „სულის დასამძიმებელი საქმე“ არ ჩაედინა. მეტადრე, ხანში მესულები ცდილობდნენ სამოთხის ღირსი გამხდარიყვნენ: „აწი რალაი დროის ჩემი ხორცზე ფიქრია, მე აწი სულის საქმეზე უნდა ვიფიქრო“ — იტყოდა მოხუცი... ხორცის სიამოვნება, ფუფუნება, განცხრომა, არშეიყობა, ცრუობა, ქურდობა, კაცის კვლა, მარხვის გატეხვა, დათრობა და სხვა ამგვარი „სამაცდურო“ საქმე იყო. კარგი ყოფაქცევის ქალისა თუ კაცის შესახებ იტყოდნენ: „ცოცხლითაი სამოთხის ღირსიაო“, ისევე იტყოდნენ ბოროტის, თავკერძა

ადამიანის შესახებაც: „ცოცხლითაი ჩავარდება ჯოჯოხეთშიო“.

ჯოჯოხეთის „კერძათ“ მიაჩნდათ „პურხაგი“, ძუნწი, უპურ-მარილო, სტუმრის მოძულე. ამის დასამტკიცებლად მოვიყვან მეტად გაგრძელებულ „საიქიოს“ ამბავს: ჯოჯოხეთში ჩავარდნილ დიასახლისს ხელში უჭირავს გახურებული კეცი და ხელდამწვარი ცდილობს კეცი კაბის კალთით დაფაროს, დამალოს, არ გამოაჩინოს... მისებრი „წაწყმედილები“ ეკითხებიან, თუ რა ცოდვის გამო არის დასჯილი... დედაკაცი აღიარებს, რომ მან მშიერი მგზავრი — სტუმარი არ მიიღო, „ცეცხლიდან გახურებული კეცი გადმოდგა და დამალა — არაფერი მაქვს გამოსაცხობიო, და ამიტომ კიდევ დეისაჯა“.

ასევე წაწყმედილად მიაჩნდათ „მირონის მოღალატე ნათლულთან“ მოარშიყე, ამის შესახებ, როგორც „ფაქტი“ ასე მიაბებს: ერთი კაცი იმედაშვილი — ნათლიდედასთან „შემცდარა“, როცა გარდაცვლილა, მისი საფლავი უჩვეულოდ გაზრდილა — ეს იმის ნიშანი იყო, რომ ცოდვილი მიწამ არ მიიღო, მოუთხრიათ და აღმოჩენილა, რომ მიცვალებული მეტისმეტად „გარუმბებულიყო“, გაბერილიყო, „მიწის სამძიმრათ“ გამხდარიყო... მიცვალებულისათვის თავი მოუჭრიათ, „გარჯლაში შემოუდვიათ“ (ფეხსა და ფეხსშუა) და ისე დაუმარხავთ.

სტუმართმოყვარეობის დასამტკიცებლად მოვიყვან გურულების ერთ დამახასიათებელ ცრუმორწმუნეობას: სტუმრის წასვლისთანავე სახლი არ უნდა „დაეხვეტათ“, თორემ სხვა სტუმარი ადრე არ მოვიდოდა, სახლს თუ მოგვიანებით მილაგებდა, მისი რწმენით, ახალი სტუმარიც ადრე მოვიდოდა.

ვინც სიცოცხლეში ვერ მოასწრებდა „ცოდვების“ მონანიებას, მისი სულისათვის უნდა ეზრუნა მის ჭირისუფლებს,

ქოს გამარჯვებას ულოცავენო აღფრთოვანებული შესძახებ-
დნენ: ჰო, ჰო, ჰო, ჰო!

იმის დასამტკიცებლად, რომ ეს სიმღერა ბატონების საწი-
ნააღმდეგო იყო, უნდა დავსძინო შემდეგი:

ნადი მუშაობის გათავების შემდეგ სავახშმოდ მიდიოდა
მასპინძლისას. წასვლის წინ ბევრი ჭალანგრით თოხს ზოპი-
რავდა. მასპინძლისას მივიდოდნენ ნადურის სიმღერით და
თოხებით, მიადგებოდნენ ეზოში რომელიმე ხეს, რომელიც
თოხებით უნდა მოეთხარათ. რაც უფრო დიდ ხეს (ზოგჯერ
ვენახიანსაც) არ დაინდობდნენ, წააქცევდნენ, მით უფრო სა-
სახელო იქნებოდა. ეს იყო ბატონების მოთხრის დამახასიათე-
ბელი მოსაგონარი.

ნადური გურულს იმდენად უყვარდა, რომ კალანდას
(ახალ წელს), გურულისათვის ყველაზე მეტად „ბედობა“
დღეს, წირვის გამოსვლისას და „შელულის“ შემდეგ, ეკლესიის
გალავანში აუცილებლად უნდა ემღერათ ყანური და ამით
შრომა და მტერზე გამარჯვება „დაეხედებიათ“.

ყანის დამუშავებას გურული უნადოდაც მოერეოდა, მაგ-
რამ თუ მგლოვიარე არ იყო, იგი ყანას სიმღერით — ნადუ-
რით ამუშავებდა, თუგინდ ნადის გამასპინძლება ნაშრომზე
მეტი დაჭდომოდა. ნადი და ნადური სიმღერა იყო, მუშურ-
გლეხური გართობა, მეჯლისი, გლეხური ბანკეტი — ვაზა-
ფხულის მიგებებასთან დაკავშირებული შრომისა და გამარ-
ჯვების ჰიმნით. ნადი ამავე დროს ქეიფისა და გართობის მი-
ზეზთაგანი ხდებოდა. თუ ნადი გყავდა და მეზობელს არ და-
პატიეხდდი, იწყენდა, კაცად არ ჩამაგდოო, იტყოდა. ზოგს კი
დაპატიეხაც არ სჭიროდა. ყანური შემოესმოდა თუ არა, სუ-
ლი წასძლევადა, თავის ყანას მიატოვებდა და ნადს შეუერთდე-

ბოდა. ნადზე ისევე სიამოვნებით მიდიოდნენ როგორც ქორწილში, რასაც გურული დროსტარებად თვლიდა, ამას ადასტურებს ის, რომ ნადში მყოფს მეორე დღეს კითხავდნენ: გუშინ ნადში რომ იყავი, როგორი დრო გაატარეო.

კარგი ყანური ოთხ კილომეტრზედაც ისმოდა. ყველა მშრომელს უხაროდა, მოხუცები მომღერლებს ლოცავდნენ, მოთაღრეები, მახლობლად მომუშავეებიც მაღლიერნი იყვნენ, რადგან იმ დღეს მეტის ხალისით მუშაობდნენ.

თუ ისე დაემთხვეოდა, რომ მოთაღრეებს ერთსა და იმავე დღეს ჰყავდა ნადი, მაშინ რიგრიგობით მღეროდნენ — ერთი რომ ისვენებდა, მეორე მღეროდა. სიმღერას ერთიმეორეზე გადააბამდნენ არა მარტო მოთაღრეები, არამედ ერთი სოფელი მეორეზე.

ხშირად ნადში საჭიროზე მეტი ხალხი მოიყრიდა თავს. მაშინ მასპინძლის ყანას რომ მორჩებოდნენ, მოთაღრის ყანაში სიმღერით გადავიდოდნენ, ოღონდ კი ემუშავნათ, და ყანა ვის ეკუთვნოდა, ამას არ დაგიღვევდნენ.

ნადი ნათესაობა-მოყვრობისა და მეგობრობის გამოცდაც იყო. მეგობარი თავის მეგობარს ან ნათესავ-მოყვარეს დაავალებდა ამა და ამ დღეს ნადი მომგვარეო. ნადის რიცხვი ისაზღვრებოდა მომღერლების მიხედვით, ერთ პირ ნადში 8—12 კაცი შედიოდა, ორ პირში — 16—24, ხშირად უფრო მეტიც. ეს მასპინძელმა თავიდანვე იცოდა და რომ არ შერცხვენილიყო, გამასპინძლების თადარიგს წინასწარ ვარაუდობდა.

სოფელ ნაგომრის ახლოს, მდინარე სუფსის პირად, კარგა მოზრდილი სახნავ-სათესი ჭალაა, რომელსაც დღესაც „კორძაიას სვრელს“ ეძახიან. ჭალის სიგრძე 5—6 კილომეტრი, ხოლო სიგანე 1—2 კილომეტრია.

სხვადასხვანაირი წირვა-ლოცვით; საკურთხებით, მოწყალების გაცემით, მონასტრებისა და ეკლესიების „შეწევნით“ და მიცვალებულის სახელით, სხვადასხვაგვარი კეთილი საქმით. მიცვალებულის სული უნდა დაეხსნა წაწყმედისაგან, ხუცების დაწესებული კანონით მიცვალებულს ცოდვა სიკვდილის შემდეგაც შეენდობა, ეპატიება, თუ მას ჭირისუფალი არ მოაქლებს წირვა-ლოცვას და სხვა საღმრთო საქმეს. ცხადია, ამით ხუცები ჭიბეს ისქელებდნენ, რადგან ყოველივე სულის საცხონებელი ქრთამი ან თვითონ უნდა აეღოთ, ან მათი შუამავლობით გაცემულიყო.

გურულის რწმენით, ბავშვი (5—6 წლამდე) უნათლავათ თუ არ მოკვდებოდა — ანგელოზი იყო და სამოთხეშიაც ანგელოზებში შეერეოდა — ცხონებულზე ცხონებულად ითვლებოდა, მისი ტირილიც ცოდვა იყო, ღმერთი იწყენდა ანგელოზად არ გაიმეტესო. ასე „პირდაპირ“ ცხონებულად მიაჩნდათ ტყუპი შვილების დედა, მას საიქიოს ანგელოზი შემოეყრებოდა და პირდაპირ სამოთხეში შეიყვანდა, ღვთისმშობელს წარუდგენდა და მოახსენებდა: „აჰა, მოვიდა ორთა მშობელი და ორთა გამზრდელი“. გარდაცვალებულის პირველსავე ღამეს მიცვალებულს თავს დაუდგამდნენ ანთებულ წმინდა სანთელს და თავზე უნდა დასდგომოდა დიაკონი (მომავალი ხუცესი), რომელსაც ცალ ხელში ეჭირა წმინდა სანთელი, მეორეში — საღვთო წიგნი დავითნი (ფსალმუნი), კითხულობდა, ხმამაღლა „ღაღადურით“. იწერდა პირჯვარს და „აკეთებდა მეტანიას“ (დაჩოქება ორივე მუხლებზე, ადგომა და კვლავ დაჩოქება რამდენიმეჯერ — 3-ჯერ, 9-ჯერ და ზოგჯერ 40-ჯერაც). დავითნში არის ერთი ფსალმუნი „მოწყალე ღმერთო“. ამის წაკითხვის შემდეგ 40-ჯერ უნდა ეთქვა უფა-

ლო შეგვიწყალე“ და 40-ჯერ გაეკლაებინა მეტანია. ეს უნდა დაეცვა ზუსტად, მოკლება ან მიმატება ცოდვად ითვლებოდა (უფალო შეგვიწყალე — ბერძნულად, „კირიელეისონ“ — თავშესაქცევი: ცმული, გიშერი, ქარვა ან სხვა რამ, რომელსაც ჩვენ ვეძახით კრიალოსანს — კირიელეისონიდან არის წარმომდგარი, მორწმუნეს რომ ზედმეტი ან ნაკლები „უფალო შეგვიწყალე“ არ ეთქვა, ამიტომ ხელში ეჭირა 40-მარცვლიანი ცმული, თითოეულ კირიელეისონზე თითო მარცვალს ჩააგდებდა, ცმული გათავდებოდა და ზუსტად 40-ჯერ იყო წარმოთქმული ლოცვა). მარჯვე მკითხველი ზამთრის ღამეში სამჯერ „დაათავებდა“ დავითნს. გასამრჯელო ეძლეოდა იმის მიხედვით, თუ რამდენჯერ „დაუთავებდა“. ამ გასამრჯელოს ერქვა „სადავითნო“...

გასამრჯელოზე მორიგება, ვაჭრობა იცოდნენ, თითოჯერ წაკითხვა ღირდა აბაზიდან ათ შაურამდე. ზოგი დიაკონი სინდისიერად კითხულობდა, არაფერს გამოტოვებდა „ღალადურით“ (ღალადება — თხოვნა, ვედრება) კითხულობდა, სასოებით, ზოგი კი გაიმეორებდა „წააჩიგორგალებდა“, ჩქარობდა, იპარავდა, ერთი გვერდის ნაცვლად ორს გადაშლიდა... ასეთი დიაკონის შესახებ იტყოდნენ: „ღმერთს ატყუილებს და მიცვალებულსაც კი ბერავსო“.

კარგი ჭირისუფალი დავითნს ყოველღამე დასაფლავებამდე აკითხებდა, ეს ერთგვარი ანგარიშიც იყო, რადგან მიცვალებულს თუ თავზე „მედავითნე“ არ ადგა, მაშინ საჭირო იყო მიცვალებულთან ყოფილიყვნენ „ღამის მათიერები“ — დარაჯები, მიცვალებული კატას არ შეეჭამა (სწამდათ თვალს ამოსჭამსო) ან სანთლის გამო ცეცხლი არ გაჩენილიყო.

დასაფლავების დღეს სადავითნოს გაცემა ავანსადაც

იკოდნენ, აძლევდნენ: დიაკონებს, ბერებს, მონოზნებს და ზოგჯერ მღვდლის პატარა ვაჟსაც კი (ორი სადავითნო, ორი „კარჭალი“ აბაზი 8 წლის ასაკში მიღებული ახლაც „ჩემს სულზეა“ ვალად).

მიცვალებულს განბანის შემდეგ მღვდელი ნაკურთხი ზეთით „შემურავდა“ სასაფლაოს — სამარეს აკურთხებდა, დასაფლავების დღეს მიცვალებულის სახელობაზე სწირავდა, ანდერძს (წესს) აუგებდა, სასაფლაომდე წინ გაუძღვებოდა, საფლავზე შენდობის წიგნს წაუკითხავდა, პეშვით მიწას მიყრდიდა — ყველა ეს ცერემონიალი იყო ქრისტიანი მიცვალებულის სულის საოხი.

ღმერთსა და მიცვალებულს შორის შუამავალი — ვეჭილი მღვდელი იყო, მღვდელს კი ყოველწლიურად თითოეული კომლი აძლევდა „დრამაფულის“ სახით ორ-ორ მანეთს, მაგრამ ის ამას არ სჯერდებოდა, თითოეული შემთხვევის დროს, თითო ღვთის მსახურებისათვის „უნდა მიეცათ განსაზღვრული თანხა, ზოგი მღვდელი განაკვეთს არ სჯერდებოდა და ნიხრს ზევითაც თხოულობდა და ეს „სულიერი მამები“ აშკარად ვაჭრობდნენ. ამრიგად, მიცვალებულის დამარხვის გასამრჯელოდ მღვდელს ყელა მისი „შრომისათვის“ უნდა მიეღობ — 10 მანეთამდე (ამაში არ შედიოდა შენდობის წიგნის მანეთი და სანთელ-საკმეველის). თითოეულ ღვთის მსახურებას ცალკეული ნიხრი ჰქონდა: წირვა — მანეთი, წესის აგება — 2 მანეთი, წინ გასაძლოლი — სამი მანეთი, „ნამოძღვარი“, ზიარების, პანაშვიდის, ზეთის ცხების... სულ — ღარიბიდან 6 მანეთი, მდიდრიდან — 10 მანეთი.. ზოგს არ შეეძლო მღვდლის გასტუმრება დასაფლავების დღეს, უფრო ხშირად მღვდლებს ნისია არ უყვარდათ, — თავისას დასაფლავებამდე

ითხოვდნენ), თუ ჭირისუფალს არ ჰქონდა, მაშინ მღვდელი მოითხოვდა თავდებს ან საწინდარს (სპილენძეულობა, თოფი, მიცვალებულის ტანისამოსი). მღვდლის სიხარბის აღსანიშნავად მაგონდება ერთი დამახასიათებელი ფაქტი: სოფელ ერკეთში გარდაიცვალა ღარიბი გლეხი. ადგილობრივი დეკანოზი სიმონ მგალობლიშვილი მიცვალებულს შემოსილი წინ გაუძღვა. სასაფლაოს მახლობლად, დეკანოზმა პროცესია შეაჩერა და თავისი „ახი“ მოითხოვა. შეიქნა ვაჭრობა, ვერ შეთანხმდნენ. დეკანოზმა საეკლესიო შესამოსელი გაიხადა და სახლისაკენ (იქვე ახლოს ცხოვრობდა) წასვლა დააპირა — მაშინ მიცვალებულის მოკეთე მეზობელმა მიმართა ხალხს: მღვდელი სასაფლაოზე არ მიგვეყვება, მიცვალებულს ეკლესიაზე არ გვამარხვინებს — შინ, შინ ჩავუსვენოთ... მოკიდეს კუბოს ხელი და მღვდლის ოჯახისაკენ იბრუნეს პირი, ჭრისტეს მრადგილე შემფოთდა, დაგწყევლოთ მთავარ ანგელოზმა, იწყო წყევლა, საჩქაროდ ჩაიცვა საეკლესიო სამოსი და დამარცხებული, გამარჯვებულებს წინ გაუძღვა.

სულიერი მამა „თავის სამწყსოს მცხოვარს“ მწყემსის თვალით კი არა, ნამდვილი ყასბის თვალით უცქეროდა, თუ მოკვდებოდა მისთვის ხეირი იყო... თვით მომისმენია შემდეგი:

მთავარი დიაკონი ეუბნება მღვდელს:

— „მრევლი მყავს და სული მიდგიაო, ნიგოითის ხუცესმა უნდა თქვას, „გუშხამ“ ვიყავით იქინეი და ორი კუბო ერთათ მოასვენეს, — აქანაი კაცი არ ფიქრობს მოგვედღე და ხუცესს პატივი ვცეთო...“

სოფელ ბოხვაურელ გლეხს ხუცესმა ასე უთხრა: შვილო, გიორგი, შენი ოჯახიდან მე დიდ ზარალში ვარ, ოცდა ათი წე-

ლიწადია შენსას არავინ მომკვდარა ახლა იფიქრა მამაშენმა სიკვდილი და 25 მანეთი მაინც უნდა მომცე...

სოფელ სამების ხუცესი ეუბნება თავისიანს:

— მარინე, შეცხადების ხმა ისმის, სადილს ნუ ამზადებ, სამ დღეს იქინეი გავძლები და, ღმერთო შენით, მერმე კიდე მიემატება ვინმე.

ხალხის რწმენით — მღვდელს თუ მრევლში სიკვდილი დაუგვიანდებოდა, ოლარს გარეცხდა და ეს გამოიწვევდა ხშირ სიკვდილიანობას.

რაც მეტი და რამდენადაც მეტად წარჩინებული სამღვდელოება უწირავდა და წესის აგებაში მონაწილეობას მიიღებდა, მიცვალებულის სულის საოხად უკეთესი იყო. ორმოცი წირვის ზედიზედ „გადახდაც“ ძლიერ ბევრმა იცოდა, როგორც მდიდარმა, ისე ღარიბმა. „საორმოცო“ გადახდას თუ გამოტირილამდე, ესე იგი, გარდაცვალების დღიდან 40 დღემდე მოასწრებდნენ, ამჯობინებდნენ, თუ ვერ მოასწრებდნენ, შემდეგ დღეებშიაც არაფერი უშავდა... ერთ დღეს ხუცესს მხოლოდ ერთი წირვა შეეძლო, ამიტომ ვისაც „საორმოცოს“ გადახდა 40 დღემდე სურდა, სხვადასხვა ხუცესს მოურიგდებოდა, ზოგს 20 აწირვინებდა და ზოგს — ათ-ათს, ზოგი კიდევ მონასტრის ბერებს დაუკვეთდა. საორმოცო წირვის გადამხდელი ხუცეებსა და ბერებს სახლში სადილს არ აძლევდნენ და რაკი „შრომა მათი ხარჯით“ იყო, ამიტომ, ჩვეულებრივ „ნაწირავზე“ მეტი უნდა მიეცათ, მაგრამ რაკი „ბითუმი წირვის მუშტარი“ ჰყავდათ ხუცეებიც ვითომ და არ აიღებდნენ მორწმუნე მიცვალებულის პატივისცემას. საერთოდ, „საორმოცოს“ გადახდის ფასი 40 მანეთიდან იწყებოდა, მაგრამ ზოგიერთი მღვდელი 20 მანეთზედაც ჩამოვიდო-

და. თუ ნაღდი ფული არ იყო, ნატურითაც შეიძლებოდა. „გულკეთილი ხუცები“ ყაბულობდნენ სიმინდს, ღომს, ღვინოს, ყანაში მოხმარებას, ზოგი კიდევ ამაზე მეტ გულკეთილობას იჩენდა და აგირავებდა 2—3 ქცევა მიწა-მამულს (საყანეს და ვენახით მოშენებულს) და ამ მამულით ხუცესი სარგებლობდა მანამდე, სანამ მიცვალებულის პატრონი ნაღდად არ გამოიხდებოდა. ზოგი რამდენიმე ხუთეულ წელიწადს (ობლების დავაუკაცებამდე) ვერ გამოიხსნიდა, ზოგი სულაც „შეატრებდა“... ზოგი მემამულე, ან აზნაური „საორმოცოს“ გადახდაში 1—2 ქცევა მიწას მიუზომავდა ხუცესს და მის საკუთრებად დაუმტკიცებდა. მინახავს ასეთი „ნასყიდობითი ბარათი“ — „მე ქვემოთე ამაზე ხელისმომწერმა თავადმა მიხეილ ნაკაშიძემ, ჩუპვ წელსა მარტის კლ დღესა, ჩემი მეუღლის კნენინა რუსუდანის სულის გასანათლებლად საორმოცო წირვის გადახდის საფასურად მოგეცი, შენ საღვთოს წმინდა გიორგის ეკლესიის შტატის მღვდელს, გაბრიელ ღლონტს ჩემი კუთვნილი მიწა, სახელდობრ, დონაურში ორი ქცევა — საზღვრებთა შორის (საზღვრები ოთხი მხრივ)“. და მერმე ჩვეულებრივი პირობის წესია და ხელის მოწერა თავადისა და ორი მოწმის.

მიწის საკუთრებით გაცემა (ან რამდენიმე წლის სარგებლობის უფლებით) იცოდნენ დიაკონებისათვის „სადავითნო-შიაც“.

მიცვალებულს, მეტადრე ხანში შესულს, გადაუხდიდნენ წლის წირვას, კარგი სადილით და ამის შემდეგ ოჯახი ნორმალურ კალაპოტში ჩადგებოდა — შეიძლებოდა სიმღერა-გართობა. გლოვობდა და შეცვლით შავს ატარებდა ქვრივად დარჩენილი.

ქვრივი ქალი (ზოგი) უღრმესი გლოვის ნიშნად ორმოცამ-

დე ფეხშიშველი დადიოდა და უღეიბოდ წვებოდა — „ხმელ
ჭილობზე“. ქვრივად დარჩენილი მამაკაციც 40-მდე ხმელ ჭი-
ლობზე წვებოდა, უბალიშოდ. იცვამდა „გადაუფხეკელ“ ქა-
ლამანს შავი ძროხის ტყავისას. მიცვალებულის ხსოვნის პა-
ტივსაცემად და საოხათაც ითვლებოდა აგრეთვე მიცვალე-
ბულის ხსოვნის დიდად პატივმცემელი მიცვალებულს დაადგამ-
და გასუფთავება. მიცვალებულს დაასაფლავებდნენ თუ არა,
„სამარის მოშორებისთანავე სასტუმლათ“ თავთან მიწაში გა-
ამაგრებდნენ რიყის მომადლო ქვას, რამდენიმე დღის ან თვის
შემდეგ უბრალო ქვას შეცვლიდა მოხელის მიერ თლილი ქვის
ჯვარი. უფრო შეძლებული, თუნდ ღარიბი, მაგრამ მიცვალე-
ბულის ხსოვნის დიდად პატივცემული მიცვალებულს დაადგამ-
და თლილი ქვის სქელსა და ფართო (კუბოსოდენა) ფიცარს,
რომელსაც გურიაში ეძახდნენ ბერძნულ სახელს—„ეკვტერს“.
ჩემი სიყრმის ასაკში გურიაში ქვის ოსტატები ბერძნები იყვ-
ნენ და ძველი ეკვტერებიც ბევრიც მათი ნახელავია. ეკვტერ-
ზე იცოდნენ შესაფერი წარწერა: „აქ განისვენებს ესა და ესა.
დაიბადა ჩუპ... წელსა, გარდაიცვალა... წამკითხველო, შენდობა
ბრძანეთ“. აქა-იქ წარწერა ლექსითაც იცოდნენ. ეკვტერზე
ჩამოჯდომა ან წამოწოლა მიცვალებულის უპატივცემულობა
იყო და ჭირისუფალიც იწყენდა. მიცვალებულის პატივსაცე-
მად, საფლავთან ეკლესიის გალავანში იცოდნენ „წმინდა“ ხის
ღარგვა: ბზის, ცაცხვის, ტირიფის ან ნაძვის, ყველა ამ ხეებს
სიმბოლური მნიშვნელობა ჰქონდა: ბზის ტოტებს ბზობა ღღეს
და ტირიფის ტოტებს „სულთა ღღეს“, ანუ „სულის წმინდის
მოფენის“ ღღეს, საფლავს დააყრიდნენ. ნაძვის „ძინთი“ (ფი-
სი) სურნელოვანი იყო, საკმეველს ჰგავდა და გაჭირვების
დროს მის მაგივრად ხმარობდნენ... ცაცხვის ყვავილით ფუტ-

კარი წმინდა სანთელს ამზადებდა, წირვის შემდეგ მის ჩეროს ქვეშ მლოცველები ისვენებდნენ. მთელს სასაფლაოზე სასოფლოდ იცოდნენ კონინდარის დათესვაც და, საერთოდ, მრევლი ცდილობდა სასაფლაო ლამაზიც ყოფილიყო და დაცულიც. ზოგი მოხუცი სიცოცხლეშივე იკეთებდა თავის ძეგლს — „ეკვტერს“ (წაუწერელს ტოვებდა გარდაცვალების თარიღს).

ერთმა მოხუცმა სოფელ ლიხაურის მცხოვრებმა გლეხმა (რამდენჯერმე მამასახლისად ნამყოფმა) ფარნაოზ ურუშაძემ გარდაცვალებამდე რამდენიმე წლით ადრე გაიკეთა თავისივე „ეკვტერი“, ტახტის მსგავსი, ზედვე შეთლილი თავმისადები სასთუმლით, და წააწერინა: „მშვიდობით მეზობლებო, ფარნაოზ ურუშაძე გავემგზავრე“. და ეს ძეგლი დადგა სოფლის თავშესაყარ ადგილას, ცენტრში, დიდი მუხის ქვეშ... დღესაც ამ ძეგლზე ხალხი ისვენებს და სოფელში დასაფლავებულ ფარნას ტკბილად იგონებს...

გურულებს საფლავისა და იქაური „ბინადრების“ საუკუნოდ განსვენებულის — დიდი შიში და რიდი ჰქონდათ, ღამით სასაფლაოს მახლობლად გავლაც კი ეშინოდათ, სასაფლაოზე „გადარება“ კი დიდ გმირობად ითვლებოდა... სასაფლაოსი არამც თუ ღამით, დღისითაც კი ეშინოდათ. მეტადრე მოზარდ თაობას უჭირდა სასაფლაოს ახლოს გავლა.

გამიგონია ერთი ამბავი, სასაფლაოს მახლობლად „გადაკაშკაშებულ“ ღამეში ქალების ღამის ნადი ყოფილა. ერთ ქალს დაუტრიაბახია, რომ მას არ ეშინია მკვდრების, ცოცხალი ვერაფერს მიბედავდა და მკვდარმა რა უნდა შემკადროსო, უთქვამს... თამამ ქალს „დანიძლავებიან“, მიუციათ ხელში „წვერწამახული“ დანიშნული ჯოხი და უთქვამთ, რომ მიცვა-

ლებულის სასთუმალთან თუ დაასობდა, სანაძლეოს მოიგებდა... ისიც წასულა... მეორე დღეს დანიშნულ საფლავეთან ქალი მკვდარი უნახავთ... სიჩქარით, თუ გაუფრთხილებლობით, წელში მოხრის დროს ჯოხი კაბის კალთაში ჩაურჭვია, წამომდგარა, წამოსვლა დაუპირებია, მაგრამ ღრმად ჩარჭობილ ჯოხს არ გაუშვია. მან წარმოიდგინა, რომ ცოდვილი მიცვალებული საფლავეში მითრევს და აღარ მიშვებსო და შიშით გული გასკდომია.

სხვა რამ წგრილმანის

სხვადასხვა დროსა და გარემოების მიხედვით მიცვალებულის დასაფლავების საერთოდ მიღებული წესი იცვლებოდა. „ვალმოხდილი მოხუცი“ გარდაიცვალა, მაინცდამაინც არავის ეტირება, „მისი არჩივი დროი მოკმული აქვს“. ასეთი მიცვალებულის ჭირისუფალი ჩვეულებრივ ტირილს, ზარით და წასაბურავით არ იხდის, ატყობინებს ახლო ნათესავებს და დილით მიასვენებენ და წირვის დადგომამდე შეასვენებენ ეკლესიაში, „წირვას მოასმენინებენ“, ნაწირვობევს დაასაფლავებენ, ოჯახში დაბრუნდებიან და საგანგებო სადილს შეექცევიან.

ასეთივე წირვის მოსმენით ასაფლავებდნენ მცირეწლოვანსაც, მიცვალებულის მიერ წირვის მოსმენა დიდ მადლად სწამდათ. მიცვალებულის ასეთი წესით დაკრძალვა ხდებოდა თუ სიკვდილი გამოწვეული იყო „ბატონებით“ ან სხვა გადამდები სენით, თუმცა იშვიათად, მაგრამ ზოგჯერ სიღარიბით და უპატრონობით (მიცვალებულს თუ არავინ ჰყავდა პატრონი).

აღდგომა-ახალკვირას, შობის მიცვალებული ცხონებულად ითვლებოდა, ჯოჯოხეთი დანგრეული იყო და სამოთხის კარი

ღია (სულის ამნისტია იყო), მიცვალებულის ჩვეულებრივი ტირილიც შეიძლებოდა. ზარის ნაცვლად გალობდნენ ქრისტე აღსდგას. დიდად მორწმუნე მოტირალიც კი ნაკლებ ტიროდა და მიცვალებულს ქრისტე აღდგაო, ეტყოდა. ჰირისუფალსაც სამძიმრის წინ ქრისტეს აღდგომას ულოცავდნენ და ეტყოდნენ: განათლებული იყო და განათლებულ დროს მოისვენა — სამოთხის ნეტარების ღირსი გახდა. ჰირისუფალიც ჰეშმარითად აღსდგას — უპასუხებდა. ამ „ბრწყინვალე“ დღეებში მღვდელთმსახურებაც, განსხვავებული, წირვაც და ანდერძის აგებაც შემოკლებული და სადღესასწაულო ხალისიანი იყო. ჰირისუფლების „შავი გაჭრაც“ განსხვავებული იყო, იკერავდნენ სულ ახლობელი ნათესავეები და მასთან ჩვეულებრივზე უფრო „მხიარულს“ და არა ძაძა-ფლასს. ტირილიც ხორცეულით უნდა გადაეხადათ, რადგან სამარხოს ჰამა მიცვალებულის სულს დაამძიმებდა. ერთი სიტყვით, ყოველივე ღონისძიებით ცდილობდნენ მიცვალებულის სახელობაზე თუ ვინმე რამეს გააკეთებდა „გულნაკლული არ დარჩენილიყო“, თუ ვინმე ხუცესს, ტანის გამბანელს, სამარის გამჭრელს ან სხვა ვინმეს „გულს დააკლდებოდა“, ესე იგი, თუ კმაყოფილი არ დარჩებოდა, ეს იყო მიცვალებულის „აგდება“ და მას არც „წირვა-ლოცვა წაადგებოდა“, მედუქნე-ვაჭარსაც კი არ ეშინოდა ნისიის გაცემისა, რადგან დარწმუნებული იყო მიცვალებულის სახელზე წაღებულს გაუნაღდებდნენ და არავინ „გააჯანჯლებდა“.

მიცვალებულის სახელს პურის ჰამაში თუ ახსენებდნენ, მისი ხსოვნის საპატივცემულოდ ღვინო პურზე უნდა გადართოთ ან ღვინოპი პური ჩაეწოთ და ეთქვათ: ღმერთმა აცხონოს, ღმერთმა მისი სული გაანათლოს.

მიცვალებულის სახელის ხსენების დროს თუ ვინმეს ცხვირს დააცემინებდა — „დააქსიტებდა“, — ზურგზე ხელს ურტყამდნენ და ეტყოდნენ: „ღმერთმა მისი დანაკლისი დღეი შეგმატოს“, ან „შენ მის მოსვლამდე არაფერი გეტკინოს“.

მიცვალებულის ავადმყოფობის ამბავის მოყოლის დროს, თავის შესაფერ ადგილას ჩაუერთავდნენ: „შენ ჯვარი გწერია, ხისკენ პირი მიქნია, ქარს და ბორიას ველაპარაკები...“ შენსა და მას შვა ათასი ხიდი და გზაია“...

თუ ვინმეს მიცვალებულის ამბავს კითხავდი, გიპასუხებდა „იმან შენი პირი და ფათერაკი წაიღო“..

მიცვალებულის პირდაპირ სახელის თქმას, მეტადრე ქალები, გაუბოდნენ, მიკიბულ-მოკიბულათ იტყოდნენ: ჩემი ცეცხლის მომკიდებელი, ჩემი გენიაში ჩამგდები, ღმერთმა ნუ მოკითხოს, ჩემი დამწველ-დამდაგველი, ჩემი ქალობაში გამომწყვეტელი, ჩემი დამბნელებელი, მე უბედურ კურცხალ შეუშრობელი, მე მუდამ მტირალი, მე მუდამ შავგაუძრობელი, მე გაუხარებელი და სხვა. საზოგადოდ, გურული ლექსიკონი ძლიერ მდიდარია, მეტადრე ქალების, ერთსა და იგივე აზრის გამომხატველს „ასნაირად იტყვის“...

ქვრივი კაცი მეორე ცოლს წლამდე არ შეირთავდა, თუ პატარა შვილები ჰყავდა აღსაზრდელი, მეორე ცოლის მოყვანის ძლიერ ეშინოდა, დედინაცვალი შვილებს დამიჩაგრავსო. თუ შეირთავდა გარდაცვლილი მეუღლის, სიდედრ-სიმამრის რჩევით და მათ მიერ ამორჩეულს. საზოგადოდ, ქვრივად დარჩენილი ცდილობდა მოყვრობა-თვისება ძველ მოყვარესთან არ გაეწყვიტა და თუ ახალ ქალს მოიყვანდა, ჯვარის შემცვლელი და შვილების ნათლია ცოლის ნათესავებიდან უნდა ყოფილიყო. საერთოდ, გურიაში დედინაცვლის დიდი შიში

ჰქონდათ. მომაკვდავი ქალებიც სიკვდილის წინ ქმრებს ანდერძად უტოვებდნენ „ჩემ ნაშობს დედინაცვლის ხელში ნუ ჩამიგდებო“, ხშირად ამ ანდერძს ასრულებდნენ. ბევრი ვიცი შემთხვევა, რომ ქვრივმა ობლები დაზარდა, „სათუოდან“ გამოიყვანა და მეორე ცოლი მერმე შეირთო.

ქვრივი ქალი კაცზე მეტს თუ გლოვობდა, თორემ ნაკლებს არა. ქვრივობის გადატანა ქალებს უფრო ეხერხებოდათ, ვიდრე კაცებს. მრავალი მაგალითი ვიცი ისეთი, რომ ოჯახი „წაქცეული“ იყო, ლარიბ-ლატაკი, კაცი მოუკვდა, ქვრივმა „ფუტი“ არ გააცივა, პირიქით, ოჯახი ფეხზე დააყენა და შვილები კარგად გაზარდა.

„უშვილძირო“ ქვრივი კი მონაზნად აღიკვეთებოდა, უფრო ხშირად ადგილობრივ ეკლესიის სენაკში დაბინავდებოდა, ზოგი კი დედათა მონასტერში წავიდოდა. ამას სჩადიოდნენ გლეხის ქალებიც და „ბრწყინვალე წოდებისა“. ერთი თავადის ქალი სამნაქმარევი, თანდათანებრ ნაკეკლუცები მონაზნად აღიკვეცა და „ჩოხანი“ ჩაიცვა.

IV. ხალხური ლექსები

ს ი მ ლ ე რ ი ს თ ვ ი ს

(ვ ა ე ი)

გახსოვს, რომ ვერ გშორდებოდნი
ერთი თვალის დანახვამდი,
უბედობის გადამკიდეს,
დამიყოვნდა შვა მარხვამდი,
სულიც აგერ ამომხდება
საწყალს მე შენს დანახვამდი.
ვის გაქვს ბაგე ფერად შინდი,
თვალი შავი, ინდი, მინდი,
შენთვის სიკვდილს არ შევშინდი
უკვდავების წყაროთ მინდი,
გამიცინე, გამიღიმე: განმინათლე თვალთა ბინდი,
გამოხევი, გამობრწყინდი
სანახავათ თუ რომ გინდი.

ქ ა ლ ი

თუ ღმერთი გწამს, ნულარ იცი
სხომინდულა ლაქაეური,
მტკიცე ფიცის გამტეხი ხარ
და ნამუსში არ კაცური.
ახლა, ღმერთს ვსთხოვ არ შეგარგოს

მაგი შენი ნაცატური,
მე შენთვის ვარ უცხო თევზი
შავ ზღვას გაღმა განაცური.

ს ა ა რ შ ი ყ ო

თვალი შენი ოსეთათ ღირს
და წამწამი არაბეთად,
წარბი ლესათ, თმა ჩოჩხათათ,
წინ შემოყრა ოზურგეთათ.
შენთან წოლა და ლაღობა (თამაში)
საიქიოს ნათლის სვეტათ,
რადგან გატყობ არ გიყვარვარ
აღარ გაქებ ამის შეტათ.

ნ ა ლ ო ი ა

სულელი ნადოია სოფელ-სოფელ დაძრწოდა. ორსულმა გზაში (სოფელ ლიხაურში) ტყუპი დაბადა... ერთი მოკვდა... მეორის ნათლიობა იკისრა წირვაზე მიმავალმა ატატო ბებურიშვილის ქალმა. ამის გამო ადგილობრივმა მცხოვრებმა ანტონ კონტრიძემ ატატოს წაუღექსა:

ბედნიერი ხარ ატატო, შენ არა გყავს სხვაი ფარდი.
მოგილოცავ მონათლულსა, გაგიზარდოს — იქნას მარდი.
ნათლიდედაც თან გიცოცხლოს დაუქნობლათ როგორც ვარდი.
ორივესთვის რომ მოგესწრო, იქნებოდა უფრო მადლი.
ქალები ტყუილა კვიან, თურმე არ აქვთ გასაჰირი.
ერთის ნაცვლად მან ორი შვა, ეს კი იყო გასაჰირი,
ვისაც იგი უხმარია, ტუტუცია, დიდი ვირი.

ა ტ ა ტ ო ს პ ა ს უ ხ ი

ძვირფასო ანტონ, შენ გმადლობ, ჩემთვის კარგი გიხარია,
იმ საწყალს შენსკენ მოსვლამდი დიდი გზაია უარია,

ხანკეი რისთვის მომიარე ჩვენი პირი წამხდარია,
შისი ოჯახი დეიქცა, ვისაც იგი უხმარია.

ატატოს ლექსი:

მამასახლისათ დავდექი
არ დარჩა გამოსადეკი.
ვინც რომ ამ დღეში ჩამაგდე,
რომ დაწვე აღარ აღეკი.

(აკლია)

ანტე ან არ უნდა იხილო
ან და უნდა ირწმუნო.

(მარიამ ზომერკისა)

ლიქსობანა

მგონია არ შევცდები თუ ვიტყვი, რომ ლექსობანა ქართვე-
ლების ავადმყოფობაა — თითქმის ყველას სჭირს და მათ
შორის გურულებსაც. მე ვფიქრობ, რომ ამის მიზეზი იყო
ჩვენი დედები, რომლებიც თავიანთ შვილებს ნანინა-ლექსით
და რითმა გამართული სიტყვებით უმღეროდნენ:

ნანინაო, ნანასაო,
ეძინება ბალანასო,
შენ ძილი და მოსვენება,
შენს მტერს კირის მოჩვენება.
აკვანია ხარატული
შიგ მწოლარე ჩახატული.
აკვანია ბეოლისაო
შიგ მწოლარე ბროლისაო.
აკვანია ლებანოზი
შიგ მწოლარე ანგელოზი.

ენის ამოდგმისთანავე ბავშვებს აჩვევდნენ ლექსის თქმას, ბავშვებიც ოდნავ წამოიჩიტებოდნენ თუ არა, თვით იწყებდნენ ლექსობანას. ერთიმეორეს ტოლ-სწორები ეჯიბრებოდნენ:

- აბა, თქვი ერთი,
- გაგიწყრა ღმერთი.
- აბა, შენ მითხარი ორი,
- მოგიკვდა ღორი.
- აბა, თქვი სამი,
- წაგექცა სკამი.
- ოთხი?
- თავში გარტყი თოხი.

ექვსი... და სხვა.

შაირული ლექსები ხალხს უყვარდა, მწიგნობრობას და, სხვათაშორის, წერა-კითხვის გავრცელების ერთი მიზეზთაგანი იყო.

ხ ბ ო ს ლ ე ქ ს ი

პარასკევს ღამეს მესიზმრა ვითომ დამსეოდა ხროი
ორშაბათ დილა გათენდა ქე მომიკვდა ჩემი ხბოი.
საყვარელო ჩემო ხბოვო, მერჩიე აღდგომის კვერცხსა,
შენ რომ მომიკვდი, მომშორდი სულ ვიტირე მე იმ დღესა.
უშენოთ ძროხას ვერ მოვწველ, სულ არ ჩამოუშვებს რძესა,
ღერგში ყველი გამითავდა, რალა მივაქამო კვერსა,
დიდზედ უფრო პატივს გცემდი რისთვის მიქენი ურჩობა,
დამიწიხლე პურ-მარილი არ შეგშვენს მაგი ხუმრობა.
ტანადობა დიდი ქონდა, როგორც არის აქლემები.
რაცხამ შენ არ წაგაყენა ჩვენი სოფლის აქიმები,
ფერად წითელი იყავი, სახელად გერქვა არიფა,

დაგასიე დობტურები შენი შორჩენა არ იქნა,
შენსა ჩემზედ მოშორებას შე ვაბრალი სიკედლის უცებს,
შენთან ლოცვა არ გავიდა კიდევ ვაწირვიე ხუცებს,
ჭამაზე სუსტი იყავი, არ მოწეკვდი გლახა ფურცელს,
ცოტა მოლას მოწუწქნიდი წამოგიბერაედა მუცელს.
სტორეთ ძალიან მიყვარდი შენ არ გაგცლიდი თუარაზე,
არ მიიღე პატივცემა თავი გადადევ ზარალზე,
შეც იმისათვის გაგიჭაერდი, გადაგათრიე შარაზე.
ჩეორე დღეს გამოვიარე ტურებს ექამე ბარკალზე,
ნამეტარი შემეცოდვე ცრემლიც მომადგა თვალებზე,
კიდევ კაი გული მქონდა, ოთხი მრჩებოდა ბალახზე.
გაზაფხულზე ოთხი მყავდა ერთიც არ ჩამყვა ზამთარზე
დარჩა ხბოი უბედური, მომცა ზარალი ზარალზე.
ჯბოი ტურებმა შექამა დედო მგელს შეხთა შარაზე
ამ ლექსისა გამომთქმელი დიომიდე ვარ მსხალაძე.

ს ა ხ უ მ ა რ ო

ჩემო ნათლიდედაო
ღმერთი შეგეწევაო,
შორი გზიდან ნაველი ვარ
ცოტა მეშივებაო,
ხეიჩილაი დამიკალი
ყელსა მომიხდებაო,
ვარიეი ქე გაუშვი
დედლათ გაგეზრდებაო,
ხვითქლი კვერი გამომიცხვე
ცომი ნუ იქნებაო,
ხაქაპურიც მოაყოლე
ყველი გეშოვნებაო,
ჩხავრის ღვინოც ამოიღე
ქურში გეშოვნებაო,
ცხენსა ჩალა დამიყარე

ზვინზე გეშოვნებაო,
ჩემო ნათლიდედაო,
ცოტა მეჩქარებაო,
შინ თუ აღრე არ მივედი
დედა გამიწყრებაო;
უზნოური მეუღლე მყავს
შინ არ დამიხვტებაო,
მეზობლისას გადიარს
ვინცხა შეეყრებაო,
არშიყობას დაუწყებენ
ვიცი შემეცდებაო,
ახალგაზრდა კაცი ვარ
თავი მომექრებაო,
ჩემო ნათლიდედაო
ცოტა მეჩქარებაო,
მე რომ ბავშვი მოგინათლე
იგი გაგეზრდებაო.

ხ ა ს ა ნ ბ ე გ უ რ ა ს ლ ე ქ ს ი

(ორი ძმა თავდგირიძე — აკეთელი. ერთი გათათრდა — წამოუძღვა მტრის ჯარს გურიაში და დამარცხდა ლანჩხუთის რაიონის სოფელ შუხუთში).

ხასან ბეგი თავდგირიძე
გარისხული ღვთისაგან მეტი
თათრის თაშობა იშონა
სულ მთლად დაავიწყდა ღმერთი.
შეკვეთილში შემოვიდა,
იძახოდა ოლან-გეთი
ლანჩხუთამდე მას ვაცალოთ
მერე ჩვენ გვიყუროს ერთი,
ჯზას ვიყავით მილიცია

რუსის ჯარი მეტად ცოტა
ცხრა ათასი თათრის ჯარი
წინ შემოგვხვთა გვებოროტა.
ვაიქცენ და ჩაერიენ...
მკირაეები აიშალა
ცხრა ათასი თათრის ჯარში
ხუთასმა ძლივს გაიმშრალა.
ჩემი ძმავი ხასან ფაშა
თავმოკრილი დავინახე
რადგან ჩემი ძმავი იყო
გაიმეო დავიძახე
წინა ღამით მან გადაგვწვა
მით დაიგო ცუდი მახე,
რადგან ჩემი ძმავი იყო
ზოლოს მაინც მე დავმარხე.

ჩონგური სახუმარო

მობხუც კაცს ეძინება, ყმაწვილ ქალს ეცინება,
დაიძინე მობხუცო, მე კი არ მეწყინება,
მობხუცმა დაიძინა, მაგრამ ხმამ გააღვიძა
ნიავე, ნიავე, ნიავეო, კარის უკან მოესმა
ქალსა უთხრა გემღური რათ არ დაუგდგე ყური.
კატა შიგ შამოუშვი და შიკამე პური,
მართალს ამბობ ბატონო, კატას კი უპატრონებ
მხოლოდ შენ დაიძინე ნანინას მოგახსენებ.



პირველ ჩინებს მოგილოცავ პაჩოტნები ყალაურებს
გურიის და იმერეთის თავადებს და აზნაურებს,
ოდიდან გადმოუსვლელოდ ომში ძლიერ ნამსახურებს
ჯილდო სწორეთ გეკუთვნოდათ, კარგათ სკამდით ქაღს და პურებს.
აძეს ვწუხვარ მე უფროსი რა გამოვართო წარდგინება,
ან რა მხნეობით იქნება თქვენი ჩინზე დადგინება,

ჰო, მხნეობათ უნდა ითქვას რომ ქნას კაცმა განჩინება
ქუთაისს სადილ-ვახშაში, ნაეახშმობევს დაძინება
უშიშრათ იარებოდით იქ, სადაც იდგა ცხრა როტა
ზედლობა ღმერთს თქვენს სოტნაში გაძლომით კაცი არ მოკვტა.



აკეთში შესანიშნავი ძველი ეკლესია ყოფილა სპილენძით დახურული. აჭარა-ქობულეთის გამაჰმადიანების დროს აკეთს მრავალი გამოქცეული შემოხიზვნია და თან თავიანთი ეკლესიიდან ხატები და სხვა ნივთებიც მოუტანიათ. ამ ნივთებში მეტად ძვირფასი ყოფილა მაცხოვრის ხატი. ლუგა ოქრო იყოვო, ამბობდნენ მოხუცებულები, კიდევ თეთროსნის ღვთისმშობელი, თეთრი ოქრო მარგალიტებით გაჭედილი. გამაჰმადიანებულ ბეგ ხიმშიაშვილს უთქვამს: ის ხატები ჩემი სალოცავეები იყო, თავდგირიძეებმა წაიღეს და უკან უნდა დავიბრუნოვო. წამოუყვანია ჯარი და სწორედ კალანდა დილას დასცემია ეკლესიას, მაგრამ მაგრად დამარცხებულა და ვერც რაიმე წაუღია. ამაზე ხალხური ლექსია:

ღმერთმა ყველას გაგითენოს კალანდა და ბასილობა,
თათრებს ღმერთი გასწყრომია წახთენია გაზდილობა.
კალანდა დილას დაგვეცენ არ გვაცალეს სადილობა,
თავის ღლეში ნაქებია თავდგირიძეო სარდალი
მისი ბიჭები ლომსა გავს, ტყეში ჩაუხთენ ჩამჭდარი,
ნუ გეშინიან ბიჭებო, მესხნი არიან წამხთარნი,
აწ გიორხანი იძახის ვერ წამიხვალ სელიმ- ალა
მესხებს თვალეზი დაუდგა გზაიც ველარ დეინახა,
აბდულ ალა გადმუაგდეს მისი ჯარი გეილახა,
სელიმ ალა გაქცეული მივიდოდა ვითა ქარი

დედამისი გზაზე შეხვთა შეილო, მითხარი მართალი.
დედა, აწი რაღა გითხრა მე საწყალი, მამამკვდარი,
თავსა ძვილაი უშველე იქ დავტრე მთელი ჭარი.
იძახიან ვაი, ვუსა, ვაი, ცოლი, ვაი, შეილი,
ვაი, რაფერ წაგვიმწარა, რაც რომ ვქენით გურიისა
მათი ხორცი დაეკამოს ფარეხას და მურიისა,
აწი თავსა დავანებებთ გაუგზავნით ჭუნისა.

აკეთელი ქალების დახასიათება

უნაქნარო ტანადი ნანო ბოლქვადის ქალი,
უსანდომო ლამაზი ლისა ბოლქვადის ქალი,
დიდი მუხის ნაკვირტალი ესმა გოგიძეს ქალი,
აღმა-აღმა ტორებს იყრის ალუასი ებრაღიძის ქალი,
დუნჩიანი თვალდაყლიპული იაგუნდის სოფიო ერისთავის ქალი,
გელაძის ქალი მზესა გავს, ჩიქვანის ქალი მთვარესა,
ჯაყელის ქალს თუ იკითხავთ, კისერი უგავს ძალესა.

აკეთში მეზობელ ქალს მეზობელმა ძაღვ
სთხოვა ასეთი ლექსით

გელაძის ქალო, ბატონო, მოწყალე ხარ ჩემზე უხვი,
ესტატემ შეგვაკერვია ყანაოზის ახალუხი,
მას მერმე ავათ გახლავარ, ისე ვკუთავ რავარც კრუხი,
ცოტა ძაღვ შეგვიძვირდა ველარ ვკამეთ მარტო კუხი.

ერთმა მედავითნემ ლექსათ მისწერა მეგობარ კაცს —
შენთვის ფელამუში ქონებოდა შენახული ამა და ამ მინდი-
ლოსანს და მე და დავით მღვდელმა შეუქამეთო. აგი ლექსი
დავითმა გამოთქვა და მე გიგზავნიო. პასუხი ასეთი მიიღო:

საკურთხები აღარ არის, აღაპებიც გადავარდა,
ამიტომაც თქვენი როლი შეიცვალა, გადაგვარდა,
თორემ თქვენსა წინამძღვარსა შაირები არ უყვარდა,
ფელამუშს არ დაეძებდა ვინ სკამა ან ვინ შესკამდა.
საქმე არ გაქვთ, ლამაზებს სღევთ, ატალახებთ ქუჩებს ტყვილა,
ყველამ იცის ვინ ბრძანდებით ის მამალი, შენ ყვინჩილა,
უნაყოფოთ გეხარჯებათ კამფეტი და ლელვის ჩილა;
ქკუას მოდით, გონს მიეგეთ, მოიხადეთ ეტლის წირვა.
რომ დაბერდი შენ უწვეროთ და დავითი უქალაროთ
დაიჯერეთ არ ვარგინართ საარშიყოთ, საბადნაროთ.
ლამაზები არ შეგზედვენ, რაც რომ უნდა ცრემლი ღვაროთ,
კიდევ გადრებთ გაკვეთილსა თუ ეს ერთი არ იქმაროთ.

ერთი მედავითნე ნათლობაში იყო. ღამე, ნავახშმევს სახლ-
ში ველარ წავიდა და იქვე მეზობლისას დაწვა. არჩივი სტოლ-
ზე დადვა, კარი ღია დარჩა და არჩივი კატამ შეუტკამა. სახლ-
ში რომ წავიდა მასპინძელს ლექსი გამოუგზავნა:

არჩივი კატამ შეტკამა, წამოვედი მოწყენილი,
დახრჩობა მისი მინდოდა ხათრით დავრჩი მოთმენილი.
მისი ჯიში წუწკი, მსლაქი ადრე იქნა მოწმენდილი
მე სადილი გამიფუტა, იმ დღეს დავრჩი დათმენილი.

პ ა ს უ ხ ი

კვლავ არჩივისა იმედით ნუ გაიგძელებ სადილსა,
თორემ სიწუწკე კატისა ბევჯელ ჩაგიშლის წადილსა,
ნატატურის მოტაცება არა ეზრახვის ნადირსა
გაჩერდი ჭლიკვი ბატკნისა ამდენ ტირილათ არ ღირსა.
ზეცავ, შვალამის დარეკეს, ანგელოზები გალობდა
ჩვენი გამჩენი მოწყალე გურიელ მამიას სწყალობდა
გლეხსა აძლევს, მტერს ამცირებს, ჩვენთანა გლახაკს სწყალობდა
ჭორს დედალი არ ეყოფა უყვარს მიმინოს ჩიტია,

ჯავბრიყვი ცოლი შევირთე მიბოძე ერთი ჩოთია,
საწყალი შენი სიმონა შენს სასახლეში მოვხოხთი
სიქაჩლეს მცინის ბავშვები მიბოძე ერთი ბოხოხი.

წყალში თევზი დატურავს კუდს აქანებს თავს არა
ახლანდელი ახალგაზრდა ფულს ეძებს და ქალს არა.
ფული იყოს ბეური ქალი იყოს სნეული,
ძუ მოკვდება სნეული სხვაიც კია ბეური.

ლ ე ქ ს ი თ ქ მ უ ლ ი ბ რ მ ი ს ო თ ა რ
თ ა ლ ა კ ვ ა ძ ი ს ა გ ა ნ

მე საიქიოს მივდივარ უკან ჩამოვრჩი ამხანაგს,
ეხედავ წასვლაც დამაყოვნდა ვიცი მომთხოვენ იქ ამაგს
ვინც უკან დამრჩა შევლას გთხოვთ, თორემ ვერ ვზიდავ მძიმე ბარგს
სიკუდვეც ბევრი მიქნია ხანდახან კი ვშვებოდი კარგს.

გმადლობ ღმერთს, ასე ვიცხოვრე სამოცდათხუთმეტი წელი,
მეთექვსმეტეში დავღონდი მუშათ ველარ გიახელი
შვილმა კარგათ შემინახა, ცოლმაც კი შემიწყო ხელი
ცოლთან კი უკაცრავადა, ეს არ არის გასამხელი.

ჩემს პატრეტს შვილებს უტოვებ ნახეთ თუ მე მსგავსი ვიყო,
ნახეთ და ნუ დამივიწყებთ სახამდი ცოცხალი ვიყო.
როცა მოკვდე დამიურვეთ თუ უკაცრავათ არ ვიყო
ღვთის მშობელსაც შემავედრეთ რაზეც ბრალდებულნი ვიყო.

გულით ყველა კარგი მინდა ღონე არ მაქვს გამიჭირდა
სანამდი კარგათ ვიყავი სულ რომ მევლო რა მიჭირდა.
ცოდვის გზაი გადამეგდო მადლზე ხელი მომეჭიდა
თვალი არ მაქ, ღონე არ მაქ და კიდევ ცხოვრება მინდა.

შენ უძლებო ჩემო თავო, ვერას დაგაკმაყოფილებ
სულ რომ ყველა კარგი გიყო შენ მაინც ვერ გაყოფინებ
სიკვდილს ელი მიწას თბრიან, თავსხომ შიგ ჩაგაყოფინებ.
სახურავით საბნის ნაცულათ, შავს მიწასაც გაყოფინებ.

მაშინ გმართებს მეგობრებო, ტირილი და თავში ცემა
წირვა-ლოცვა, ღვთის ვედრება, გლახაკზე ფულის მიცემა,
ტირილით სთხოვე ღვთის მშობელს შემინდოს ცოდვით დაცემა
თუ რომ ასე დამიურვებთ ცოტა შეება მომეცემა.

კარგათ ვიცხოვრე თუ ავით ახლა ორივე ერთია
მე ღმერთმა სული მიბოძა ჩემს გვამში შენაერთია,
თუმცა ვსცოდე განვარისხე ისევ მიშველის ღმერთია
ამით მაქ დიდ იმედი, რომ მწამდა მამა ღმერთია.

ქრისტე მწამს და ღვთისმშობელიც ნათლისღება კარგათ ვიცი,
პონათლულიც კი ვყოფილვარ დედაჩემისაგან ვიცი:
ნათლია მყავდა თავადი ჩემგან თავღებათ ნაფიცი.
მღვდელი დავით შარაშიძე სხვაი ყველა აღარ ვიცი.

მღვდელმა მითხრა არ წაწყდები ქიქოძემც ასე ამიხსნა
ქიქოძის გვარი ძვირად ღირს მან კარგი გზაი გაგვიხსნა.
დაგვიწერა ქადაგება, სახარება მთლათ აგვიხსნა
ყველას გვმართებს მისი ლოცვა ვედრება და ხელზე კოცნა.

კარგი, ავი, ცოდვა, მადლი, ყველა ახლა დავინახე
სახლში, გზაში, საქმობაში როგორ გვედგა ცოდვის მახე.
თვალხილული ვერ ვხედავდი რომ დავბრმავდი, დავინახე,
სიკაბუკე ბრმა ყოფილა ჩემით ასე გამოვსახე.

სიბერისთვის რაღა გითხრა მძიმეა და საზარელი
თუ ჭკუა აქვს ზომიერი თვისება აქვს საყვარელი,
ცოდვის გზაი მას არ მოსწონს ჯოჯობეთში შესაყრელი
ცუდს ხომ მაინც ვერ აქნიებ თუნდ მოჰკვეთო იმას ხელი.

ბევრს კიდევაც ეპირება სიბერე და სიგლახაკე
დაბერდება, დაღონდება, შეიქმნება მონარაკე,
აღმართ-დაღმართს ველარ შესძლებს, საზოგადოთ, უყვარს ვაკე
ვინც შეხედავს ჭკუიანი, კაბუკისთვის არის სარკე.

მას ტაძარი ევივრება სახლი ღვთისა სალოცველათ
შიგ უსისხლო მსხვერპლის დაკვლა თუ ღირსია შემწირველათ,
ღის ძალ ეღვას არ შივიდეს ღირსია დასატანჯველათ
თუ უღირსათ ეზიარა შეიქნება ქრისტეს მტერათ.

მე ვსთხოვ ყველა მკითხველებსა, რომ დარეკონ წამოდექით,
წირვა-ლოცვას ყური უგდოთ წმინდის გულათ შეუღექით,
მგზავრათ სადმე მიდიოდეთ მოსმენასა დაადექით,
გზაიცი უფრო წარგემართვის მერმე გზასა გაუღექით.

მე ცხოვრებით კარგათ ვიყავ, კარგათ განვლიე დღენია
ხან დავდიოდი ქვეითათ, ხან მყავდა კარგი ცხენია.
თავის დღეში არ მიყვარდა მოყვასთა გასაწყენია,
სიბერის დროს დავგლახაკდი, მაგრამ ის არა მწყენია.

მართალია, დავგლახაკდი და სამოწყალოს არა გთხოვ,
მაგრამ მას კი არ ვთაკილობ ვინც მომცემს კი არ დავითხოვ,
ჩემს მერმე კარგად იცხოვროთ ღვთისაგან წყალობას მოვითხოვ
ჩემს ოჯახსაც უერთგულოთ თქვენგან იმედით მოვითხოვ.

რაც ვიცხოვრე ნებიერად ყველა მტერისაგან იყო,
სიზმრათ ვნახე ანგელოზი პირში ჩანგალი ჩამიყო,
შემეშინა სულს მართმევდა გამელვიძა აღარ იყო
ღმერთმა სულყველა დაგლოცოს მოყვარე თუ მტერი იყო.

რას ვაგრძელებ თავს რათ გაწყენთ მინდა რომ მოკლეთ გავლექსო,
ორი წელიწადი არის მე რომ თვალები დამეფსო.
ვინც არ მნახე რა გაწყინე სევდით გული ამევსო,
ღმერთმა დიდად დაუმაღლოს ყველა ჩვენთანებსო.

1924 წ. აპრილის 12

სოფელი ასკანა.

მ ღ ვ დ ე ლ ი თ ა ნ ე წ უ ლ ა ძ ი ს სა ხ ლ ი ს წ ა რ წ ე რ ა
სახლებო, ყველა უნდო ხართ, ქვიტირზე ფიცარ წნულია,
რათ გინდათ კალტი, რაზები შიგ ნივთები მდიდრულია

პატრონს ვერა ეხმარებით უფრო მახეთ კი ეგებით
ნიეთმპარავებს ვერ ამაგრებთ ვერც ცელიანს ემალებით.

კილტე, რაზებს არ უფრთხიან არც შემოსვლას გეკითხება,
ვინც რომ ძვირფასებს ააგებს მასვე ჰირათ ეკიდება
შენ შეშინდევ აქ ქობზაზო, მარტო მე ჩემს სიცოცხლეში
სანამ ჩემი თანამგრძნობი მიმიწვევს ცივ სამარეში
და მაშინ კი ხუთი უიციროთ გასწარდება ანგარიში
ცხრა არშინი ტილოც კიდევ სხვა რაღაა აქ საშიში.
იქაც, უშიშრათ წარსდგები თუ რომ აქ გქონდა ღეთისა შიში
და უნიეთოთაც იცხოვრებ როგორც ჩანა საღმრთო წიგნში.

ქ ი ქ ა ზ ე წ ა რ წ ე რ ი ლ ი (მისივე)

ღმერთო, ვაზისა ნაყოფი
ღღე ყოველ მოგვეც საყოფი
ზომიერ მსმელო იხარებ.
უზომო მსმელო, ინანებ.

ვარდენ გუგუნავას გლეხის ქალი უყვარდა. მშობლებმა
შერთვა არ დაანებეს და თავი მოიკლა. მღვდელმა იოანე წუ-
ლაძემ ლექსი უძღვნა.

სიყვარულისთვის თავგანწირულო, მის აღტაცებით თავის
მომკვლელო,
ნაცნობებისა გულის დამწველო და მშობლებისა მთლათ
დამდაგველო,
ს.ზმარ ოცნებავ, ქორფა ყვავილო, სიცოცხლის მტერო, ბიჭო
ვარდენო,

სიყვარულისა ნაშობო, სიყვარულმა მოგიტაცა,
მით მოწამლე დედის გული, გაამწარე თვით მამაცა,
არ მომკვდარხარ, ვითომ გძინავს და ოცნებობ იმავ ძილში,
თავს გველება საყვარელი ვით ბურბული ვარდს მაისში.

არც მოკვდები იმათი მხრით ვინც მტკიცეა სიყვარულში.
 გიციობდა, მოაგონდები წუთისოფლის სიხარულში
 დაამღერებს შენს თქმულ ლექსებს შენსავე მოსაგონარად
 ძვის დარდის ამოსაყრელად და სხვისდაც გასაგონარად.
 ძნელი წარმოსადგენია ყმაწვილისგან თავის მოკვლა
 რსიც შეუძლებელია სიყვარულის ჩუმათ მოვლა,
 წყეული ის ბედის ჩარხიც რა უკულმა მბრუნავია,
 სანამ არ გადაბრუნდება გზაიც დაუნახავია,
 უეცრათ გადაბრუნდება შემდეგ გზაი გამოჩნდება
 ვისიცი გასასვლელი იყო მისთვის აღარ გამოდგება.
 რა ვქნათ, რა ვსთქვათ, ვის რა უთხრათ, ამგვარები ხშირად ხდება,
 მიზეზი იყო კაენი, შემდეგ კრძალავს კანონდება
 გზა მშვიდობის შვილო, ვარდენ, ვინ რაღას მოგეხმარება.
 ეს ცხრა ტაეები თავს გარდა თუმცა თქვენა გეკადრება
 მეთათეში მას ვსთხოვ ღმერთსა, რომ გაღირსოს ნეტარება
 ცხრა დასში არ გამოგრიცხოს რადგანაც გაქვს ნათლისღება.

წამკითხველნო, არ დამზრახოთ თქვენცა უბოძეთ შენდობა
 არ იფიქროთ უცოდველ ვართ ჩვენცა გვეხება მკვლელობა
 ნამდვილ მკვლელობის მსგავსია ცილისწამება, ბეზლობა.
 დღითიდღე მაგის მუშა ვართ ვითომ რამ კარგი ხელობა.
 ვარდენმა თავი მოიკლა ის ერთი კაცის მკვლელია,
 ჩვენ დღიურათ ათ ვარდენს ვკლავთ, ვინ არის გამკითხველია,
 ვაი რომა სხვისი ცოდვა ძალიან საკიცხველია,
 თავისი კი არაფერი არცა რა საკითხველია,
 ვარესიდან ღმერთო გვიხსენ შენი მაღიდებელია
 მაგის მეტს ნულარ შეგვასწრებ საშიში სასმენელია.

1888 წ.

ო რ მ ო ც ღ ა ე რ თ შ ი რ ო მ ა ჯ ა ნ ყ ე ბ ა ი ყ ო
 ი მ ი ს ლ ე ქ ს ი

გურიაში საქმე მოხდა, იქნა ცოდვის გადიდება,
 არღუთოვი ჩამობრძანდა განაცხადა ღარიგება

ქვეშლის ეზოში იპირვენ ამბაკოს და ათარშიზას
სხვაიჲ თუ არ დავიჭირეთ ყაძახების წამხთარ საქმეს აი ორი ვერ
აგვიზღაფს.

სხვაი ყველა დაუქირვან მიხეილს ყავს დამაშაკი
მიხეილ და გიტო სიმონ ფრთხილათ არის ვითა შაკი,
ზურაბ ერისთავს უბრძანეს ვარგებულა თქვენი ძველი
ა? ორი კაცი დაქირვა შენ თუ კარქა შეიძელი.
თან წაგყობა ბერიძნები, გააყუჩე მასინძელი,
სომონიკამ დაიძახა უფროსი კაცი ვინ არის
ზურაბი არის გიბრძანებს მღვიძარეა თუ მძინარი.
შინ არც ერთი არ არიან, არცა მიხელ, არცა გიტო
ჯობს რომ შენდა ჩუმათ იყო, კარი მაგრა ჩაიკილტო,
ოქვენ ერისთველები მოსულხართ მგონი ჰაჰა გაგიღლიტო.
კარს დაურტყეს დიდი ურო, კარში გამო უამური
გავარდა თოფი იყვირეს წავებთით მოკლეს ჩვენი კურო.
კაძახობა ახლა გვინდა გასაპირში მოკაკულო
კარზე თოფები ჩაურტყეს მგონი იყო ყველა ჰინჭი,
ქეც მოკლა და ქეც გეიქცა სწორეთ იყო ღვთიდან ნიჭი,
ღეღიშენის რძე შეგერგო რომ ყოფილხარ კაი ბიჭი.

მ ე ო რ ე ა მ ა ვ ე ა ჯ ა ნ ყ ე ბ ა ზ ე

ბურსულომ წიგნი მისწერა ლევანის ძე დადიანსო
გურულებმა ჩხუბი მიქნა მე აქ ველი შენსა ჯარსო.
დადიანმა მისი ჯარი მოაყენა მალთაყვასო.
ოცდახუთი გურულები თავს დაესხა მეგრელთ ჯარსო,
ჩაერიენ ერქაშეთში ბაწარს აბმენ ბატონ-ყმასო.
აძახიან დადიანო, თავს ნუ მოგვკრი მადლიანო,
სხვათ სხვაფერად ვარგივართო, ღორის მწყემსათ კაი ვართო.

ხ ა ლ ხ უ რ ი

ათას რვაას ორმოცდასამში ავაშენე ერთი ოლა
ხუთი თვალი მაინც იყო, მარა შეექვსეც შინდოლა

ინასაც შეუმატებდი ძელი რომ არ დამღევოდა
ქალის მოყვანა მინდოდა, რომ ვინმე გამპირებოდა...

თუ გინდოდეს თავის კირი, შეიყვანე ქალი ქერივი,
სადილ-ვახშამს არ გაღირსებს არც გეჭნება ღამე ძილი.

ოტია დადიანი იყო ოზურგეთის მაზრის უფროსად. სა-
ჩივრით დაითხოვეს. ატატო ბებურიშვილის ქალმა ლექსი მის-
წერა.

თაგეები დარაზმულიყვნენ სულ ყველა ფორმით ჩაცმული
სტიროდენ შენგნით მოკვედებით, შენგან გვაქვს სული ჩადგმული,
მწირველათ მელა მიყავდათ ზედაშე სურით დადგმული
ღიაკვნათ კიანქველები გალობა უთხრეს მასხრული.
წინ წყალი უკან მეწყერი, მე მიმინო და შენ მწყერი,
ატავ, შენ რათ არ იცანი ადგილი პირაჯრის საწერი,
არსად გაუშვი ქათმები არც სადმე ხორცის ნაქერი,
ყველა ქერივს და გაქირვებულს შენ შეუქამე საკმელი
პანლურ-პანჩურით გაგადღეს, აწი, მშვიდობით პარტენი.

ყ ა რ ა ნ ა ი ს ლ ე ქ ს ი

ყარანაი ყანაში შეტად გასუქებულიყო,
ჩავალ შიგ და დაეიქერაე თოკს მოვაბაე წელზედაო,
შეგვაზმაე და ზედ შევჯდები გავანტუნებ სერზედაო,
წინდამ კაცი შემეყარა გამიცვალე ცხენზედაო,
ყარანაი დაქუშმაშდა გადავარდა კლდეზედაო,
შენ ყარანაე რას ქუშმაშობ, შენ ვინ გავცვლის ცხენზედაო,
ყარანაის დაკვლაზე რაქული ცული გავტებე,
ყარანაის გახთაზე ყირმული დანა გავტებე,
ყარანაის ფეხები ახალციხის სვეტებო,
ყარანაის ფრთებიოთა იხალციხე გადავქედე,
ასი ლიტრა ქონი ქონდა პატარძალმა ლუკმად იგდო.

V. ძველი რვეულიდან

რა იყო ძველად ჩვენში თეატრალური ხელოვნება, როგორ უცქეროდნენ მას გურულები და ვინ ააღორძინა ხელოვნების ეს დარგი?

დაბეჭითებით ვერ ვიტყვი, გურიაში პირველად სად გამართეს წარმოდგენა, მაგრამ ვფიქრობ რომ ეს იყო, ალბათ; ქ. ოზურგეთში. ოზურგეთი ოფიციალურ ქალაქად 1896 წლამდე არ ითვლებოდა, მაგრამ ის მაინც ქალაქი იყო. მასწავლებლები, სახელმწიფო მოხელენი, ყველაზე მეტი მაინც აქ იყო თავმოყრილი. მაშასადამე, პირველი წარმოდგენაც ოზურგეთში უნდა ყოფილიყო. ამას ადასტურებს, სხვათა შორის, ისიც, რომ გურიაში პირველი დროებითი სცენა ოზურგეთში დაარსდა პირველად სახელმწიფო კაზინოში, შემდეგ სცენა იყო მოთავსებული ქალაქის ბაღში, საქალებო სკოლის დარბაზში. თამაშობდნენ უმთავრესად ჩინოვნიკები და ოფიცრები. როგორც სხვა დანარჩენ კულტურულ საქმეს, ისე სათეატრო ხელოვნების პირველ მესვეურად მაინც მასწავლებლები იყვნენ. პირველ ხანებში ამ პირველ სცენაზედაც ისინი თამაშობდნენ. დიდია ძველი მასწავლებლების თავდადება, საქვეყნო საქმის უანგარო სამსახური, თავგანწირვა, ყოველგვარი

შევიწროების ატანა. მათ დათრგუნეს სიბნელე. გაამეფეს სინათლე, მოსპეს ცრუმორწმუნეობა, ცხოვრების სინამდვილეზე ყალბი წარმოდგენა და ხალხი გაათვითცნობიერეს.

დღეს გურიაში ყველა სოფელში თუ ადგილობრივი ძალებით წარმოდგენები იმართება, ამ პატარა კაცების, მაგრამ დიდი ადამიანების დიადი მოღვაწეობის უნარს მიეწერება. წინათ ერთ სოფელში წარმოდგენის დასადგმელად მონაწილეთა ძალის შეკრება დიდი საძნელო საქმე იყო, ამისათვის სოფლის კი არა, სამაზრო მობილიზაცია უნდა მომხდარიყო. აი ამისი საბუთიც — აკეთი, გურიაში მოწინავე კუთხედ ითვლებოდა, სასოფლო სკოლა აკეთში იმ დროს გაიხსნა, როცა გურიაში ასეთი სკოლა მასზე უწინ დაარსებული მხოლოდ ორი იყო, პირველად ჩემს მახსოვრობაში აქ ვნახე წარმოდგენა, ეს იყო 1883 წელს — აღდგომის კვირეებში. წარმოდგენა გაიმართა ადგილობრივი მასწავლებლის ირაკლი შევარდნაძის მეთაურობით — მე მაშინ 12 წლის ვიკავი და ჩემ თავს უუბედურეს ადამიანათ ჩავთვლიდი, ამ წარმოდგენას რომ არ დავსწრებოდი. თამაშობდნენ ერისთავის კომედიას „ძუნწს“, სხვათა შორის, მონაწილეობას ღებულობდა ჩემი ძმა მღვდელ-მასწავლებელი ლავრენტი — ასრულებდა ივანიკას როლს, მე ეს ვიცოდი, რადგან საამისო მზადება ორი თვით ადრე დაიწყო. წარმოდგენის დღეს და ორი დღით ადრე მეც ბევრი მარბენინეს — სხვადასხვა დავალების შესასრულებლად, რაც გამოიხატებოდა უმთავრესად წარმოდგენის ტექნიკური მხარის მოგვარებაში — პიესისათვის საჭირო ინვენტარისა (რეკვიზიტის) და სხვა ყველაფრის შოვნა, რაც საჭირო იყო სცენის გაწყობა-გაფორმებისათვის და მონაწილეთათვის, უმთავრესად იმისდა მიხედვით თუ რა ტანსაცმელი

იყო მათთვის საჭირო, უმთავრესად მათი სარგო ჩონა-ახალუ-
ხი, წულა-მესტი, ქამარ-ხანჯალი და სხვა, რაც მათ არ გააჩნ-
დათ. მაგრამ მიუხედავად ყოველივე ზემო ჩამოთვლილისა,
წარმოდგენაზე მაინც ბილეთი არ მომცეს დასასწრებად. უკა-
ნასკნელი ბილეთი აბაზი ღირდა, მაგრამ აბაზი მაშინ დიდი
ფული იყო. წარმოდგენა დაიწყო, მე ზღუქუნი დავიწყე,
ღმერთმა განუსვენოს, ერთმა ჩემმა სახლიკაცმა ბილეთი მი-
ყიდა და ცრემლი შემაშრო. წარმოდგენა სკოლის ოთახში
იყო, იმავე შენობაში სოფლის კანცელარია იყო. როლები
ასე იყო განაწილებული: კარაბეტა — მასწავლებელი ირაკ-
ლი შევარდნაძე, ხამფერა — თავადის ქალი ვისილა თავდგი-
რიძე, მონავარდისა — იმისი და ნინუცა, ივანიკა — ლავრენ-
ტი წულაძე, არჩილი — თავადი ზაქარია ნაკაშიძე — ოზურ-
გეთიდან საგანგებოდ ამისათვის გამოწერილი, მეკუბოე —
ლავრენტი ტულუში — ფოთიდან მოყვანილი. როგორც ხე-
დავთ სულ პატარა როლების ამსრულებელიც კი სხვა მხრი-
დან მოსაყვანი ყოფილა. აქვე უნდა აღინიშნოს, რომ თუ ყა-
რამან თავდგირიძის კულტურული ოჯახი ცრუ შეხედულები-
საგან თავისუფალი არ ყოფილიყო, მაშინ ქალების როლების
შემსრულებელს აკეთში სულ ვერ იშოვნინდნენ — მას ყამსა
შინა ქალებიდან წარმოდგენაში მონაწილეობის მიღება დიდი
რაინდობა იყო, დიდ მსხვერპლად ჩაითვლებოდა.

ხალხი წარმოდგენებს არ ესწრებოდა, თუ ვინმეს მოი-
ტყუილებდი, სხვადასხვა დაპირება-აღთქმით დააჯერებდი.
დამსწრე (მაყურებლები) მონაწილეებს მაინც კომედიაჩი-
კებს ეძახოდა, ხალხს არ გაემტყუნებოდა, რადგან მას სო-
ფელ ნაგომრის „იარმარკაზე“ ენახა მხოლოდ ფოკუსნიკები
25)

და ჯოხებზე მოსიარულე ჯამბაზები, ხელოვნებაზე კი მათ არავითარი წარმოდგენა არ ჰქონდათ.

ოზურგეთის და აკეთის შემდეგ წარმოდგენების მართვაში პირველი ადგილი ეჭირა ბახვს — იქაური მაშინდელი მასწავლებლები: პატივცემულნი ცოლ-ქმარნი ნინო და გიგო შარაშიძეები, ცნობილი პედაგოგი და „ეშმაკის მათრახის“ აქტიური თანამშრომელი, „ბლიკვაძის“ ფსევდონიმით — ალექსანდრე მგელაძე ან საქმეშიაც პირველობდნენ. ასე თუ ისე, 1880 წლიდან 1890 წლამდე კანტიკუნტად ოზურგეთში, ზახვში, ხიდისთავში, ჩოხატაურში, აკეთში და ლანჩხუთში მასწავლებლების თაოსნობით იმართებოდა წარმოდგენები. გარდა ხალხის სულიერი საზრდოს მიწოდებისა, მასწავლებლებს ქველმოქმედებაც ჰქონდათ სახეში, რადგან წარმოდგენის მთელი შემოსავალი ხმარდებოდა საზოგადო საქმეს, ხარჯებსაც დიდად გაუბობდნენ და დღევანდელ ხელგაშლილობას არ იჩენდნენ, მაგალითისათვის მოვიყვან ერთ ფაქტს — 1894 წელს ლანჩხუთში ითამაშეს ორი კომედია, შემოსავალი უნდა გაეგზავნათ საზღვარგარეთ სტუდენტებისათვის — ხარჯი იყო სულ ერთი მანეთი და 7 კაპ. (იხ. მაშინდელი გაზ. „ივერია“), მართალია, შემოსავალი იყო 65 მანეთი, ეს თანხა დიდი არ იყო, მაგრამ მაშინ დიდათ ფულობდა. ასეთი იყო ანგარიშიანობა, დაზოგვა საზოგადო ფულის.

1890 წლებში ზაფხულის არდადეგებში შესდგა მასწავლებლების მიერ წარმოდგენების გამმართველი მოსიარულე დასი, თამაშობდნენ აკაკის „ბუტიაობას“ — ახალგაზრდები ი. რამიშვილი, ა. წითლიძე ასრულებდნენ ქვისლების როლს და, როცა სცენაზე როლის მიხედვით წუწუნი დაიწყეს: „ო, რა ცეცხლში ვართო“, დამსწრეებიდან გაისმა ხმა —

„მართლა რომ ცეცხლში ხართ — ვინ თქვენ და ვინ არტისტებიო“.

წარმოდგენების მართვა, ძალებიც რომ ყოფილიყო, არც ისე იოლი საქმე იყო — უკანასკნელ მამასახლისსაც კი შეეძლო ხელი შეეშალა. მასწავლებლებს ზოგ ადგილას აყენენ თავად-აზნაურობა და ესენიც ჩაეჩხირნენ ამ კეთილ საქმეში — თუ მათი თანხმობა და მეთაურობა არ იყო, ისე საქმეს აფერხებდნენ. იყო ასეთი მაგალითიც, ნიგოეთში მასწავლებელმა მოაგვარა წარმოდგენის გამართვის საქმე, ეს იწყინა ერთმა იქაურმა აზნაურის მეუღლემ, რატომ ჩემი მეთაურობით არ იმართებაო და წარმოდგენა ჩაშალა. ეს საქმე გაზეთში საპოლემიკოთ გახდა, ერთ მხარეს გამოესარჩლა ნ. ჟორდანიას — სემინარიის ახლად კურსდამთავრებული, და ამ საქმეზე დაიწერა მისი პირველი წერილი გაზეთში.

ოთხმოცდაათიანი წლების შემდეგ მასწავლებლებს გვერდში ამოუდგა მოსწავლე-ახალგაზრდობა და წარმოდგენების გამართვაც სოფლად გახშირდა ამ ხანებში. დაბეჯითებით ვერ ვიტყვი, რომელ წელს შესდგა ნიგოეთში დიმიტრი კალანდარიშვილის მეთაურობით მოსიარულე დასი, რომელშიც შედიოდნენ: დიმიტრი კალანდარიშვილი, იასონ ნიკოლაიშვილი, დიმიტრის დები თეო და ნინა, ერთი ქალიც — პოლინე წილოსანის ასული — იმქამად ლანჩხუთში წერა-კითხვის ერთადერთი მცოდნე დიდი ხვეწნის შემდეგ რომ დასთმო დედამ. ამავე დასში იყო ერასტო კალანდარიშვილი და ამ წიგნის ავტორი. სუფლიორობა იკისრა სილიბისტრო ჯიბლაძემ. მთელი თვე ნიგოეთში ვამზადებდით „ბაიყუმსა“ და „ბუტიაობას“. პირველი წარმოდგენა გაიმართა ნიგოეთში, იქიდან ურმით მთელი მონაწილენი ერთიმეორეზე წაკერებული ზეწრებით

გაემართნენ ლანჩხუთში, აკეთში, ჩოხატაურში, ხიდისთავში და ოზურგეთში. მთელი შემოსავალი — სამას მანეთზე მეტი — გაეგზავნა ფილიპე მახარაძეს ვარშავაში.

ხალხი წარმოდგენებს გაუბრუნდა. ბილეთს, ძალით, საპატიო პიროვნება, ან ზოგან რომელიმე პროგრესისტი ბოქაული თუ შეაჩეჩებდა ხელში, თორემ სალაროში ძლიერ ნაკლებად ყიდულობდნენ. პირველი რიგის ბილეთი მანეთი ღირდა.

1897 წლიდან სახალხო წარმოდგენების მართვას სათავეში ჩაუდგა სოფლის ახალგაზრდობა, აქ პირველობა ეკუთვნის ხიდისთავს, საცა ხალხური მოძრაობა, ხალხის გამოფხიზლება პირველად დაიწყო და მიიღო დემოკრატიული ხასიათი. სახალხო მოღვაწის იასონ მეგრელიძის თაოსნობით შედგა დასი, რომელიც უკვე თამაშობს დრამას — ეს დრამა იყო გუნიას „და-ძმა“. ორი წლის შემდეგ თითქმის არ დარჩენილა გურიაში მოზრდილი სოფელი, საცა ეს დრამა არ ეთამაშათ.

ბოლო წლებში ოზურგეთში ჩვენ სცენას მოემატა ჩვენი საამაყო რეჟისორი და მსახიობი ალიოშა წუწუნავა, მისი დები—ეველინა და ცეცილია, შემდეგ თანდათან, ვასო ურუშაძე, მარო მდივანი, სამსონ ხურციძე, ბიქტორ შარაშენიძე, ვიქტორ ნინიძე, გერმანე გოგიტიძე და სხვა ბევრი ნიჭიერი ახალგაზრდა, რომლებიც თუ შემდეგში პროფესიონალი მსახიობები არა, თავის დროზე პროფესიონალი სცენის მოყვარეები იყვნენ. გახშირდა წარმოდგენების მართვა — დასა თანდათან გაძლიერდა როგორც რეპერტუარის მხრივ, ისე მისი მხატვრული შესრულებით — მაყურებელთა რიცხვმაც საგრძნობლად იმატა. განსაკუთრებით ახალგაზრდობა გაიჭაყა ხელოვნებამ. რაც მთავარია, მოწინავე სოფლებში

თვითდინებით ჩამოყალიბდა თვითმოქმედი დრამატული წრეები, რომლებსაც ძირითადად დახმარებას უწევდა ზემოხსენებული ოზურგეთის დასი, მათთვის, განსაკუთრებით პირველ ხანებში ადვილად დასაძლევია პიესების შერჩევაში, როლების განაწილება-მომზადებაში, რეკვიზიტის, გრიმების და სხვა მრავალ მხატვრულ საკითხების მოგვარებაში, განსაკუთრებით დიდი ღვაწლი მიუძღვის ალიოშა წუწუნავას და სამსონ ხურციძეს, რომლებიც დაუზარებლად ეხმარებოდნენ ახალგაზრდებს მათ დრამატულ წრის მუშაობაში, ხშირად თვითონაც იღებდნენ მონაწილეობას, მათთან ერთად პიესაში, რითაც ამხნევებდნენ ადგილობრივ პიესის მონაწილეთ და ამავე დროს მეტ მაყურებლებს იზიდავდნენ მათი მონაწილეობით.

დღეს, ჩვენდა საბედნიეროდ ყოველივე ამის ნაყოფს ვხედავთ, გვაქვს მუდმივი სცენა — თეატრი — გურიის ცენტრალურ ადგილებში, სადაც მიმდინარეობს გაცხოველებული მუშაობა ხელოვნების დარგში.

ა ბ ტ ო ზ ი ო ზ რ ა ფ ი ა

დავიბადე 1871 წელს, გურიის პატარა სოფელ ჭანკათში. მამაჩემი (ივანე) იყო მღვდელი, წვრილშვილის პატრონი, ღარიბი. მისი ცხოვრება უბრალო გლეხის ცხოვრებისაგან მხოლოდ ავირა-უქმე დღეებში განსხვავდებოდა, როცა მას ანათორა ეცვა, სხვა დროს ის გლეხურ ცხოვრებას მისდევდა. ბებიაჩემი (მამით) მწიგნობარი დედაკაცი გახლდათ, კითხულობდა როგორც მხედრულს ისე ხუცურს, ზეპირად იცოდა ვეფხისტყაოსანი, გურამიანი, ბეჟანიანი და სხვ. მამაჩემიც დიდი მოყვარული იყო გარდა საღმრთო წერილისა, სხვა წიგნებისაც, თვითონაც დიდი ხალისით კითხულობდა და კვირაობით სხვებსაც ხმამაღლა უკითხავდა. როცა ხანში შევიდა და ის დაუახლოვდა მაშინდელ გურიის მოღვაწეებს: არსენ წითლიძეს, ისიდორე რამიშვილს, სილიბისტრო ჯიბლაძეს და მათ მიმდევრებს, მერმე უფრო უმატა სახალხო წიგნების კითხვას, ზოგჯერ ეკლესიაშიც კი კითხულობდა: ფილარეტის ცხოვრებას, დიოგენს, სოკრატს და, ასე წარმოდგინეთ, ეგნატე ნინოშვილის დასაფლავების დღეს (კვირა დღე იყო) შემოსილმა წირვის ნაცვლად ხალხს წაუკითხა მოსე მწერალი“ და შემდეგ ეგნატეს პანაშვიდი გადაუხადა.

მანვე პირველმა ხუცესმა ურჩია ხალხს „საკურთხი“ არ გამოეტანათ საფლავზე და თუ ვინმეს სამადლო საქმე უნდოდა ავადმყოფისა და გაჭირვებულისათვის მიეტანათ და არა ხუცესისათვის. ოჯახში იყო მეტისმეტად მკაცრი, შვილებს გვზრდიდა სპარტანულად და მისგან ერთი ალერსიანი სიტყვა არ მახსოვს, წერა-კითხვა უფროსმა და-ძმებმა სახლში დამაწყებინეს და სამი თვე ან-ბან-განი მაძახებინეს. ან-ბანი მალე ვისწავლე, მაგრამ „ამოსაღები“ მეოთხე დღეს ძლიერ მივაგენი და იმ დღესვე არსენას ლექსი წავიკითხე. 1880 წელს ოზურგეთის სასულიერო სასწავლებელში მიმაბარეს — მიმიღეს პირველ განყოფილებაში. ვსწავლობდი საშუალოდ. გარდა გაკვეთილებისა, თუკი ვიშოვნიდი გარეშე წიგნებს, მეტის ხალისით ვეტანებოდი. ძლიერ მიყვარდა წირვა-ლოცვაზე სიარული და „ღვთის ვედრება“, მაგრამ 1885 წელს, როცა ეკლესიაში სიარული სავალდებულოდ გავიხადეს, რამდენიმე თვეში „გაიძვერობა“ დავიწყე — გზიდან ან ეკლესიიდან გამოვიპარებოდი, რის გამო ერთი წლის შემდეგ როგორც „ურწმუნო“ სასწავლებლიდან გამომაძევეს. ეპისკოპოსის ჩარევით ისევ მიმიღეს, მაგრამ სწორედ ამ დროს რალაც ბედად ისიდორე რამიშვილი შეგვხვდა და მისი რჩევით წინამძღვრიანთკარის სასოფლო-სამეურნეო სასწავლებელში მიმაბარეს, საცა ამ დროს თვით ისიდორე იყო მასწავლებლად. ეს იყო 1886 წელს. 1890 წელს ეს სასწავლებელი ორი კურიოზის შემდეგ (რისთვისაც ორჯერ გამომავდეს, მაგრამ ისევ მიმიღეს) დავასრულე. სასწავლებელს ჰქონდა ძლიერ მდიდარი ბიბლიოთეკა (რომელიც ორ წელს მე თვით მეზარა), არ დამიტოვებია არც ერთი ქართული წიგნი, რომელიც ორ-სამჯერ არ წამეკითხოს. ზამთრის გრძელ ღამეებში

ყაზბეგის ნაწერები გომურში, გლეხებსაც კი წაუკითხე. 'სკოლაშივე შევეჩვიე ლექსებისა და პატარა მოთხრობების წერას, როცა დიმიტრი ყიფიანი მოჰკლეს და დიმიტრი ბაქრაძე გარდაიცვალა, მოწაფეებს მასწავლებლის თანდასწრებით მათი ცხოვრება და მოღვაწეობა წაუკითხე. ამ სასწავლებელში მეურნეობის ყველა დარგს ასწავლიდნენ. მე განსაკუთრებულ ყურადღებას მეფუტკრეობას ვაქცევდი და ეს საგანი სხვა ამხანაგებზე უკეთაც ვიცოდი. ჯერ კიდევ მოწაფეობის დროს ვცადე მეთარგმნა ბუტლეროვის წიგნი „ფუტკრის ცხოვრება“, მაგრამ, ცხადია, ვერ შევძელი. ასე იყო თუ ისე, სხვა ჩემს ამხანაგებთან შედარებით სკოლის დასრულების შემდეგ შემეძლო არსებობისათვის ბრძოლა. პირველ წელს მამის ოჯახში დავიწყე მეურნეობა. ამავე დროს სამრევლო სკოლაში ვმასწავლებლობდი. ერთი წლის შემდეგ კერძო პირთან ვიყავ — მეფუტკრედ გურიაში, შემდეგ რაჭაში, მერმე ჭუთაისის სამეურნეო სკოლაში ვასწავლიდი მეფუტკრეობასა და მეაბრეშუმეობას, ვიყავი აგრეთვე ამავე სკოლის ეკონომი და მეთვალყურე (შემდეგ კი ეს უკანასკნელი ორი თანამდებობა მიხა ცხაკაიას გადავულოცე). ჩემის თაოსნობით სკოლის მოწაფეებმა დააარსეს ჟურნალი „ნორჩი მეურნე“ და მოაწყვეს საკუთარი სამკითხველო-ბიბლიოთეკა, (იწერდნენ „კვალს“), 1897 წ. მონაწილეობა მივიღე ეგნატე ნინოშვილის დასაფლავებაში. იმავე წელს სამსახურს თავი დავანებე, ცოლი შევირთე და მამის ოჯახიც მივატოვე. დავიწყე დამოუკიდებელი ცხოვრება. ორი წელიწადი მასწავლებლად ვიყავი წყალწმინდასა და სუფსაში (გურია). მასწავლებლობას თავი დავანებე და რამდენიმე წელს ვცხოვრობდი ხიდისთავში სიმამრის ოჯახში. „ჯეჯილში“ წერა დავიწყე 1892

წელს, ამაზე უფრო ადრე დავიწყე „ივერიის“ კორესპონდენტობა, შემდეგ „კვალის“, „ცნობის ფურცლის“ და „ნაკადულის“. ჯერ კიდევ უცოლო ვიყავი, როცა ეგნატეს დავუახლოვდი და მასთან მჭიდრო კავშირი მქონდა.

ხიდისთავში იმ დროს (1901—1902 წლებში) ახალგაზრდობა დიდი ძალა იყო. სამკითხველო, წარმოდგენები, საჯარო-გასამართლება, სამედიცინო სასამართლო, სახალხო ლექციები და სხვა მსგავსი იყო ჩვენი დღის საკითხი და ჩვენც ორ ბანაკად გაყოფილი (პროგრესისტი და რეგრესისტი — კვალისტები და ივერიისტები) ერთიმეორეს სამკვდრო-სასიცოცხლო ბრძოლაში ვიწვევდით. ცხადია, მეც დასელების ჯგუფში ვიყავი და ჩემი მსოფლმხედველობა ხიდისთავში ყოფნის დროს ჩამოყალიბდა. ჩემი საარსებო წყარო იყო მეფუტკრეობა და მაზედ დამოკიდებული ღურგლობა (სკების გაკეთება). მეც ცოტაოდენი ამით და ზოგი ცოლის ნამზითვი სპილენძეულობის გაყიდვით ოზურგეთში სამოსახლო შევიძინე და 40-მანეთიანი ქოხი დავიდგი — ხელი მოვიკიდე ოჯახურ ცხოვრებას, მაგრამ დასახლებიდან წლინახევრის შემდეგ, 1904 წლის აპრილში, ლანჩხუთის გლეხთა აჯანყებასთან დაკავშირებით დამიჭირეს და 5 წლით ორენბურგის გუბერნიაში გადამასახლეს. 9 თვის ტყვეობისა და ეტაპის შემდეგ ორენბურგიდან გამოვიპარე და იმავე წლის დეკემბერში გურიაში არალეგალური ცხოვრება და წრეში მუშაობა დავიწყე. მონაწილეობა მივიღე სულთან-კრიმ-გირეის კომპანიაში. 1905 წელს პლასტუნებმა სახლ-კარი და მთელი ჩემი „ივლა-დიდება“ დამიწვეს... 1907 წელს კიდევ გადამასახლეს და კიდევ გამოვიპარე. ვიმალებოდე და წრეებში ვმუშაობდი. ჩამდენიმე წლის შემდეგ ერთმა მოლიბერალმა მაზრის

უფროსმა „შემირიგა“, მაგრამ, როცა ის გამოიცვალა, 1910 წელს, ისევ დამიჭირეს და სამი თვე მომისაჯეს ადმინისტრაციული სასჯელი, როგორც ბეჭდვითი სიტყვით ცრუცნობების გამავრცელებელს მთავრობის წინააღმდეგ. 3 თვე ქუთაისის ციხეში ტყვეობით ვისარგებლე და ჩემი დიდი ხნის ოცნებას ფრთა შევასხი. დავწერე „ფუტკარი და მეფუტკრეობა“, რომლის დედანი იმავე წლის გამოფენაზე ოქროს მედლით დააჯილდოვეს. წიგნი გამოიცა 1912 წელს კავკასიის მეფუტკრეთა საზოგადოების მიერ, 3 ათასი ცალი. იგივე წიგნი საბჭოთა მთავრობის მიერ ოთხჯერ იქნა გამოცემული და მიღებულია დამხმარე წიგნათ საშუალო და უმაღლეს სასწავლებლებში.

შ ი ნ ა ა რ ს ი

აბოლონ წულაძის წერილი იკანე ჭავჭავაძისადმი	1
ი. ჭავჭავაძის პასუხი	2
ჩემს შვიტხველს	4
1 შრომის სიმღერები	7
გალობა	8
ლილინი	12
კრიშანჭული	13
სიმღერა	13
ყანური, ანუ ნადური	14
ელესა	32
სულხევი	35
აგიდელა და აგუნა	48
ქალების შრომის სიმღერა — ლილინი	58
21. ღღეობა-ღღესასწაულები	60
საშობაო სამზადისი და შობა	61
აღდგომა და მასთან დაკავშირებული თამაშობა-გართობა	80
სათამაშოზე	86
გავდებ-გამოვდები	89
ფეხგაყვრიე	90
ცეხგაგორებით	90
გატანიე ბურთი	91
ჭაკუნობია	94
სახობა	95

ბტომა	96
ცეკვა	97
მისალმება	100
წყევლა, გადაცემა, დალოცვა	101
ტირილის წიგნი	105
ქორწილის წიგნი	105
წირვა საღმრთო	105
წირვა ნაწყევარ-ნათიცარი	106
წირვა საეტლო	106
სახლიკაცის წირვა	107
სათესლე სიმინდის კურთხევა	108
მარგვლა, თოხვა, წმენდა, შაინდი, ნადი და ყანური სიმღერები	108
შაინდი და ნადი	108
პაპაჯვარი	109
დადეგი	110
ღამის თევა ავადმყოფისათვის	110
ბრძნილობები	111
ლოგინის აღება. ნერჩი. მელოგინე ქალი	111
მოისარობა	113
ბოსლობა	114
გოქის ხუჩაფატი	114
მერცხალი რას ამბობს	114
ვარდენ გუგუნავას თქმული	114
შეწყენილის ლოცვა	115
ნათვალევის	115
უქმურის ლოცვა	117
კლიმობა — 23 იანვარი	118
სულთა შაფათი ხორციელთა მკედრის სულია	118
ყველიერის ორშაბათი	119
ყველიერის ხუთშაბათი — ილორობა	119
ყველიერის შაბათი — ცეცხლის სულთა	119
ლამპრობა	120

ჯერისწერა	120
შაბათი საღამო	121,
წარმო და უკუნი	122
ექიმობა და მკურნალობა	122
კატაჯვარა	127
III. მიცვალებულის კულტი გურიაში	130
შეცხადება	147
სულთაბრძოლა	148
სამძიმარი	150
თათბირი	153
ტირილი	172
სულის ახსნა	198
არჩივი, საკურთხი და ალაპი	200
გამოტირილი	204
ნიშნით ტირილი	207
ტირილის „გადადება“ და ტირილის ეპიზოდები	209
სხვადასხვაგვარი ტირილი	210
ქვრივი ქალის მოთქმა	211
„ჩამფხრული“ ტირილი	213
დაქირავებული მოტირალი, ანუ ვეკილობით ტირილი	213
ბრძანებით ტირილი	215
მიცვალებულის „საიქიოს წასადგომი“ პატივისცემა	216
სხვა რამ წვრილმანიც	227
IV. ხალხური ლექსები	231
ძველი რეგულიდან	248
ავტობიოგრაფია	255